

PERKINS LIBRARY


Duke University

Rare Books

Source Unknown

FRANCISCI JOSEPHI
DESBILLONS,
E SOCIETATE JESU,
FABULARUM
ÆSOPIARUM
LIBRI DECEM
DILIGENTER EMENDATI.


POST EDITIONEM TERTIAM PARISINAM,
QUAM
SOLAM AUCTOR AGNOSCIT,
TERTIA IN GERMANIA.



CUM APPROBATIONE.



AUGUSTÆ VIND. ET FRIBURGI BRISG.
SUMPTIBUS FRATRUM IGN. ET ANT. WAGNER.
MDCCLXXVI.



PRÆFATIO.

GRATI, memorisque hominis officium est, omni cura providere, ut, quam operam suam favore fuisse publico exceptam resciverit, hanc ipsam nova subinde opera, utcumque res postulabit, augeat atque perficiat. Cum igitur viderem Fabellas meas a viris approbari cum eruditio, tum in re omni literaria æstimanda versatissimis; atque alios Literatos complures, qui eas legissent, idem fere sentire intelligerem: statim in animum induxi, nihil prætermittre, quin liberalem, jucundamque istam benignitatem, quantum efficere meditando atque elucubrando possem, remunerarer. Quid autem præstiterim, mox indicabo, postquam primum de hoc, in quo me exercui, fabularum genere pauca disseruero; ac deinde ostendero, bene latine, his etiam temporibus, scribi aliquid posse, contra quam homines gentis nostræ nonnulli, ingeniosi quidem, & eruditionis gallicæ non expertes, at ejusmodi quæstionis judices

dices minime idonei, existimarunt, ac pronuntiarunt.

I. APOLOGI, five narrationes de animantibus, rebusve etiam sensu carentibus institutæ, & ad utilitatem hominum translatae, omnes olim ab Æsopi nomine, qui inventor ipsarum vulgo habebatur, Æsopizæ Fabulæ dictæ sunt. Quintilianus (a) tamen hoc inventum Hesiodo, qui multo ante Æsopum vixit,tribuendum videri significat. Exstat revera de Accipitre & Aëdone fabella (b) Hesiodi. Sed altius repetere licet originem Apologorum, ipsisque etiam ab indubitabili veritatis ac sanctitatis omnis fonte arcessere dignitatem. Annis enim, postquam obierat Moses, circiter trecentis fictam de Arboribus regem sibi postulantibus fabellam sacri Codices (c) nobis offerunt.

NEQUE id redarguat animadversionis censoriæ severitas:

(d) Quod arbores loquantur, non tantum feræ.

Licet enim, semperque licebit ægras hominum mentes innocentibus jocis delenire, sensumque ad bonam appetendam frugem ludendo allicere. Fabellæ tamen ita fingendæ, contexendæquæ sunt, ut suas plerumque partes in iis Belluæ sustineant; quippe quæ propius absunt ab hominibus corporis animati similitudine.

MULTA igitur possunt in hoc scribendi genere adhiberi, quæ falsa sunt. Nam, verbi gratia, Lupum & Agnum non modo loqui falsum est, sed naturæ etiam Lupinæ repugnat, illum in altercationem delabi, dum potens illecebra cogit, ut statim

(a) Institut. Orat. Lib. V Cap. XI.

(b) Oper. & dier. V. 201.

(c) Judic. Cap. IX V. 8. Apologi quoque sunt, qui leguntur Reg. Lib. II Cap. XII V. 1. Cap. XIV V. 5. Lib. IV Cap. XIV V. 9, ac sæpius in sanctis Evangeliiis.

(d) Phædr. Lib. I Prol. V. 6.

tim in prædam irruat. Tunc autem feritas ejus cohiberi, & quasi suspendi fingitur. Quo dato, jam eos sermones, quos Phædrus & Fontana referunt, Lupum inter & Agnum haberi verisimile est.

CETERUM Scriptor Fabellarum diligens

(e) Reddere personæ scit convenientia cuique.

Et ab ista lege si qui recesserint, vix eos & suavitatis narrationis, & præceptionis utilitas excusant. Quapropter Critici quidam, paulo forte rigidiores, id approbari sibi non posse dixerunt, quod apud Phædrum (f) Vacca, Capella, Ovis, & Leo non modo societate jungantur, ac venentur simul; sed captum etiam Cervum partiri velint. Prædam totam, ait Phædrus, Leonis improbitas abtrulit. At singulæ partes quid, inquiunt illi, juvare socias poterant, quæ carne non vescuntur? Verumtamen hæc, & alia hujuscemodi nonnulla, quæ Phædro, quæ Fontanæ (g) minime absurda visa sunt, adduci ego certe non possum ut improbem. Neque, opinor, poema quodlibet tam severe accipiendum est, ut expendatur, an delectare (h), an prodesse etiam debuerit, postquam utrumque præstitit.

QUÆ quidem dux res maxime requiruntur, ut laudem fabellæ suam optineant. Eas ergo necesse est continere nihil, quo virtus, pudor, honestas possint offendi. Quam legem Phædrus, ex ipsa apologorum natura emanantem, quod bis, terve neglexit: illud miserrimis ævi Tiberiani, quo vixit, corruptelis imputo. Fabellam vero de legatis (i) Canum ad Jovem, quæ tota putida est &

a 3

infi-

(e) Horat. Art. Poet. V. 316.

(f) Lib. I Fab. V.

(g) Lib. I Fab. VI &c.

(h) Horat. Art. Poet. V. 333.

Aut prodesse volunt, aut delectare Poetæ,
Aut simul & jucunda, & idonea dicere vitæ.

(i) Lib. IV Fab. XVII.

inſiceta, ſcriptoris elegantiffimi fetum eſſe, cum ipſa ratio, tum ſcriptura veterum Codicum ineptiſſima credere me vix ſinunt.

DEINDE oportet ſtili ſuavitate apologos eſſe commendabiles. Quod eveniet, ſi comprehenſio verborum omnis laborioſa repudietur; adhibeatur autem elocutio pura, nativi leporis plena, ad narrationem dilucidam, brevemque, id eſt, circuitione vana carentem, accommodata; demum feſtivitas quædam, minus arguta, quam ingenua, cum ſimplicitate ſermonis perpetua conjungatur.

HANC porro ſcribendi rationem, ſtudio forte inutili incenſus, cum in fabellis repræſentare percu- perem; nuncque Phædrum, nunc Fontanam, ſum- mos ambos artifices, inſpicerem: hic ad extremum videbatur mihi tam plenus, tamque perfectus, ut me deterreret, ne lingua gallica auderem propoſi- tum exſequi: at ille, præterquam quod fabellas nobis haud ita multas reliquit, habet præterea nonnullas, quæ noſtrorum temporum ingeniis pa- rum conveniunt: atque ut id, quod ſentio, magis forte candide, quam prudenter, aperiarn; fatebor, me, dum iſtas Auctoris ceteroqui politiſſimi fabel- las attente perpenderem, etiamque commentariis illuſtrarem, animadvertiſſe, deeſſe plerique nonnihil utilitatis illius, qua præditum tale eſſe debere ſcri- bendi genus, modo ſignificavi. Itaque Phædrum minore mihi cum periculo, quam Fontanam, eli- gendum eſſe credidi, cujus inſtitutum perſequerer:

(k) Nec hæc invidia, verum eſt æmulatio.

II. At: quid moræ eſt, quin turba eruditulo- rum hic mihi reſclamitet, contendatque, hominem gente Gallum latine ſcribere, id certe eſſe periculo- ſiſſimum? Ego vero rationem eorum omnem fa- cile, uti ſpero, breviterque refutabo.

TENE-

TENEMUS, inquiunt, in manibus scriptores nonnullos exterarum gentium, qui postquam præcepta grammaticæ gallicæ omnia diligenter didicerunt, gallicosque Auctores optimos quosque studiosissime legerunt, scribere gallice ausi sunt: risumque nobis ad extremum excitarunt. Igitur (sic enim colligunt) quæcumque hominum recentiorum opera latine scripta laudantur maxime; ea ipsa Auctores antiqui irriderent, si reviviscerent.

AT primum intelligere adversarios nostros cupio, quantum sit latinam inter gallicamque linguam hoc discrimen; quod verborum illa ad concentum, qui judicatus fuerit optimus, disponendorum libertate commodissima gaudeat: hæc contra sit serva legum (1) perpetuarum, quibus oportet omnes voces ita gubernari, ut non possint recedere vel levissime de statione præscripta, quin faciant offensiunculam. Unde evenire prope necesse est, ut,

a 4

qui

(1) Istis legibus, quas ignorat Latinitas, hic mihi per ipsam obtemperare parumper licuit: tantam illa videlicet nostram esse vult scribendi libertatem, quantam requirit adhibenda stili varietas, quantamque sensus aurium doctus ac delicatus postulat. Cujus quidem libertatis afferri ex Auctoribus optimis facile possent exempla; quibus eædem sententiæ omnibus fere modis expressæ demonstrarentur. Tantum notabimus, sic locutum esse Terent. Adelph. Act. V Sc. IX V. 3.

Judico Syrum fieri esse æquum liberum. . . . Istum Liberum?

Sic locutum Ciceronem, de finib. bon. & mal. Lib. V Cap. I. *Venit mihi Platonis in mentem.* Sic locutum Horatium, Lib. II Sat. I V. 60.

Quisquis erit vitæ, scribam, color.

Jam vero qui scripsisset:

Judico æquum, esse Syrum fieri liberum. . . . Istum Liberum?

Qui scripsisset: *Platonis mihi venit in mentem.*

Qui scripsisset:

Scribam, quisquis erit vitæ color.

Is certe latine scripsisset. Hinc autem concludendum illud ipsum relinquimus, quod pluribus argumentis explicare superfedemus.

qui linguam gallicam commoratione apud ipsos Gallos diutina, & exercitatione longa propriam sibi quodammodo non reddiderit, at ex solis libris perceperit; is in opere præsertim paulo longiore mendis interdum ridiculis illam inficiat.

Tum deinde velim considerari, quid Paulus Manutius, quid Marcus-Antonius Muretus, (ut alios complures omittam) legendo atque imitando Auctores latinitatis optimos, profecerint. Hic Epistolas, ille Orationes, summa ambo cura atque industria, scripserunt. Quid porro contigit? utrumque setum annis abhinc ducentis eruditi Lectores evolverunt, & admirati sunt: Critici sagaces excusserunt; & qui latinitatem in plerisque argenteæ, quam vocant, ætatis Scriptoribus paulum a statu pristino declinantem animadverterant, vix quidquam, quod non ætatem auream omnino redoleret, in hac omni scriptione deprehenderunt. Neque obijciendum nobis est, illam ipsam non idoneorum esse judicum approbationem; quippe qui tam errare in dijudicanda latinitate, quam isti in latine scribendo, potuerint: in re enim hujusmodi, quæ rationem hominum ac diligentiam minime superat, errari universe totis ducentis annis, verisimile non est. Quod ut confirmetur exemplis, nonne hos intra ducentos annos stilus Lipsianus, quem statim amplexati sunt imitatores pessimi complures, mox a peritis iudicibus recte damnatus est? nonne Thuanum, nonne Stradam, nonne alios, qui tantis primum laudibus excepti fuerant, postmodum animadversum est, non esse latinitatis auctores vel satis ingenuos, vel etiam satis accuratos? Atque, ut ineamet ipse vineta cædam, nonne has fabellas, quas properanter nimis, parumque considerate, semel atque iterum passus fueram prodire in lucem, recognovi demum, & nunc offero meliore, ut opinor, stilo retractatas a maculis

culis etiam vindicatas nonnullis, quas incuria nostra fuderat? Verum Mureti, Manutiique opera modo laudata, cum suffragationibus peritorum omnium tam diuturnis comprobata sunt, bene latina esse, fatendum est.

POSTREMO si quis vulgarem gentis alicujus exteræ linguam, sola librorum ope adjutus, optime didicerit; ille certe, linguam latinam eadem via perdisci posse, tali exemplo demonstraverit, maxime, si qua duas inter linguas istas cognatio peculiaris intercefferit. Atqui Menagius, hanc viam secutus, ad tantam linguæ Italicæ, cui cum Latina similitudo singularis est, cognitionem pervenit, ut eam quamvis usurpare colloquendo (m) nesciret. scriptis tamen expresse accurate, doctisque etiam commentariis illustraverit. Legere me quidem memini apud Auctorem Gallum nescio quem, versuculos Menagii nostri Italicos ab hominibus Italis (n) irrideri. Ego vero facile concedam, ejus argutias, omnemque poeticam facultatem non valde probari: at linguæ imperitiâ non magis in ipso irrideri puto, quam in Francisco-Seraphino Regnerio, homine itidem Gallo, cujus redditum versibus Italicis Anacreontem ultro laudant Itali, fatenturque itilo esse suavissimo concinnatum. Nihil, opinor, profit refellere pluribus homines malevolos, qui studiis nostris adversantur. Ex dictis facile colligent æqui judices, bene latine his etiam temporibus scribere eos posse, qui ad percipiendam veteris illius optimæ Romanæ linguæ vim atque copiam paulo benignius

(m) Menagiana, Tom. II pag. 95. Edit. 1715. *Les Seigneurs Italiens qui me font l'honneur de me venir voir, sont étonné de ce que je ne parle pas Italien, sachant les ouvrages que j'ai fait imprimer dans leur langue, & que j'en ai même donné les origines.*

(n) Auctor fama celebratissimus, qui ævum Ludovici XIV commentatus est, aliter sentiebat; sic enim de nostro Menagio loquitur; *Ses vers Italiens sont estimés même en Italie.*

nus a natura informati, sese in hac palæstra diligenter execuerint.

III. Nunc dicam, quid efficere conatus sim, ut eruditi Lectoris approbatione non indignam editionem hanc nostram redderem. Primum in recognoscendis & castigandis prioribus quinque harum fabellarum libris operam sane magnam posui. Plurimos versus, qui vel nimis abjecti, vel paulo asperiores visi sunt, ad aliquam speciem, numerosque molliores, quantum sivit propositi simplicitas, adduxi. Latinitatis formam sub regulas pure & emendate loquendi exquisitiores passim redegi. Nonnullas voces minus latinas, minus proprias, minus aptas ad consuetudinem Veterum, minusve hodie usitatas amovi; feliciores in eorum locum substitui. Sententias ipsas, aliquando non satis inter se coherentes, copulationibus idoneis continuavi. Quædam a me etiam sunt interdum adjecta, quæ, ut probabilior existeret apologorum veritas, requiri videbantur: quædam vicissim, quæ esse plane supervacanea judicabam, sublata sunt.

TALIS autem laboris molestiam cum suscipere paulum refugerem, viri aliquot exculti politionibus doctrinis mihi stimulos admoverunt: quorum unus, eruditione insignis, magnumque Academiæ Parisiensis ornamentum, eo me honore dignatus est, ut meas fabellas attente perlegeret, Criticum ageret in re tam levi, utiles demum animadversiones mecum perbenigne communicaret.

Ego vero sic undique excitatus, non tantum hos fabellarum priores quinque libros emendavi, sed alteros quinque composui: quos quidem cum aliis etiam quibusdam musæ nostræ lusibus, nunc primum in lucem emitto. Præterea Scriptores indicavi quamplurimos, a quibus materiam eandem, aut prope eandem, quam mihi sumpsi, tractatam fuisse

fuisse comperi: notationesque grammaticas, aliquando etiam historicas, ex Auctorum veterum selectis testimoniis plerumque conflatas, apposui. Quæ omnia sub aspectu legentium ad imas quasque paginas, de prudenti hominum peritorum consilio, subjeci, majorem hanc ipse ratus opportunitatem fore, quam si ad calcem rejicerentur. Itaque munus hoc pacto satis amplum, ni fallor, satisque solidum, ex nimium tenui, nimiumque levidensi munusculo, benevolis Lectoribus confeci. Opus omne duas in partes distribui: quæ tamen, quamvis utralibet singulatim totum id, quod jam antea edideram, magnitudine superet, facile poterunt in unum volumen compingi.

Quas autem fabellas fuisse jam ab aliis concinnatas significo, eas mihi plerumque more modoque meo diverso proprias feci. Nam si quasdam veteres Æsopicas, Æsopi ingenio dignas; quasdam Gabrielis Jaii; nonnullas Henrici Richerii; satis multas Joannis Fontanæ, a quibus, quam minime possem, mihi recedendum esse intelligebam, exceperis: ceteras fere omnes (ut latine & ingenue loquar id quod sentio) non modo figuravi, & exposivi; sed adduxi etiam ad rectum ordinem, atque interdum sub potestatem sensus ipsius, qui dicitur communis, redegi. Quod porro Fontanam non ubique vestigiis ipsius persequi conatus sim; & quod fabellas ejus tam raro fidus interpretes reddiderim: nemo id vertere mihi vitio debet. Non ita sum obdurescere solitus ad ingenuam Gratiarum festivitatem, ut opus, quod ipsæ concinnaverint, non admirer. Fontanam ergo excellentissimum esse apologorum scriptorem, & probe intelligo, & ultro prædico. At quemadmodum permulti sunt urbanitatis latinæ flores, qui nullis effingi accurate possunt coloribus gallicis; ita sæpe latini colores nulli suppetunt adeo molles, ut venustates Fontanæ gallicas repræsentare valeant. Nimirum varias linguas do-

Ctri-

ctrina, prudentia, usus, exercitatio variis opibus facile augment ac perficiunt: has autem universas opes, id est, vim atque copiam prope infinitam conferri simul in unam aliquam linguam, non sinit ipsa, sive providentia divina, sive humanæ naturæ infirmitas.

„O P E R Æ pretium me facturum esse credidi, „si pauca de fabellarum scriptoribus, qui passim in hoc „volumine citantur, commemorarem; ac recensio- „nem quamdam instituerem. Quidquid id est, ac- „cipi in optimam partem cupio.”

Æ S O P U S, natione Phryx, conditione servus in libertatem ab Idmone quodam vindicatus est. Dicitur in Eusebii chronico interemptus anno primo olympiadis quinquagesimæ quartæ. Sed hanc notationem temporis evertunt, quæ a Plutarcho memorantur in libro de sera Numinis vindicta, missum Æsopum fuisse Delphos a Cræso Rege, apud quem florebat: Cræsus enim anno tantum quarto olympiadis quinquagesimæ quintæ, annis fere ante Christum natum 557 regnare coepit. Fabulæ sub ejus nomine existant hodie 297, quarum 136 primum anno 1610 e Bibliotheca Palatina prodierunt. Plura autem de ipso vide a nobis commemorata Fab. Prol. Lib. VII & VIII.

L O C M A N U S Thomæ Erpenio, qui fabellas ejus edidit, videtur eodem fere, ac Æsopus, tempore vixisse. Ino eruditi viri complures, quibus- cum ipse Erpenius non multum dissentit, eundem, qui Græcis Æsopus fuit, Persis habitum esse Locmanum existimarunt. Dicuntur fabellæ istæ e Persica lingua in Arabicam elegantissimo stilo fuisse conversæ. Satis quidem facetæ, satisque simplices ex interpretatione latina demonstrantur plerumque: at interdum sententias vel insulas, vel parum probabiles exhibent. Numero sunt omnino triginta septem: quarum decem & octo Tanaquillus Faber, Cado-

Cadomensis, versibus latinis senariis reddidit, vel potius amplificavit; atque auxit quidem laude non mediocri; quanquam est ejus ratio narrandi paulo verbosior. Obiit autem Faber Salturnii die 12 Septembr. an. 1672, ætat. 57, vir præditus ingenio peracri, variaque & exquisita doctrina instructus.

PHÆDRUS, sorte servus, gente autem non Thrax, ut vulgo traditum est, at Macedo, ut eundem reor, & in nova fabularum ejus editione, brevi forsan proferenda in lucem, demonstrare mihi videor, in ea Pierii montis parte, quæ ad Macedoniam pertinet, natus est. Vixit temporibus Octavii Augusti; quo donante, libertatem recepit, Romæ puer admodum latinis literis eruditus est. Postea genio suo, paulum maligno, vafroque, nimium indulgens, calamitates sibi illas facile arcessiverit, quarum historiam narramus, Prol. Lib. X. Accusatori suo Sejano superites, adhuc sentiebat non parum abesse, quin fieret senio debilis. Infortunio edoctus, suppressisse fabellas suas videtur. Postmodum amico cuidam inertiam ejus increpanti, grandiore ætatem suam excusavit. Itaque ad annum Christi 43 facile pervenerit; quo anno Seneca ad Polybium scribens, fabulas Phædri nostri non sibi fuisse cognitatas indicat. Sunt enim a morte Sejani ad hoc usque tempus anni non amplius duodecim. Jam ergo mirandum tantopere non est, quod Seneca vel prorsus nesciverit, vel sic fuerit locutus, tanquam nescisset, an *Fabellas & Æsopæos* logos Phædrus unquam tentasset.

APHTONIUS Sophista, sive Rhetor, Antiochenus, sub finem secundi, aut initio tertii post Christum natum sæculi floruisse creditur. Ejus fabulæ, numero quadraginta, græce & latine una cum ejusdem progymnasmatibus sæpius editæ sunt. Has autem separatas in suam collectionem Apologorum compegit, suisque castigationibus illustravit

Neve-

Neveletus. Stilo fatis eleganti conscriptas, ratione etiam ordinis, ac dispositionis fatis idonea prædatis inveni.

RUFUS Festus Avienus, qui librum de oris maritimis carmine iambico scripsit, qui Dionysii Afri descriptionem orbis, Aratique Phœnomena versibus hexametris expressit, an Anienus, vel Abienus, vel Avianus, vel denique (sic enim variant manuscripti codices) Anianus ille sit, cujus existant Fabulæ Æsopicæ quadraginta duæ elegis expressæ, non fatis compertum est. Horum tamen omnium unus idemque auctor apud plerosque Criticós habetur Rufus Festus Avienus. Quo autem sæculo vixerit, qua sit domo, vel gente oriundus, non magis liquet. Illum enim floruisse dicunt alii Diocletiani, alii Antonini Pii, vel Hadriani temporibus, neque testimonium ullum, ullamve rationem idoneam subijciunt. Jacobus autem Sponius cum Romæ in Villa Cæsarini reperisset Festi Avieni Proconsulis epigramma in suimet ipsius memoriam compositum, atque in marmore inscriptum, vulgavit, & Avieni nostri fetum esse pronuntiavit (o). Deam porro Nortiam veneratur auctor hujus Epigrammatis; & se Vulfinii (quod nunc est Italis *Lagodi Bolsena*) natum declarat. Tum colligendum erit floruisse hunc ante annum Christi 378: quo anno Valens imperator flammis extinctus est: Suidas enim Festum Avienum memorat a Valente missum in Asiam fuisse Proconsulem. At Petrus Melian Hispanus, qui Avieni nostri opera, quæ supersunt, collegit, & anno 1634 Madriti edidit, fatis recte ex eo, quod Auctor, libro de Oris maritimis vers. 83 & 180 fretum Gaditanum, Malacæque portum ad suam pertinuisse gentem indicet, Hispanum eum fuisse concludit. Præterea Luitprandi Ticinensis Diaconi verba refert, me-

(o) Jac. Spon. Itiner. Tom. II pag. 148, & Lib. de ignotor. Dæd. aris, pag. 41 & seq.

memorantis, Avienum nostrum *virum catholicum, & Hispanum, civemque Eborensem, in Hispaniæ Carpetania* (quæ hodie Talavera de la Reyna vocitatur) eodem (p) & die & anno quo sanctus Augustinus ascendit ad Cælos, obiisse. Et hæc quidem cum Aurelii Theodosii Macrobiani ætate aptissime conveniunt; quem esse illum ipsum Theodosium, cui suas Avienus Fabellas dedicat, plerique Critici existimant. Disceptationem suscepisse de tali Scriptore tam molestam me propè poenitet. Ejus enim fabellas quis peritus & incorruptus Judex, si diligenter examinet, non fateatur, esse plerumque inficetas; interdum contra leges metricas, sæpe contra elegantiam atque proprietatem latini sermonis repugnare; multo sæpius artificio, five ordinandi res prudenter aptisque verbis connectendi ratione indigere; neque dignas esse, quas Petrus Crinitus, Caspar Barthius, Philippus Brietius, alique tam benigne laudarent?

GABRIAS, qui & Babrias, & Babrius ab aliis nominatur, apologorum Versibus græcis *choliambicis* five *scæzontibus* expolitorum libros, ut refert Suidas, decem confecerat. Sed qui hodie apologi sub ejus nomine circumferuntur, ii omnes, excepto uno, scripti sunt versibus iambicis. Memorat Vossius, hos in quibusdam codicibus manuscriptis adscribi Ignatio Diacono: quod & ante Vossium se comperisse declaravit Fabius Paulinus. Is ergo fuisse mihi videtur Ignatius ille Diaconus, qui Tarasii Patriarchæ Constantinopolitani vitam memoriæ mandavit. Ibi enim num. 56 narrat se a Tarasio initium rite faciendis trimetris, tetrametris, trochaicis, anapæsticisque, & heroicis versibus. Trimetri autem versus iidem sunt qui vulgo iambici vocantur. Porro hunc Auctorem non multo post annum Christi 806 scripsisse Tarasii vitam comperio. Nunc ut

non-

nonnihil de fabellis dicam, quas ab eo retractatas esse puto: has animadverti incite admodum tetra-
stichis, sive quatuor versibus, singulas includi, vel
potius constringi plerumque ac suffocari.

SEB. Gottofr. Starchius specimen sapientiæ In-
dorum veterum græce primus edidit Berolini anno
1697; interpretationemque latinam adjunxit. Li-
ber est colloquiis Belluarum inter se politicis, studio
sane parum solerti institutis, refertus. Hunc annis
ante Alexandrum magnum trecentis ex Indico ser-
mone in Arabicum fuisse conversum testatus est
Abrahamus Echellensis: ego vero convictum suspi-
cor a Simeone Setho Græculo, qui anno Christi,
circiter 1100 vivebat. Ibi certe Monachorum &
Eremitarum creberrima sit mentio; novique Testa-
menti quædam sententiæ adhibentur, quæ venire
in mentem priscorum Arabum, Indorumve non po-
tuerunt. Ceterum pravo ac nonnunquam barbaro
stilo opus omne pertextum est: fabellas tamen satis
recte compositas tres, quatuorve continet. Liber
Pilpæi Indi ab isto non multum discrepat.

SUB Sancti Cyrilli nomine apologos morales
edidit Balthasar Corderius Viennæ Austriæ, anno
1630. Nunquam illos, nisi hoc ipso latino sermo-
ne plane barbaro, qui exhibetur, scriptos fuisse
existimo. Auctor eorum ineptus non vixisse nisi
post sæculum decimum secundum videtur.

ANONYMUS ab Isaaco-Nicolao Neveleto una-
cum Æsopo, Aphtonio, Gabria, Phædro, Avie-
no, Laurentioque Abstemio editus Francofurti an-
no 1610, jam antea, nec semel, at mendosissime
prodierat. Scriptor est incurfione verborum ac sen-
tentiarum importuna horridus; dicacitatis appetens,
ineptiarum prodigus, aliquando tamen ridicule fa-
cetis, ac prope ingeniosus. Alii dictum hunc no-
mine Romulum, alii vocatum Salonem, & gente

Par-

Parmensem fuisse volunt: vixisse autem seculo decimo tertio opinatus est Bernardus Moneta: ego vero parum id omne interesse rei literariæ existimo.

RIMICIUS, Guilelmus Hermanus, Hadrianus Barlandus, ac Laurentius Valla, omnes, præter Vallam grammaticum illustrem, plane incogniti, fabellas Æsopicas partim e græcis latinas fecerunt, partim e ligato sermone in orationem solutam trans-tulerunt. Has autem collegit Robertus Stephanus, & una cum priore Laurentii Abstemii Hecatomythio, at paulum decurtato, in lucem emisit anno 1529. Sordida est ista farrago, sed aurum continet.

LAURENTIUS Abstemius seculo post decimum quinto exeunte florebat. Fabellas 198, quarum primam partem Hecatomythium vocavit, sermone scripsit latino soluto. Stilum adhibuit simplicem, sæpe optimum, aliquando nimis abjectum ac prope barbarum. Quasdam etiam narrationes jocis honestis inseruit homine christiano atque ingenuo prorsus indignas.

GABRIEL Faernus Cremonensis, bonus poeta, Criticusque insignis, bene de Terentio meritis, obiit Romæ die 17 Nov. an. 1561. Centum fabulas vario carminum genere explicatas moriens reliquit. Quæ figuris in ære incisis elegantibus adornatæ prodierunt Romæ anno 1564, atque Carolo Borromæo Cardinali sanctissimo dedicatæ sunt. Has longo post tempore vir, ut accepi, non illiteratus, nomine Mayolus, in libros quinque distributas anno 1697 Parisiis edidit. Cujus quidem editionis inscriptio talis est: *Phædrus alter, seu Gab. Faerni Cremonensis fabulæ ex Æsopo aliisque priscis Auctoribus, Pii IV Pont. max. hortatu scriptæ, Et jussu editæ anno 1564, nunc primum in Gallia, novoque ordine prodeunt, ad usum Scholarum accommodato.*

JOACHIMUS Camerarius anno 1500 Pabepergæ, sive Bambergæ in Franconia natus est; Lipsiæ autem anno 1574 de vita decessit, relictis variæ literaturæ innumerabilibus monumentis minime contemnendis; inter quæ non postremo loco habendæ sunt Æsopicæ fabulæ, plures quingentis, ab ipso cura magna atque diligentia undique collectæ, & ad latinitatem uuiusmodi, eamque satis puram, reductæ. Thesaurus ille est apologorum uberrimus, & ab omnibus, qui res amant ejusmodi, studiose comparandus, quamvis multa non satis scite excogitata, quædam etiam prorsus inepta contineat.

PHILIBERTUS - Hegemon *Guide Cabillonensis* anno Christi 1595, ætatis autem suæ 60, fato functus est. Fabellas viginti duas gallicis versibus scripsit parum quidem eleganter, parumque doctè, ita tamen, ut in eo simplicem illam veterum poetarum nostratium non injucundam narrandi rationem agnoscere liceat. Ille autem in meis notationibus Philibertus Hegemon, omisso vero nomine, ideo appellatus est, quia non aliter in suis opusculis appellari ipse voluit: quæ opuscula cum nequaquam obvia sint, inscriptionem eorum en legendam offerimus: *La Colombiere & maison rustique de Philibert Hegemon, de Châlon sur Saone: contenant une description des douze mois & quatre saisons de l'année: avec enseignement de ce que le Laboureur doit faire per chacun mois. L'Abeille françoise du même Auteur: ses fables morales, & autres poësies: & les louanges de la vie rustique, extraites des œuvres de G. de Saluste sieur du Bartas. A Paris chez Robert le Fixelier. 1583 in 8. pag. 150*

JACOBUS Regnerius Bealni in Burgundia natus est die 6 Januar. an. 1589, patrè Benjamino Regnerio causarum patrono. Literis excultus, pueros nobiles custos ac præceptor, pacta mercede, rexit, instituitque. Deinde operam corrigendis libris apud
Typo-

Typographum locavit. Medicam denique artem propriam sibi assumpsit: cujus artis doctor est nuncupatus Cadurci die 3 Decemb. an. 1624, eamque demum in fortunam devenit, ut inopia perditus, variisque morbis, & calamitatibus aliis permixtis consumptus periret die 16 Jun. anno 1653. Apologos ille Divione an. 1643 centum edidit; quos distribuit partes in duas, atque Phædrios inscripsit. Longe quidem Regnerius noster ab auctore optimo, quem sibi proposuerat imitandum, recessit: sæpe enim & verba & res ipsas male temperat, stilumque etiam aliquando non satis latinum adhibet: narrandi tamen jocandique ratione utitur plerumque non inficeta; specimenque nativi cujusdam leporis interdum expromit.

JOANNIS Fontanæ fabellas qui nescit, barbarus est; qui legit, nec amat, nec sentit ingenii excellentis monumentum esse pulcherrimum; is profecto festivitatem ipsam atque venustatem ne de facie quidem novit.

SEX fabellarum libros Fontana jam ediderat, cum Antonius *Furetiere* Parisinus apologos quinquaginta scripsit, vulgavitque anno 1671, at infelici prorsus eventu: quippe quos oblivione vivus vidit obrutos sempiterna. Annis ab eorum interitu viginti septem mortuus ipse est post annum ætatis suæ octavum & sexagesimum.

ISAACUS *de Benferade* Normannus anno 1691 obiit nonagenarius. Fabulas Æsopicas fere ducentas, totidem tetraſtichis inclusas, anno 1678 publicarat. Quam legem tetraſtichorum iniquissimam si non imprudenter sibi ipsi imposuisset, rem exsecuturum illum fuisse longe felicius, ex eo licet conjicere, quod plerumque, ubi materia spatium liberum habebat, versibus hanc polivit lepidissimis.

ÆGIDII Menagii Andegavi, Parisiis anno 1692 demortui, fabellæ exstant latinæ quinque inter varia ejusdem carmina, non illepidæ, stiloque satis accurato conscriptæ.

JOANNES Commirius Turonensis migravit e vita Parisiis anno post partum virginis 1702, cum annum ipse ætatis suæ septimum ageret ac septuagesimum. Non alium invenio apologorum scriptorem latinum, qui plus leporis ac festivitatis adhibuerit. Affluentem sermonis copiam paulo severius coercuisset; maluisset videri simplex, quam ingeniosus: maculas etiam nonnullas, quas incuria fuderat, studio diligentiore delevisset: illum ego certe Phædrum alterum longe verius, quam Faernum, qui paulo quidem simplicior est, at multo minus elegans, appellandum esse judicarem.

EUSTACHIUS *Le Noble* Campanus Parisiis anno 1711 mortuus est. Fabellas ducentas conscripsit, quas singulas non modo versibus gallicis omnino sex, at latino etiam disticho complexus est, labore profecto puerili ac minime necessario. Has tamen inter latinas nonnullæ, inter gallicas autem multo plures occurrunt, quas esse pretii alicujus haud negaverim. Sed & comœdiam ille Æsopicam, apologis non inelegantibus refertam, concinnavit, exemplum Edmundi *Boursault* Burgundi, Parisiis anno 1701 mortui, secutus: qui, data ejusmodi comœdia anno 1690, magnos plausus, nec indebitos, excitaverat.

GABRIEL - Franciscus *Le Jai* Parisinus obiit anno Christi 1734, ætatis suæ septuagesimo septimo. Confecerat labore & industria non inutili, edideratque Parisiis an. 1725 Bibliothecam Rhetorum: cujus primum volumen, pag. 739 - 755, scriptas oratione soluta fabellas triginta sex; alterum pag. 739 - 758, versibus senariis explicatas viginti quatuor

tor exhibet. In hisce porro fabellis, prioribus præsertim, multa eleganter, nonnulla etiam facete atque ingeniose concinnata reperiuntur.

HENRICUS Richerius Normannus Parisiis, anno 1748 die 12 Martii, de vita decessit sexagenario major. Quamvis ille conatu aliquando minus felici facetus esse voluerit; neque fatis virtute quadam poetica pollere videatur: scriptor tamen apologorum gallicorum nullus, meo judicio, existit, qui ab elegantia Fontanæ, vix & ne vix quidem imitabili, propius abesset. Reliquit certe Richerius noster intervallo remotos infra se, longo quidem, Antonium Ludovicum *Le Brun* fato functum Parisiis anno 1743, longissimo autem Antonium *Houdard de la Motthe* ibidem anno 1731 demortuum, cujus fabellæ (q) prope omnes demonstrant, ab hominibus antiquitatis aureæ contemptoribus, quamvis alioquin ingeniosis, res plerumque & excogitari parum plausibiles, & infelici prorsus artificio concinnari.

(q) Inter Fabellas ejus, quas, numero quidem paucas, excipi de ceteris velim, laudanda præsertim videtur tertia libri secundi, de Puero & Avellanais.





FACULTAS
R. PATRIS PRÆPOSITI PROVINCIALIS
SOCIETATIS JESU
PROVINCIAE GERMANIAE SUPERIORIS
CUM
PRIVILEGIO CÆSAREO.

CUM D. IGNATIUS WAGNER Bibliopola Augustanus typis vulgare desideret librum, cui titulus: FABULARUM ÆSOPIARUM LIBRI DECEM A P. FRANC. JOS. DESBILLONS Societatis nostræ Sacerdote idiomate latino conscriptum, Ego IGNATIUS RHOMBERG, ejusdem Societatis per Germaniam superiorem Præpositus PROVINCIALIS, potestate ad id mihi facta ab Adm. Rev. Patre nostro LAURENTIO RICCI, universæ Societatis Præposito GENERALI eidem ad hanc duntaxat editionem dicti operis facultatem impertio, simulque communico Privilegium Cæsareum, quo Bibliopolis ac Typographis omnibus interdicitur, ne librum ullum a Nostris conscriptum citra consensum superiorum typis edere, vel recudere, aut intra fines S. R. I. inferre præsumant, iutelligendo de iis solum ditionibus, in quibus suprema Auctoritate non aliter ordinatum est. In cujus rei fidem has ei, manu propria subscriptas, & consueto Officii mei sigillo munitas dedi. Landspergæ 24 Aprilis 1763.


IGNATIUS RHOMBERG.

EXPLICATIO

NON PRÆTEREUNDA.

Petierunt multi, ut ex his meis fabellis, numero fere trecentis ac quinquaginta nunc simul exstantibus, quas excogitassem, declararem. Dicam ergo bona fide: Quæcumque argumenta ab aliis fuisse tractata Scriptoribus non indico, ea omnia, si exceperis fabulam de Gutta, Ponto, & Ostreo, quæ in volumine, nescio quo, Spectatoris Anglici continetur, a me esse inventa existimo: existimo, inquam; non assevero: nonnulla enim, quæ primum invenisse me credideram, aliena postmodum e perlectis quibusdam libris recognovi, suisque inventoribus reddidi.





CLAUDIO SALERIO.

Cut dono , dedico fabulas novas ? tibi,
Optime SALERI: namque tu primus bono
Has muneraſti perlegens ſuffragio,
Et judicaſti luce dignas publica.
Quapropter ipſas animus augurat mihi,
Satis felici prodituras alite:
Etenim ſincera, candidaque præditum
Te mentis indole eſſe, norunt plurimi,
Tibi quos adjunxit nexibus læta aureis
Neceſſitudo ; deinde liberalium
Præſtare te magna Artium peritia,
Neque te Latinis eſſe, quam Græcis libris,
Minus aſſuetum, quos priſta polivit manus,
Latere opinor literato nemini.
Id ergo totum qualecunque habe tibi
Novi libelli ; meque Livor ſi malus
Amarulentis appetiverit jociſ,
Tuo præſidio tutere imbellem, precor.





FABULARUM ÆSOPIARUM LIBER PRIMUS.

PROLOGUS.

DARE omnes homines naviter operam decet,
Ut sese honestis artibus invicem adjuvent.
Pro viribus ergo efficere conatus fui,
Ut ne, alma studia literarum dum sequor,
Obscuram inani dicerer vitam otio
Transisse. Porro cum viderem, quas ferunt (a)
Æsopum auctorem reperisse Fabulas,
Magno has fuisse doctis olim sæculis
In honore; talem mihi sumendam censui
Materiam, prima fronte levissimam quidem,
At penitus omni laude vera præditam.
Ejus enim dores paulo diligentius,
Pauloque rectius intueri si velis,
Tute ipse lusus esse nostros utiles
Ad corrigendam vitam hominum fatebere.

Speciosis alii dum eloquentiæ strophis (b)
Severitatem venditant censoriam,
Re vacuas ipsa nœnias effutiunt
Plerumque. Nos paratu verborum levi,

Tenui

(a) Phædrus Lib. I Fab. I V. 1 & alii. Quanquam, ut in præfatione monuimus, multo ante Æsopum Hesiodus, atque ipsi etiam divinatorum voluminum auctores hoc scribendi genus adhibuerunt.

(b) Phædrus Lib. I Fab. XIV V. 4 de quodam futurore:
Verboſis acquiſivit ſibi famam ſtrophis.

Tenui, modesto simplices, fideis jocis (c).
 Lenocinantes, mentibus frugem bonam
 Inferimus. Et vero inficiari non licet,
 Nostrum illud omne Fabularum quin genus,
 Dum varia proponit, oculisque subjicit
 Exempla, monitis arguit salubribus
 Cujusque vitam, quas & ipsa condidit
 Natura, sanctas usque leges suadeat,
 Officia denique doceat fere omnia,
 Quis continetur societas mortalium.
 Unde hanc moralis (d) esse Philosophiæ scholam,
 Eamque veram, non inepte dixerim.

FABULA I. (e)

Lilium.

SATUM feraci, & nobili solo, suum
 Cum nuper apicem Lilium discluderet, (f)
 Erumperetque (g) sese in auras luminis;
 Aurorâ primum lacrymulam demittere
 Unam, alteramque cœpit. At tam lucidus
 Repente foliis exstitit apertis nitor,
 Ut læta jam Dea pariter nitentibus
 Oculis genisque fulserit, & adriserit,
 Absolveritque risu simul amabili
 Omnem novelli floris pulchritudinem.
 Mox Phœbus aureo emicans vultu advolat,

Sua-

(c) Phædrus Lib. I Prol. V. 7.

Fideis joculari non meminerit Fabulis.

& Lib. III Prol. V. 37 de Æsopo.

Quia, quæ volebat, non audebat dicere,

Affectus proprios in fabellas transtulit,

Calumniamque fideis elusit jocis.

(d) Cicero de fato init. *Quia pertinet ad mores . . . nos eam partem Philosophiæ de moribus adpellare solemus: sed decet agentem Linguam latinam, nominare moralem.*

(e) Hanc verius dixeris Allegoriam in ortum

Serenissimi Burgundiæ Ducis.

(f) Lucretius Lib. V V. 439.

Discludere mundum,

Membraque dividere, & magnas disponere partes.

(g) Cæsar de Bello civ. Lib. II c. 14: *se foras erumpunt.*

Suaque luce Lilium complectitur,
 Fovetque, recreatque; & expleri nequit
 Videndo; & omnes hic velit secum Deos,
 Deasque adesse, gaudium hoc ut gaudeant.
 Hucque, o Deorum summe, dixit, huc ades,
 Verende genitor. Audiit, adest Jupiter;
 Videtque, gaudetque, ut Jovem quidem decet;
 Ita tamen gaudet, ut hominem tunc diceret.
 Interea amœno cincta Nympharum grege
 Natura stabat, proprium admirans opus.
 Oculo sagaci perspicit aliquamdiu
 Penitus, penitusque, sollicita, ne quid suo
 Decoris alumno desit, ultima quod manus
 Adjicere possit. Ad faum postquam omnia
 Exacta gustum convenire intelligit:
 Decus meum, inquit, cresce, o Lilium; mea,
 Cresce, o voluptas; teque jam, quotquot micant
 In orbe flores, capite summissio colant.
 Dixit; statimque seligit fidam e suis
 Comitibus unam, prævalenti corpore,
 Vultuque, Floram, candido, & rubicundulo;
 Et mandat, opera Lilium assidua juvet,
 Curasque alendo sedula omnes conferat.
 At illa, tanto honore gaudens, exilit,
 Simulque reteggit nectare plenos sinus,
 Succosque fundit, quos, futuri præsciæ,
 Jam præpararant antea Vita & Salus.
 Quo dicta spectent, tota novit Gallia.

F A B U L A II.

Formica & Cicada. (h)

PATIENS laboris, grana dum sēges daret,
 Opus formica fecerat (i), hiemis memor;

A 2

Fru-

(h) La Fontaine, Lib. I Fab. I. Benferade, Fab. LXII. Aesopus, Fab. CXXXIV. Aphonius, Fab. I. Faernus, Fab. VII. Burmannus in Appendice ad Phædrum, Fab. XXVIII. S. Cyrillus, Lib. I Fab. IV.

(i) Salomon Prov. c. 6 V. 6, *Vade ad formicam, o piger, & considera vias ejus, & discē sapientiam: quæ cum non habeat*

Frugemque multam in horreum congresserat.
 Cicada totos interim dies sonis,
 Male otiosa, stridulis indulserat,
 Nil providens quid deinde venturum foret.
 Venit hiems. Tristi misera contrahitur gelu;
 Seque perituram denique præagit fame,
 Si non cibi aliquid unde unde extricaverit.
 Formica tutum se receperat in cavum,
 Paratis opibus jam fruens. Hanc convenit
 Cicada supplex: Ferque, ait, amica, fer opem
 Egenti. At illa: Quid agebas autem, has ego
 Dum opes colligerem? Cantabam videlicet.
 Cantabas! laudo. Nunc saltare quid vetat?
 Miseram senectus olim subitura est vicem,
 Laboriosa ni juvenus præcaveret.

FABULA III.

Aquila, Corvus, & Pastor. (k)

OVEM rapuerat Aquila curvis unguibus:
 Idem experiri Corvus & ipse dum cupit,
 Parem e grege toto prædam observans eligit,
 Simulque magno devolans ruit impetu.
 At nec ovem tollere, impar quippe viribus,
 Neque hujus etiam pertinaci vellere
 Misere impeditum se expedire jam potest.
 Accurrit ergo pastor, & hunc capiens: Tuas
 Prius decebat nosse te vires, ait,
 Quam tale facinus nitereris exsequi.
 Capere volebas: captus ipse nunc veni,
 Meo futurus filio ludibrium.

Docet fabella, tentiores ad suam,
 Potentiorum exemplis, perniciem trahi.

FABULA IV.

Lacerta & Testudo.

Tui me miseret, ajebat Testudini

Lacer-

bat ducem, nec præceptorem, parat æstate cibum sibi, & congregat in messe, quod comedat.

(k) La Fontaine, Lib. II Fab. XVI. Benferrade, Fab. LXXXVII.
 Æsopus, Fab. CCVII.

Lacerta; quæ, quocunque libeat vadere,
 Tuam ipsa tecum ferre cogaris domum.
 Quod utile, inquit illa, non grave est onus.

FABULA V.

Ericius & Talpa. (l)

ADVENTARE hiemem Ericius (m) quidam videns,
 Talpam rogavit, proprio in cavo locum
 Sibi ut vim contra frigoris concederet.
 Concessit Talpa: sed receptus hospitem,
 Ut se movere cumque vult, Ericius
 Pungit molestis hinc & hinc aculeis:
 A se ergo Talpa hunc sentiens damno suo
 Receptum, ferre nec diutius volens,
 Precatur, obtestatur, exire ut velit,
 Quandoquidem angustus ambo non capit locus.
 At esse gaudens ille, ubi bene est sibi,
 Hinc exeat, ait, qui manere non potest.
 Fabella docet hunc imprudenter hospitem
 Admitti, qui non possit aliquando ejici.

FABULA VI.

Leo, Lupus, & Vulpis. (n)

LEO ægrotabat: accesserunt illico,
 Ut solarentur, omnes undique belluæ;
 Vulpis tamen adhuc aberat. Ergo Lupus datum
 Hanc criminandi infensus arripit locum:
 Nil curat, inquit, de salute principis.
 Dumque alia multa deblaterat ejusmodi,
 Conflare tentans invidiam; tandem advenit,

A 3

Ejus-

(l) Benferade, Fab. LXXII. Le Noble, Fab. LIII, & in comœdia sua Æsopica A&. I Sc. IV. Richer, Lib. IV, Fab. XV. Abstemius, Fab. LXXII.

(m) Isidorus, Origin. Lib. XII, Cap. 3, *Ericius animal spinis coopertum. exinde nominatum, quod subrigit se, quando spinis suis clauditur.* Hinc apud Sallustium, Hist. Fragin. Lib. III, & apud Cæsarem de bello civ. Lib. III, Cap. 67. Trabs infixis horrens aculeis ferreis Ericius vocatur.

(n) La Fontaine, Lib. VIII, Fab. III. Æsopus, Fab. LXXII. Faernus, Fab. XCIX. Jaius Biblioth. Rhet. Tom. II pag. 741.

Ejusque verba Vulpis audit ultima.
 Vix introgressa: Me, ait, excusatam velis,
 Magnanime Princeps, si forte videor tibi
 Parum fuisse diligens: mea interim
 Tibi opera impensa est; & fuit pretium in mora:
 Nam circuivi; & hinc, & illinc sedulo
 Rogavi, quodnam remedium præstantius,
 Tuoque morbo magis idoneum foret.
 Quid comperisti, quærit impatiens Leo?
 Respondet Vulpis: Nil crede efficacius,
 Quam si jubebis detrahi pellem Lupo
 Viventi, eamque protinus calidam indues.
 Placet remedium: Lupus ergo deglubitur
 Miser, & agnoscit, quæ nihil dominos juvat,
 Recidere fraudem sæpe in auctores suos.

FABULA VII.

Pueruli Fratres.

NATURA, & usus vitæ communis, duos
 Puerulos fratres mutuo conjunxerat
 Amore, qualem ferre id ætatis solet.
 Tentatus est forte unus amborum levi,
 Brevisque morbo. Venam oportuit tamen
 Secari, Medico sic jubente. Quod videns,
 Protinus adflere cœpit alter. At mihi
 Pius iste motus misericordiæ placet,
 Ait æger secum reputans; ac etiam magis,
 Quam credidi, ab eo nunc me amari intelligo.
 Postridie cum prima redisset salus,
 Germanum aspexit crustulorum copia
 Instructum: partem sibi dare ut vellet, rogat.
 Negat ille vero. Quid? mihi pias heri
 Lacrymas dedisti, nuncque crustulum negas?
 Nego, inquit, lacrymas sponte natura elicit;
 Auro parandum contra crustulum puto.
 Speciosa sæpe sanctam amicitiam nota
 Testatur: at raro ipsa res fidem facit.

FABULA VIII.

Rosæ & Papilio.

SEMOTA ab omni pene conspectu Rosæ
 Florebat, & latebat horti in angulo.
 Inde tamen aliam, non visa ipsa, clanculum
 Rosam videbat; quæ patenti in area
 Blande renidens lumini ætherio, suum
 Decus aperiret non sine fastoso igneæ
 Fulgore formæ. Tum livore carpitur;
 Gemitque, genere quod parem, tam dispari
 Vivendi sorte sese oporteat frui.
 Papilio, sua quem forte levitas huc tulit,
 Sentit gementem; &: Stulta, cur, inquit, gemis?
 Tua ista nempe clarius micat soror,
 Radiisque Solis vividioribus calet;
 Sed te minus tenella est, & vernans minus;
 Et ævum denique brevius, quam tu, exiger.

Hæc misera plerosque homines conditio premit:
 Obscura vita displicet; illustris nocet.

FABULA IX.

Columba Plumipes, & Columba Saxatilis.

SPERNENS Columba Plumipes (o) Saxatilem, (p)
 Superbiebat, quod se semper cerneret
 Bene ocreatam; dum suas illa interim
 Nudas, turpesque tibias ostenderet.
 Saxatilis ait: Nudis me esse tibiis
 Quod fors voluerit, non modo injuste exprobras;
 Sed etiam, quod sic nata sim, mihi gratulor,
 Quippe magis expeditæ: at ocreas tibi
 Quod fata dederint, quid ea jactas munera?
 Vincula esse potius, quam ornamenta, dixerim:
 Etenim experire: non modo nihil adjuvent;
 Sed etiam impedian, ne satis facile ambules.
 His excicata verbis, a se Plumipes

A 4

Ova

(o) Catullus Carm. LVI V. 17.

Adde huc Plumipedas, volatilesque.

(p) Varro de re rust. Lib. III Cap. 7: *Unum* (Columbarum genus) *Agreste: ut alii dicunt, Saxatile.*

Ova incubari non meminit: ut se probet
 Posse ambulare commode, nido exilit
 Repente, & ocreis simul inhærentem suis
 Spem sobolis rapit, & inscia illidit solo.

Vestis luxuria gloriantes indicat
 Fabella plures ruere in exitium grave.

FABULA X.

Capo.

HABEBAT aliquis Caponem, chortalibus
 Præ cæteris altibus, dilectum sibi;
 Ita ut, pennarum nullo conspicuum licet
 Nitore, pulchrum hunc esse totum crederet.
 Adeo est amantum cæca deliratio!
 Etiamque tinctu insignem rubro fasciam
 Ad ejus collum stultus alligaverat.
 Ornatu hic autem glorians novo, additam
 Sibi putat esse miram pulchritudinem,
 Ergo celeriter sese confert ad suos.
 Ineptum at illi non ferentes, protinus
 Omnes ad unum invadunt, & procaciter
 Illudere certant, omnibus & vexant probris.

(q) Loco est ignominie honor indigno datus. (r)

FABULA XI.

Simius & Hinnuleus.

HINNULEUS olim, Simiusque dum simul
 Colludunt; ille genio indulget innocens,
 Lufumque simplex e lusu solum petit:
 Sed alter, etiam ludens, innatam sibi
 Malitiam continere non potest diu,
 Et ad usque vivum dente pungens perfido
 Hinnulei delicatam fauciat cutem;
 Qui simul acerbans ejulatu, fletibus (s)

Sen-

(q) Pub. Syrus, V. 354.

Loco ignominie est apud indignum dignitas.

(r) Cicero in Verrem, Lib. V Cap. 14, *Quæstor sum factus, ut mihi honorem illum tum non solum datum, sed etiam creditum ac commissum putarem.*

(s) Flere dicuntur Cervi.

Sensum doloris, hinc cito pede confugit
 Cervum ad parentem, desluentique offerens
 Cruore tinctam corporis partem: En vides,
 Vides, heu! clamat, me miserum natum tuum
 Malus iste agyrta quo tractaverit modo:
 Quam nisi tu atrocem vindicas injuriam,
 Pater, uti justum est; hercle perii funditus:
 Namque hoc abisse impune postquam viderit,
 Ad majus aliquod scelus erit paratior.
 Causam querendi Cervus esse existimans
 Parem querelis, territus primum fuit,
 Et ultionis cupiditate percitum
 Sibi simul sensit fremere, & accendi jecur:
 At propius omnem deinde rem considerans,
 Læsam esse leviter ut cutem nati videt,
 Luctum ejus ipse denique mendacem arguit.
 Tenerior animus quamlibet factam sibi
 Exaggerare offensusunculam solet.

FABULA XII.

Gruis & Pavo. (t)

SIMULTAS, variis orta de causis, Gruem
 Olim incitavit, & Alitem Junontum,
 Ut se vicissim incesferent (u) convicio.
 Vide, inquit Pavo gemmeum (x) caudæ explicans
 Nitorem, in illis miro plumis ordine
 Dispositis quanta luminum vis fulguret;
 Tuumque lauda postea, & mihi, si potes,
 Objice colorem cinereum. Retulit Gruis:
 Plumarum honore lucido præstas quidem;
 Neque hanc invideo futilem tibi gloriam:
 Sed humi te retinet iste, quem jactas, decor;
 His ego dum pennis, quas, superbe, vituperas,

A 5

Pro-

(t) Benferade, Fab. CVI. Avienus, Fab. XV.

(u) Suetonius in Tiberio, Cap. 11: *Non desuit, qui eum convicio incesferet.*

(x) Phædrus, Lib. IV, Fab. XVIII, V. 7.

Nitor Smaragdi collo præfulget tuo,

Pistisque plumis gemmeam caudam explicas.

Procul hinc volatus molior sæpe arduos,
 Ultraque nubes, proxima (y) Superis, feror.

Quisquis es ab aliqua parte commendabilis,
 Ne sis ab alia vituperabilis, time.

FABULA XIII.

Mala Aurea. (z)

VIR Lusitanus filium habuit unicum,
 Cujus venustam simplicis animi indolem
 Etiam adjuvabat pulchritudo corporis.
 Erga hunc (vel aliis, quam parenti, amabilem)
 Erat parentis magnus, at prudens amor.
 Oculum ille, curis excitatum providis,
 Cum sæpe in ipso desigeret attentius,
 Animum introspectit, usu & exemplis malis
 Ad artes flagitiosas exorabilem,
 Eo facilius, quo magis simplex erat.
 Ergo monebat sæpe, ne socios sibi
 Habere vellet, ut habebat multos nimis,
 Et hunc, & illum memorans, qui parilis quidem
 Ætatis, at non parilis innocentiae
 Flore eniterent. Magna cum reverentia
 Meritis paternos audiebat filius:
 At enim, inquiebat, tuta omnia times, pater:
 Eosque certe, cum quibus credis mihi
 Periculosum inire consuetudinem,
 Quam non nocere possint, haud nosti satis.
 Imo, aliquid ipsi forte si contraxerint
 Viciositatis, quidquid id fuerit, meis
 Bonis, ita spero, exemplis emendabitur.
 Neque his placari visus est; neque adhuc tamen
 Pater esse causam, cur succenseat, ratus,
 Præstare verbis quod nequit, tentat dolo
 Efficere id innocente. Cistulam parat,
 Pulcherrimisque Malis aureis replet,
 Nisi quod tot sanis aliquot intermiscuit,

Sub-

(y) Avienus, V. 14.

Proxima sideribus, numinibusque feror.

(z) Locmanus, Fab. XXIII. Car. Poreus, Fab. inedita.

Subtilibus quæ signis jam prænuntiant
Corruptionem. Quo factò, natum vocat;
Et: Hoc læve, inquit, pignus habe amoris mei.
Lætus, gratusque filius donum capit;
Mox & sciendi cupidus, quas habeat opes,
Dum curiose numerat, atque examinat,
Repente clamat: Heu! quid fecisti, pater?
Cur insincera miscuisti his integris?
Ne querere, fili: cum malis enim bona
Communicabunt integritatē suam.
Imo (a) respondet ille, quæ bona sunt modo,
Brevi malorum mala fient contagio.
Nil tu time, inquam, nate; vel hoc mihi denique
Concede, ut experiamur quem res exitum
Habere possit. Natus nil dum suspicans,
Quo tenderetur, annuit, invitus licet.
Ergo obseratur cistula; clavisque in manus
Datur parentis, ipse adesse dum velit
Referandi tempus. Interim impatiens moræ,
Patrem usque, & usque blanda sollicitat prece,
Tentatque facere natus, ne diutius
Vetetur visere, quo suæ sint res loco.
Nimis inquietus quid te frustra maceras,
Ajebat ille? quin potius, quod tu cupis,
Fieri dum liceat, sustines moram brevem?
At ecce, postquam distulit satis diu,
Tandem venisse nuntiat optatum diem,
Simulque clavim tradit: illa segnius
Videtur obsecundare isti improvido,
Suum expetenti cernere citius malum:
Nam vix aperta est cistula, ingentem videt
Omnibus ad unum Malis, jam non aureis,
Luem insedisse, & horridam putredinem.
Et calamitatem non ego hanc prædixeram,
Exclamat? heu me! quam verus forem, nimis
Intelligebam: sed aliter visum tibi,

Pater.

(a) Vox *imo* recurrit sæpe apud Martialem, & syllabam
semper habet ultimam brevem: at Catullus Carm. 78 V. 20
Frustra? imo magnum cum pretio atque malo.

Pater. Dolor (non tanti est) fili, abstine,
 Ait ille, iungens plena amoris oscula:
 Tibi quod habere super his noluerim fidem,
 Quereris: at ipse numquid credideras mihi,
 Dum commonerem, vita quorum non foret
 Impuritatis expers, quam facile in malam
 Perniciem eorum societas adduceret?
 Perisse Mala, dono quæ dederam, doles;
 Damnum puta istud & leve & reparabile.
 Sed adulteratis si te, nate, moribus
 Aliquando fieri vitiosum contingeret;
 Et ista quæ nunc tantopere juvat patrem,
 Vitæ innocentis si periret castitas;
 Quid patre misero fieret? tamque flebilis
 Jactura quo sarciri jam posset modo?
 Hoc dicitur convictus exemplo puer
 Meminisse semper, insincera quam cito
 Perniciem Malis intulissent integris.

Hæc fabula, puer, quisquis es, scripta est tibi:
 Raro boni te reddent ex malo bonum;
 Malumque semper ex bono reddent mali.

FABULA XIV.

Cucurbita, Glans, & Rusticus. (b)

VENTRE intumentem repere humi Cucurbitam,
 Miratus olim Rusticus: O factum male,
 Ita vivam, dixit! Nam illa quanto pulchrius,
 Meliusque ab hacce dependeret ilice!
 Talem, hercle, tales arborem fructus decent.
 Næ dormiebat, quem rerum auctorem ferunt,
 Hæc dum ordinaret! Nam Cucurbitæ loco
 Cur non vicissim serpit ista Glans humi?
 Pol si vocatus essem in partem consilii,
 Hæc, & alia recte statuisssem, ut equidem reor.
 Dum sic movetur, tamque difficilis rei

Nodum

(b) La Fontaine, Lib. IX, Fab. IV. Jaisus Biblioth. Rhet.
 Tom. I, pag. 753, Cujus verba pleraque retinimus.

Nodum expedire misere (c) quærit, nec potest:

Homines, quibus acris ingenii vis obigit

Felicior, dormire vix, inquit, licet.

Simul recumbit; simul hominem invadit sopor.

At ecce ab ipso vertice ilicis incidit

Glans dormienti, ejusque nasum vulnerat.

Evigilat; nasoque simul admota manu:

Hui! plaga facta est non levis! sanguis fluit!

Tantumne vero Glans minima infligat mali?

Cucurbita autem quid si cecidisset? Papæ!

Nil immutandum; sentio. Rerum artifex

Suis prudenter cuncta disposuit locis.

Sese haud ab similem credat isti Rustico

Divinam quisquis culpat providentiam.

FABULA XV.

Lupus pœnitens.

MORES scelestos, ac vitam nefariam,

Instinctus olim tristi pœnitentia,

Abominari fortiter cœpit Lupus.

Cruditatis æstu semper abripi,

Fervere semper amore cædis impio,

Hæc vita non est, inquit; ergo aliam lubet

Vivendi regulam experiri, affectibus

Legem immodestis ponere, converti bonas

Ad pacis artes atque mansuetudinis;

Pecudes lanigeras, mite & innocuum genus,

Placet imitari, & illarum commercio

Deformitatem corrigere nostræ indolis.

His dictis, recta tendit ad ovium gregem,

Bene certus animi (sic videbatur sibi)

Non modo creare nil mali, at etiam suis

Probe mutatis has recreare moribus.

Hæu! quanta vis est pravæ consuetudinis!

Gentem ille placitam vix propius inspexerat,

Simul iras veteres sentit exardescere;

Simul imperiosos impetus sequitur volens,

Præ.

(c) Horatius, Lib. I Sat. IX, V. 8.

..... Misere discedere quærens.

Prædamque, quam fors objicit primam, rapit.

Fabella demonstrat, homines multos, mera
Quos turpitudine sceleris a scelere avocat,
Occasione retrahi ad scelus data.

FABULA XVI.

Vulpis & Canis.

VULPIS rapuerat gallum gallinaceum,
Voraveratque. At hanc recenti sanguine
Adhuc madentem fortis occupat Canis,
Crebroque dente membra discerpens vorat.
(d) Ab alio expectes, alteri quod feceris.

FABULA XVII.

Mures duo.

LARDUM e muscipulo (e) pendulum famelici
Edacitatem Muris inflammaverat
Potenti illecebra. Victus ille denique
Obsequitur: at vix attingit, captus gemit.

Po-

(d) Verba ipsa sunt Pub. Syri. V. 2.

(e) Rob. Stephanus, Basil. Faber, & qui hos secuti sunt Lexicographi, id, quod gallice dicitur *souriciere*, dictum latine *Muscipulam* fuisse testantur; citantque Varronem. Varonis quidem de Re Rust. Lib. I, Cap. 8, Sect. V. Edit. Lips. 1735, verba hæc sunt: *Si parit humus Mures, minor sit vindemia, nisi totas vineas oppleris muscipulis*. At cur inde potius *Muscipula*, quam *Muscipulum*, in casu primo singulari enunciandum concludatur? Ego vero adhiberi ad idipsum posse auctoritatem Lucilii existimaveram; cujus Satyrarum Lib. 30, num. 23, verba ista exhibentur: *Hic ut muscipula contenta*. Sed cum sententia sit imperfecta, ac forte etiam depravata verba, nihil certi ex hoc fragmento colligi potest. Nunc autem Phædrum, qui annis, postquam Rob. Stephanus ultimam Thesaurum suo manum adjecit, amplius quinquaginta in lucem editus est, controversiæ omnis judicem adhibebimus. Is enim *Muscipula*, quarto casu plurali, non *Muscipulas*, memorat, Lib. IV, Fab. I, V. 16.

Aliquot secutis, venit & retorridus,

Qui sæpe laqueos, & muscipula effugerat.

Hinc Apuleius *Decipulum*, non *Decipulam* dixit. Hinc Commodianus, auctor vetus Christianorum Acrochistidum ita loquitur Instrukione 48:

Escam muscipuli, ubi mors est, longe vitate.

Suum ergo sortem dum lamentatur miser,
 Quippe sibi nullam spem salutis jam videns
 Superesse; Mus severus, & retorridus
 Hac forte transit, &: Merito certe tuo,
 Quod nunc deploras, inquit, obvenit malum:
 Ego jam quidem olim centies ejusmodi
 Mihi fraudulentas videram objici dapes;
 Sed animus semper abhorruit, quantamlibet
 Illæ excitarent appetentiam sui.
 Etenim profecto capite sub hoc nostro viget
 Aliqua scintilla sensus & prudentiæ;
 Rationis autem quam sis omnis indigus,
 Fictilibus antea, indoctisque moribus
 Tu perquam nimium sæpe jam probaveras.
 Meme, inquit alter, encas. Quod arguis,
 Ferrem libenter, si meis malis simul
 Dares medelam; sed nihil tu cum queas
 Prodesse; dure, cur tuis meam insuper
 Hanc calamitatem exasperas conviciis?

FABULA XVIII.

Aries & Taurus. (f)

NATURA tantis viribus muniverat
 Arietis caput, armaveratque tam bonis
 Cornibus, ut omnes lanigeros inter greges
 Regnaret unus; & aries occurreret
 Jam nullus, ipsi auderet qui resistere.
 Elatus ergo tot suis victoriis,
 Taurum etiam stultus ad certamen provocat;
 Simulque arietat; & percussus simul
 Taurina fronte, campum metitur jacens:
 Tunc ferme exanimis, pristinam superbiam
 Damnavit ipse, & hanc miser vocem edidit:
 Successus obcæcatum me tenuit diu;
 At justa, qui sim, calamitas nunc me docet.

FA-

FABULA XIX.

Cancer & ejus Filius. (g)

UT prorsus (h) iret, filium retrogradum
 Cancer monebat; at filius: I præ (i); sequat.
 Cuiquam ne objicias, quod tibi objici potest.

FABULA XX.

Agricolæ & Mercurius. (k)

IN ipsa ripa fontis Mercurio sacri
 Agricola quondam dum succidit arbores,
 Securis casu elapsa in undas decedit:
 Quam recuperare nullo cum posset modo,
 Lacrymare cœpit. Motus misericordia
 Mercurius homini apparuit, & exquisit
 Lacrymandi causam; quam simul didicit, abit,
 Mox &, securim deferens secum auream,
 Redit; & an hæc sit, quam modo perdidit, rogat.
 At eam suam esse pauper negat. Ergo alteram
 Defert secundo Mercurius argenteam;
 Quam cum esse pauper nunc quoque negaret suam;
 Ipsi postremo ferream Deus obtulit:
 Illam suam esse cum assentiret Rusticus;
 Justum & veracem Mercurius hominem volens
 Remunerari, simul omnes dono dedit.
 Hinc ille lætus socios convenit suos,
 Aperitque id omne quod modo acciderat sibi.
 Quam rem experiri de sociis unus volens,
 Ad fontem accedit, atque in undas dejicit

Secu-

(g) La Fontaine, Lib. XII, Fab. X. Benserade, Fab. XCVI.
 Aphthonius, Fab. II. Gabrias, Fab. L. Avienus, Fab. III. Ca-
 merarius, Fab. CCXLV.

(h) Prorsus, sive prorsum ire, est recta, quasi propositum
 versus incedere. Plautus, Pseudol. Aët. IV, Sc. I, V. ult.

Non prorsus, verum ex transverso cedit, quasi can-
 cer solet.

Idem Pers. Aët. IV, Sc. V, V. 5.

Simulato, quasi eas prorsum in navem.

(i) Terent. Andr. Aët. I, Sc. I, V. 144.

(k) La Fontaine, Lib. V, Fab. I. Benserade, Fab. XCI. Æso-
 pus Fab. XLIV. Faernus, Fab. LXII. Jafus Tom. II, pag. 742.

Securim; deinde flens in ripa confidet.
 Cujus ubi causam flendi rescivit Deus,
 Securim desert auream, an sit hæc, rogans,
 Quam perdidit: eam cum suam esse diceret;
 Mercurius, cognita ejus impudentia,
 Neque auream ipsi, neque etiam suam dedit.
 Is merito, injusta qui petit, nihil obtinet;
 Et qui justa petit, plura, quam petiit, refert.

FABULA XXI.

Aquila & Mus. (l)

IMPLICITA quondam cæcis laqueorum dolis
 Aquila, ubi sensit, impetum simul exerit,
 Et se expedire quatit; unice hoc agit,
 Ira & furore fortis; & nil proficit.
 Cujus laborem Mus videns, misertus est,
 Abrosis ergo dente crebro vinculis,
 In libertatem vindicat Armigeram Jovis.
 At libera illa: Mene contemptissimæ
 Debere vitam bestiolæ; Pro Jupiter!
 Dixit: suumque liberatorem necat.

FABULA XXII.

Cygnus & Anser. (m)

CYGNUM, Anseremque habebat quidam Villicus;
 Suxque mensæ destinabat alterum;
 At alterum servare cupiebat diu
 Gratum, canoræ vocis ob dulcedinem.
 Aliquando, seram sub noctem, ad focum sedens,
 Confabulansque: Noster nunc vobis, ait,
 O pueri, qualis Anser esse creditur?
 Ego vero factum satis obesum judico,
 Respondet unus, hanc ut familiam tuam
 Recreare possit non illiberaliter:
 Sic ille, sic loquuntur deinde ceteri.

Hærus

(l) Richer, Lib. VII Fab. V. Absternius, Fab. LXX.

(m) La Fontaine, Lib. III Fab. XII. Benferade, Fab. CLXXVI.
 Æsopus, Fab. LXXIV. Faernus, Fab. XXV.

Herus ergo, eorum quandoquidem sententiam
 Non improbat ipse, ad stabulum, Cycno, & Anseri
 Commune, pergit; tamque præcipiti gradu,
 Ut lumen (n) etiam ferre secum negligat:
 Quæritat; omittit Anserem, Cycnum capit,
 Statimque porro dederet inscius neci,
 Nisi ille sortem tam feram ut sentit sibi
 Instare, cantum fundere simul funebrem,
 Suavemque inciperet, mortis ad solatium.
 Quos ubi canoros Villicus agnovit sonos:
 Heu! quantus error me, inquit, in malam prope,
 Necessitatem peccandi conjecerat!
 Cycnoque misso, prendit Anserem & necat.
 Quid blanda virtus suavis eloquentiæ
 Præstare possit, ista fabella indicat.

FABULA XXIII.

Equus & Asinus.

INSTINCTUS odio, calcibus infestis Equus
 Petivit Asinum, & vulnere afflixit gravi:
 At medio in ictu malefacti pœnam sibi
 Conscivit ipse: tibiæ etiam alteram
 Luxavit, dissoluta cartilagine;
 Ita ut dolorem sævientem non ferens,
 Coactus fuerit languidos artus humi
 Deponere, ægro non sine luctu: quem videns:
 Ego, inquit Asinus, male valebam, sed mihi
 Bene esse jam nunc incipit, cum sic jaces.

(o) Læso doloris remedium inimici est dolor.

FABULA XXIV.

*Lupus ovilla pelle indutus, & Pastor. (p)***O**VILLA pelle se Lupus contexerat:

Sic

(n) Horatius, Lib. I Epist. II V. 35.

Posces ante diem librum cum lumine.

Quintilianus Institut. Lib. V Cap. 12, pag. 452 Edit. Burman., in rebus vero apertis argumentari tam sit stultum quam in clarissimum solem mortale lumen inferre.

(o) Pub. Syrus, V. 340.

(p) Abstemius, Fab. LXXVI.

Sic personatus ovium numeroſo gregi
 Immiſcuit ſe perfidus. Quotidie
 Aliquam bidentem devorabat clanculum.
 Sed fraude Paſtor cognita, tandem occupat
 Incautum; & morte debita ſtatim afficit.
 Interea Opilio Junior, rei inſcius
 Quid eſſet, quærit cur ovem dedat neci.
 Hanc & ego pariter, inquit ille, putaveram
 Ovem eſſe; ſæctis at probavit ſe Lupum.
 Malos ſi occultat ſpecies, opera detegunt.

FABULA XXV.

Ruſticus & Silva. (q)

ESTO beneficus; at cui benefacias, vide.
 In Silvam venit Ruſticus, capulum rogans
 Aptum ſecuri tollere liceret ſuæ:
 Quod cum, annuente Silva, feciſſet; ſtatim
 Ferrum in beneficas vertere cœpit arbores;
 Quarum ingemiſcens una: Merito cædimur.

FABULA XXVI.

Canis & Lepores duo. (r)

UNUM inſecutus in campo Leporem Canis,
 Videt alterum; & eum ſimiliter ſtudet (s) inſequi;
 Utrumque ſed dum capere vult, neutrum capit.
 Sibi ipſa ſemper aviditas nimia officiit.

FABULA XXVII.

Leo, Simius, & Vulpis. (t)

QUÆCUMQUE paulo curtior præditæ
 Cauda fuiſſent belluæ, edixit Leo,

B 2

Suo

(q) La Fontaine, Lib. XII Fab. XVI. Benſerade, Fab. XXXIX.

Anonymus a Neveleto editus, Fab. LIII. Hermannus, Edit. Rob. Steph. pag. 130. Gudius append. ad Phædr. Fab. V.

(r) Le Brun, Lib. IV Fab. XXI. Muſ. Rhetor. Tom. II pag. 183.

(s) Corn. Nepos in Chabria ſub fin. *Primus ſtudet portum intrare.*

(t) La Fontaine, Lib. V Fab. IV. Faernus, Fab. XCVII.

Suo ni excedant regno intra paucos dies,
 Malo mulctandas, quotquot potuerint capi.
 Pœnam ergo celeri Simius parat fuga
 Vitare; at ipsam similiter Vulpem videns
 Effugere velle: Tu vero, inquit, quid times?
 Ad tene edictum pertinere existimas?
 Respondit illa: Si mala edictum est fide,
 Facile oratores invenientur perfidi;
 Caudam mihi esse curtiozem qui pro bent.

FABULA XXVIII.

Aquila & Sol. (u)

RADIANTIS Aquila in Solis adversum jubar
 Oculo irretorto dum obtutum defigeret:
 Quam te, ait, acutum cernere, o lucis pater,
 Credidero, cum nil, absque (x) te esset, cernerem!
 Sol retulit: Ipsa quando cogit veritas
 Dicere quod res est, audi, & errorem tuum
 Depone: Tanta luminum qui copia
 Abundo, ut cælum, & auras, & terram, & mare
 Illustrem, cæcus ipse cernere nil queo.

Hos admonet fabella, qui lucem omnibus
 Dilargiuntur, dum sibi ipsi nil vident.

FABULA XXIX.

Liber & Prelum.

AT me premendo cur gemis, dixit Liber,
 Prelum allocutus, ipse tacitus dum premor?
 Respondit Prelum: Non meam doleo vicem;
 Sed quæ mala tibi incautus arcessis, gemo.
 Frequens videlicet usus rerum jam diu
 Me docuit, qualis expectanda sit Libris
 Fortuna plerisque; ac de te sic auguror:

Sol-

(u) S. Cyrillus, Lib. I Fab. II.

(x) Plautus Menechm. Act. V Sc. VII V. 33.

Nam absque te esset, hodie nunquam ad Solem occasum viverem.

Terentius Phorm. Act. I Sc. IV V. II.

..... absque eo esset,

Recte ego mihi vidissem.

Sollicita primum curiositas levem
Aget huc emptorum turbam; fors etiam tibi
Plurima politorum hominum insudabit manus:
At, mox severas vel tibi imponet notas
Censura gravis; & vitla, quæ notaverit,
In luce ponet irridenda publica:
Vel, quod gravius est, cum te novitas deseret,
Aut desinet excitare Lectores tuos,
Statim subibit ingravescens tædium,
Et sempiternæ sepeliendum te dabit
Oblivioni: Tum taciturnus (y) inertibus
Præbebis epulas tineis, vel amicies (z) piper.
Prelum hic quievit. At Liber invicem gemens:
Lector, ait, omen benevolus malum obruat!



FABULARUM
ÆSOPICARUM
LIBER SECUNDUS.

PROLOGUS.

CAPIT me fabularum suavis indoles:
Capit venusta munditiæ latinitas
Simplex, & arti prænitens facilis color
Liberosæ. Ergo meas omnes mihi
Fere propellunt mentis ægritudines,
Deleniuntque versibus lepidis suis,
Monitisque doctis Phædrus ac Terentius:
Quibus poetam vix alium felicius

B 3

Utile

- (y) Horatius, Lib. I Epist. XX, ad Librum suum:
Contrectatus ubi manibus fordescere vulgi
Coepis, aut tineas pasces taciturnus inertes,
Aut fugies Uticam, aut vinctus mitteris Ilerdam.
- (z) Idem Lib. II Epist. II lin.
Deferat in vicum vendentem thus & odores,
Et piper, & quidquid chartis amicitur ineptis.

Utile miscere dulci existimaverim.
 Ego porro eorum lene scribendi genus
 Adhibere, quantum licuit, abnisi fui
 His concinnandis fabulis: quarum tibi,
 Lector, secundum exordiar jam nunc librum.

FABULA I.

Malus exspoliata.

ONUSTA pulchris, optimisque fructibus
 Superbiebat Malus: nam quotidie
 Herilis ad se ventitabat familia,
 Modo hoc, modo illud pomum, cui maturitas
 Pretium addidisset, decerpendi gratia.
 Sic illa amicos facere stulta credidit:
 At, præter folia, postquam nil superfuit,
 Eadem repente sese desertam videns:
 Heu! fuerat, inquit, diviti nullus mihi
 Amicus, quoniam nullus est nunc pauperi.

FABULA II.

Cervus & Hinnuleus. (a)

CERVO dicebat Hinnuleus: Tu viribus,
 Tu corpore multum canibus (b) antestas, pater;
 Etiamque magna cornua in capite geris,
 Quibus terribilem capere vindictam queas;
 Timendus ergo potius, cur eos times?
 At ille: Quid ea memoras, quorum me pudet?
 Ego fugere quidem nolim; nec possum tamen
 Non fugere, simul audiui latratus canum.

Frustra excitantur, qui timent; quem sinxerit
 Natura timidum, ratio nulla corrigit.
 Tua tamen, Lector, si laboras hoc malo,
 Fata ut sequare, fabula sequens admonet.

FA-

(a) Benferade, Fab. CLVII. Æsopus, Fab. LVI. Faer-
 nus, Fab. XXIII.

(b) Cicero de invent. Rhet. Lib. II Cap. I. Etenim quo-
 dam tempore Crotoniata multum omnibus corporum viribus &
 dignitatibus antesteterunt.

FABULA III.

Lepores & Ranæ. (c)

LEPORES perpetuis concitos terroribus
 Cepit aliquando magnum vitæ tædium:
 Facto conventu, denique statuunt mori.
 Quid enim? timere semper, hocine vivere est?
 Cuncti ergo luctu perditī, silentio
 Undam palustrem stagni vicini petunt,
 Finire vitam certi sub medio lacu.
 Mœsta autem stagno cum propinquavit cohors,
 Perterresactæ saltu se subito in aquas
 Misere Ranæ. Hic unus exclamans Lepus:
 Heus, inquit, socii, quantus hic nostri quoque
 Timor, videte, & inceptis abssistite.
 Perstemus animis: timidi non adeo sumus,
 Ut inveniri timidiores non queant.

FABULA IV.

Vulpis & Gallina. (d)

INGRESSA Vulpis Gallinarum tugurium,
 Nido ægrotantem Gallinam invenit; rogat
 Quomodo valeret. Illa refert: Si tu hinc, soror,
 Abires, certe haberem me meliuscule.
 Bonos malefici solo discessu juvant.

FABULA V.

Testudo & Aquila. (e)

ARTEM volandi contumax addiscere
 Testudo voluit, & Aquilam elegit sibi
 Magistram. Ab ejus natura alienum nimis
 Hoc esse dixit Aquila: enixius tamen

B 4

Urgen-

(c) La Fontaine, Lib. II Fab. XIV. Benferade, Fab. CLX.
 Æsopus, Fab. LVII. Gudius in appendice ad Phædrum,
 Fab. II.

(d) Richer, Lib. V Fab. XX. Benferade, Fab. CLXXXI.
 Philib. Hegemon, Fab. XI. Locmanus, Fab. XXXIII. Ga-
 brias, Fab. LXV.

(e) Benferade, Fab. XCV. Æsopus, Fab. LXI. Avienus,
 Fab. II.

Urgentem, & obstinatam accepit unguibus,
Tulitque in auras. At ubi dimissa hæc fuit,
Cecidit in saxum, & effracta periiit domo.

Natura dux est optima: ut juvat hanc sequi,
Sic ire contra impune nulli contigit.

FABULA VI.

Puer & Agricola. (f)

DUM pasceret oves, ter, quaterve per jocum
Puer, lupum adesse clamitans, exciverat
Agricolas. At opem postulare serio
Cum cogeretur, hi delusi sæpius
Jam non subveniunt; & lupus prædam rapit.

Mentiri assueto, vel si (g) verum dixerit,
Fidem non facile haberi, hoc exemplum probat.

FABULA VII.

Bubulcus & Leo. (h)

QUÆRENS Bubulcus, quem juvenicum amiserat,
Lustravit omnem frustra solitudinem;
Denique invenire posse desperans, Jovi
Supplicat; & hædum, si sibi furem modo
Ostendere velit, ipsi mactandum vovet.
Inde proficiscens, in quercetum devenit,
Ibique reperit, quem Leo vorabat, suum
Juvenicum. Trepidus igitur, & perterritus,
Manusque tendens supplex ad cælum: O bone,
O sancte Jupiter, ait, voveram quidem
Tibi hædum, si fur inveniretur mihi:
Nunc voveo Taurum, si furem vitavero.
Humana sæpe vota perniciem petunt.

FA-

(f) Richer, Lib. VI Fab. XIX. Le Noble, Fab. CXLI.
Benferade, Fab. LXXXVII. Æsopus, Fab. CCLXX. Bar-
landus, Edit. Rob. Steph. pag. 144.

(g) Phædrus, Lib. I Fab. X.

Quicumque turpi fraude semel innotuit,
Etiam si verum dicit, amittit fidem.

(h) La Fontaine, Lib. VI Fab. I. Philib. Hegemon,
Fab. XXI.

Æsopus, Fab. CXXXI. Faernus, Fab. LXXV.

FABULA VIII.

Grues & Anseres. (i)

AGRUM vastabant juncti Gruibus Anseres.
 Quod cum audiissent Rustici illuc se ferunt.
 Grues, simul eos aspiciunt, simul avolant;
 Verum capiuntur Anseres, dum corporis (k)
 Onere impeditos pigra solo retinet mora.

Suis fortuna quem saginavit bonis,
 Non facile emerget præsentis periculo.

FABULA IX.

Mula. (l)

RECREATA posito largius Mula hordeo
 Lasciviebat, inordinatos impetus
 Molita. Talem me genuit videlicet
 Equus, ait, esset cursu qui celerrimus,
 Cui similis ego sum. Sed paulo post contigit,
 Ut eadem cessaret, ubi currendum fuit,
 Vixque ambulare posset. Tum dixit gemens:
 Equi putabam celeris me esse filiam;
 Sed Asinum mihi fuisse nunc memini patrem.
 Adversa (m) stultos admonent fortis suæ.

FABULA X.

Mors & Rusticus. (n)

VETULUS redibat Rusticus e silva, ferens
 Vix se, suumque fascem. Victus denique
 Labore, & annis, posuit infelix onus.

B 5

Tum

(i) Richer, Lib. II Fab. XI. Æsop. Fab. LX. Locmanus, Fab. XXXVII.

(k) Phædrus, Lib. III Fab. VII V. 4.

..... Unde sis, quæso, nites?
 Vel quo cibo fecisti tantum corporis?

(l) La Fontaine, Lib. VI Fab. VII. Benferade, Fab. CLXXI.
 Æsopus, Fab. CXL. Faernus, Fab. XXIX.

(m) T. Livius, Lib. V Cap. LI. *Adversa deinde res admonuerunt religionum.*

(n) La Fontaine, Lib. I Fab. XV & XVI. Boileau, Tom. II. Rousseau, Tom. II. Æsopus, Fab. XX. Faernus, Fab. X. Tanaq. Faber ex Arabico Locmani, Fab. XIV. Jaius, Tom. II pag. 740.

Tum cogitare coepit tristis omnia
 Quaecumque perfert nunc, vel olim pertulit.
 Nam quas faventis ille fortunæ vices
 Habuit, ad annos si retro elapsos velit
 Animum referre? paupera primum in casa
 Vitam (o) auspicatus, miseras inter miser
 Reptavit infans: hinc malorum quis modus?
 Vel quando duri ferreum fati ordinem
 Explere paulum destitit? conjux mala:
 Desidia inertes liberi: immodicis herus
 Juvandus operis: milites, domesticam
 Quis saepe oportet præbere supellestem:
 Rigidus coactor: creditor impatiens moræ:
 Victus facultas rara: perpetuus labor;
 Ac denique mali plurimum; prope nil boni:
 Quæ dum recenset omnia, & simul inspicit,
 Imaginem præsentis infortunii
 Senex misellus, calamitatis ad gradum
 Venisse summum se putat: mortem invocat.
 Adest: Quid, inquit, me rogas? . . . Fascem hunc, age,
 In humeros ut recipiam, me, precor, adjuva.
 Mali medela Mors venit, gravius malum.

FABULA XI.

Idem Argumentum.

FASCEM lignorum Rusticus, senex miser,
 Portabat ægre: longiore sed via
 Fractus, victusque, abiecit infelix onus:
 Mortem invocavit. Mors advenit. Tum Senex:
 Fascem, ait, in humeros hunc mihi reponas precor.

FABULA XII.

Agricola & ejus Filii. (p)

PUGNARE inter se Filios quotidie
 Suos Agricola cum videret, nec satis

Potis

(o) Plinius, Hist. Lib. VII, proem. *Jacet fens, animal ceteris imperaturum; & a suppliciis vitam auspicatur.*

(p) La Fontaine, Lib. IV Fab. XVIII. Benferade, Fab. XCIII. Laur. Valla, Edit. Rob. Steph. pag. 56, cujus verba nonnulla retinuimus.

Potis esse eos in gratiam reducere ;
 Jubet complures virgas afferri sibi,
 Omnesque in unum deinde fascem colligat ;
 Tum fascem caperent, ac perfringerent, monet :
 Quod illis vero efficere non valentibus ;
 Virgas dissolvit, frangendasque singulas
 Tradit, statimque cum fregissent : Vos, ait,
 Vos pariter arētis unanimitas (q) nexibus
 Si societ, eritis firmi, inexpugnabiles ;
 Sin dissociarit invida æmulatio,
 Facilem offeretis hostibus victoriam.

Hæc vera quam sint monita providi patris,
 Nemo est, opinor, qui mecum non sentiat ;
 Res tamen ut etiam fieret omnibus magis
 Perspecta, placuit addere exemplum sequens.

FABULA XIII.

Tauri quatuor & Leo. (r)

SANXERE Tauri quatuor (s) periculum
 Cujusque ut omnes reputarent proprium sibi.
 Simul pascentes hos videt Leo, nec tamen
 Conjunctos audet aggredi, quanquam esurit :
 Primum ergo verbis dat operam fallacibus ;
 Segregat ; ac demum segregatos enecat.
 Addit vim invictam fortibus concordia :
 Discordia frangit ipsam fortitudinem.

FA-

(q) Titus Livius, Lib. IV Cap. VIII. *Eumerem, Attalum-que fratres . . . - cuiuslibet Regum hujus ætatis nullare magis, quam fraterna unanimitate regnum æquasse.*

(r) Benferade, Fab. CVIII. Le Noble, Fab. CIX. Aphthonius, Fab. XVI. Avienus, Fab. XVIII. Tanaq. Faber ex arabico Locmani, Fab. I.

(s) Non modo littera t geminanda non est in voce *quatuor*, ut longa prima syllaba fiat, sed etiam brevem unquam ab ullo vetere Poeta factam illam fuisse non puto.

FABULA XIV.

Lupus & Ovis. (t)

MULCATUS olim (u) morsibus diris canum
 Lupus jacebat potus & cibi indigens;
 O. em rogavit, potum ut afferret sibi,
 Perituro, ex unda prætereuntis fluminis:
 Si enim tu potum dederis, ait, egomet cibum
 Inveniam facile. At illa, fraude cognita,
 Sic retulit: Potum stulta si darem tibi,
 Cibum invenires facile; me ipsam scilicet.
 Periculosum est adjuvare maleficum.

FABULA XV.

Gallina Ova pariens Aurea. (x)

QUOD lucrum habetur in manibus, hoc sæpius
 Habendi plura cupiditate amittitur.
 Ille bebat aliquis ova parientem aurea
 Gallinam: homo (y) meus hanc auro plenam ratus
 Cædit, aliisque gallinis similem invenit.

FABULA XVI.

Lupus & Anicula. (z)

JEJUNIUS obambulabat, escam quæritans, Lupus.

(t) Benferade, Fab. CCII. Æsopus, Fab. CVI.

(u) Terentius Adelph. Act. I Sc. II V. 9.

. Ipsum dominum, atque omnem familiam
 Mulcavit usque ad mortem.

Cicero orat. pro Mil. Cap. XIV. *Qua in turba C. Vibienus ita est mulcatus, ut vitam amiserit.* Ibi enim *mulcatus*, non *multatus* legendum est; quod & ratio ipsa non minus aperte, quam optimorum codicum fides, demonstrat. Aliud est igitur, multare morte: aliud, mulcare usque ad mortem. Vide præterea notam ad Fab. XXXII Lib. V. Part. II.

(x) La Fontaine, Lib. V Fab. XIII. Benferade, Fab. CXX. Æsopus, Fab. CXXXVI. Avienus, Fab. XXXIII.

(y) Phædrus, Lib. V Fab. VII V. 32.

. Homo meus se in pulpito
 Totum prosternit. Plaudit illudens Eques.

(z) La Fontaine, Lib. IV Fab. XVI. Benferade, Fab. XCIV. Philib. Hegemon, Fab. XIII. Æsopus, Fab. CXXXVIII. Aphtonius, Fab. XXXIX. Avienus, Fab. I. Faernus, Fab. LXXVI.

Lupus. Profectus ad locum quemdam, audit
 Puerum plorantem, dicentemque Aniculam:
 Plorare desine. Pergis? Tradam te Lupo.
 Ratus locutam serlo Aniculam Lupus,
 Expectat ad multam horam; sed cum vespera
 Demum advenisset, rursus audit puerulo
 Ablandientem: Dormi, pupe mi; huc Lupus
 Si venerit, eum continuo mactabimus.
 Tunc: o dolosos homines, Lupus abiens ait,
 Qui dicunt aliud, aliud facere cogitant!

FABULA XVII.

Ovis & Cornicula. (a)

CORNICULA sedens in Ove dam tergum fodit:
 Injuriam ex te quam patior, inquit Bidens,
 Cani si faceres, ferres infortunium.
 Respondet illa: Quibus ego illudam, scio,
 Molesta placidis, morigera ferocibus.
 Malitia sæpe comitem habet prudentiam.

FABULA XVIII.

Asellus & Equus. (b)

EQUUM labore nimio confectus rogat
 Asellus, ut, se comitem si salvum velit,
 Juvet, onerisque parte paulisper levet.
 Quod ille cum renueret; omnis denique
 Labentem Asellum deserit vigor. Ast herus
 Onus omne, & ejus corium quoque demortui
 Equo reclinat in dorsum; quibus fere
 Oppressus ille: Merito, dixit, heu! meo
 Exerceor nunc, qui laboranti prius
 Asello durus opitulari nolui.
 Qui socio subvenit, ille providet sibi.

FA-

(a) Benferade, Fab. LXIII. Barlandus, Edit. Rob. Steph. pag. 145. Burmannus append. ad Phædr. Fab. XXVII.

(b) La Fontaine, Lib. VI Fab. XVI. Æsopus, Fab. CXXV. Faernus, Fab. XVI. Burmannus append. ad Phædr. Fab. XIV. Jævus Biblioth. Rhet. Tom. I pag. 745.

FABULA XIX.

Leo & Capra. (c)

CONSILIA qui dant, sæpe consulunt sibi.
 Leo conspicatus in rupe morantem Capram,
 Ut pratum in viride potius descendat, monet.
 Capra refert: Faciam; hinc si procul discefferis;
 Qui non, ut melius mihi sit, hoc suades mihi,
 Sed ut habeas tu, quod fores famelicus.

FABULA XX.

Leo Senex & Vulpis. (d)

SENEX cum factus esset Leo, nec querere.
 Sibi victum posset, machinatus est dolum,
 Quo sibi suppeteret alimentorum copia:
 Agros reliquit, intimam coluit specum;
 Ibique se ægrotare simulabat jacens.
 Quæ res ubi fama crebrescente innotuit,
 Undique complures accesserunt belluæ:
 At ipsas capiens singulas necat Leo.
 Vulpis & accedit; arte sed hujus cognita,
 Stat extra limen, hinc salutat, & pedem
 Procul referre celeriter cum jam parat:
 Cur non, ait ille voce blanda conquerens,
 Ingredere, filia? hæc refert: Videlicet
 Venientium ad te multa quidem vestigia
 Impressa video; nulla sed redeuntium.
 Cum se dolosis artibus demitigat,
 Tunc est timenda maxime crudelitas.

FA-

(c) Benferade, Fab. CXIV. Le Noble, Fab. CLVIII.
 Æsopus, Fab. CCXXXIV. Avienus, Fab. XXVI.

(d) La Fontaine, Lib. VI. Fab. XIV. Benferade, Fab. LV.
 Philib. Hegemon, Fab. IX. Æsopus, Fab. CXXXVII.
 Faernus, Fab. LXXIV. Tanaq. Faber ex Arabico Loc.
 manj, Fab. VI. Burmannus, append. ad Phædr. Fab. XXX.

FABULA XXI.

Fringuilla. (e)

AUCEPS fringuillam (f) cum cepisset, ac pedem
 Filo alligasset, puerulo hanc dono dedit.
 Sed inter homines illa vitam non ferens,
 Ubi libertatis aliqua se spes obtulit,
 Fugit, notisque nemoribus se condidit:
 Simul autem ramis arboris filum inscia
 Implicar; & ultra jam volare non potest;
 Reperitque mortem, servitutem dum fugit.
 Leve damnum suffer, ne grave incurras malum.

FABULA XXII.

Ranæ duæ. (g)

CUM fureret æstas immodica, suam duæ
 Paludem Ranæ siccata[m] reliquerant,
 Inopesque circum errabant, quærentes aquam.
 Ad puteum tandem deveniunt; utque uberi
 Illum scatere aquarum copia vident,
 Perbibere cupiunt; unaque: Iluc age, o soror,
 Quin, inquit, saltu mittimus corpuscula?
 Sed altera: Hic si puteus aruerit quoque,
 Inde remeare quo valebimus modo?
 Itus est imprudens, de reditu si non liquet.

FABULA XXIII.

Cerva, Venator, & Leo. (h)

VENATOREM olim Cerva fugiens, in feri

Leo-

(e) Æsopus, Fab. CII. Faernus, Fab. LXXXV.

(f) Alii fringuillam, alii etiam fringillam vocant. Verum nomen fringuilla. Varro enim de Lingua Latina, Lib. VI sub. fin. *M. Atilius*, inquit, *in Casina: Quid fringutis? quid istud tam cupide cupis?* Casinæ, Act. II Sc. IV V. 49 Verba ista Plauti leguntur: cuius vulgatæ quidem editiones habent *fringutis*: at *fringutis* vera esse lectio videtur. *Fringutire* autem ab antiquo *fringere* deductum, & id cum sono subsilire esse puto. Vide Notium, Cap. I Sest. XXI.

(g) Benferade, Fab. CXLI. Æsopus, Fab. XIX & CXLVII. Faernus, Fab. XXXVII.

(h) Æsopus, Fab. LXIV. Tanaq. Faber ex arabico Loemani, Fab. VIII.

Leonis antrum se recepit inscia.

Quæ comprehensa dum necatur: Hei mihi,

Quid, inquit, hominem tam celeri prodest pede

Fugisse sævum? savior occurrit fera.

Viras Charibdim frustra, si in Scillam incidas. (i)

FABULA XXIV.

Formica & Columba. (k)

FORMICA sitiens ad fontem descenderat;

Sed illam aquarum fluxus in præceps trahit:

Peribat misera, cum sortem ejus intuens

Columba, miseransque injicit ramusculum:

Quo sublevata naufraga evadit necem.

Post paulo, instructus arcu, quidam Rusticus

Advenit illuc forte; & obviam sibi

Columbam aspiciens, figere hanc telo parat.

Sentit periculum Formica, & piæ timens

Columbæ, talo rustici sese applicat,

Ipsumque mordet, adnitens, quantum (l) potest.

Doloris ille impatiens obvertit caput;

Simulque volucris admonita procul evolat.

Juva, ut juveris; raro beneficium perit.

FABULA XXV.

Apes & ipsarum Dominus. (m)

HERUS dum abesset, dumque Apes quamplurimæ

Labore dulci detinerentur foris;

Ingressus aliquis in mellarium, favos

Diripuit. Mox reversus, ut apiaria

Effracta, inanesque alveolos Herus videt,

Ingemere primum, deinde malo, quaquā licet,

Mede-

(i) Philipp. Gualterus Alexandreidos Lib. V V. 301.

Incidis in Scyllam, cupiens vitare Charibdim.

Qui versus deinde, reposito *incidit* pro *incidis*, in pro-
verbiorum numerum relatus est.

(k) La Fontaine, Lib. II Fab. XII. Benferade, Fab. LXXXVIII.
Æsopus, Fab. XLI.

(l) Terentius And. Act. V. Sc. II V. 20.

Sublimem hunc intro rape, quantum potes.

(m) Æsopus, Fab. LXXXV.

Mederi cœpit. Interim redeunt Apes
 E pastu, herumque nihilominus, ac si mali
 Auctor fuisset, simul omnes aculeis
 Fodicare certant. Tunc: O volucres pessimæ,
 Ait ille, vel dum si laboro sedulus,
 Delere vobis si queam infortunium,
 Meam in perniciem vos agit cæcus furor!
 Aliena damna tempore dextro ni leves,
 Opera sæpe tua damno. vertetur tuo.

FABULA XXVI.

Asinus silvestris, & Asinus domesticus. (n)

SILVESTRIS (o) Asinus Asinum cum domesticum
 Pinguem, & nitentem, & herbas inter primulas
 Vernantis agri luxuriantem cerneret:
 Sorte hujus, inquit, me frui, nam quid vetat?
 Quin adeo &, socium habere me, velit, rogo?
 Secum hæc locutus, venientem dominum videt,
 Clitellas isti qui beatulo suas
 Imponit, moxque cogit hinc sequi ad locum,
 Ubi cæsa fuerant ligna, quæ dorso super
 Congesta si non is satis propere vehat,
 Nodoso fuste dux pigrantem suscitatur.
 Ad sua tum gaudens latibula revertit Ferus:
 Tuasque, non invideo, delicias habe
 Tibi solus, inquit, bajule o patiens nimis!
 Nulla est beata servitus: & hæc mihi,
 Quantumvis misera, contra libertas placet.

FABULA XXVII.

Mus in cista natus. (p)

I N cista natus Mus erat: menses ibi
 Aliquot, quietus, & sua quidem satis

Con-

(n) Æsopus, Fab. CXI.

(o) Varro de re rustica, Lib. II Cap. VI. *Horum genera-
 duo: anum ferum, quos vocant Onagros. In Phrygia &
 Lycaonia sunt greges multi. Alterum mansuetum, ut sunt in
 Italia omnes.*

(p) Abstemius, Fab. I.

Contentus sorte (quippe nil aliud putans
 Melius sibi evenire posse) vixerat.
 Eum tamen incessit aliquando cupiditas
 Hinc exeundi, & explorandi, an hac sua
 Cista pateret mundus multo latius.
 Peregrinandi cupido januam exhibet
 Fissura tenuis: illac prorumpit levis.
 At curiosus singula vix circum incipit
 Lustrare, varias hinc, & hinc dapes videt:
 Degustat omnes: invenit omnes optimas:
 Tunc: O mea, inquit, nil melius cistellula
 Mihi esse posse, quam stultus ego credidi!

Cives ad istos hæc fabella pertinet,
 Qui stulte amantes patrium solum, boni
 Vix alibi quidquam posse reperiri putant.

FABULA XXVIII.

Milvus & Agricola. (q)

COLUMBAM dum persequitur, in laqueum incidit
 Milvus, &, ipsum dedere cum vellet neci
 Agricola: Parce, non enim te læsi, ait.
 At ille: Neque te, opinor, ista læferat.

Mortem innocenti qui parat, jure hanc subit.

FABULA XXIX.

Femina mortem pro Marito appetens. (r)

MORBO jacentem Femina Maritum videns
 Gravissimo, ut qui jam fere succumberet,
 Lamentabatur: An meum poteris mihi,
 Mors dura, barbara, eripere, inquit, Conjugem!
 Desiste, ah! vel si victimam tibi denique
 Mactari oportet, victima en adest; veni.
 Simul hæc verba inter, advocata Mors venit:
 At mulier trepida, non, me ut tolleres, ait,
 Huc te advocavi; victimam cape, en jacet.

Magni-

(q) La Fontaine, Lib. IV Fab. XV. Benferade, Fab. XXXVI. Abstemius, Fab. III.

(r) Richer, Lib. III Fab. VI. Benferade, Fab. CXCV. Abstemius, Fab. LX.

Magnifica verba vanus effundit dolor:
Præfens periculum veras voces exprimit.

FABULA XXX.

Asinus, Simia & Talpa.

DUM conqueruntur, Simia quod desit sibi
Cauda, Asinus autem quod non habeat cornua:
Tacete, dixit Talpa; me miserrimum
Cæcum videtis, & potestis conqueri?
Luctu, & querelis cur ævum consumimus?
Quin intuemur, fors si quem gravior premit?
Misero levamen inferioris est malum.

FABULA XXXI.

Lupus & Hystrix. (s)

HOSTES tibi esse quamdiu cognoveris;
Pugnandi tempus semper esse existima.
Jejunus olim in Hystricem (t) incidit Lupus:
Suis at illa ut rota spiculis erat
Vallata, timuit vi prædator aggredi;
Prætentans ergo rem dolo: Cur sic, ait,
Armata semper, ut in procinctu milites,
Procedis? atqui milites ipsi tamen
Quandoque ponunt arma: nuncque ubi suis
Omnia gubernat pax amica legibus,

C 2

Ho-

(s) Richer, Lib. XII Fab. IX. Benferade, Fab. LXVIII.
Abstemius, Fab. LXIX. Jaius, Biblioth. Rhet. Tom. I pag. 742.

(t) Plinius Hist. Lib. VIII Cap. 35. *Hystrices generat India & Africa, spina contestas, ac Herinaceorum genere: sed Hystrici longiores aculei, & cum intendit cutem, missiles.*
Calpurnius Ecloga VI V. 13.

..... Hirsuta spinosior Hystrice barba.
Hystricem masculini generis facit Claudianus Eidyllio II
V. 4. Ceterum hanc ille belluam ibidem fusc lateque describit.

..... Stat corpore toto
Silva minax jaculisque rigens in prælia crescit
Picturata seges

..... Tortumque per auras
Evolat excusso nativum missile tergo.

..... Fert omnia secum:

Se pharetra, sese jaculo, sese utitur arcu.

Unum animal cunctas bellorum possidet artes.

Hostem tu sola quem times, vel quem petis?
 Age vero, hæc arma pone, quæ te dedecent,
 Corpusque tandem delicatum libera.
 Cui retulit Hystrix: Adversus similes tui
 Me stare semper armatam decet, ac juvat.

FABULA XXXII.

Equus ægrotans & Canis. (u)

EQUUS ægrotabat; mandere assuetus Canis
 Projecta cadavera, illum visitat, rogans,
 Quomodo se haberet: Melius, inquit, quam velis.
 Fabella spectat ad avarum hæredum genus.

FABULA XXXIII.

Vir Eruditus, & Trossulus. (x)

VIRUM eruditum, cum suis solum libris
 Bene otiantem quidam adivit Trossulus
 Petulanter, ut sit, irridendi gratia,
 Bellos quod homines sic perosus scilicet,
 Vitam inficetis solus in tenebris agat.
 At ille: Nunquam memini me, dixit, magis
 Fuisse solum (y) quam cum nunc mecum hic ades.
 Si tantum ineptus, nec etiam fuerit malus,
 Nihili mensuram Trossulus totam replet.

FABULA XXXIV.

Canis infidelis, & Pastor. (z)

OVES custodiendas tradiderat Cani,
 Cani infideli Pastor, ignarus mali.
 Namque ille vitiis corruptus, mores feros
 Luporum cœperat imitari, & plurimas
 Ore impiato jam bidentes manderat.

Quod

(u) Richer, Lib. III Fab. XVII. Le Noble, Fab. CXL.
 Abstemius, Fab. LXIV.

(x) Richer, Lib. VIII Fab. II. Benferade, Fab. CXCIX.
 Abstemius, Fab. LXXV.

(y) Cicero de Offic. Lib. III Cap. I Init. *Pab. Scipionem . . .
 dicere solitum scripsit Cato . . . nunquam se minus otiosum
 esse, quam cum otiosus; nec minus solum, quam cum solus esset.*

(z) Abstemius, Fab. LXXVIII.

Quod execrandum Pastor ut novit scelus,
 Simul expiare morte scelerati parat.
 Mene, Canis inquit, me quasi si lupus forem,
 Mactare possis, here mi, violenta manu?
 Reserva tales hostibus poenas lupis:
 Prudensque serva me tibi addictum Canem.
 At Pastor: Hostes sunt mihi quidem lupi:
 Hostes sed illi sese profitentur meos:
 Te contra, amicus qui videbaris mihi,
 Nunc morte tanto digniorem judico,
 Scelere lupino quod fefelleris fidem.
 Hos fabula esse bis sceleratos indicat,
 Quos ad patrandum perfidia movit scelus.

FABULA XXXV.

Lucius late regnandi cupidus. (a)

IN amne, pisces qui satis multos sinu
 Aleret profundo, regnabat ferus, & potens
 Dominator olim Lucius (b). At eum piger,
 Riparum iniquas objici moras (c) suæ
 Rapacitati: & Hæc, ait, nobis vago
 Quæ pectus igne subigit, ac depascitur
 Cupiditas, sese finibus angustis gemit
 His contineri; quærendum est, ubi latius
 Excurrere possit: Memini cum mihi diceret
 Peregrinus iste Salmo (d), commode satis
 Patere tractus oceani! certe hos lubet
 Invadere: Meis legibus Neptunios
 Compellere greges, non adeo magnus labor
 Hic undique nostris imperare piscibus,
 Superbeque dominari, ludus est mihi.
 Vix ea locutus, prono fertur alveo,

C 3

Petit-

(a) Abstemius, Fab. LXXXII.

(b) Lucium memorat Aufonius in Mosela V. 122. ad quem locum Vinetus: *Santones*, inquit, *mei BEQUET vocant...*
Alii Galli etiam BROCHET.

(c) Virgil. *Æn.* Lib. IX V. 143.

Fossorumque moræ.

(d) Plinius Hist. Lib. IX Cap. XVIII. *In Aquitania Salmo fluviatilis marinis omnibus præfertur.*

Petitque pinna præcipiti, quantum (e) potest
 Fluctus marinos: sed in ipso amnis ostio
 Captum marinus hunc lupus perforbuit.

Ambitio injusta, quantis afficeret malis
 Hunc orbem, haberes ni dementia ducem!

FABULA XXXVI.

Asellus viridis. (f)

ASELLUM quidam per vias urbis suum
 Voluit colore viridi pictum incedere.

Ridicula primum visa res est omnibus;
 Viridemque Asellum feminæ, pueri, senes
 Certatim lepidis concelebrarunt jocis:

At mox ubi illi denique riserunt satis,
 In Asello viridi præter Asellum nil vident.

Mirari quidquam non valent homines diu.

FABULA XXXVII.

Leo & Rana. (g)

VALDE loquacem cum Ranam audisset Leo,
 Timuit, & aliquod esse magnum animal putans,
 Retro se vertit: at mox e stagno videt
 Ranam exeuntem, quam indignans calcat pede.

Falsos timores ingenerare fortibus
 Periculosum quam sit, exemplum hoc probat.

FABULA XXXVIII.

Agricola & Fortuna. (h)

AGRICOLA, terram fodiens, thesaurum invenit,
 Aufertque, nec eum Fortunæ acceptum refert;
 Sed etiam meritis debitum credit suis.
 Thesaurum hinc aliquot post dies fur subripit:

Affi-

(e) Terent. Adelph. Act. III Sc. II V. 52.

..... Tu, quantum potes,

Abl.

(f) Abstemius, Fab. LXXX.

(g) Æsopus, Fab. XXXVII.

(h) La Fontaine, Lib. VII Fab. XIV. Richer, Lib. XII
 Fab. XIII. Æsopus, Fab. LXXXII. Avienus, Fab. XII.

Afflictus ergo luctu inconsolabili (i)
 Agricola questibus omnia infanis replet,
 Et aspera inter verba Fortunam increpat.
 Cur me, inquit illa, gravibus immeritam probris
 Lacerassis? atque, quod tibi ereptum est bonum,
 Mei faventis munus hoc si non fuit,
 Mei resstantis crimen hoc cur nunc vocas?

FABULA XXXIX.

Tulipa.

HABEBAT aliquis maximæ Tulipam (k) spei,
 Ac singulari quæ jam pulchritudine
 Oculos tuentum dulci retineret mora;
 Tam recto caule, tamque procero suas
 Attollebat opes: tam rotundatus bene
 Tam scita incurstantes differentia
 Calix colores explicabat vividos!
 Florum eruditi quotquot amatores erant,
 Cupiditate omnes curiosa perciti,
 Visuri adibant Tulipam formosissimam,
 Omnes amabant, omnes cupiebant sibi
 Habere propriam; quorum unus versutior,
 Audaciorque ceteris, illam, data
 Occasione, furaci abstulit manu.

Difficile custoditur, quod multis placet.

FABULA XL.

Pueri & Ranæ. (l)

PUERI ad inertis stagni venerant aquam

C 4

Ranis

(i) Ovidius Metam. Lib. V V. 426.

..... Moerens inconsolabile vulnus

Mente gerit tacita.

Cicero ad famil. Lib. IV Epist. III med. *Est omnino vix
 consolabilis dolor.*

(k) Vossius de Vitiis Sermonis, Lib. II Cap. XVIII pag.
 306, 307. *Tulipa flos e Turcia adlatus qui pi-
 leum turcicum refert Pileus Turcicus sic vocatus (Tu-
 lipantum) videtur a figura globosa, qua refert τολυτην, hoc
 est lanam purgatam, inque globos compositam, ut colo adapte-
 tur Tulipantum (Tulpam, quod nos vocamus Tur-
 ban) ejusdem esse originis arbitror, ac Tulipa.*

(l) De la Motte, Lib. III Fab. V Camer. Fab. CDXVII.

Ranis refertam; simul in ripa confident;
 Simul, bacillis instructi ut longis erant,
 Modo hanc, modo illam, si caput forte efferat,
 Ranam jocantes mulcant (m) ac dedunt neci.
 Tum procul exclamat una: O barbari, quibus
 Hæc tanta clades nostra dulcis est jocus!

Ad hos fabella pertinet, quorum procax
 Sæpe dominatus miseros ludendo opprimit.

FABULA XLI.

Pisces. (n)

JACTIS in undas retibus, magni quidem
 Capti sunt Pisces; at minuti se simul
 Extricavere, facile permeantibus
 Corpusculis fenestras lineæ domus.

Fortuna raro summis injiciens manum
 Fallitur: in imos manca (o) sæpius ruit.

FABULA XLII.

Puer & Coluber. (p)

O BAMBULANDO reperit Colubrum Puer
 Gelu rigentem; quem recepit in sinum
 Misericors & refovit, inscius mali.
 At ille, pristinus ubi redditus est vigor,
 Furit, impioque dente beneficium necat.

Scriptum est in hominem, qui nuper miserrimus,
 Nunc opprimit salutis auctorem suæ.

FA-

(m) Vide not. ad Fab. XIV hujus libri.

(n) Benferade, Fab. CIII. Æsopus, Fab. CLVII.

(o) Horatius, Lib. II Sat. VII V. 88.

In quem manca ruit semper fortuna.

(p) Benferade, Fab. VIII. Æsopus, Fab. CLXXIII. Phædrus, Lib. IV Fab. XVI. Mea autem hæc Fabula, sed & decima Libri tertii, ac decima octava Libri quarti imprudenter quidem, & contra quam proposueram, concinnatæ a me atque editæ sunt: eas etiam repudiare decreveram: at postmodum esse hoc nomine servandas censui, quod paulo diversam a ratione Phædri, neque tamen absurdam exhibere rationem visæ sunt.

FABULA XLIII.

Rosæ & Amarantus. (q)

QUIS non coloris nostri purpureum decus,
 Quis non odoris suaves delicias amat?
 Dixit Amaranto nimium sibi placens Rosa.

Amarantus autem : Nil, ait, mihi quidem
 Contingit horum simile; sed vivo diu.



FABULARUM ÆSOPICARUM

LIBER TERTIUS.

PROLOGUS.

FABELLÆ, ab ipso quas Æsopi nomine
 Nostri priores (a) dixerunt Æsopias (b),
 Placere prisca Græciæ doctæ viris,
 Summisque: nec eas, tanquam aniles nœnias,
 Infantibusve pueris vendibiles jocos,
 Contempsit ulla docta gens mortalium.
 Pater Sophorum, magnus ille Socrates,
 Dignas putavit (c) quas poliret versibus,
 Suffragioque muniit postquam suo,
 Has esse jam omnibus approbandas quis neget?

C 5

Ist.

(q) Benferade, Fab. CXXXI. Æsopus, Fab. CCLXXIX.

(a) Plinius Jun. Lib. III Epist. IV. *Veniebat in mentem, priores nostros, &c.* quo nomine veteres ille Oratores vocat.

(b) Dicit etiam possunt Æsopææ, ut Phædrus, Lib. V Prol. V it eas appellat. Sic & Cicero, Acad. Quæst. Lib. II Cap. XLVIII. *Ad patris revolvor sententiam: quam quidem ille Carneadeam esse dicebat.* Et ad famil. Lib. VII Epist. XIX. *Institui Topica Aristotelea conscribere.* Pro quo etiam *Aristotelica* aliæ editiones exhibent. Libro autem de Orat. III Cap. XIX. *Vobis hæc Carneadia, aut illa Aristotelica vis comprehendenda est.*

(c) Plutarchus de audiendis Poetis non longe ab exordio Plato in Phædone, & alii.

Igitur materiam, quam mihi sumpsi in manus,
 Festivitate liberali cum sciam
 Pollere; & esse moribus etiam utilem;
 Hanc ego cavere diligenter debui,
 Ne culpa tenuis ingeni corrumperem:
 Atque his profecto ceterisque fabulis,
 Quascumque fingere experiar Phædri stilo,
 Conabor, ullo sed sine labore anxio,
 Uti suam adsit non inconveniens (d) decus.

FABULA I.

Sol & Aquilo. (e)

SOL quondam & Aquilo, uter foret valentior,
 Delitigabant. Demum, iter qui carperet,
 Hominem videntes: In eum vires, inquirunt,
 Vicissim nostras experiri quid vetat?
 Sciscunt (f), ut, ipsi pallium qui excusserit,
 Is jure merito sese victorem ferat.
 Tum primus Aquilo flatibus horrifonis furit:
 At se viator contra vim venti arctius
 Involvit. Ergo, postquam profecit nihil
 Aquilo, calentem Sol emolitur facem,
 Radiosque sensim in intimam insinuans cutem
 Viatoris agit. Ille mox exæstuat:
 Mox & gravi humeros pallio sponte exuit.

Vim vi repellunt homines plerumque: ast eos,
 Quo vult, volentes pertrahit benignitas.

FABULA II.

Agricola & Ciconia. (g)

SATA depascebant læta Grues & Anseres.
 Laqueum tetendit Agricola; eosque & simul

Cepit

(d) Phædrus, Lib. III Fab. XIII V. 6.

Non inconveniens corpus, & par est color.

(e) La Fontaine, Lib. VI Fab. III. Philib. Hegemon, Fab. VI. Camerarius, Fab. CCCLX. Tanaq. Faber ex Arabico Locmani, Fab. XVIII. Jānus Biblioth. Rhet. Tom. I pag. 741.

(f) Cicero de Offic. Lib. III Cap. XI. *Athenienses sciverunt; ut Æginetis . . . pollices præciderentur.*

(g) Benserade, Fab. LXXXVI. Æsopus, Fab. CLXXV.

Cepit Ciconiam. Illa vero supplicat;
 Et se innocentem dicit; & neque Gruem,
 Neque Anserem esse; sed avium omnium optimam (h),
 Ut quæ pie parentes revereri suos,
 Senioque fractos alere consueverit (i).
 Etiamque campis operam, ait, navo utilem,
 Angues (k), lacertas, pestesque id genus, vorans.
 Hæc omnia, inquit ille, veta sint licet,
 Quando tamen capta es una cum nocentibus,
 Quam meruere illi, tu quoque subibis necem.
 Qui focium hominibus flagitiosis se dedit,
 Flagitil pœnas jure dat, vel innocens.

FABULA III.

Piscator & Pisciculus. (l)

PISCATOR in aquas cum jecisset hamulum (m)
 Pisciculum eduxit. Orat ille, & obsecrat,
 Ut sese abire, sic minutulum (n), sinat:
 Crescam, ait, interea; cumque factus grandior
 Fuero, majore tunc me recipies lucro.

Pisca-

(h) Cælius Rhodiginus Lestion. antiq. Lib. XI Cap. XVII.
*Si quidem, ut auctor Ambrosius est, Ciconia romano usu pia
 vocatur; quod pulli parentibus jam senio confectis, nec ali-
 menta sibi conquirere satis valentibus, in retributionem mi-
 tuam, tacita quidem; sed alta naturæ vi in id propellente,
 necessaria summo studio, quod in homine ratum est, suggerunt.*

(i) Phædrus, Lib. I Fab. XI V. 5.

Ut insueta voce terreret feras.

Lib. III Prol. V. XIV.

Ut assuetam fortius præstes vicem.

Lib. IV Fab. VII V. 8.

Omne adfuevi ferrum quæ corrodere.

(k) Juvenalis Sat. 14 V. 74.

..... Serpente Ciconia pullos

Nutrit, & inventa per devia rura Lacerta.

(l) La Fontaine, Lib. V Fab. III. Benferade, Fab. CXI
 & Fab. CXXXVI. Æliopus, Fab. CXXIV. Avienus, Fab. XX.

(m) Plautus Stich. Act. II Sc. I V. 17.

Arundinem fert, sportulamque, & hamulum piscatorium.

(n) Plautus Poenul. Prol. V. 28.

Nutrices pueros infantes minutulos

Domī ut procurent, neu quæ spectatum afferant.

Piscator autem: Tu tamen in Sartagine
Mitteris, inquit: *pretio nam spem non emo* (o).

FABULA IV.

Membra & Venter. (p)

PRO se querentes, proque membris cæteris,
Ventrem incusarunt aliquando Pes, & Manus,
Quod otiosus bona voraret omnia.
Demum laboret, vel cibum ne postulet,
Edicunt. Ille semel, iterumque supplicat;
Nequicquam. Contumaces alimentum negant.
Exhaustus ergo longa venter deficit
Inedia: at pariter Membra deficiunt. Suum
Tunc fungi voluit, at sero, officium Manus:
Nam factus Venter nimia desuetudine
Debrior, omnem repulit omnino cibum.
Sic membra denique, male dum Ventri invident,
Pereunt eodem, quo perit venter, modo.

Quos maxime cessare vulgus iudicat,
Ab his sæpe opera maxime utilis datur.

FABULA V.

Canis & Bos. (q)

PLENO accubabat forte præsepi Canis:
Ut carpat escam. Bos accedit: Hirriens (r)
Vetat hic. At ista cum tua invidentia
Di te, Bos inquit, perdant, qui non vesceris
Fæno isto, & alios vesci eodem non sinis!

Hæc

(o) Verba ista sunt Terentii Adelph. Act. II Sc. II. V. II.
Quorum quidem sensus est, *Ego bonum præsens pro lucro incerto non pacifcor.*

(p) La Fontaine, Lib. III Fab. II. Benferade, Fab. XLII.
Anonymus a Neveleto editus, Fab. LV. Regnierius, Part. II
Fab. IV. Tanaq. Faber ex Arabico Locmani, Fab. XVII.
Jaius Biblioth. Rhet. Tom. II pag. 752.

(q) Richer, Lib. VII Fab. III. Benferade, Fab. LXXIV.
Le Noble, Fab. LVI. Barlandus, Edit. Rob. Steph. pag. 145.
Cujus fati multa verba retinuimus. Camerarius, Fab. CCXII.

(r) Festus *Hirrire*; *quod genus vocis est canis rabiosa.*
Hinc Sidonius Apollinaris, Lib. IV Epist. VII. *Est canibus unatum, ut, etsi non latrant, tamen hirriant.*

Hæc invidorum abominanda est indoles:
Quibus uti nequeunt, neminem his frui volunt.

FABULA VI.

Puer & Fortuna. (s)

AD oram putei dormiebat Puerulus,
Eum fortuna suscitans, abi hinc, ait;
In puteum namque si caderes, non hanc tuam
Fuisse culpam, sed meam omnes dicerent.

FABULA VII.

Camelus & Jupiter. (t)

CAMELUS olim fortis pertæsus suæ
Conquestus est; armari taurum cornibus;
At sese inermem ceteris animalibus
Objectum: cornua ergo donari sibi
Jovem rogavit. Deus at iratus preces
Audire ineptas non recusavit modo,
Sed etiam auriculas decurtavit bestię.
Fortuna vivat quisque contentus sua.

FABULA VIII.

Lupus & Hædus. (u)

CAPRA pastum itura stabulo Hædum concluderat,
Aperire nemini, ipsa dum redeat, monens.
Quod cum audiisset, post paulo accedit Lupus;
Pulsat; caprinamque imitatus vocem, jubet
Fores recludi. At Hædus sentiens dolos:
Non aperiam, inquit; ad me vox meat quidem
Caprina; sed per rimulas video Lupum.
Diffidere si quos, maxime tenues decet.

FA-

(s) La Fontaine, Lib. V Fab. XI. Benferade, Fab. CLXX.
Æsopus, Fab. LVI. Rimicius, Edit. Rob. Steph. pag. 191.

(t) Benferade, Fab. C. Æsopus, Fab. CC. Avienus, Fab. VIII.

(u) La Fontaine, Lib. IV Fab. XV. Benferade Fab. XXVII. Anonymus, à Nevelto editus, Fab. XXIX. Hermannus, Edit. Rob. Steph. pag. 122. cujus verba nonnulla retinimus. Burmannus append. ad Phæd. Fab. XXXII.

FABULA IX.

Oves & Lupi. (x)

Oves Luposque, pace facta junxerat
 Solemne fœdus, utrinque obsidibus datis.
 Oves dedere vim canum, catulos Lupi.
 Sed illæ cum vix inceperant simplices
 Liberius agere, & pace properarent frui;
 Catuli ecce, matrum desiderio perciti,
 Ululatus edunt. Audiunt lupi; irruunt,
 Fidemque læsam criminantur, ac Oves
 Laniant, heu! destituras præsidio canum.
 Pax fraudulenta bello ipso pejus malum.

FABULA X.

Vulpis & Caper. (y)

In puteum Vulpis, & Caper descenderant,
 Sitim ut levarent. Cum bibissent, & Caper
 Respicere circum inciperet, de reditu anxius:
 Bono animo es, inquit Vulpis; hinc enim prius
 Reputavi mecum qui possimus egredi.
 Namque ad parietem si admovebis te modo,
 Pedibusque corpus posterioribus eriges,
 Mentoque ad pectus adducto ista cornua
 Reclinabis, ego per tua terga transiens
 Evadam e puteo, teque educam postea.
 Tali consilio Barbatas habuit fidem,
 Et id omne fecit, quod erat præceptum sibi.
 Ergo illa remeat. Quæ quidem dum gaudio
 Elata gestit putei in ipso margine,

Nec

(x) La Fontaine, Lib. III Fab. XIII. Benferade, Fab. XXXVIII. Æsopus, Fab. CCXLI. Aphonius, Fab. XXI. Hermannus, Edit. Rob. Steph. pag. 130. cujus verba non pauca retinuimus. Camerarius, Fab. CCXVIII. Burmannus append. ad Phædr. Fab. XXI. Jaius, Tom. II pag. 745.

(y) La Fontaine, Lib. III Fab. V. Benferade, Fab. LI. Æsopus, Fab. IV. Phædrus, Lib. IV Fab. VIII. At paulo aliter, pauloque jejuniis, quam Æsopus, aut quisquis ille est, qui sub ejus nomine latitat; eus quidem singulis fere vestigiis insistendum esse nobis credimus. Vid. not. ad Fab. XLII. Lib. II.

Nec curat, socio quid futurum sit suo:
 Dolosa, perfida increpatur: at refert:
 Age tamen, Hirce; si quantum in mento geris
 Setarum, in mente tantum esset sensus tibi,
 An prius, amabo, puteum in hunc descenderes:
 Quam provideres, an remeandi sit via?
 Veramur hoc exemplo quidpiam aggredi,
 Nisi præsenferimus exitum facilem fore.

F A B U L A XI.

Mulier & Gallina. (z)

GALLINAM habebat Mulier, quæ quotidie
 Pariebat ovum: bina sed, pro singulis,
 Ova parituram, si plus escarum daret,
 Sperans, incœpit educare lautius.
 Gallina vero mox effecta pinguior,
 Ovum inde parere ne potuit unum quidem.
 Tardat, hebetatque luxus hominum industriam.

F A B U L A XII.

Cancer & Vulpis. (a)

MARE Cancer olim deseruit, in litore
 Pascendi cupidus. Vulpis hunc simul aspicit
 Esuriens, simul accurrit; & prædam capit.
 Næ, dixit ille, iusta patior, qui salo
 Cum fuerim natus, voluerim solo ingredi!
 Suus unicuique præfinitus est locus,
 Quem præterire sine periculo non licet.

F A B U L A XIII.

Musicus. (b)

BENE incrustatam calce Musicus domum,
 Rudis canendi, habebat: in qua dum canit,
 Sibi resonantem plenius vocem putat
 Valde canoram. Factus hinc superbior:
 In publico, inquit, me theatro protinus

Au-

(z) Benferade, Fab. CCXIII. Æsopus, Fab. XXIV. Laur. Valla, Edit. Rob. Steph. pag. 57. cujus verba nonnulla retinimus. Tanaq. Faber ex arabico Locmani, Fab. XII.

(a) Æsopus, Fab. XCV.

(b) Æsopus, Fab. XCVI.

Audiri oportet. At experiendi gratia
 Illuc profectus, tristem & exilem sonum
 Cum distribueret tertios vix ad gradus,
 Exhibilatur (c) protinus, & exploditur.

Scholarum in umbra qui latens placuit sibi,
 Placuisse stulto clara lux sæpe hunc probat.

FABULA XIV.

Canis & Asinus. (d)

HEROQUE, familiæque blanditur Canis:
 Canem vicissim herus, familia onerant bonis.
 Quod animadvertens Asinus, graviter ingemit.
 Hoc certe inique (e) comparatum existimat,
 Quod ille cunctis perplacet, cibum accipit
 De mensa herili, & has, & alias id genus
 Ludo fortunas (f) obtinet, vel otio.
 Portare contra sese clitellas suas,
 Cædi flagellis, otiosum nullibi (g)
 Cessare, & esse despectum omnibus tamen.
 At id si fiat (h) autem blanditiis, eam

Decre-

(c) Cicero Paradoxo 3 Cap. II. *Histris si paulum se mo-
 verit extra numerum, aut si versus pronuntiatus est syllaba
 brevior, aut longior, exhibilatur & exploditur.*

(d) La Fontaine, Lib. IV Fab. V. Benferade, Fab. XV.
 Hermannus, Edit. Rob. Steph. pag. 116. cujus verba non
 pauca retinuimus. Burmannus append. ad Phædr. Fab. X.
 Jaius, Tom. II pag. 747.

(e) Cicero Orat. pro Cluent. Cap. 21. *Sam hoc quoque
 prope iniquissime comparatum est, quod in morbis corporis,
 ut quisque est difficillimus, ita Medicus nobilissimus atque
 optimus quaritur: in periculis capitis, &c.*

(f) Terentius Andr. Ast. I Sc. I V. 70.

Tum omnes . . . laudare fortunas meas,
 Qui gnatum haberem tali ingenio præditum.

Cicero ad famil. Lib. IV Epist. 7. *Cum tibi nihil desse
 arbitrer ad tuas fortunas omnes obtinendas, præter voluntatem.*

(g) Vitruvius, Lib. VII Cap. I med. *Tessera (pavimenti)
 angulos habeant æquales, nullibique a fricatura exstantes.*

(h) Terentius Adelph. Ast. V Sc. IV. V. 25.

Ego quoque a meis me amari, & magni pendi postulo:
 Si id fit dando, atque obsequendo, non posteriores feram.

Martialis, Lib. VI Epig. XI.

Hoc non fit verbis, Marce, ut ameris, ama.

Decrevit autem, tam utilem, pariter sequi.
 Nec distulit enim; sed hero redeunti domum,
 Rem tentaturus, procucurrit obviam;
 Et exultavit (i), & palpavit (k) ungulis.
 At ille clamat; advolantque servuli:
 Et ineptus Asinus, qui se urbanum credidit,
 Fustium inamœnis dedolatur ictibus.

Sæpe, ubi repugnat natura, officit labor.

F A B U L A XV.

Bos & Vitula. (l)

ARANTEM Vitula pinguis aspiciens Bovem,
 Eum contempsit præ se, quæ nihil ageret.
 Sed sacrificii mox ut advenit dies,
 Bovem reservat Rusticus, Vitulam immolat.
 Quod cum videret: Heus amica, Bos ait,
 Laboravisse nunquam quid te nunc juvat?

FABULA XVI.

Leo Filiam Rustici amans. (m)

LEO cujusdam Rustici amabat Filiam;
 Cumque illam habere cuperet, patrem virginis
 Rogavit, assentiret nubere hanc sibi.
 Ullo se pacto, ut Filia nubat bestię,
 Adduci posse Rusticus negat. Tamen,
 Cum torve aspiceret, frenderetque dentibus
 Leo minanti similis, ille exterritus

Mu-

(i) Cornelius Nepos, Lib. XVIII Cap. V. *Verberibus co-
 gebat* (equum) *exultare*.

(k) Juvenalis Sat. I V. 35.

..... Quem Massa timet, quem munere palpat.

Horatius quidem, Lib. II Sat. I V. 20.

Cui male si palpere, recalcitrat undique tutus.

At Nonius, Cap. 7 Sect. 30. *Palpatur* pro *palpat*, quasi
 antique a Lucilio dictum notat.

(l) Benferade, Fab. CLXII. Furetiere, Fab. XII. Æso-
 pus, Fab. CLXXVII. Avienus, Fab. XXXVI. Commirius,
 Tom. I pag. 319 Edit. 1714.

(m) La Fontaine, Lib. IV Fab. I. Benferade, Fab. CC.
 Æsopus, Fab. CCXXV.

Mutat consilium; Filiamque huic nubere
 Se velle dicit; modo sibi dentes sinat
 Revelli & unguis, qui terrerent virginem.
 Quod postquam, amore cæcus, permisit Leo,
 Sibi ergo demum Filiam dari expetit:
 Sed illum inermem Rusticus jam non timens,
 Arrepto fuste, pulsat, & abigit domo.

Amor, improbus amor extinguit prudentiam,
 Ipsamque deinde fortitudinem domat.

FABULA XVII.

Culex, Leo, & Aranea. (n)

NEQUE ego te timeo, neque me fortior es, ait
 Culex Leoni. Tune terrorem mihi
 Incutere credis, quod didiceris unguibus
 Lacerare pecudes, dentibusque frangere?
 Age vero ad pugnam nunc veniamus, si lubet.
 Dixit; simulque cecinit animosus tuba;
 Simulque inhæsit naribus adversarii,
 Cutemque teneram pupugit pertinaciter.
 Leo furiosus unguibus proprios sibi
 Dilaniat artus, donec exanimis cadat.
 Suum superbus tunc victor epinicion,
 Idem ipse tubicen, personans, hinc avolat.
 At mox tenuibus heu! filis Aranæ
 Implicitus, vitam gloriosam finit,
 Lamentans, hostem quod qui tantum vicerat,
 Nunc ab animante tantula acciperet (o) necem.

FABULA XVIII.

Columbæ & Accipiter. (p)

BELLUM Columbæ gerere contra Milvum
 Voluere: idcirco deligunt regem sibi
 Accipitrem. At hostem se ille, non regem probat;
 Etiamque

(n) La Fontaine, Lib. II Fab. IX. Benferrade, Fab. CV. Æsopus, Fab. CXLIX.

(o) Cicero ad Attic. Lib. V Epist. 20 sub med. *Osaces, dux Parthorum vulnus accepit, eoque interijt.*

(p) Anonymus a Neveleto editus, Fab. XXII. Camera-
 rius, Fab. CCII.

Etiamque miseras Milvo ferocius
 Rapt, laniatque. Tum suam dolent vicem,
 Clamantque: satius Milvi impetum fuit
 Tolerare, quam hujus regiam tyrannidem.

F A B U L A XIX.

Simius & Vulpis. (q)

ROGAVIT olim Simius (r) Vulpem, ut daret
 Caudæ partem aliquam, contegendas ad nates;
 Etenim, quod usui & honori foret sibi,
 Huic esse id oneri. Vulpis at retulit, nihil
 Sibi nimium esse, & Cauda humum verri sua
 Se malle, quam illa Simiæ nates tegi.

Significat hæc fabella, raro quidpiam
 Superfluum esse diviti, ut egenum juvet.

FABULA XX.

Auceps, Palumbus, & Serpens. (s)

DOLUM Palumbo incautus Auceps dum struit,
 Premit Anguem, cujus dente violatus perit.
 Malum jure feres, quod parabis alteri.

FABULA XXI.

Asellus ejusque Herus. (t)

IN silvam Asellus cum venisset, reperit
 Cæsi Leonis exuvias. Has induit,
 Ad pascua dehinc, sic personatus, redit:
 Greges, armenta territat, fugat. Videt

D 2

Herum

(q) Richer, Lib. X Fab. XVI. Benferade, Fab. XLIII. Le Noble, Fab. CXXV. Anonymus a Neveleto editus, Fab. LVI. Hermannus, edit. Rob. Steph. pag. CXXXI. cujus verba pleraque retinimus. Regnerius, part. 2 Fab. V. Burmannus append. ad Phædr. Fab. XXII.

(r) Isidorus origin. Lib. XII Cap. 2. *Harum (Simiarum) genera quinque sunt; ex quibus Cercopithecii caudas habent.*

Martialis, Lib. XIV Epigr. 202.

(s) Callidus emissas eludere Simius hastas,
 Si mihi cauda foret, Cercopithecus eram.

(s) Benferade, Fab. CXLVIII. Æsopus, Fab. XXXII.

(t) Benferade, Fab. XCVII. Le Noble, Fab. XXIII. Avienus, Fab. V. Barlandus, Edit. Rob. Steph. pag. 156. cujus verba nonnulla retinimus. Camerarius, Fab. CLV.

Herum venientem: pariter & in ipsum ruit.
 Sed apprehensis ejus auriculis Herus:
 His forte, dixit, artibus alios licet
 Decipias; at ego protinus indolem tuam
 Asininam agnosco, quem libet cultum induas.

FABULA XXII.

Taurus & Caper. (u)

TAURUS Leonem dum fugit, aliquod sibi
 Latibulum quærens, caprile obvium subit:
 Sed obstitit ei cornibus adversis Caper.
 Nunc me, inquit ille, impune contemnis quidem;
 Verum si abierit, quem fugio, tunc senties,
 A Tauri quantum viribus distet Caper.
 Etenim caprile, cum prætergressus Leo,
 Procul abiisset: omni sublato metu,
 In Caprum Taurus irruit, & eum necat.
 Dum fors breve tempus te defendit a malo,
 Potentiorum ne spernas hostem cave.

FABULA XXIII.

Corvus & Urna. (x)

INVENERAT Urnam aquariam Corvus siti
 Enectus (y). At aqua (z) brevior, Urnaque altior,
 Ne bibere possit, obstant. Ipsam nititur
 Effundere urnam; nec valet. Tum denique
 Injicit assumptos ex arena calculos.

Attollitur

(u) Benferade, Fab. CIV. Æsopus, Fab. CCLXXXI.
 Gabrias, Fab. XL. Avienus, Fab. XIII.

(x) Richer, Lib. XI. Fab. XIII. Benferade, Fab. CXV.
 Le Noble, Fab. CLXXII. Avienus, Fab. XXVII. Camera-
 rius, Fab. CCLV. Porro hanc historiam Plinius, hist. Lib.
 X Cap. XLIII de Corvo narrat; non de Cornice, ut Avie-
 nus, & alii plerique scriptores.

(y) Cicero Tuscul. Lib. I Cap. V *Mento summam aquam
 attingens, enectus siti Tantalus.*

Idem de Divinat. Lib. II Cap. XXXV. *Fame enecta (avis)
 si in offum pultis invadit.*

(z) Virgilius Æneid. Lib. I V. 114.

..... Eurus ab alto

In breviam & Syrtes urget.

Brevia autem a brevibus aquis sic appellata sunt.

Attollitur aqua. Corvus hoc pacto bibit.

Acuere solet industriam necessitas.

FABULA XXIV.

Venator & Leo. (a)

CUM Venatore litigans, generis sui
Leo præferebat vires hominum viribus.
Post longa jurgia ducit adversarium
Venator ad mausoleum, ubi sculptus fuit
Jacens, domitusque viribus hominis Leo.
Sed hoc sibi Ferus satis esse indicium negat:
Homines id etenim sculpunt, inquit, quod volunt;
At si Leones sculpendi artifices forent,
Quot homines a se prostratos effingerent?

FABULA XXV.

Corvus & Serpens. (b)

SERPENTEM Corvus esuriens cum cerneret
In sole (c) dormientem; protinus hunc petit
Rapitque. At ille mox ubi ad sese redit,
Corvum remordet; qui se moriturum brevi
Cum jam sentiret: Heu me! dixit, qui mihi
Hinc stultus, unde pereo, quæsierim lucrum.

Designat homines fabula incautos, quibus
Id, quod cupiere, sæpius damnum creat.

FABULA XXVI.

Rustici & Sarmenta. (d)

DUO cum quondam Rustici ad litus maris

D 3

S.

(a) La Fontaine Lib. III Fab. X. Benferade, Fab. LXI.
Æsopus, Fab. CCXXIII. Aphonius, Fab. XXXIV. Avienus, Fab. XXIV. Tanaq. Faber ex arabico Locmani, Fab. VII. Burmannus append. ad Phædr. Fab. XXV.

(b) Le Noble, Fab. CIII. Æsopus, Fab. C. Faernus, Fab. XXIV.

(c) In sole ambulare: in sole apricari: in sole jacere: in sole exuri: a sole abesse, vel discedere: bonæ locutiones latinæ sunt. Vide Cicer. de Orat. Lib. II Cap. XIV ad Attic. Lib. VII Epist. XI. Tusculan. Lib. V Cap. XXXII. Cels. de re med. Lib. I Cap. III. Plin. jun. Lib. III Epist. V.

(d) La Fontaine, Lib. IV Fab. X. Æsopus, Fab. CX.

Sar-

Sederent otiosi: Navem conspicio,
 Unus ait, eamque permagnam me hercule.
 Post paulo dixit alter: Ego vero id nego,
 Hanc esse navem; at esse contendo scapham.
 Expectant; demum Sarmenta appelli vident.
 Magnam ex longinquo qui reverentiam parit,
 Si propius adstet sæpe erit contemptui.

FABULA XXVII.

Avis, ejusque Pulli, & Villicus. (e)

MONUIT locatos in segete Pullos Avis,
 Ut diligenter, hinc dum abest, attenderent,
 De messe sermo si fieret. Pulli anxii
 Redeunti narrant matri, amicis Villicum
 Suis mandasse curandum id negotii.
 Respondet Mater, esse nil periculi.
 Item tremantes nuntiant alio die,
 Propinquos, operam ne recusarent suam,
 Rogatos. Rursus esse securos jubet.
 At illa demum ut audit, cum filio
 Statuisse Villicum, ut ipsi mane postero
 Inciperent ambo triticum succidere:
 Fugiamus, inquit: hi cum jam non pendeant
 Aliena ex opera, propriam certe dabunt.
 Rem gerere ipse potes? alios ne expectaveris? (f)

FA-

Sarmenta autem ista longinqua non ex ipsa, quæ immit-
 titur in oculos specie, sed ex ipsa imaginandi vi hic æsti-
 mari censenda sunt. Male ergo Richerius fabular. præfat.
 pag. 14 non esse narrationem hanc verisimilem pronuntiavit.

(e) La Fontaine, Lib. IV Fab. XXII. A. Gellius, Lib. II
 Cap. XXIX. Avienus, Fab. XXI. Faernus, Fab. XCVI. Me-
 nagius, Fab. I.

(f) A. Gellius, Lib. II Cap. XXIX. *Hunc Æsopi apolo-
 gum Q. Ennius in Satyris scite admodum & venuste versibus
 quadratis (trochaicis) composuit: quorum duo postremi isti
 sunt, quos habere cordi & memoria operæ pretium esse her-
 cle puto:*

Hoc erit tibi argumentum semper in promptu situm:
 Ne quid expectes amicos, quod tute agere possies.

FABULA XXVIII.

Crocodilus & Vulpis. (g)

DE nobilitate gloriabatur sua,
 Pluresque Vulpi instabat commemorans avos
 Crocodilus, unde recta venisset via.
 At Vulpis: Unde venerim, inquit, me minus
 Id Angit, quam quo vadere liceat mihi.

FABULA XXIX.

Ursus, Leo, & Lupus. (h)

CORREPTUM, jamque strangulatum, mandere
 Parabat Ursus hinnuleum famelicus.
 Leo, siccis pariter faucibus, supervenit,
 Et extorquere prædam violentus parat.—
 Ursus, qui multis antea leonibus
 Restiterat, avida nunc ubi stimulat fames,
 Sese videlicet ait nolle cedere.
 Exoritur ergo pugna utrinque pertinax,
 Et horrida: neuter vincit; neuter se imparem
 Sentit; pugnantque, dum defecti (i) viribus,
 Et hinc, & inde simul in terram corruant.
 Cum sic jacerent languidi, accedit Lupus,
 Causamque tollit hinnuleum certaminis:
 Quem sic impune sibi videntes abripi,
 Dixere: Miseri strenue pugnâvimus,
 Ut latro pugnae ferret omne præmium!

FABULA XXX.

Asinus Dominos mutans. (k)

APUD olitorem peragebat Asinus dies,
 Multis laboribus, uti censebat quidem,

D. 4

Fran-

(g) Benferade, Fab. CXXXIX. Æsopus, Fab. IX.

(h) Benferade, Fab. CXLIII. Le Noble, Fab. CXI. Camerarius, Fab. XXXIX.

(i) Tibullus, Lib. II Eleg. V V. 76.

Ipsum etiam solem defectum lumine vidit.

Phædrus, Lib. V Fab. VI.

Accessit alter æque defectus pilis.

(k) La Fontaine, Lib. VI Fab. XI. Benferade, Fab. CXLIX, Æsopus, Fab. XLV. Faernus, Fab. LXIX. Jaius Biblioth. Rhet. Tom. I pag. 751.

Frangi, enecari, pastuque tenuissimo
 Recreari solitus. Ergo sese durius
 Haberi, quam fas, jusque vellent, credidit:
 Jovem rogavit, sortem ut mutaret suam:
 Ejusque precibus exoratus Jupiter
 Postinde figulo navare hunc operam jubet.
 Sed ferre cœnum, ac regulas dum cogitur:
 Hanc gravius etiam ferre fortunam incipit.
 Mutare dominum, imprudens, rursus expetit,
 Rursusque auditur; lege sed posita tamen,
 Ut hæc quæcumque fuerit ultima fors, ferat;
 Nec speret aliam deinde venturam vicem.
 Is cum annuisset, obigit Coriario:
 Tum: Quid rogavi, dixit lamentans? heros
 Apud priores vivere satius fuit;
 Namque ille postquam durus me laboribus
 Necuerit, parcat ne corio quidem meo.
 Quamvis acerba fors erit, eam sustine,
 Ne pejor fiat, obrectare si velis.

FABULA XXXI.

Aper & Cerva. (1)

DENTES ferus Aper exacuebat (m) arbore:
 Quem conspicata Cerva: Cur, inquit, facis
 Id quod, ut opinor, nunc fieri nil postulat?
 Nam nullus hostis, aspice, occurrit tibi,
 Et cuncta pacis undique munus obtinent.
 At Setiger: Non temere facio, quod vides;
 Etenim pugnandi cum mihi tempus venerit,
 An tunc fore putas dentes acuendi locum?
 Sero parantur arma, cum hostis ingruit.

FA-

(1) Richer, Lib. VI Fab. XVIII. Benferade, Fab. CLVIII.
 Le Noble, Fab. CXXX. Æsopus, Fab. LIV. Faernus,
 Fab. LXXVIII.

(m) Plinius, hist. Lib. XVIII. Cap. I. *Cum arbore exa-*
cuant, limentque cornua Elephantis & Uri: saxo Rhinocero-
tes, & utroque Apri dentium ficas.

FABULA XXXII.

Asinus & Equus. (n)

Equo inuidebat Asinus, quod totos licet
 Male otiosus ille cessaret dies,
 Tamen aleretur delicate & largiter;
 Laboribus ipsi dum perpetuis interim
 Exercitato, vilis alimenti datur
 Vix satis; & ut ne vita miserum deserat.
 Sed ad pericla belli postmodum videns
 Equum apparari, jam suam sortem incipit
 Diligere: Et: Asinum vivere, inquit, me iuvat.
 Eorum, qui beati creduntur, mala
 Videre, miseris non leve est solatium.

FABULA XXXIII.

Æthiops. (o)

ALIQUIS loquacem dum sibi esse feminam
 Queritur maritus, & modum celerrimæ
 Apponere linguæ mille tentat artibus,
 Operamque perdit; sic Æsopus incipit
 Narrare: Servulum Æthiopem quidam emerat;
 Cujus nigrum colorem contractum putans
 Fuisse propter solam negligentiam
 Domini prioris, usque & usque hunc institit
 Lavare, donec immodica vexatio
 Eo coegit miserum, ut morti occumberet.
 Corrigere qui vult naturam, Æthiopem lavat.

FABULA XXXIV.

Muscæ. (p)

EFFUSA mellis copia est: Muscæ advolant:
 Pascuntur. At mox impeditis cruribus
 Revolare nequeunt. Heu! miseram, inquit, vicem.
 Cibis iste blandus qui pellexit suaviter,

D 5

Nunc

(n) Benferade, Fab. CLXV. Æsopus, Fab. LVIII. Faer-
 nus, Fab. LXXXIV.

(o) Benferade, Fab. CLI. Le Noble, Fab. III. Æsopus,
 Fab. LXXV. Locmanus, Fab. XVII.

(p) Æsopus, Fab. LXXXIX.

Nunc fraudulentus quam crudeliter necat!
Perfida voluptas hoc exemplo pingitur.

FABULA XXXV.

Vespertilio & Mustelæ duæ. (q)

HUC, illuc temere dum volat, casu evenit,
Ut in Mustelæ nidum vespertilio
Irruat, in ipsoque capiatur impetu.
Hæc autem, acerbo quoniam erant omnes sibi
Odio volantes: Sic mei, inquit, ceteri
Tractentur hostes & pereant, ut tu modo
Peribis! prædamque simul vexat unguibus,
Ac devorare jam parat. Periculum
Pensentit ille; seque murem, non avem
Testatur esse: denique ut fecit fidem,
Veniam precatur avolandi, & impetrat.
Sed inde (tanta est ejus imprudentia!)
In aliam rursus, nec multo post, incidit
Mustelam, cunctis muribus quæ maxime
Esset inimica, & hæc, Quod est odium mihi
Gentem in murinam, morte protinus tua
Solaberis, ait. At quis error te malus,
Respondet ille, decipit? cave, obsecro,
Ne pecces id quod postea infectum, foror,
Volueris frustra: non ego sum, quem tu putas,
Aliquis de gente murium infestissima:
Male mures pereant; vivat avium gens: avis
Ego sum; quod alis, aspice, en meis tibi
Probare possum. Mustelæ hæc oratio (r)
Honestæ visa est. Ergo præsentissimam
Evasis iterum Vespertilio necem.

Hominum fragilitas ingenium versabile,
Variumque, variis pro periculis, expetit.

FA-

(q) La Fontaine, Lib. II Fab. V. Æsopus, Fab. CIX.
Færnus, Fab. LXXVII.

(r) Terentius Andr. Act. I Sc. I V. 114: *Honestæ ora-
tio est.*

FABULA XXXVI.

Hædus & Lupus. (s)

CAPRILIS (t) ipso tutus in fastigio
 Cum stareæt Hædus, prætereuntem prospicit
 Lupum: simulque grandibus conviciis
 Laceßere illum cœpit. Respondet Lupus:
 Non tu, sed iste nunc locus illudit mihi.
 Audacia nulla est, nullum ubi periculum.

FABULA XXXVII.

Tubicen & Hostes. (u)

DELAPSUS in vißtrices Hostium manus
 Tubicen rogabat, innocentem se virum
 Ut ne, quod facere jam parabant, cæderent:
 Et hominem, ajebat, occidi unquam neminem (x):
 Istaque sola, quam libens tradam, tuba
 In auras spargere fuitiles didici sonos.
 At illi: Meritæ tu tamen occumbes neci,
 Hocque magis etiam, quod pugnandi sis licet
 Ipse imperitus, alios ad pugnam excitas.
 Jure reputatur is qui impellit ad malum
 Nocentior illo, qui malum inde perpetrat.

FA-

(s) Richer, Lib. XII Fab. IV. Benferade, Fab. LVIII.
 Le Noble, Fab. CLXXXII. Æsopus, Fab. CXXXIX.

(t) Ut ovili ovilla pecora, bubili bovilla, equili equina,
 ita caprili caprina concluduntur.

(u) Benferade, Fab. CLXI. Dela Motte, Lib. II Fab. XVIII.
 Æsopus, Fab. CXLII. Avienus, Fab. XXXIX. Laur. Valla,
 Edit. Rob. Steph. pag. 59.

(x) Perizonius ad Sanctii Minervam, Lib. I Cap. I pag. 7.
 Edit. 1702. Quando, inquit, Comici dicunt: *Nemo homo:*
a ratione illud certe est alienum: si quidem in τῷ nemo jam
expressum est τὸ homo. At non soli comici hanc loquendi for-
 mulam a ratione, si superis placet, alienam adhibuerunt.
 Nam Cicero ad famil. Lib. XIII Epist. LV. *Ut hominem ne-*
minem pluris faciam. Tusc. Lib. I Cap. XLI. *Hominem qui-*
dem scire arbitror neminem. De Nat. Deor. Lib. II Cap.
 XXXVIII. *Ut per biduum nemo hominem homo agnosceret.*
 Ibid. Lib. I Cap. XLIII. *Neminem Deo, nec Deum, nec ho-*
minem earum . . . vultis.

FABULA XXXVIII.

Accipiter & Cuculus. (y)

MAGNUM Cuculo fecerat convicium
 Accipiter, ipsi quod pares quanquam dedit
 Natura vires corporis, animo tamen
 Dejectus humili, vesci malit vermibus,
 Quam dulci aviculas pro cibatu (z) carperg.
 Paucis diebus postmodo elapsis videt
 Cuculus illum, quem necarat Rusticus,
 Pendere summo turris e fastigio,
 Ut alios pœnæ terreat similis metu
 Accipitres, ne columbas prædari velint:
 Tibique solis, inquit, vesci vermibus
 Si maluisses, quanto nunc melius foret!
 Conditio tenuis paucis est periculis
 Objecta; magnis ampla casibus patet (a)

FABULA XXXIX.

Capones duo. (b)

SIMUL Capones nutriebantur duo
 In ornithone (c) inclusi; at horridus, & macer
 Languēbat unus; pinguis alter, & nitens
 Suam jactabat speciem, & corpulentiam,
 Sociumque præ se contemnebat: & probris
 Amarulentis non leves injurias
 Super etiam addit; innocentemque opprimit.
 Interea herilem amicus advenit domum;
 Ac delicatas ipsi cum dapes herus
 Apponere vellet, pinguem Caponem necat,
 Macrum relinquit; socium qui suum videns
 Cum perimeretur: Nunc ego, inquit, ego miser,

Te

(y) Abstemius, Fab. VII. Camerarius, Fab. CCXCII.

(z) Plinius hist. Lib. VIII Cap. LV. *In Alpibus candidi (lepores) quibus hibernis mensibus pro cibatu nivem credunt esse.*(a) Cicero de Offic. Lib. I Cap. XXI. *Quæ eo faciliora sunt Philosophis, quo minus multa patent in eorum vita, quæ fortuna feriat, & quo minus multis rebus egent.*

(b) Abstemius, Fab. X.

(c) Ornithon locus est, in quo saginandæ aves chortales includuntur. Vid. Columell. Lib. VIII Cap. IV.

Te miseriorem video tandem, qui modo
Beatus, arrogansque insultabas mihi.

Sortem improborum suffer, quos donis suis
Fortuna cumulat: hos saginat (d), ut immolet.

FABULA XL.

Aranea & Hirundo. (e)

ARANEA quondam exarserat in Hirundinem,

Irata, muscas, ipsa vesci quas solet,

Quod illa caperet ore furaci volans. (f)

Ergo vindictæ cupida; nec, res exitum

Quem sit habitura denique, fatis providens,

Textilia ad altas retia suspendit fores,

Qua pervolare sæpe inimicam viderat.

Enim vero illa concitatos impetus

Mox advolando huc dirigit; sed retia,

Textricemque simul aera per medium rapit;

Portatque, nec novi oneris quidquam sentiens,

Tunc misera tractus per profundos aeris

Aranea pendens: Hanc, ait, juste vicem

Exterior, genera quæ volantium infima

Cum vix labore magno prædari queam,

Capere aves posse tam magnas putaverim.

Majora viribus aggredi ratio vetat;

Sed ratio, & ira quid commune consulunt?

FABULA XLI.

Vulpis & Ericius. (g)

REI administrum publicæ; furtis suis

Dita-

(d) Commirulus, Fab. de Tauro saginato.

Miratur hos, paresque Dīs vulgus facit;

At vero sapiens despicit, ceu victimas,

Fortuna quas saginat, ut sibi immolet.

Hæc porro mihi ex cognitione commirianorum versuum
prævia nulla incidit sententia, cæteroqui communis & per-
vulgata.

(e) La Fontaine, Lib. X Fab. VIII. Abstemius, Fab. IV.

(f) Plinius hist. Lib. X Cap. XXIV. *Sola avium* (hirun-
do) *non nisi in volatu pascitur.*

(g) La Fontaine, Lib. XII Fab. XIII. Philib. Hegemon,
Fab. XIX. Faernus, Fab. XVII. Camerarius, Fab. CCCXCVII
Menagius, Fab. IV. De Ericio vid. not. ad Fab. V Lib. I.

Ditatum, Samii dedere cum vellent neci,
Æsopus tali fabula deterruit:

Tetram in lacunam forte Vulpis incidit
Nec potuit exire, impeditis cruribus
Limo tenaci. Et huc simul denso agmine
Musæ advolantes indefensam aculeis
Fodere insisterunt. Quod videns Ericius,
Parabat, quippe motus misericordia,
Malas abigere volucres; illa sed abnuit:
Namque has mihi, inquit, ne molestiam gravem
Jam facere possint, satietas ipsa impedit:
Succederentque mox aliæ famelicæ,
Quæ, mihi quod reliquum sanguinis est, exfugerent.

FABULA XLII.

Jupiter, Modestia & Virtutes ceteræ.

VARIAS Virtutes cum creasset Jupiter,
Quæ duces homini & utiles comites forent,
Produxit ultimam omnium modestiam:
At ipsi in homine nulla sedes est super
Relicta, quam non de (h) Sororibus suis
Aliqua occupasset. Quod animadvertens: Tibi
Nullam quidem, inquit Jupiter, sedem licet
Habere propriam, his cæteris qualem dedi:
Sed istæ quoties emicare cœperint,
Te simul adesse jubeo; ne quid audeant,
Quod non tuo ipsa more blando temperes.

Hinc usque laude vera Virtutes carent,
Quibus modestia pretium non addidit.



FABU-

(h) Cicero de Legib. Lib. III Cap. VII. Puto posse, & quidem aliquem de tribus nobis.

FABULARUM ÆSOPICARUM LIBER QUARTUS.

PROLOGUS.

A B illo vetere, simplici, mundo stylo
 Jam tum recessit paululum Latinitas;
 Ubi Romana pubes semel abhorruit
 Ab scriptitandis versibus senariis,
 Quales Poetæ veteres omnes comici
 Fundere solebant. Imo ferme ceteri
 Veteres Poetæ, si qua præsertim vafræ
 Lubido Musæ scriptionem ludicram,
 Menippeamque concinnare jusserat,
 In metro amabant liberum hunc morem sequi
 Suavem profecto, nec vocabulis minus,
 Quam rebus ipsis aptandis idoneum.
 Romanorum ille Varro (a) qui doctissimus
 Ante, & post fata dictus est, hujusmodi
 Senariorum millia multa scripserat;
 Seu defricandis moribus operam daret,
 Urbemque lepidis recrearet lusibus,
 Seu fabulosas callide contexeret
 Narrationes, monitis & perspergeret
 (b) *Communem vitæ ad usum pertinentibus.*

Olim hæc fuere. Deinde scribendi genus
 Tam facile, tamque delicatum respuit
 Illapsa sensim argutiarum cupiditas,

Demum-

(a) A. Gellius, Lib. III Cap. X. Varronis de numero septenario Librum exponens: *Tum ibi, inquit, addit se quoque jam duodecimam annorum hebdomadam ingressum esse, & ad eum diem septuaginta hebdomadas Librorum conscripsisse.*

(b) Varronis ipsius verba hæc sunt apud A. Gellium, Lib. XIII Cap. XI.

Demumque turbo (c) cordubensis obruit.
 Jamque hæc regnare pestes late cœperant,
 Suas fabellas Phædrus cum primum edidit:
 Quæ forte causa est, cur hodie nullo (d) fere
 Munitus exstet veterum testimonio;
 Neque hunc sibi esse cognitum Seneca (e) indicet.

Meo quidem iudicio, si Phædri stilus,
 Si ingenium, & ista æquabilis festivitas
 Aliquando fuerint Romanis contemptui,
 Apud eos artem eloquil, & gustus indolem
 Fuisse paulum corruptas oportuit.
 Illius ergo semita qua monstrat viam,
 Cupidus sequendi, passibus haud æquis licet,
 Pergam innocentes expolire fabulas.

FABULA I.

Sus & Leæna. (f)

FOECUNDA Sus Leænæ vertebat probro,
 Catulum quod unum quolibet parru ederet:
 Unum, at Leonem; retulit indignans fera.
 Res dignitate prævalent, non copia.

FABULA II.

Puer, & Passer fugitivus. (g)

PRAVAM, malamque Passeris ingrati indolem
 Afflictus olim conquerebatur Puer,
 Quod

(c) Turbo curdubensis hic significat importunam illam eloquentiam, quam, veluti quemdam turbinem immisit Latio Corduba.

Martialis, Lib. I Epigr. LXI.

Duosque Senecas, unicumque Lucanum
 Facunda loquitur Corduba.

(d) Nihil usquam apud Veteres de Phædro memoratur, nisi quod Martialis, Lib. III Epigr. XX & Avienus, præfat. fabular. meminere ipsius quidem, at meminere tantum.

(e) Seneca consolatur ad Polybium, Cap. XXVII. *Non audeo te usque eo producere, ut fabellas quoque, & Æsopos Logos, intentatum romanis ingeniis opus, solita tibi venustate connexas.*

(f) Æsopus, Fab. CCXIX. Tanaq. Faber ex Arabico Locmani, Fab. XI. Comminius Tomoli pag. 224 Edit. 1715.

(g) Abstemius, Fab. XLIII. Camerarius, Fab. CCCXIV.

Quod illum quanquam delicatioribus
 Alere solebat, ipse nutritor, cibus,
 Tamen a se abiret fugitivus. Dein supplicans:
 Revertere, ait, Amicule mi, revertere;
 Amaritudo nulla mihi pectus movet,
 Pacemque tecum, si reverteris, bonam
 Reconciliabo (h); caveam saltem respice
 Bellam, nitentem, quam relinquis: num nihil
 Habet illa, quod te revocet, ac reddat mihi;
 Ista fugitivum oratio jam cœperat
 Mutare, ut esset non inexorabilis;
 At solo cavæ nomine audito avolat.
 Pulchrum esse fabula carcerem nullum probat.

FABULA III.

Pastor & Mare. (i)

PECUDES cum egisset Pastor, ad litus Maris,
 Undamque leni cerneret pellacia (k)
 Ridentem, amore mercaturæ captus est.
 Pecuniam ergo conficit: coemit nuces:
 Navigio imponit: solvit: animo jam movet
 Magna: tenet altum. At ecce tempestas furit:
 Et cum veniret in vitæ periculum,
 Sua ipse mœrens cogitur in fluctus bona
 Projicere; portumque etiam vix repetit miser.
 Oves ibidem denuo cum pasceret,
 Et unda staret: O, video, nuces, ait,
 Nuces, dolosa, rursus, at frustra, cupis.
 Usu pericli vita fit eruditior.

FA-

(h) Corn. Nepos, Lib. VIII Cap. III. *Reconciata pace*
 (Thrasibulus) *legem tulit.*

(i) La Fontaine, Lib. IV Fab. II. Benferade, Fab. CLII.
 Esopus, Fab. XLIX. Laur. Valla, Edit. Rob. Steph. pag. 61.

(k) Lucretius, Lib. II V. 559.

Subdola cum ridet placidi pellacia ponti.

FABULA IV.

Leo, Asinus & Vulpis. (l)

VENATUM iere Vulpis, Asinus, & Leo;
 Præda ampla facta est: hanc Asinum Leo jubet
 Partiri; singulasque partes singulis
 Equales ille cum poneret, eum Ferus
 Rapi, laniatque: postea Vulpeculæ
 Dat idem negotium. Illa vero astutior,
 Partem Leoni posuit longe maximam;
 Minimam particulam vix reservavit sibi.
 Leo, a quo fuerit tam bene docta, quæsit;
 Me, retulit illa, docuit hujus calamitas.

FABULA V.

Musculus & Felis. (m)

OBAMBULABAT, editus in mundum recens,
 Musculus; & illam singulis animantibus
 Communem lucis usuram cum carperet,
 Præ gaudio alacer, ac properaret vivere;
 Secum otiantem placide, nixam clunibus,
 Reducta in urbem cauda ad extremos pedes,
 Similemque blanda meditati, Felem aspicit.
 Mitis profecto bellua, inquit, en adest;
 Ipsoque vultu spirat sanctimoniam;
 Hanc compeilare, & ipsa si non abnuat,
 Connectere modo vincla amicitiae lubet.
 Accedit ergo propius. At exertis simul
 Improba eum Felis unguibus capit, & vorat.

Modesta species non hominem sanctum probat,

FABULA VI.

Invidus & Avarus. (n)

INVIDO, & Avaro Jupiter quondam annuit,
 Peteret alteruter id quod optaret, statim

Rem

(l) Richer, Lib. II Fab. X. Benferade, Fab. CLXIII.
 Æsopus, Fab. XXXVIII. Faernus, Fab. III.

(m) Absternius, Fab. LXVII.

(n) Richer, Lib. VIII Fab. XXI. Benferade, Fab. CCXIX.
 Avienus, Fab. XXII. Camerarius, Fab. CCLII.

Rem successuram votis; at lex est tamen
 Dicta: ut, petenti quidquid alterutri datum
 Fuisset, duplum tribueretur alteri.
 Honestam certe, nec mihi visam hactenus
 Benignitatem impertit hodie Jupiter,
 Secum ait Avarus: illam nos autem decet
 Apponere lucro, quam licebit maximo;
 Parcamus igitur votis imprudentibus
 Præire socio. Pro sua parte Invidus
 Attenta mente pariter omnia ponderat;
 Postquamque, ne quid peccet imprudens, satis
 Sibi præcavisse visus est, edit prior
 Sua vota; & unus postulat oculus sibi
 Ut eruatur: socio geminos erui
 Hac mercede velit, nec leve reputat lucrum.

Ubi fingit aliquid esse venturum boni
 Cupido cæca negligit præsens malum.

FABULA VII.

Gallus, Asinus & Leo. (o)

IN agrum eundem Gallus, Asinus & Leo
 Venere; Gallus, tritici grana ut legat;
 Asinus, palatum (p) carduis ut tergeat;
 Leoque, prædam si quam inveniat, ut voret:
 Adest inventus Asinus: hunc ergo neci,
 Occurrit quando nil melius, jam destinat:
 Irruit. At ecce Gallus argutissimis
 Percellere auras cantibus simul incipit;
 Simulque fugere cogitur Leo territus.
 Natura Gallo hanc nempe virtutem dedit,
 Sola ut Leones voce vertat in fugam.
 Tunc Asinus autem, fugere trepidantem feram
 Ubi videt, se terribilem stulte existimat;
 Illamque credit, ex sui nimio metu
 Fugere, suumque ferre ne aspectum quidem

E 2

Potuif-

(o) Richer, Lib. XII Fab. XI. Benferade, Fab. LIII. Le Noble, Fab. CLXXXVII. Æsopus, Fab. LXVI.

(p) Horatius, Lib. II Sat. II V. 23.

Vix tamen eripiam, posito pavone, velis quin
 Hoc potius, quam gallina, tergere palatum.

Potuisse; ac tanta cæcitas animum tenet,
 Ut etiam persequatur, ignavam vocans.
 Sed Galli acutos cum Leo tandem sonos
 Minus exaudiret, sistit, obvertit caput;
 M ratus Asinum venientem, huc refert gradum,
 Stultamque pecudem strangulatam devorat.
 Stultitia comitem si fors arrogantiam
 Habuerit, homines certum in exitium trahit.

F A B U L A VIII.

Milvus, Corvus & Aquila.

RAPUERAT carnem (q), & auferebat **Milvus**;
 Sed illam corvus esse contendit suam,
 Sibique raptam clamat, & furem arguit.
 Tum criminatus alter, de dolo malo,
 Calumniæque postulat adversarium.
 Seque esse furem jurejurando negat.
 Fortasse Corvus, aperta vi irruens, queat
 Id recuperare, quod sibi raptum dolet;
 Sed novit hostem, quam sit rostro, & unguibus
 Pugnare non inhabilis; remque maluit
 Finiri legibus. Ergo in jus eum vocat.
 Cumque huc Aquila venisset, hanc humilis cliens,
 Ut ne gravetur esse sibi iudex, rogat.
 Aquila, clientum quæ secandis litibus
 Debere se operam crederet, non abnuit;
 Statimque carnem, quæ iurgandi occasio
 Discordibus erat, ad se deferri jubet;
 Quam, iussu metuens detrectare, **Milvus**.
 Sanctum ad tribunal posteaquam detulit:
 Secedite, inquit illa; decretoriam
 Sententiam ipso crastino die feram.
 Condicta venit hora: Corvus adfuit:
 Sed expectatus esset cum satis diu,
 Nec compareret **Milvus**; Aquila exhibet;
 Im vacuum ab omni controversia, dapem

Ad-

(q) Phædrus, Lib. I Fab. IV V. 2.

Canis per flumen carnem dum ferret natans.

Adjudicansque corvo, sic pronuntiat:
(r) *Fatetur facinus is qui iudicium fugit.*

F A B U L A IX.

Equus, & Lupus.

TUTUS satis præsidio virtutis suæ
Cum solus olim pasceret in silvis Equus,
Ipsi, quam prædatus erat, ostentans ovem,
Felicitatem jactabat suam Lupus:
Et miror, inquit, quod tu tantis viribus,
Animisque tantis præditus, leves cibos,
Et insuaves ab ipsa decerpens humo,
Tolerare vitam potius asperam velis,
Quam, tot meis edoctus exemplis bonis,
Vi rapere pecudes, fortioris præmio
Frui, vescique jurulentis carnibus.
Equus ad hæc: Non profecto, non tuam hanc tibi
Invideo sortem, quam potius miserabilem,
Et execrandam judico. Vitam quidem
Minus ego laute vivo; sed habeo tamen
Alimenta, quæ naturæ convenient meæ:
At prosum hōminibus; & meum nomen suis
Apud eos claret insignitum laudibus:
Contra perpetuis imprecationibus
Omnes petunt te, publicam omnium luem;
Et inter ista, quæ bona falso nuncupas,
Inureris omni turpitudinis nota.
Nemo esse felix simul & infamis potest.

F A B U L A X.

Leæna & Ovis.

OVEM Leæna rapuerat; sed eam tamen
Lege moriendi misericors exemerat,
Etiamque famulam fecerat propriam sibi;
At ipsam amare cum cœpisset, ultima
Sui latibuli parte clausam sedulo
Tenebat inter putridas cadaverum
Reliquias. Misera ferre non poterat Bidens

Fœtorem acerbum, lentisque cruciatibus
 Consumebatur; nec tamen audebat queri:
 Sic tacita tantum murmurabat: Hoc magis
 Dolor ingravescit, quo minus erumpit foras.

FABULA XI.

Vir sapiens & ejus inimicus.

VIR sapiens, cœsi neminem unquam læserat,
 Inimicum habebat, qui celare quod diu
 Tentarat, odium frangere ultra non valens,
 Verba inter aspera graves ediderat minas,
 Simul audierunt, territi properant, monent
 Amici. At ille: Jam noram, inquit, hunc, mihi
 Quam sit inimicus; attulitque non leves,
 Fateor, latere quamdiu voluit, metus:
 Sed eum fuisse factum pejorem mihi
 Falso putatis: Esse clanculum malus
 Cum desinit hostis, esse tunc bonus incipit.

FABULA XII.

Catella.

CATELLAM (s) valde amatam, delicatius
 Palcebat manibus ipsa suis muliercula;
 Nec alias illa ferre potuisset manus,
 Vel afferentes ordinariam dapem.
 Sed cum repente, fatiis ita jubentibus,
 Domina abiisset illuc, unde neminem
 Redire dicunt; in potestatem venit
 Hominum Catella, qui nullas ei, ut prius,
 Sortis benignæ delicias indulgeant,
 At potius ipsam, tanquam si gregariis
 De canibus esset aliqua, miserias pati
 Cogant acerbis victitando duriter;
 Etiamque sæpe tecto abigant interdum,

Mittant

(s) Thesaurus, tum Rob. Stephani, tum Basilii Fabri,
Catellam, quasi neutiquam a Cane, sed a Catena tantum
 derivatam exhibet. Martiali tamen, Lib. I Epigr. CIX &
 Lib. VII Epigr. LXXXVII. & Lib. XIV Epigr. CXCVI hanc
 ipsam vocem ad pusillam Canem significandam adhibuit.

Mittantque noctu exclusam, ah! dormitum foris.
 Miranti interea ceteras canes, quibus
 Non melius esset, quam sibi, & suam tamen
 Quæ sortem non dolerent, una sic refert:
 Hæc vitæ ratio, quæ novitiæ tibi
 Videtur aspera, usu & assuetudine
 Idonea nobis facta est, nuncque etiam placet;
 Ac si quam acerba fortunæ severitas
 Fecisset olim intercapedinem tuæ
 Felicitati, idipsum quod nunc tu negas
 Te ferre posse, ferres vivendi genus.
 Beata præsens vita venturæ nocet.

F A B U L A XIII.

Rusticus & Asinus.

SUA gravatum sarcina, quantum satis
 Debebat esse, agebat Asinum Rusticus.
 Cum carperet iter per frutetosum locum:
 Ni sum falsus, ait, hinc prope a me confessor
 Virgulta, quorum non sit usus futilis;
 Faciuntque prorsus ad meam cupidinem;
 Operæ ergo pretium fuerit hæc decerpere:
 Ohe, resiste, Barde: id oneris additum
 Feres, nec opinor, magno incommodo tuo.
 Resistit ille. Nec morâ, imprudens Herus
 Virgulta cædit, mundat, aptat, colligat,
 Pondusque justo ponderi imponens novum,
 Plus, ratio quam sinat, Asini dorsum premit.
 At sic tamen eum progredi viam videns
 Satis expedito gressu, sarcinam putat
 Non esse tantam, major ut aliquantulo
 Non illa fieri sine periculo queat;
 Lapidum ergo forte cum strues occurreret
 Juxta viam seposita, & ex illis duos
 Videret, qui placerent sibi præ cæteris:
 Stulte facerem, ait, si, quod objicit mihi
 Fortuna tam benigna, negligerem bonum.
 Atque duos lapides, quos facile tollit manus,
 Quantillum est oneris? hos &, Aselle mi, feres.

Officium vires prope recusant: fert tamen
 Pecus miscella: colligit etiam breves
 Sui vigoris reliquias, & exerit:
 Ira ut miretur, gaudeatque Rusticus,
 Asinum sibi esse talem, quem nullus labor
 Debilitet: cumque gravior nudum incedere
 Suaderet æstus, detrahit vestem sibi,
 Et ceteris quoque impedimentis eam
 Non dubitat super ingerere, nil dum suspicans,
 Quanto prope esset Bajulus infelix malo
 Ut conficeretur denique. Enim vero in via
 Grave offendiculum cum fefellisset pedem,
 Simul ille cadit, & sarcina oppressus perit.
 Qui minimus, sæpe summus est mali gradus.

FABULA XIV.

*Superba Anxietas, sive Musca, Trochilus,
 & Troffulus. (t)*

ÆSTATE media concitati sex equi
 Currum trahentes, putre quatiebant solum,
 Et excitato pulvere fugabant diem.
 Temone in ipso tenuis interea sedens,
 O quantus, inquit Musca, premit equos labor,
 Quantusque sudor irrigat, dum me trahunt!
 Sic prævalenti confidere cum vult trabe,
 Quæ quinque crassas facile sustineat boves,
 Pusillus ille, ex alitum gente infima,
 Prætentat illam Trochilus (u), & supersilit
 Similis timenti, ferre se ne non queat.
 Sic impudenti Troffulorum de grege
 Aliquis, ineptus, administris imperi

Multum

(t) Benferade, Fab. XXXI. Le Noble, Fab. CXCVII.
 Abstemius, Fab. XVI. Faernus, Fab. XLV. Camerarius,
 Fab. CCCCXCII.

(u) Regulus vulgo dicitur, Plinius Hist. Lib. X. Cap.
 LXXIV. *Dissident Aquila & Trochilus, si credimus,
 quoniam Rex appellatur avium.*

Multum exhibere se negotii putat;
At, ille vivat (x), an secus, hi nil sentiunt.

FABULA XV.

Avarus & Thesaurus. (y)

THESAURUM Avarus fossa condiderat humo:
Quem subodoratus clanculum fur sustulit.
Ergo ille rediens, vacuum ut invenit locum,
Sortem execrari cœpit omnibus modis (z).
Tum quidam sapiens: Quid, ait, incassum furis?
Ubi pondus auri sterile posueras, ibi
Repone lapidem; tibi tantumdem proderit.

FABULA XVI.

Lupus Filium erudiens.

LUPUS erudire filium, visum sibi
Nimis ferocem, voluit ad mores bonos:
Generi, inquit, nostro multa multi existimant
Jure exprobrari, turpem quæ mereant notam:
Sævi, rapaces, furtis atque cædibus
Assueti vivere latrones, Lupi audiunt:
Isti sunt tituli, isthæc honorum insignia,
Quibus adornare nos plerique hominum solent:
Et, si fateri quod res est, nobis licet,
A veritate non aberrant plurimum:
Quod ut refutes, Nate, moderato tuo
Vivendi more, & exemplis, quantum potes,
Sanctis, & omni furto, fraude vacantibus,
Falsum esse tandem ostendas, te multum precor.
Hæc juniori causam plausibilem Lupo,
Et honestam habere credita est oratio;
Animoque penitus ille jam receperat
Monitus paternos, &, reluctanter licet,

E 5

Ad

(x) Cicero Philipp. XIII Cap. XVI. *Vivat, an mortuus sit, quis aut scit, aut curat?*

(y) La Fontaine, Lib. IV Fab. XX. Benferade, Fab. CLVI. Æsopus, Fab. LIX. Faernus, Fab. XLVIII.

(z) Terentius Eunuch. Act. II Sc. III V. 92.

Et quæ nos semper omnibus cruciant modis.

Ad obsequendum comparabat indolem.
 At ecce, quæ fors dereliquerat gregem
 Deerraveratque, his interim aspicitur ovis:
 Simulque victus cessit, ac evanuit
 Amor honestatis, cujus successit loco
 Sævæ rapacitatis, cædis impiæ
 Libido victrix. Subito ad prædam curritur:
 Capitur, necatur, manditur misera bidens:
 Bona huc consilia recidere. Sed utrum putas
 Præsignavisse sceleri patrando viam?
 Ipse, erudierat qui præceptis tam bonis,
 Fuit ipse ductor sceleris patrandi pater.
 Hanc pædagogis expolivi fabulam,
 Qui sancta verbis, prava sed exemplis docent.

F A B U L A XVII.

Edera & Agricola.

FRUTICABAT Edera, frondibusque humum suis
 Tegere contenta, non audebat altius
 Erigere sese, & proximam sibi arborem
 Amplecti, & excelsa adminicula prosequi:
 Sed rapere spatium properabat, quam maximum
 Poterat, avaris hinc & inde lapsibus,
 Ita ut feracis hortuli partem bonam
 Male occuparet. Quod animadvertens, statim
 Evellere malam stirpitis frugem incipit
 Agricola prudens. Illa tum: Nostras, ait,
 Temerare frondes, barbarus quis te furor
 Impellit? contine, oro, violentas manus;
 Parce immerentem abolere natali solo,
 Ubi pullulantes humilis inferno comas,
 Inglorioque simplex otio fruor,
 Nec noceo quidquam. At ille: sed prodes nihil;
 Meoque in horto quod nihil prodest, nocer.
 Atque hæc locutus, instat diligentius
 Perpurigare omnem stirpibus malis locum.

Ad otiosos cives fabula pertinet.

FABULA XVIII.

Mustela & Mures. (a)

MUSTELA senior, ac deserta viribus,
 Mures, ut olim, non valebat assequi.
 Dolum ergo cœpit struere, quo prædam sibi
 Ullum citra laborem venari queat,
 Ore tenuis in farinam sese condidit,
 Accedunt mures; at farinam strenuo
 Dente subigentes ubi Mustela prospicit;
 Ungues scelestos exerit, & prædam caput.
 Solertia sæpe virium præstat vicem.

FABULA XIX.

Puer & Colonus.

DUM vallem amœnam cupidus explorat Puer;
 Pulchrosque flores pulchrior ipse dum legit;
 Colonus, esse nil satis tutum, monet;
 Sibi namque visas proserpentes bestias,
 Quarum videlicet inopinis moribus
 Infigeretur vulnus insanabile:
 Itaque prudenter ageret; aut potius loci
 Nimium maligni amœnitatem sperneret,
 Discederetque, si saperet. Externitus
 Hæsit Puer; avidamque continuit manum.
 At mox recrescit (b) viribus pollens novis
 Cupido, mox & imperat pulso metu,
 Ergo ille genio libere indu'get suo,
 At violam, quæ micabat inter gramina,
 Ungue temerarius improbo cum carperet,
 Attingit inscius, excita:que Viperam
 Ibi latentem: quæ simul dente aspero
 Hunc pungit, & veneno letali imbuir.

Ubi

(a) Barlandus, Edit. Rob. Steph. pag. 116. Phædrus,
 Lib. IV Fab. I. Vid. not. ad Lib. II Fab. XLII.

(b) T. Livius, Lib. XXVI Cap. XLI. sub fin. *Vos modo,
 Milites, favete nomini Scipionum, Scholi Imperatorum vestro-
 rum, velut accisis recrescenti stirpibus.*

Ovidius Heroid. Epist. II V. 5.

Luna quater latuit; pleno quater orbe recrevit.

Ubi est Voluptas, esse ibi periculum
Non facile credi, ostendit hæc narratio.

FABULA XX.

Anicula & ejus Ancilla. (c)

DUAS habebat Anicula Ancillas domi;
Easque ad cantum Galli gallinaeci,
Quem sibi ad idipsum nutribat, quotidie
Ipsa excitabat, antequam luceſceret,
Ut facerent opus. At illæ motæ denique
Tam pertinacis tadio vigilantia,
Obtruncant Gallum, sperantes, hoc mortuo,
Se posse somno longiore jam frui.
Sed mox earum spem ſefellit exitus;
Hæc namque, poſtquam Gallus occiſus fuit,
Jam ſurgere ipſas nocte intempeſta jubet.

Mortales aliquod evitare dum ſtudent
Leve malum, in aliud ſæpe gravius incidunt.

FABULA XXI.

Vulpis, Aſinus & Leo. (d)

IN ſaltus nemorum devios proceſſerant
Vulpis, Aſinusque, venarentur ut ſimul.
Dum curſitaret Vulpis, occurrit Leo;
Utque illa vidit imminens periculum,
Acceſſit, & ſodalem juravit ſuum,
Eumque vinctum, tradituram ſe Fero,
Impunitatem ſi promitteret ſibi.
Qui cum illam ſeſe dimiſſurum diceret;
Aſinum ſceleſta in caſſes incautum trahit.
Sed hunc effugere non poſſe ut Leo videt,
Vulpem ipſam primo comprehenſam devorat,
Ad Aſinum edendum convertit ſe poſtea.

Se perdunt (e) ſæpe, ſocios qui perdunt ſuos.

FA-

(c) La Fontaine, Lib. V Fab. VI. Benſerade, Fab. CLXIV.
Æſopus, Fab. LXXIX.

(d) Richer, Lib. IV Fab. XVI. Æſopus, Fab. CXVI.
Faernus, Fab. LXXXII. Camerarius, Fab. CDLXXXI.

(e) Cicero de ſinib. bon. & mal. Lib. I Cap. XV. *Multi
amicos . . . plerique autem ſeiſſos penitus perdiderunt.*

FABULA XXII.

Milvus ægrotans. (f)

DICEBAT Matri Milvus ægrotans suæ:
 Quid lamentare frustra? quin potius Deos
 Precibus exoras, Mater? Illa sic refert:
 Deorum, Nate, quis miserebitur tui?
 Nullus vocatur precibus ac votis Deus,
 Cujus aliquando templa non fœdaveris,
 Et consecratas non violaveris dapes.
 At unde nunc venit ista religio tibi
 Tam subita summam Cœlitum in potentiam,
 Quam dum valeres, solitus es contemnere?
 Raro in periculis impius constat sibi.

FABULA XXIII.

Pardus & Vulpis. (g)

MELIUS cavilla (h) quam gravi sententia,
 Reprimitur sæpe stulta gloriatio.
 Superbiebat Pardus, quod varius color
 Suo datus esset corpori. At Vulpis jocans:
 Meus, inquit, animus & varium, quoties libet,
 Capere colorem didicit; ac tanto magis
 Te nostræ oportet dignitati cedere,
 Quanto plus vili præstat animus corpore.

FABULA XXIV.

Deus Ligneus. (i)

FREQUENS colebat Ligneum quidam Deum
 Paganus; & rogabat, ut aliquid boni
 Sibi tribueret: sed fiebat interim
 Res ejus omnis in dies angustior.

Ergo

(f) Æsopus, Fab. CXXXII. Faernus, Fab. XIII. Gu-
 dius append. ad Phædr. Fab. I.

(g) Benferade, Fab. CXXI. Boursault Comœd. Æso-
 pica II. Aët. III. Sc. III. Philib. Hegemon, Fab. XVI. Æso-
 pus, Fab. CLXII. Avienus, Fab. XL.

(h) Plautus Aulul. Aët. IV. Sc. IV. V. II.

Aufer cavillam: non ego nunc nugas ago.

(i) La Fontaine, Lib. IV. Fab. VIII. Benferade, Fab.
 LXXXIII. Æsopus, Fab. CXXVIII.

Ergo vehementi denique ira percussus,
 Deum, apprehensis cruribus, magno vibrans
 Conatu intorquet; ac muro illiit caput.
 At ecce, quanta ne fuit in votis quidem,
 Effracto capite magna vis auri effluit:
 Quam lætus ille dum recolligit: Mihi
 Nil, inquit, profuisti, quamdiu bene
 Tibi feci, nunc, cum noceo, prodesse incipis?
 Abi autem procul, inepte, & futilis Deus!
 Istis nihilo plus improbis famulis vales,
 Qui, nisi male habiti, nullum opus faciunt bonum.

FABULA XXV.

Juvenes duo & Ursus. (k)

CUM Pellhōne Juvenes duo transegerant (l)
 Ille stipulatam (m) tradidit pecuniam;
 Hi promissere pellem villosissimam
 Ursinam, eamque amplissimam: Nondum quidem
 Necatus ipse est Ursus nobis, inquit;
 At, quod tantundem est, ubi stabulet, notavimus:
 Imus: necatum qui deglubant, mittito.
 Hinc nemus ingressi dum invicem sese excitant,
 Ut omnem corde porro propellant metum;
 Ecce latebroso, prædam odoratus, specu,
 Erumpit Ursus. Illi simul exterriti
 Trepidare. At alter, ut erat agilis, & levis,
 Quam primam reperit, altam scandit arborem;
 Humi decubuit alter; sive didicerat,
 Ursi id esse moris, ut depalcerent
 Viventium artus, mortuorum spernerent;
 Seu potius ipse fregerat hominem metus,
 Prostraveratque non absimilem mortuo.

Hunc

(k) La Fontaine, Lib. V Fab. XX. Benferadé, Fab. CI.
 Æsopus, Fab. CCLIII. Avienus, Fab. IX. Abstemius,
 Fab. XLIX.

(l) Cicero ad Attic. Lib. II Epist. IV. *Amabo te, cura
 ut cum Titinio, quoquo modo poteris, transigas.*

(m) Cleero Orat. pro Rosc. Com. Cap. V. *Hæc pecunia
 necesse est, aut data, aut expensa lata, aut stipulata sit. . . .
 stipulatam non esse taciturnitas testium concedit.*

Hunc versat omnes Urfus in partes, suum
 Ad os jacentis, & nares, rostrum applicat;
 Nullumque postquam spiritum sensit: Procul
 Abeamus, inquit; istud omnino liquet
 Cadaver esse; jamque foetere incipit.
 Quem cum prospexit abscessisse longius,
 Ex arbore tandem timidus descendit comes,
 Sociumque prendens (n): Plurimum tibi gratulor,
 Amice, dixit, tanto quem periculo
 Ereptum video: sed rescire pervelim,
 Ad te jacentem cum propius accederet,
 Tecumque tacite Fera videretur loqui,
 Tibi forte moniti si quid instillaverit.
 Me monuit, inquit, ut ne pellem vendere
 Viventis Urfi collibeat unquam mihi.

FABULA XXVI.

Bos & Equus.

SALUBRIS interpretati delicias dabant
 Omnem suam operam corpori augendo Boves:
 Quorum unus, advenire cum inciperet sibi,
 Bonorum ab ipsa nimietate (o) tædium,
 Juncos rigentes proximi lacus petit,
 Sperans ibi aliquod irritamentum gulæ
 Posse reperiri: sed simul vestigium
 In ora posuit unda, crassi corporis
 Obesitate (p) defixus, inhæsit luto.
 Illum tenacibus impeditum angustiiis
 Cum se expedire (q) quæreret, focii vident;
 Illumque, longis cum sibi mugitibus
 Opem, dare vellent, imploraret, audiunt:
 Neque commoveri eos tamen sentit miser.

Inte-

(n) Terentius Phorm. Act. IV Sc. III V. 14.

Visum est mihi, ut ejus tentarem sententiam:

Prendo hominem solum: Cur non, inquam, Phormio,
 &c.

(o) Columella, Lib. VI Cap. XXIV. *Nimietate verni pabuli pecudes exhilaratæ lascivunt.*

(p) Idem ibid. *Ne eas steriles reddat nimia corporis obesus.*

(q) Vid. not. ad Fab. XIV Lib. I.

Interea macer, & maximis laboribus
 Exercitatus, multisque miseriis, Equus
 Prope hinc advertit infortunium Bovis;
 Et subvenit ultro, & utilem simul incipit
 Operam adhibere: nam lutum partim ejicit,
 Teritque partim calcibus, & sic deprimit,
 Facilemque demum tramitem Bovi facit.
 Qui tale gratus ad beneficium stupens,
 Satis unquam, dixit, hancce misericordiam
 Laudare possum? sed quid autem te impulit
 Ut me adjuvares, cum propinqui etiam mei
 Me derelinquant omnis auxilii indigum?
 Equus simpliciter; Hi sua videlicet,
 Usque affluentes dum bonis vivunt, frui
 Felicitate tantum possunt; ast ego
 Miseris (r) adesse didici haud ignarus mali.

FABULA XXVII.

Puer & Turbo. (s)

DUM verberare torto Turbinem (t) exercet Puer,
 Cur te, inquit, ut agitare motu idoneo
 Pulsare cogor? Turbo respondet: Statim
 Iners jacerem, nisi animos plagæ darent.
 Multis necesse est vexari, ne torpeant.

FABULA XXVIII.

Leo, Agnus & Cerva. (u)

AGNUM vorare dum Leo inventum parat,
 Cervam, nec procul hinc accubantem, conspicit:
 Simulque præda melioris cupidine
 Pellectus, petit hanc; viliozem, quam tenet,
 Respuit. At hujus cerva venientis sono

Admo-

(r) Virgilius Æn. Lib. I V. 634.

Non ignara mali miseris succurrere disco.

(s) Regnerius, Part. I Fab. X.

(t) Virgilius Æn. Lib. VII V. 378.

Ceu quondam torto volitans sub verberare turbo,

Quem pueri exerceant

Dant animos plagæ.

(u) Æsopus, Fab. CCXXVIII.

Hos Fabula notat, qui meliora dum petunt
Non obtinenda, præsens amittunt bonum.



Indocta morum facta commutatio!
Etenim profecto hanc imperitis moribus
Objicio culpam: quod virum Gallum, ingenii
Cui vis, & apta differendi copia
Concessa fuerit, nunc plerique vix putent
Hominem esse sanum, si Latine scripserit;
Saltem inficeto, pravoque ejus indolem
Fuisse studio corruptam dijudicent.
Atqui latinum quemque scriptorem optimum
Vetustum assidua recte versari manu
Pars nostrum hominum sanior nondum negat.

Ergo & tentare, an illa, quæ toties legas,
 Imitando demum aliquatenus (a) valeas tuis
 Æquare scriptis lingua eadem differens,
 Conatus est dicendus haud inutilis:
 Et adjuvanda est talis æmulatio (b).
 Ita nempe fiet usitator in dies
 Latinitatis aureæ scientia:
 Ejusque porro varias optimas opes
 Frequentiori distrahere commercio
 Cunctis licebit. Sin minus: brevi accidet
 Ex vanæ (c) Gentis arrogantia, ut sibi
 Occludat ipsa limpidos fontes bonæ
 Antiquitatis: cujus ingenuæ quidem
 Veneres, salesque lepidi, & ars æquabilis
 In libris, quos nunc Gallica expolit manus,
 Plerisque nullum jam fere inveniunt locum.

Hac ipse commotus aliquantulum fui
 Iniquitate temporum, & deterritus (d)
 Ne quid latine scriptum mandarem typis.
 At primum in istis, quas polivi, fabulis
 Satis expedita cum sit simplicitas stili,
 Brevitasque, & sensus varietas probabilis;
 Esse placituras aliqua parte credidi

Ven-

(a) Vox *aliquatenus* Vossio de Vitiis Sermonis, Lib. I Cap. XXV, falso admodum suspecta est: quippe quæ per multis Columellæ, Senecæ, Plinii Historici, & aliorum exemplis comprobetur.

(b) Cicero Tusculan. Lib. IV Cap. VIII. *Æmulatio autem dupliciter illa quidem dicitur; ut & in laude, & in vitio nomen hoc sit: nam & imitatio virtutis æmulatio dicitur.*

(c) Cicero de Divinat. Lib. I Cap. XIX. *Irrideamus Haruspices: Vanos, futes esse dicamus, quorumque disciplinam & sapientissimus vir, & eventus, ac res comprobavit, contemnamus.*

(d) Scioppius in infamia Famiani, pag. 43 Edit. 1658, damnat hanc vocem; pro qua Famianum Stradam admonet, dici ab ipso *terrītum*, vel *conterrītum* oportuisse. Verumtamen, Phædrus, Lib. V Fab. IV V. 7 dicit se fabulæ respectu deterritum. Ovidius Metam. Lib. X V. 600. Hippomenem juvenum eventu deterritum memorat: atque Cicero ad Attic. Lib. X Epist. XV, pudore deterritum narrat Antonium.

Venturasque etiam in multitudinis manus,
 Tum si longe aliter accidat, paucissimis
 Contentus esse decrevi lectoribus;
 Satis beatus, hi modo sint similes tui,
 Optime SALERI, qui lepore candido,
 Et arte lucida, & opibus cunctis bonæ
 Antiquitatis jam diu mentem tuam,
 Bonam ipsam & alacrem, naviter adornaveris.
 Nunc si increpavit lector impatiens moræ
 Hunc forte paulo longiorem Prologum,
 Saltem hanc inibit gratiam ex me, quod sibi
 Verbosa nulla fiet excusatio;
 At fabularum quæ mearum pars erit
 Extrema (e), quintum protinus librum dabo.

FABULA I.

Camelus. (f)

PRIMUM ut Camelus visus est, perterriti
 Homines fugere: procedente tempore
 Considerarunt ejus mansuetudinem,
 Qua cognita aliquis ausus est accedere.
 Sed ubi compertum est nullam in tanta bellua
 Inesse bilem (g), sic eam contemptui
 Habuerunt, ut capistrum cogerent sequi (h),
 Puerisque parvis circumagendam traderent.
 Fabella ostendit, usu, & assuetudine
 Minui timores, sensimque evanescere.

FABULA II.

Viator & Lapides.

ISTI me Lapides hercle conficiunt gravi
 Labore, cursumque etiam, nec mediocriter,

F 2

Præ-

(e) *Extrema Lege: non ultima.*

(f) La Fontaine, Lib. IV Fab. X. Æsopus, Fab. CXVIII. Faernus, Fab. XVIII.

(g) Plinius Hist. Lib. XI Cap. XXXVII. *Fel. . . . Camelii. . . non habent.*

(h) Horatius, Lib. I Epist. X V. 48.

Tortum digna sequi potius, quam ducere funem.

Præpediunt; talem cur molestiam fero,
 Inquit Viator saxosam ingressus viam?
 Simulque Lapides, quotquot obstant, incipit
 Tollere, & ejicere, & expurgare limitem,
 Sese facilius agere qua possent pedes.
 Sed quis enimvero fructus hinc demum redit?
 Duplum laboris, duplum is impendit moræ.
 Homines hoc sæpe, sufferendum quod venit,
 Minuere stulte dum volunt, augent malum.

FABULA III.

Vulpis & Cervus.

MALEVOLA Vulpis, & inimico percita
 Livoris æstu, Cervum incefferat probris:
 Sed quanquam acuta, ac diligens malignitas
 Perviderat omnia, unam ad extremum tamen
 Exilitatem tibiarum objecerat.
 Cui non modo nihil asperum contra refert
 Cervus, sed ipse gratulans etiam sibi:
 Omni mea, inquit, me esse contentum satis
 Specie decebit, livor in qua perspicax
 Id unum vitii, tantulumque, notaverit.
 Invidia quædam est, quæ, quos carpserit, juvat:
 Quod non vituperat, laudat malevolentia.

FABULA IV.

Carbonarius & Fullo. (i)

FULLONEM cum argaret Carbonarius,
 Ut una secum, quam domum conduxerat,
 Habitare vellet: Quod rogas, non expedit,
 Respondet Fullo, quæ facerem enim candida,
 Carbonibus ea simul infuscares tuis.
 Male socientur, quæ natura discrepant.

FA-

(i) Richer, Lib. VI Fab. XV. Benferade, Fab. CXXIII.
 Æsopus, Fab. XII. Faernus, Fab. LXIII.

FABULA V.

Cervus & Vitis. (k)

VENANTES fugiens Cervus in vitem incidit,
 Et pullulantes latuit inter palmites :
 Sed mox pericli oblitus, & nefaria
 Frondis tenellæ plectus cupidine,
 Vitem, licet ipsi, quod vivat adhuc, debeat,
 Vitem sacrilegis carpere cœpit dentibus :
 Ecce autem, dum liberius obsequitur gulæ,
 Ramusculorum motus excitator,
 Suam hic adesse prædam, Venantes monet:
 Qui subito adorti Cervum figunt spiculis,
 Tunc ille moriens: Patior hanc merito vicem,
 Dixit, meam qui servatricem læserim.

FABULA VI.

Canis & Vulpis. (l)

DUM gloriatur, dumque Vulpe se Canis
 Fœcundiorē prædicat; Vulpis refert:
 Fœcunda magis es; catulos at cæcos (m) paris.
 Vana intumescit gloria fœcunditas,
 Perfessione iusta si fœtus carent.

FABULA VII.

Ager, in quo Thesaurus. (n)

SIBI advenire sentiens summam diem
 Agricola, jussit filios accedere:
 Agrumque, dixit, quem relinquo, vos mala
 Cavete ne diffidia cogant vendere:

F 3

Defos-

(k) La Fontaine, Lib. V Fab. XV. Benferade, Fab. CLXXV.
 Æsopus, Fab. LXV. Faernus, Fab. LXX. Jaisus Biblioth.
 Rhet. Tom. I pag. 751.

(l) Æsopus, Fab. LXIX.

(m) Plinius Hist. Lib. VIII Cap. XL sub. fin. *Quidam
 tradunt, si unus (Catulus) gignatur, nono die cernere: si
 gemini, decimo: idemque in singulos adjici, totidemque esse
 tarditatis ad lucem dies.*

(n) La Fontaine, Lib. V Fab. IX. Benferade, Fab. CLXIX.
 Æsopus, Fab. XXII. Faernus, Fab. XXXV. Jaisus Biblioth.
 Rhet. Tom. I pag. 753. cujus verba nonnulla retinimus.

Defossus illic namque Thesaurus lateat:
 Qua parte lateat, id vero ignorat pater:
 At enim monenti credite, ac ligonibus
 Rastrisque glebas partem in omnem vertite:
 Confidite: labor Thesaurum eruet improbus,
 Dirabitque omnes. Interim moritur senex.
 Illi imperata facere (spes enim lucri
 Stimulat) terramque fodere, quam longa est dies.
 Thesaurus, qualem cupierant, non est quidem
 Inventus usquam; sed agrum dum sic excolunt,
 Cultura peperit ipsa perpetuas opes.
 Homini Thesaurus ingens, assiduus labor.

FABULA VIII.

Venator, Palumbes & Cornix.

TENDEBAT arcum Venator collinear. (o)
 Visa Palumbe: cui Cornix: Quid restitas?
 Quæ tibi minatur, hanc sagittam non vides?
 Video, inquit illa, sed quam Venator retro.
 Reducat ad se, petere me nedum velit.
 Dum sic Palumbes misera se ipsam decipit,
 Volans sagitta improvidam transverberat.
 Maledica vidi lingua cum restringeret
 Sua tela, gravius hinc tamen vulnus daret.

FABULA IX.

Equulus & Equus.

EQUULUS habebat herbas in prato affatim
 Pingues, tenellas: luxus at gustum obtudit,
 Ipsaque creavit satietas fastidium.
 Eodem, vires reficiendi gratia,
 Deductus forte cum fuisset Quadrupes
 Senior; adit eum Pullus, & multa rogat
 Prece, impetratque, ne gravetur pascua
 Hinc ad meliora ducere. Erumpunt simul,
 Et per depressa vallium, ardua collium,

Pla-

(o) Collineare, est dictum recta linea ad id, quod proponitur, dirigere. Vide Ciceron. de finib. bon. & mal. Lib. III Cap. VI, tum de Divinat. Lib. II Cap. LIX.

Planaque camporum promovent celeres gradus.
 At duplicari ductor umbras cum videt,
 Cursum reflectit, perque vias notas sibi
 Sensim reducit ad relicta pascua:
 Quo dum reveniunt (p), interea sol occidit,
 Nox itaque Pullo facile causam præbuit,
 Cur falleretur: qui exertis, quantum potest,
 Herbam apprehendit, commoliturque dentibus.
 Pulchre satullum (q) dulcis excipit sopor.
 Rerum at colores orta lux ubi retulit,
 Expergefactus, & oculos circumferens,
 Hui! fallor, inquit, an hoc idem aspicitur solum
 Quod spreveram? herba hæc suavis quo facta est modo?
 Respondit senior: Ex labore scilicet
 Collecta cœnam condit (r) insuavem fames.

FABULA X.

Gallina & Ova serpentis. (s)

SERPENTIS Ova Gallina olim reperit,
 Et incubavit, dum fœtus excluderet:
 Et illi vita vix incœperunt frui,
 Altricem diris enecarunt morsibus.
 Malum sibi foveat, quisquis educat malos.

FABULA XI.

Vulpis & Rubus. (t)

FUGIEBAT acta Canibus Vulpis: in Rubum
 Densum ac rigentem, se coniecit; & Canes
 Elusit: & cum pungeretur sentibus:
 Etiamné, dixit, qui me servant, sauciant?

F 4

At

(p) Vid. Vorstius de Latinitate falso suspecta, Cap. XVI.

(q) Varro de re Rust. Lib. II Cap. II, non longe ante fin.
*Hoc item faciunt mane, antequam matres in pabulum exeant,
 ut agni satulli fiant lacte.*

(r) Cic. de fin. bon. & mal. Lib. II Cap. XXVIII. *Socratem . . . audio dicentem, tibi condimentum esse famem.*

(s) Le Noble. Fab. LXXXVIII. Æsopus, Fab. CXVII.
 Faernus, Fab. LXXIX.

(t) Le Noble. Fab. CLXXIX. Gabrias, Fab. VIII. Camerarius, Fab. CCCLXIX.

At faucient, dum servant: Nam didici malum
Ferendum esse leve, ut evitetur maximum.

FABULA XII.

Piscator & Thunnus. (u)

PISCATOR olim totam qui consumpserat
Multo diem labore, nihilque ceperat,
Litus reperebat tristis, cum subito in scapham
Thunnus, inimicum dum fugit piscem, insilit:
Quem capiens: Longus efficere, ait, quod labor
Non potuit, id fortuna quam cito efficit!

FABULA XIII.

Delphinus & Simius. (x)

MELITÆA (y) Athenis jam propinquabat ratis:
Exorta subito dira tempestas eam
Fregit, pontoque dissipavit. Hoc videns,
Miseretur, & quoscumque Delphinus potest,
Juvat, rapitque ab undis homines naufragos,
Terræque reddit: quos & inter, non satis
Discernens genera, Simium in dorso levat.
Hunc dum sic veheret, qua domo esset, quæsit:
An Atheniensis? Sum, inquit, ipsa scilicet
In urbe media natus; & mihi sunt quidem
Parentes primi civium. Ergo tu probe
Piræum nosti? Sic, ait, nemo ut magis;
Amicum quippe, sanguine & junctum mihi.
Hic autem portum Simius nimis loquax
In hominem vertit. Quod simul sensit, caput
Reflexit, erroremque Delphinus suum
Intelligens, remisit in aquas bestiam.
Sibi ipsa semper vana loquacitas nocet.

FA-

(u) Æsopus, Fab. XVII.

(x) La Fontaine, Lib. IV Fab. VII. Benferadé, Fab. CXVI.
Æsopus, Fab. LXXXVIII. Faernus, Fab. XXXVI.

(y) Plinius Hist. Lib. III Cap. ult. *Melita*, unde *Catulos*
melitans appellari *Callimachus* auctor est.

FABULA XIV.

Fures & Gallus. (z)

CUM Fures captum dedere pararent neci
Gallum, rogabat ille, se ut dimitterent,
Hominibus quippe qui didicerit utilem
Operam navare; eosque noctu fuscitet
Opus ad diurnum. At illi: Tu tanto (a) magis
Moriere; quod sic nos furari vix sinis.

Nemo placere bonis & malis simul potest.

FABULA XV.

Corvus, Asellus & Agafo. (b)

IN prato Asellus dum tranquille pascitur,
Exulceratum in ejus dorsum devolat
Corvus, tunditque rostro fauciam cutem.
Rudit ille, saltat; nec potest depellere
Volucrem importunam; tamque lepidos sic jocos.
Præbet, ut Agafo non modo ipse bajulo
Suo infelici non ferat opem; at rideat.
Heu me! ait Asellus, bis patior hæc vulnera,
Quod ridet ille, ferre opem qui debuit.

FABULA XVI.

Amnis & Fons. (c)

EX quo trahebat fonte originem suam,
Hunc sprevit Amnis: vix exili murmure
Scaturientem audiri, & inter herbulas
Tenuem, ac egenum delitescere dictitans;
At se per populos, urbesque celeberrimas
Fragore magno volvere fluctus suos.
Sensit superbum: &: Nostra, Fons inquit, nisi
Suppeditet urna, quid habeas, quod jactites?

Fabella eorum damnat insolentiam,
Sux qui auctores dignitatis vituperant.

F 5

FABULA

(z) Richer, Lib. VIII Fab. IX. Æsopus, Fab. XCVII

(a) Terentius Andr. Aët. IV Sc. IV. V. 35.

Suam gnâtam non dabit? tanto hercle magis dabit.

(b) Æsopus, Fab. CXV. Faernus, Fab. LXXXIX.

(c) Benferade, Fab. CLXXXIV. Bourfaut Comœd.

Æsop. II Aët. III Sc. IX. Abstemius, Fab. LVII.

FABULA XVII.

Culex & Taurus. (d)

IN cornu Tauri parvulus quondam Culex
 Confedit; seque dixit, mole si sua
 Eum gravaret, avolaturum illico.

At ille; Nec te confidentem senseram.

Dictum sit illis, qui se, cum sint futiles,
 Viros tamen esse magni ponderis purant.

FABULA XVIII.

Simia & Nux.

ADHUC virenti cortice obductam nucem
 Cum reperisset Simia, ipsam mordicus
 Decorticare coepit; & gravis quidem
 Amritudo est hujus, inquit, corticis;
 At nucleus tanto dulcior mihi accidet.

FABULA XIX.

Sus opima. (e)

FORTE in culinam Sus se opima contulit;
 Ibique pernas, larda, botulos, dum videt;
 Hæc sunt Suilla, dixit; & abiit gemens.

Placere nulla conditio felix potest,
 Cujus odiosus prævidetur exitus.

FABULA XX.

Cera & Later. (f)

CERA invidebat Lateri duritiem suam;
 Quam comparari ab ignium violentia
 Cum comperisset, se ipsa in ignes dejecit:
 At misera penitus liquitur, & consumitur.
 Quod uni prodest, alteri sæpe id nocet.

FA-

(d) Richer, Lib. II Fab. VIII. De la Motte, Lib. I Fab. XIII.
 Æsopus, Fab. CCXVII. Tanaq. Faber ex arabico. Locmani,
 Fab. XIII. Burmannus append. ad Phædr. Fab. XXXI.

(e) Camerarius, Fab. CCLXXVI.

(f) Abstemius, Fab. LIV. Camerarius, Fab. CCCXIX.

FABULA XXI.

Lupus & Mulus. (g)

MULUM voraturus erat inventum Lupus;
 At nomen ejus scire cum vellet prius :
 O (h) qui vocaris, inquit? Istud me quidem
 Latet (i) ait Mulus; audire memini tamen
 A matre, nomen esse mihi scriptum pedis
 In ipsa dextri posterioris ungula;
 Quod scire si vis, accede huc, legas licet.
 Lupus legendi gratia cum accederet,
 Pedem ille dextrum posteriorem sustulit,
 Hujusque fronti, quanta vi potuit, simul
 Impegit, ac semianimem prostravit solo.
 Lupus ad se tandem vix reversus: Heu! mali
 Quantum creavit stulta curiositas,
 Dixit lamentans, & boni quantum abstulit!

FABULA XXII.

Fuvii duo, alter perstrepsens, alter silens. (k)

AD Fluvium magno perstreptentem murmure
 Quidam viator cum venisset, restitit,
 Timuitque: sed mox ausus est tamen vadum
 Tentare; & undas mirans altitudine
 Carere, ripam facile ulteriorem attigit.
 Ad alium deinde Fluvium pervenit, suos
 Lente, & quiete fluctus qui provolveret:
 Hunc, inquit, pertransire, minimus est labor
 Tam lenem, tamque pacificum; ab isto alter

Rapido

(g) La Fontaine, Lib. XII Fab. XVII. Camerarius.
 Fab. CCXXXV. Menagius, Fab. III. Jaisus, Tom. II
 pag. 148.

(h) Vide Terent. Adelph. Act. V Sc. VI V. 3.

(i) Non audiendus est Scioppius, dum in infamia Fa-
 miani pag. 104 non magis latinum esse, *latet me*, quam *pa-
 tet me*, contendit, & hunc esse solœcismum diserte pronun-
 tiat. Vide Varron. de re rust. Lib. I Cap. XL. Virg. Æn.
 Lib. I V. 134. Ovid. Fast. Lib. V V. 361. Plin. Hist. Lib. II
 Cap. XX.

(k) Camerarius, Fab. CCXC.

Rapido, & irato tam facile cum evaserim.
 Simul hæc locutus intrat: & absorbet simul
 Ipsum profunda vorticis malignitas.

Diffide, si quis taceat infensus tibi:
 Pleni minarum longe metuendi minus.

F A B U L A XXIII.

Pica & Columba. (l)

COLUMBAM Pica interrogasse dicitur,
 Cur ova eodem poneret semper loco,
 Hinc pullos non ignara semper abripi.
 Respondit illa: Sic soleo videlicet,
 Aliterque facere simplicitas me non finit.
 At Pica: Stulta est ista simplicitas, ait,
 Noto ex periculo quæ non fit prudentior.

F A B U L A XXIV.

Avarus & ejus Filius. (m)

EXIMIA poma Avarus in domus suæ
 Secretiori parte collocaverat;
 At nulla, nisi quæ tabida inficeret lues,
 Suam inde permittebat in mensam extrahi.
 Quod ejus postquam Filius graviter ferens
 Objecit frustra, denique invenit viam,
 Pomorum in ipsum qua penetraret horreum:
 Sed etiam amicos unum & alterum sibi
 Comites adjunxit. Optima quæque scilicet
 Poma hi capeffunt. Factum rescivit Pater,
 Succensuitque Filio damnum exprobrans:
 Qui rem confessus ultro: Quid damni tibi
 Intulimus, inquit? poma tantum putrida
 Tu comedis; integra sola nos comedimus.
 Nil perdit, id qui amittit, quo uti nesciat.

FA-

(l) Abstemius, Fab. VI.

(m) Abstemius, Fab. CLXXIX.

FABULA XXV.

Arbores. (n)

RECTÆ, & proceræ contemnebant Arbores
 Unam inter ipsas, totta quod, & humilis foret :
 Lignarius autem cum venisset huc faber,
 Cæduntur omnes illæ, at hæc relinquitur.
 Minimi fuisse pretii, multis profuit.

FABULA XXVI.

Vulpis sine cauda. (o)

VULPIS retentam laqueo caudam amiserat,
 Elapfa, vitamque hoc pretio redemerat.
 Sed enim pudore mixtus affligit dolor
 Misellam, quod se deinde sic oporteat
 Curtam ambulare. Socias ergo, tunc simul
 Ut forte magna coierant frequentia,
 Adit, sedetque, suasque perprimit nates
 Prudens, tegitque causam mœroris sul :
 Dehinc: Istam, inquit, caudæ longitudinem (p),
 Natura generi quam dedit nostro nimis
 Benigna, cur, sorores, non abscindimus?
 Ea lutosam verri humum numquid juvat?
 Ego vero amitti tale onus, lucrum puto.
 At, quæ rescierat hujus infortunium,
 Sic retulit una : Consilium non improbo,
 Cujus nec dubito momentum tibi grave
 Dandi quin fuerit; persuadere sed mihi
 Nil poteris; tergum ni prius obvertas, soror.
 Hic omnium ingens irrisio Vulpeculam
 Cauda minorem exire cœtu perpulit.
 Qua quis laborat, si queat cum pluribus
 Communicare infamiam, reputet levem.

FA-

(n) Abstemius, Fab. XII.

(o) La Fontaine, Lib. V Fab. V. Benferade, Fab. CLXVI.
 Æsopus, Fab. VII. Faernus, Fab. LXI. Jaius Tom. II. p. 744.

(p) Phædrus, Lib. I Fab. VIII V. 8.

Gulaque credens colli longitudinem.

FABULA XXVII.

Piscis fluviatilis & Pisces marini.

TORRENTE raptus alveo fluviatilis
 Marina Piscis subierat forte æquora:
 Occurrit incolarum turba, & advenam
 Hortantur omnes, regna Neptuni velit
 Incolere secum. Nimiam hic undarum objicit
 Amaritudinem. Illi contra se negant
 Sentire tale quidpiam. Vestrum malum
 Ne sentiat, inquit, ipsa pravitas
 Gustus, & ipsa assuetudo mali vetant;
 Civilibus undis maxima pars Mortalium
 Immersa, fluctus inter amaros volvitur,
 Bis misera, se miseram esse si non senserit.

FABULA XXVIII.

Bubulcus & Hercules. (q).

CURRUM sibi videns penitus hæsisse in via
 Bubulcus auriga, invocavit Herculem
 Queribundus: expectansque, dum auxilium Deus
 Afferre veller, otiosus restitit.
 Adfuit, inertemque Hercules hominem volens
 Corrigere: Lapidem hunc, inquit, obstantem ejice;
 Limum hunc renacem comminus; humero hanc rotam
 Impelle, sublevaque: punge nunc boves.
 Hui! plaustrum volvitur! Ergo meminervis Deos (r)
 His opitulari, qui admovent operi manum.

FABULA XXIX.

Simia, Porcus & Vulpis.

SUAVES, tenellos fœtidis Porci auribus
 Simia jocando flores alligaverat:
 Hinc stolidus ille factum se bellum putans,
 Sibi placebat, & videbatur sibi
 Dignus profecto qui placeret omnibus;

Simul-

(q) La Fontaine, Lib. VI Fab. XVIII. Avienus, Fab. XXXII. Faernus, Fab. XCI. Camerarius, Fab. CCCLIX.
 (r) Varro de re rust. Lib. I Cap. I. *Dei facientes adjuvant.*

Simulque ineptis tripudiabat (s) motibus.
 Quod forte Vulpis cum videret; sic eum
 Monuisse fertur: Quam ipsa turpem finxerit
 Natura formam. ornatus hanc si splendidus
 Illustrat, auget ipsam turpitudinem.

F A B U L A XXX.

Leo & Musculus (t).

L EONIS olim dormientis per júbas
 Lasciviendo cum excurrisset Musculus;
 Cumque excitatus ipsum cœpisset Leo:
 Veniam is rogavit imprudentiæ daret;
 Eamque facile misericors Leo dedit;
 Pecudem necare quippe tantulam pudet.
 In retia ille paulo post forte incidit;
 Quibus expedire cum se, frustra perfurens,
 Nequiret, rudere (u) cœpit immanem in modum.
 Audit, simulque proximo e cavo exilit
 Musculus; &: Adsum tibi, ait, beneficii memor:
 Statimque teretes dente corrodit plagas,
 Maculasque solvit, & Leonem liberat.

Gratia referri ab infimis etiam potest.

F A B U L A XXXI.

Asellus onustus Sale, deinde Spongiis (x)

V IDE, -quidquid agis, an res conveniat loco;

Nam

(s) Male primam syllabam in *tripudiare* longam fecit
 Fortunatus, Lib. VIII Carm. 4 V. 4:

Creditur & sacro tripudiare gradu.

Nam Catullus, Carm. 64 V. 72.

Quo nos decet citatis celerare tripudiis.

Cujus versus quintam sedem occupat dactylus, ultimam
 anapestus.

(t) La Fontaine, Lib. II Fab. X. Benferade, Fab. XVI.
 Æsopus, Fab. CCXXI. Gudius append. ad Phædr. Fab. IV.
 Jaius Biblioth. Rhêt. Tom. I pag. 743.

(u) Virgil. Æn. Lib. VII V. XVI.

Hinc exaudiri gemitus, iræque Leonum

Vincta recusantem, & sera sub nocte rudentum.

Rugire autem de Leonibus dictum apud idoneum nul-
 lam Latinitatis auctorem inveni.

(x) La Fontaine, Lib. II Fab. X. Benferade, Fab. CLXXIX.
 Æsopus, Fab. CCLVIII. Faernus, Fab. VI.

Nam multa, quæ fecisse quondam juverit,
Post vicibus immutatis si fiant, nocent:
Frustraque dictum ne sit, exemplum dabo.

Cum Fluvium Afellus transisset onustus Sale,
Et, in aquas dorsum demittens, aliquandiu
Jacuisset, onere se levatum senserat:
Ergo aliquot ille post diebus huc iter
Dum facit onustus Spongiis, similem sibi
Eventum sperat; & decumbit; at graves
Aqua subeunte Spongiæ miserum opprimunt.

FABULA XXXII.

Cucurbita & Arbor. (y)

CREVERAT adhærens Arbori Cucurbita,
Hujusque trunco & ramis sustentibus,
Evecta fuerat, magnam in altitudinem.
Hinc gloriatur, & etiam præ se, impudens,
Contemnere audet hanc, sine qua reperet humi:
Quot, inquit, annos expectare oportuit,
Donec ea caperet magnitudinem suam!
Ego autem evasi tanta paucis mensibus.
At olitor illuc paulo post cum accederet,
Factam fuisse maturam Cucurbitam,
Ejusque stirpem exaruisse jam videt.
Deducit ergo hanc, & reluctante[m] licet,
Seque implicantem ramis, in solum trahit.
Cito emerfisti? ne citius recidas, time.

FABULA XXXIII.

Lepus & Testudo. (z)

TARDIS euntem passibus testitudinem
Vidit, superboque Lepus aggrediens joco:
Tam propera, dixit, quo tuam portas domum?
Quid si, inquit illa, pedibus me dicam tibi

Præ-

(y) S. Cyrillus, Lib. III Fab. IV. Camerarius, Fab. CCLXXIV. Commirius, Tom. I pag. 316 Edit. 1714.

(z) La Fontaine, Lib. VI Fab. X. Benferade, Fab. LXVII. Æsopus, Fab. CCXCII. Loemanus, Fab. XX. Jaius Biblioth. Rhet. Tom. I pag. 744. ejus verba non pauca retinimus.

Præstare? Totis hic enimvero artibus
 Lepus exilire: &: Hanc, ait, tuam mihi
 Exprime celeritatem, meque, si potes,
 Assequere. Id, inquit tardipes, ego ac lubens
 Experiar; at enim præsignemus terminos,
 Statuamusque simul, quo certemus pignore.
 Utrique postquam jurata est conventio:
 Age tu porro, avibus in bonis, inquit Lepus,
 Ego dum quietus hic jaceo, & obdormio.
 Testudo pergit interim, & ipsa diligens
 In tarditate, lento festinat gradu;
 Demumque victrix, occupat metam viz.
 Tunc lepus evigilat, & cursu rapido volans,
 Priorem hanc pervenisse nequicquam dolet.
 Dotibus eximiis, unde abest prudentia,
 Prævalet, ubi etiam solus est, prudens labor.

FABULA XXXIV.

Caseus & Felis. (a)

IN cella opimum cum posuisset Caseum
 Rusticus: inesse Murem, qui corroderet,
 Advertit: ideo misit huc Felem. At simul
 Captum illa murem, Caseumque devorat.

Ad vindicanda damna si improbos legas,
 Plerumque gravius hi tibi damnum inferent.

FABULA XXXV. (b)

Struthiocamelus altum volandi cupidus.

MENTE id ferebat anxia, quod verius
 Se subsilire, quam volare cerneret
 Struthiocamelus (c), utpote brevioribus

Instructus

(a) Le Noble, Fab. XXI. Abstemius, Fab. CXVI. Camerarius, Fab. CDXL.

(b) Camerarius, Fab. CCLXVIII.

(c) Plinius Hist. Lib. X Cap. I: *Grandissimi, & pene bestiarum generis Struthiocameli. ad hoc demum datis pennis, ut currentem adjuvent. Cetero non sunt volucres, nec a terra tolluntur.*

Instructus alis, & majore corporis
 Mole impeditus. Ergo cum perdiscere
 Artem volandi cuperet, in rupis jugum
 Erepsit, unde se demisit. At gravi
 Actus deorsum lapsu fregit tibias.
 Sic ferri in altum qui cupiebat æthera,
 Is jam ambulare ne potuit quidem solo.

Ad altiora, quam natura fert sua,
 Qui tendere audent, nostra fabella hos monet.

FABULA XXXVI.

Lupi fides. (d)

FORE ut jam nullis vesceretur carnibus,
 Sed herbas, aut ad summum pisces manderet
 Laqueo prehensus olim cuidam Rustico
 Dixit, spopondit, jurejurando Lupus
 Fidem obligavit, & sic evasit necem.
 Hinc se dum recipit in nemus, Porcum videns
 Palludis atro se volutantem vado:
 Hic, inquit, certe piscis est; & eum vorat.
 Male agere qui vult, nusquam non causam invenit.

FABULA XXXVII.

Vulpis & Ericius. (e)

SUPERBA Vulpis dixit olim Ericio, (f)
 Pollere centum se artibus, quas omnium
 Adhibere sciret hostium contra dolos;
 Eumque sprexit, unam qui se diceret
 Calere tantum. Paulo post venatici
 Huc advolarunt, prædem odorati, canes.
 Ericius artem tunc recurrit ad suam;
 In orbem rite convolvit corpusculum,
 Suisque spinis protegit, & canum feros
 Eludit ictus. Postquam sic periculum

Evasit

(d) Camerarius, Fab. CDLIX.

(e) La Fontaine, Lib. IX Fab. XIV. Benferade, Fab. LXX. Camerarius, Fab. CCCXCIV. Jaius, Tom. II p. 241.

(f) De Ericio, Vide notam ad Fab. V. Lib. I.

Evadit omne, prospicit; & Vulpem videns
 Urgeri canibus, apprehendi denique:
 Huccine, ait, recidis cum tuis centum artibus?
 O quanto potior una, si sit optima?

F A B U L A XXXVIII.

Olitor & Sepes. (g)

ISTA, inquit Olitor, cur Sepes terram occupat
 Sterilis; quin evello, spaciumque olusculis
 Amplifico! Dixit; incipitque evellere
 Hortumque furibus omnem pervium facit.
 Prudentia nimis inquieta est, quæ malum
 Arcessit ingens, damnum ut avertat leve.

F A B U L A XXXIX.

Alba Spina & Ficus. (h)

AMICTA nitidis Alba Spina flosculis
 Cum se jactaret: & ficum contemnere,
 Ornatam sola viriditate frondium:
 Sic illa retudit ejus arrogantiam:
 Florere me natura non voluit quidem;
 Sed simul ac tempus autumnale venerit,
 Homines accedent ad me onustam fructibus,
 Quos regibus ipsis apponent, videlicet
 Succo refertos optimo, & suavissimo.
 Et despiciatis foetibus interim tuis
 Aliquot egentes aviculæ victum petent.
 Quam multa flores quæ tulerant pulcherrimos,
 Ingenia fructus aridissimos (i) ferunt!

F A B U L A XL.

Sol & Noctua. (k)

SOLI, quod ejus sustinere Noctua

G 2

Radios

(g) Abstemius, Fab. CLXXXIX.

(h) S. Cyrillus, Lib. II Fab. XXIII.

(i) Auctor Dialogi de Oratorib. Cap. XIX. *Quidquid aridissimis Hermagoræ, & Apollodori libris præcipitur, in honore erat.*

(k) Camerarius, Fab. CD.

Radios non posset, fecerat convivium:
Non me, sed oculos, Sol ait, culpa tuos.

Cæcus, & ineptus osor quisquis est bonæ
Antiquitatis, nostra fabella hunc monet.

FABULA XLI.

Amygdalus & Pyrus. (l)

CUM se videret innumeris Amygdalus (m)
Floribus opertam, sibi plaudebat, & Pyrum
Spernebat; ut quæ germina vix protruderet.
Sed, fraudulenta qui recesserat fuga,
Aquila revertens flores hujus abstulit,
Spemque simul omnem fructuum disperdidit.

Monentur tenera ingenia ne properent nimis
Florere, ad frugem (n) pervenire si velint.

FABULA XLII.

Agricola & Arbores.

AGRICOLA quidam, recto quas digesserat
Ordine, novellas educabat Arbores:
Quarum una, cæcis obsecuta motibus
Male subeuntis succi, abibat paululum
Diversa ab aliis. Monitus est, ut indolem
Vitiosam vinclis ocysus compesceret.
At, inquebat, nulla nos ratio jubet
Adhibere tam severam diligentiam:
Et adhuc tenellam vincla forsan læderent.
Expectat igitur: Interim crescit malum,
Et invalescit; tunc voluit, at serius,
Corrigere, factum (o) quippe robustum nimis.

Fabella

(l) De la Motte, Lib. IV Fab. II.

(m) Quæ Amygdalus nobis, ea est Amygdala Columelæ,
Plinioque, at Palladium, auctorem latinitatis non spernenda,
qui Lib. I Cap. XV. de eadem diligentissime scripsit,
ducem secuti sumus.

(n) Quintilianus Institut. Lib. I. Cap. III. *Illud ingenio-
rum velut præcox genus non temere unquam pervenit ad frugem.*


(o) Cicero, Philip. V Cap. II. *Omne malum nascens facile
opprimitur; inveteratum fit plerumque robustius.*

Fabellæ pueros, ni cito fingantur, docet
Plerosque fieri mox inemendabiles.

FABULA XLIII.

Catellus, Ovis & Cuniculus.

CUNICULUS, Ovis & Catellus venerant
In Campum eundem: sed diversa singulis
Causa veniendi fuerat. Nam genio suo
Catellus indulgere quæsit, & leves
Captare lusus. Simplex autem se bidens
Ad decerpenda contulit, si quæ sibi
Bona viderentur pabula. At cuniculum
Fodiendi terram cupiditas traxit mala.
Triplex notatur hic mihi lectorum genus.



FRANCISCI JOSEPHI
DESBILLONS

SOCIETATIS JESU

FABULARUM
ÆSOPIARUM

LIBRI QUINQUE ALTERI,

NUNC PRIMUM EDITI.

JOSEPHO OLIVETO.

Et nostras aliquid esse ducis fabulas,
JOSEPHÆ; & illas cum facile perspexeris

G 3

Non

Ovidius, Remed. Amor. V. 91.

Principiis obsta: sero medicina paratur,

Cum mala per longas invaluere moras.

Quintilianus, Institut. Lib. I. Cap. III. *Frangas enim
ætius quam corrigas, quæ in prævum induruerunt.*

Virgilius Georg. Lib. II V. 272.

... Adeo in teneris consuescere multum est!

Non inuenisti specie blanda corticis
Allicere furtim mentes ad frugem bonam;
Omnenque nostram tendere huc industriam,
Ut suauitate condiantur veritas,
Plerisque acerba, & utiles inter jocos
Ludat verecunde innocens filii indoles:
Hinc approbantis animi testimonium
Benevolus ultro gratificatus es mihi.
Quapropter aliquam ut isti iucundissimæ
Urbanitati gratiam rependerem,
Hos fabularum quinque decrevi libros
Tibi dedicare; eosque præ quinque alteris
Polire studui tanto diligentius,
Quod eruditus non latino sis minus,
Quam gallico sermone, scribendi artifex:
Etenim decorum, delicatum, lucidum
Seras in utroque genere, verborum ordinem;
Pariterque, quas res invicem annecti velit
Arguta ratio, visque iudicii potens,
Egregie calles; & bona reconditum
Sub mente gustum laudis utriusque obtines:
Idemque, spero, facile mecum sentiet,
Quicumque libros legere suevit optimos:
Omnes per orbis Literarii plagas
Tam iusta famæ celebritas de te viget,
Tamque diuturna, ut is fere convicio
Adurgeatur, qui refragari velit.
Jam vero id omne quidquid est munusculi,
Ut iudicarem non tibi ingratum fore,
Tua singularis induxit me humanitas:
Amas rependere omnibus videlicet
Officia liberalis indulgentiæ;
Censoriæque virgulæ amaritudinem
Adhibere nunquam, nisi perinuitus, soles.



Ad se attinere, & asperam graviter ferens
 Reprehensionem, doluerit; ne mutiat,
 Suadebo; at potius sapiat edoctus; nisi
 Suam ipse malit prodere turpitudinem.
 Hunc denique ramen oro multum, & obsecro,
 Ut mentis erga quemlibet affectu malo
 Prorsus alienum existimare me velit:
 Quippe quia vivo mihi prope uni cognitus,
 Nullumque novi ex istis terræ filiis,
 Regifica quorum prandia examen leve
 Famelicumque Literatorum colit:
 Neque eruditis versor in conventibus,
 Unde mihi furtim sub pectore inoleverit,
 Et efferbuerit acrior æmulatio;
 Tum mentis ægritudo, livor postea,
 Demum simulas, & odium coaluerint.
 Sed inhonoratus invidendam nemini,
 Placidamque vitam solus in tenebris ago:
 Ac, si quid forte calleo de moribus
 Hominum, illud omne debeo unice libris,
 Quos consulere amo lector non indiligens.

FABULA I.

Villicus & Canis.

VETULUM, factumque minus idoneum gregi
 Custodiendo, vel tuendæ a furibus
 Nocturnis domui, Villicus habebat Canem.
 Ingratus, operam cujus utilem diu
 Sibi fuisse meminit, hunc, senio gravem,
 Tardumque, morti devovere sustinet.
 Ergo apprehendit nec reluctanter: simul
 Coactos in fasciculum connectit pedes;
 Lapidemque collo denique magnum subllgat.
 Sic exornatum protrahit, sub proximæ
 Paludis undam detrusurus. At Senex:
 Nam quid, here, dixit, facinoris feci miser,
 Ut agas tam acerbe, tamque inhumane; & meam
 Tam longam servitutem sic remuneres?
 Vlm veritatis sentit herus: hanc opprimit;

Et

Et fraudulentam comparat calumniam:
 Ten' vivere, inquit, liceat, quem rabies tenet
 Contagiosa? moxque demersum necat.

Qui statuit aliquem perdere invisum sibi,
 Si iusta ratio nulla sit, falsam invenit.

FABULA II.

Ursus & Uxor ejus. (b)

DUM vult amoris mutui gratam vicem
 Lepidis, venustis excitare lufibus,
 Oculum revellit Ursus Uxori suæ:
 Simulque violens proprii ultor criminis
 Ungues scelestos sibi revellere incipit.
 At ista mœrens: Quid, ait, incassum furis;
 Hoc facere decuit, me priusquam rangeres:
 Nunc & tibi nocet, & mihi prodes nihil.

Hæc fabula docet, facti pœnitentiam
 Scram esse, damno quæ mederi non pōtest.

FABULA III.

Boves & Lanius. (c)

PLRIMI apud Lanium detinebantur Boves:

Accedit ille, unumque mactat. Ceteri,
 Obistere vellent, tot conjunctis viribus
 Servare socium poterant; at contra impetum
 Nil commoventur, dum se quisque decipit,
 Similisque sperat cladis immunem fore.
 Sic Lanius omnes, alios post alios, necat.

Nullus alienum reputet homo hominis malum (d).

FABULA IV.

Aquila & Pavo. (e)

DUM gaudet Aquila, turba quod avium frequens
 Ipsam esse dicat omnium pulcherrimam,

G 5

Pavo

(b) Absternius, Fab. CXLVII.

(c) Camerarius, Fab. CCXXVII.

(d) Terent. Heautont. Act. I Sc. I V. 25.

Homo sum: humani nihil a me alienum puto.

(e) Absternius, Fab. CVII.

Pavo indignatur; nec tamen audet intimos
 Aperire sensus, propter Reginæ metum:
 Sic ergo murmurat: Istam pulchritudinem
 Non pennæ, at unguis, & rostrum tibi arrogant.
 Suspecta laus, quam summa potestas obtinet.

FABULA V.

Jupiter, Apollo, & Momus. (f)

QUAM quisque norit artem in hac se exercent. (g)
 Proverbium illud antiquissimum nova
 Placet brevique comprobare fabula.

Laudem canendi Apollo cum propriam sibi
 Haberet, hanc invidia motus Jupiter
 Præripere voluit; & peritia ratus
 Se prævalere posse: Uter melius canat,
 Nunc experiamur, inquit, Momo iudice.
 At Momus: Canat Apollo; Jupiter tonet:

FABULA VI.

Puer & Scamnum.

DUM celliore parvus in Scamno Puer
 Se jactat, & superbit, & humili loco
 Stantem Catervam despicit supereminens,
 Aliquem de genere se gigantum credidit:
 Et: Hæc videtur quam minuta plebs, ait,
 Homunculorum! quam brevibus corpusculis
 Finita! Talem tunc vocem Scamnum edidit:
 Descende; minimum te omnium ipse noveris.

Immerito honoris qui locatus in gradu,
 Stulte hinc superbit, hac notatur fabula.

FA-

(f) Benferade, Fab. CCIX.

(g) Cicero Tusculan. Lib. I Cap. XVIII. *Bene, inquit, illo proverbio Græcorum præcipitur:*

Quam quisque norit artem, in hac se exercent.

Istud autem proverbium adhibuit in *Vespis* Aristophanes.

FABULA VII.

Murium Conventus. (h)

COIERE Mures, consulendi gratia,
 Quanam arte possent felis, in gentem suam
 Quotidie furentis, unguis asperos
 Vitare. Postquam plures in sententias
 Diversus abiit cœtus studio inutuli;
 Demum unus senior, alta mente rem diu
 Meditatus: Aures, inquit, huc advertite:
 Scelere nos hostis fraudulento perfidus
 Plerumque adortus imprudentes opprimit:
 Sonum ergo si quem nuntium adventus sui
 Præmittat ille deinceps; admonebimur
 Mali propinqui, & fugere poterimus necem.
 Quapropter ejus collo tintinnabulum
 Esse alligandum censeo. Ingens omnium
 Hic vero plausus approbantium fuit.
 At postmodum tamen unus aliquis junior:
 Quis porro certum, quis paratus est, ait,
 Adire pro re publica periculum?
 Tacent; operamque difficilem esse sentiunt.
 Periculosis Consiliarius frequens
 In rebus aderit, exsecutor non item.

FABULA VIII.

Ranunculus & Rana. (i)

AQUIS luto refertis natus, & via
 Ipsa educatus publica Ranunculus
 Audire Ranam, proximi stagni incolam,
 Monentem, ut ad se, communem habiturus locum,
 Migrare vellet, noluit. Quid enim mihi
 Triste hic futurum timeam, ait, cum tamdiu
 Ibidem ab omni vixerim immunis malo?
 Sed ille dum sic computat, plaustum advenit,
 Et adhuc loquentis os & artus conterit.

Plenis

(h) La Fontaine, Lib. II Fab. II. Benferade, Fab. CIII.
 Abstemius, Fab. CXCV. Faernus, Fab. XLVII. Regne-
 rius, Part. I Fab. I.

(i) Æsopus, Fab. LXXXIV. Faernus, Fab. XXXVIII.

Plenis pericli sedibus tanto magis
Malum propinquat, quo diutius abfuit.

FABULA IX.

Nitedula & Mustela. (k)

REPESERAT in cumeram frumenti Nitedula (l)
Exilis: aptam rimula dederat viam.

Famelica mandit strentue oblatam dapem;
Gulæque sic obsequitur; sic ventri gula
Subservit; ut refectum intra paucos dies
Jam plena tendat obesitas corpusculum.
Tunc, si maneret hoc diutius in loco,
Ne sibi grave aliquod appareretur malum,
Verita; redire voluit ad proprium larem:
Notum ergo repetit aditum; at frustra nititur
Transire: pinguem tenuis ille non capit.
Prope hinc misellam sic laborantem videns
Mustela: Quod, ait, profuit, nunc id nocet:
Cibus auxit corpus, minuat abstinentia:
Ingressa macra es; macra poteris egredi.

Hoc argumento ostenditur, quædam bona
Debere omitti, quæ, postquam receperis,
Nisi dimittantur, obfutura sunt tibi.

FABULA X.

Quercus & Arundo. (m)

DEPRESSA quantum ad Inferos radicibus;
Tantum propinquans Superis alto vertice,
Annosa Quercus dixit olim Arundini:
Quid te, misella, fiet; si perflaverit
Iratus Aquilo, cum te nunc mitissimi
Insectat aura blandiens Favonii?

Retu-

(k) La Fontaine, Lib. III Fab. XVII. Benferade, Fab. XLVII. Le Noble, Fab. CXLVI & CLXXX. Boursault. Comœd. Æsopica I Act. I Sc. 2. Gabrias, Fab. XLVII. Avienus, Fab. XVI. Horatius, Lib. I Epist. 7 V. 29.

(l) Nitedula, mus agrestis.

(m) La Fontaine, Lib. I Fab. XXII. Benferade, Fab. LXV. Aphtonius, Fab. XXXVI. Faernus, Fab. I. Jaius Biblioth. Rhet. Tom. 2 pag. 743.

Retulit Arundo: Quælibet vis ingruat,
 Summissa vereor; & illa sit clemens mihi.
 Quercus: Ego nullis, inquit, cedo viribus;
 Nimbos, procellas, ac depræliantium
 Quascumque iperno, frango ventorum minas.
 Dum sic superba gloriatur, *frigido* (n)
Ab axe repente se erumpunt Phrenetici
Septentrionum filii. Se flexilis
 Arundo sponte dejicit. Prætervolant
 Illæsam. Quercus obluetatur: at simul
 Violento adorti turbine illam prouunt.
 Vis summa humiles omittit, elatos domat.

FABULA XI.

Puer & Pædagogus. (o)

PAUCIS inepti monitoris præposteram
 Loquacitatem carpere lubet versibus.
 Profundi ad oram fluminis ludens Puer
 Pede lapsus est: at prensa labentis manu
 Salix opem dat, pendulumque sustinet,
 Ne pereat, undæ mersus in voraginem.
 Huc Pædagogus cum venisset: Hoc sinam,
 Hoc patiar, inquit, istos nebulones meos
 Sic evagari? sic mihi non obsequi?
 Præsentem eripiam te quidem periculo,
 Proterve ludio: at non certe, non feres
 Impune: namque te modo, simul ac domum
 Reduxero, flagris perbelle admonitum dabo,
 Quantum satis erit, facti ut memineris diu.
 Puer externatus diro flagrorum metu,
 Salicem relinquit, & obrutus fluctu perit.

FABULA XII.

Puella rustica & lactis cymbium. (p)

SUMMO repositum capite lactis cymbium

Puella

(n) Verba sunt M. Ter. Varronis in Marci pore, fragmen-
 tor. pag. 118. Edit Scriverii.

(o) La Fontaine, Lib. I Fab. XIX. Locmanus, Fab. XXV.

(p) La Fontaine, Lib. VII Fab. X. Specimen Sapientiæ
 Indorum, Sect. 6 pag. 337, Edit Starkii.

Puella dum fert rustica, tacito in sinu
 Reputare cœpit quidquid hinc posset boni
 Emergere sibi: Vel nihil, inquit, ex meo
 Conficiam lacte, vel pecuniæ satis,
 Ut ova centum comparem: pulli tribus
 Simul a Gallinis excludentur: est quidem
 Astuta Vulpis; horum non adeo tamen
 Numerum diminuet, ut porco non sint pares
 Emendo: tenuis emptus est Porcus mihi;
 Pinguescit; jamque multum fecit corporis;
 Venditur: emiturque Vacca & ejus insuper
 Vitulus, in arvo qui jam exultat florido. . . .
 Hic, oneris oblita sui, gaudio exilit
 Puella, spesque cum Lacte evertit suas.
 Mortalium plerosque fabella hæc monet,
 Qui somniare magna vigilantes solent.

FABULA XIII.

Leo bellum parans. (q)

BELLUM parabat, in exteram gentem Leo,
 Ejusque regni diversis e partibus
 Jam variæ ad ipsum Belluæ convenerant,
 Rem promovere certæ consilio & manu.
 Dux monuit, ut diversa belli munera,
 Quæ convenirent singulis, capefferent.
 Tunc latos humeros Elephas ostentans suos,
 Vastamque dorsi pandens amplitudinem:
 Ego, inquit, omnem sarcinam, omnes machinas,
 Instrumentum omne bellicum facile feram:
 Nec me gravabunt; si qui præterea volent
 Nostro sedere tergo, ut pugnent commode.
 Ego Cataphractus miles, Rhinoceros ait,
 Ultro periculis obviis, feriam simul,
 Simulque sustinebo hostiles impetus.
 Laceßere hostem cominus, meum est, Lupus

Excla.

(q) La Fontaine, Lib. V Fab. XIX. Abstemius, Fab. XGV.
 Jaisus Biblioth. Rhetor. Tom. I pag. 744. cujus etiam verba
 quædam agnoscere hic licet.

Exclamat; dentes jam mihi exerti crepant.
 Totas ego unus possum, ait ferox Aper,
 Evertere acies more (r) fulmineo ruens.
 Ego, Vulpis inquit, insidiatoris vicem
 Implebo; virtus & dolus aderunt mihi.
 Me, Simius ait, peritare in castris decet;
 Regem oblectabo dulcibus præstigiis,
 Fessumque gravibus curis reficiam caput.
 Partes tibi suas quisque dum sic vindicat;
 Demissis Asinus interim auriculis silet;
 Siletque pariter corpore contracto Lepus;
 Stuporis ille, at hic timoris conscius:
 Et utrumque carpunt ceteri, & onerant probris;
 Et esse castra liberanda discutant
 Stolido ac inertī pecore: sed Leo negat:
 Et: Hi quoque operam conferent, ait, utilem:
 Clangentis Asinus buccinæ imitetur sonos:
 Lepus cursoris defungatur munere.

Nemo est tam ineptus, a perito qui duce
 Ad aliquid aptus inveniri non queat.

F A B U L A XIV.

Pastor & Molossus. (s)

MOLOSSUM habebat Pastor mirā præditum
 Virtute, custodemque præclarum gregis:
 Sed dum voracem, dum famelicum nimis
 Conqueritur; aliquis persuasit, uti venderet
 Istum helluonem, & hinc duos, vel tres canes
 Redimeret alios, operam qui possent parem
 Simul adhibere, & lavibus impensis ali.
 Ergo generosus, & fidelis, & vetus
 Ejicitur hospes. At ubi sensit jam procul
 A grege valentem abesse custodem Lupus,
 Longo metu solutus, desertas oves,
 Modo hanc, modo illam, invadit, & facile rapit.
 Unde redit ingens lucrum, ne impensas dole.

FABU-

(r) Ovid. Metam. Lib. X.

Fulmen habent acres in aduncis dentibus Aprī.

(s) La Fontaine, Lib. VIII Fab. XVIII. Jaius Biblioth.
 Rhetor. Tom. I pag. 742.

FABULA XV.

Ostrea & Viatores. (t)

IN litus Ostream expulerat fluctus maris,
 Expulsamque, cito refugiens, reliquerat.
 Hanc simul hiantem duo Viatores vident,
 Simulque properant: Et: Mea est, vidi prior,
 Ait unus. Ast ego prior sensu, alter refert.
 Dum sic decertant, tertius supervenit.
 Tu Judex esto, dicunt. Ego vero ac lubens,
 Respondet ille; neque morabor vos diu.
 Statim & capeffit, & abligurit Ostream.
 Stupentibus ad hæc, testam utramque dividit,
 Suamque cuique porrigit; tum subjicit:
 Lis est dirempta; vos quieti cedite.
 Fabella stultos litigatores monet.

FABULA XVI.

Sculptores duo & Æsopus

DUO Sculptores olim ejusdem marmoris,
 Æqualem utrinque, venditam & pretio pari,
 Suam sibi quisque partem comparaverant.
 Sed cum peritus alter sculpendi artifex,
 Et alter imperitus admodum foret;
 Æsopus hunc sic admonuisse dicitur:
 Non belle egisti; quid enim hinc erues boni?
 Tuum at sodalem callidum emptorem puto:
 In marmore suo pretiosam videlicet
 Sentit latere statuam; & hanc facile eruet.
 Materiam habere idoneam parum est, nisi
 Illam expolire doctus norit artifex.

FABULA XVII.

Asini duo & Vulpis. (u)

QUOD vulgo dicitur, *Asinus Asinum fricat,*
 Dixere Veteres, *Murum Muli scabunt: (x)*

Id

(t) La Fontaine, Lib. IX Fab. IX. Boileau. Epist. 2 & ex
 hujus gallico Moneta carm. 10 atque Godellus, p. 189.

(u) La Fontaine, Lib. XI Fab. V.

(x) Vide Erasm. Adagior. chil. I centur. 7 proverb. 96.

Id quo pertineat, ut Asini bipedes queant
Facilius pervidere, fabulam hanc dabo.

Par inficetum, & illaudatum, Asini duo
Opipare pransi, dulcibusque carduis
Bene recreati, dum inter se colluderent:
Heus, inquit unus, ut placet, frater, tibi
Conditio nostra? Corporis nostri decor
Qualis videtur? Et isthæc oris dignitas,
Isti modo acuti, modo graves vocis soni,
Iste aurium subtilis & nitidus apex,
Hæc cuncta quantum laudis habent & gloriæ?
Respondet alter: Cur tacere nos pudor
Cogat, quod ipsa veritas loqui jubet?
Nos ambo nempe belluli toti sumus:
Res vacua ab omni controversia patet.
Invidia si quid forsitan obtrectaverit,
Quid tum? more suo fecerit: solet invehi
In optima quæque: obtrectet igitur, & gemat.
Ut omnia Vulpis audierat: Vos o nimis
Felices, inquit, Bestiæ, quibus licet,
Ab omnibus negata, laudum munera,
Vobis ab ipsis invicem accipere, & frui!

FABULA XVIII.

Philomela, Corvus, & Bubo. (y)

NATURA vernis pinxerat coloribus
Fetus repullulantes; formosissimi
Ridebat anni blanda tempestas: dies
Festivitati candidæ simillimus
Locum beatæ finiens reliquerat
Tranquillitati: Solis aurei calor
Extulerat ab agris molliter tepentibus
Subtilem odorum copiam, quam paululum
Noctis serenæ frigus addensaverat,
Et in parentis regna telluris sinens
Recidere, florum, floridarumque arborum

Diur.

Diurnum odorem odore vincebat novo.

Philomela tales avida delicias capit,
Penitusque condit eruditis sensibus.
Sed efficaci mox scientiæ obsequens
Inflat canorum guttur, & ad omnes modos
Intendit: acrem nunc, & argutam vibrat
Animosa vocem more clangentis tubæ:
Nunc languida premit, frangit, obscurat sonos:
Et deficere videtur, & medullitus
Amore tenero tota colliquefcere.

Favonius, quem lilia inter & rosas
Dulci tenebat inertia vinctum sopor,
Evigilat; hasque mirans tam volubiles
Tam delicati flexiones gutturis,
Ne cesset illa, metuit. Evigilat quoque
Corvus; at inepto præditus gustu, & sibi
Quod somnus abrumpatur ægre etiam ferens:
Quæ te mala, inquit, cuncta ubique dum silent,
Libido cogit, tam moleste ut perstrepas?
Tibi videris bella cantrix: at tuæ
Mihi cantilenæ, moneo, valde displicent;
Illisque jam nunc abstinere ni vells,
Ex me feres grande aliquod infortunium.

Philomela atroces verita minas obmutuit;
Multoque mane cum vix dilucesceret,
Periculofam præpotentis Alitis
Viciniam reliquit, & se contulit
Celeriter in remotam solitudinem.
Ibi sese doctis artibus operam dare
Impune tandem posse credit: & leves
Per summa gramina Zephyrorum spiritus
Cum dulce fremerent, sibilumque (z) ludicrum
Mobilibus arbor frondibus omnis redderet,
Et Phœbus etiam candida purus face
Innubilas per auras lucem spargeret;
His illa paret incitamentis: canit;

Simul-

(z) Virgil. Eclog. V V. 82.

Nam neque me tantum venientis sibilus Austri, &c.

Simulque varias celebrat agrestis loci
Amoenitates, & voluptatem suam.

Sed in cavato proximæ trunco arboris
Somno sepultus qui latebat, horridus
Bubo (a) excitatur; quamvis & lucem oderit,
Paulum progressus, voce ferali increpat:
Et: Inficetos ni statim cantus, ast,
Finieris, istam vocem importunissimam
Ultor ego, vitamque simul eripiam tibi.
Hic denique suum misera Avis studium abjicit;
Timensque Corvos nocte, Bubones die,
Silet, dolorve si urgeat, tantum gemit.

Fabella scripta est in homines quosdam feros,
Quibus omnis Musa suavior bilem mover.

FABULA XIX.

Columba & Turtur.

COLUMBA—multum conquerens, cum Turture

Communicabat luctus & metus suos:

Instare semper Milvum; geminos sibi
Rapuiffe pullos nuper; quos nunc educat,
Hos pariter se metuere ne rapiat brevi,
Ipsamque matrem. Cui turtur proprii immemor
Pericli, & hujus miseriam tantum intuens:
Secede mecum, dixit, nidulus est mihi
Prope hinc locatus; hinc vos recipiam lubens,
Et te, tuamque sobolem Milvi impios
Contra furores protegam. Illa sed refert;
Eheu! Miselle, quid mihi auxilii potes
Præstare, noster quem Tyrannus, si ingruat,
Simili pavore afficiet, & pari nece?
Periclitanti bellicosus & valens
Adeffet Ales, fiderem: sed humilibus
Succurrere humiles, non potentes assolent.

H 2

FA-

(a) Plinius Hist. Lib. X Cap. XII. *Bubo funebris, & maxime abominatus deserta incolit noctis monstrum; nec sancta aliquo vocalis, sed gemitu.*

FABULA XX.

*Pica & Columba.***P**ICA & Columba Pavonem convenerant

Benignitatis officiosæ gratia.

Dum redeunt: Iste quam mihi Pavo displicet,

Malevola dixit Pica! Quam insuaves sonos

Emittit ore luctifico! Cur non silet?

Pariterque turpes cur non obtegat pedes.

At innocens Columba contra sic refert:

Vitia hujus observare non licuit mihi;

Præstantis autem corporis speciem inclytam,

Caudæ nitorem & æmulum gemmis decus

Mirata sum, & laudare non satis queo.

Mali requirunt, carpere quæ possint, mala:

Laudare contra, quæ bona sunt, amant boni.

FABULA XXI.

*Pueri duo.***D**UO stultus alter, alter autem callidus,

Pueri in commune (b) invenerant aliquot nuces.

Quas cum fregisset callidus, stulto dedit

Putamina cassa, nucleos sumplit sibi.

Frustra ille, quod tenet, experitur, quid queat

Prodesse, deceptumque sese intelligit.

At non decipiet ultra, dixit; & probe

Ulciscar ejus fraudem, si qua fors ferat.

Hi postmodum ambo similiter quodam die

Invenere oleas: quique nuperam sibi

Instructam fraudem corrigere pari dolo

Cupiebat: Id quod intra est, inquit, da mihi;

Tibi, quod est extra, tolle. Gaudet in sinu

Socius, jubentique alacriter morem gerens,

Putamina capit mollicula, dulcem cibum;

Duros misello tradit ultro nucleos.

Nil usus adjuvat, ubi deest prudentia.

FA-

(b) *In commune* conferendas scilicet. Est enim Ellipsis in hac antiqua loquendi formula. Vide not. ad Lib. IV Fab. XXI.

FABULA XXII.

Noctua & Gallus. (c)

ASSUETA tenebris, claram & illustrem magis
 Lunam esse Sole, contendebat Noctua:
 At Solis Gallus adventantis nuntius,
 Fuge, cæca, dixit; Luna pallet: Sol redit.
 Calumnia nunquam certius refellitur,
 Quam cum impugnata virtus emergit palam.

FABULA XXIII.

Apis & Eruca. (d)

ROSÆ obstinatum rodere micantes sinus
 Apis indignata vidit Erucam: Mala,
 Inersque Bestia, inquit, hos tam fulgidos
 Tam delicati, tali odore præditi
 Floris colores te perimere non pudet?
 Imo, refert illa, tam boni succi dapes
 Præ ceteris natura me cogit mea
 Eligere: mihi sunt mel merum, mera suavitas;
 Nihil & veneno, quo meum corpus viget,
 Esse faciendo magis idoneum puto.

Mulcatur hujus acerbitate fabulæ
 Criticorum acerbum & lividum quoddam genus.

FABULA XXIV.

Pica, Cornicula, & Vulturius.

EXASPERATA trucibus in Corniculam
 Odits Vulturium Pica famelicum videns,
 Sic allocuta est: Quæ tenet aves ceteras,
 Corniculam in ulmo nidulantem (e) proxima
 Visendi num te cupiditas pariter tenet?
 In me quidem ejus nulla sunt, quæ prædicem,
 Officia; laudem agnoscere tamen quamlibet,

H 3

Vel

(c) Richer, Lib. IV Fab. II.

(d) Richer, Lib. VIII Fab. XXII.

(e) Varro, Lib. I. Hebdomatum, apud Nonlum Cap. II
 Sect. 589. *Halcyones hieme in aqua nidulantur.* A. Gellius,
 Lib. II Cap. 29. *Nomen est Cassita, habitat, nidulaturque in
 segestibus.*

Vel in hoste, cogor veritatis (f) viribus:
 Dicam ergo, quæ mirata sum; prolem educat
 Teneramque, pulchramque, & matri simillimam;
 Namque ipsa pulchra est; &, quod aliis matribus
 Fortasse nullis antea unquam contigit
 Pariendo, & educando, pristinae suæ
 Habitudo illa non modo amisit nihil,
 Sed etiam evasit inde corpulentior. (g)
 Hoc excitatus perfido præconio
 Suam Vulturius sentit augeri famem;
 Corniculæque celeriter nidum petit;
 Matremque, prolemque pariter necat, & vorat.
 Ultro malevoli laudant, ubi laudem magis
 Esse nocituram, quam calumniam, sciunt.

FABULA XXV.

Boves duo.

VALIDI & opimi perpetuis laboribus
 Se destinari cum scirent Boves duo,
 Ægre ferebant: quorum contumacior
 Unus recusat operam; & detrectat jugum.
 Quapropter illum, quando pinguis est satis,
 Et corpulentus, debitumque officium negat
 Præstare, nec prodesse alio potest modo,
 Interficit herus. Quod videns alter, sua
 Sic fata secum disputat: Proponitur -
 Malum mihi duplex: labor, aut mors; mors est quidem
 Finis laborum, at ipsa maximus labor;
 Minima malorum semper eligenda sunt;
 Ergo laborare satius, inquit, quam mori.

FABULA XXVI.

Quercus & Edera. (h)

PRÆCLARA Quercus, arboribusque ceteris
 Excelsior

(f) Phædrus, Lib. I Fab. IV. 9.

Repulsus ille veritatis viribus.

(g) Plautus Epidic. Act. I Sc. I V. 8.

Corpulentior videre, atque habitior.

(h) Richer, Lib. V Fab. XV.

Excelsior, in omne dominabatur nemus.
 Huic Edera nexu circum adhærens lubrico;
 Numquid, ait, ista te juvat tanta arborum
 Frequentia, quod sic te ambiat, sic te premat?
 At nonne potius nimis obumbrando nocet?
 Tum quercus: O, tace, invida; tu sola hic noces.

FABULA XXVII.

Cuculus & Luscinus.

SUUM Cuculus cantum ab omnibus videns
 Rideri, secum, quidquid illud est malum
 Rem tacitus omnem pensat; & bona fide,
 Non belle canere sese, demum intelligit.
 At inde causam credit infortunii
 Esse repetendam, quod duos tantum modos
 Iterare norit. Luscinium (i) ergo musicæ
 Artis magistrum pretio precibus illicit,
 Melicam ut docere varietatem se velit.
 Sed ille frustra cum tentasset iadolem
 Discipuli ineptam: Didiceris vocem licet
 Rite modulari, nil tibi, inquit, proderit;
 Vox dura reddet semper insuaves sonos.

Artis ope frustra variam natura induit
 Vitiosa formam, si vitiositas manet.

FABULA XXVIII.

Aquila & Corvus.

AQUILA exprobrabat Corvo infamæ notam,
 Quod projectorum putridis cadaverum
 Vesci soleret carnibus. Sed utrius,
 Amabo, ait ille, facinus odiosum est magis?
 Corvi, qui nullas devorat, nisi mortuas,
 Pecudes; an Aquilæ, vivas quæ depascitur?
 Illustria quædam scelera sunt: at maxima
 Sæpe ibi pudendi causa est, ubi minime pudet.

H 4

FABU-

(i) *Luscinus* æque dicitur, ac *Luscinia*. Vide Phædrum, Lib. III, Fab. XVIII, & Senecam Epist. 76 paulo longius ab initio, ad fidem quinque manuscr. Palatin. emendatum.

FABULA XXIX.

Canis mutare conditionem coactus.

ALIIQUOT per annos vixerat Canis domi,
 Si non plane otiosus, at levissimis
 Variare solitus otium laboribus;
 Profeceratque non ineptis lusibus,
 Familiam ut omnem benevolam sibi redderet:
 Sed herus ab illo posse cum magis utilem
 Operam dari intelligeret, ipsum denique
 Custodiendo addixit Agnorum gregi.

Obtemperavit, at perinvitus, Canis,
 Talemque obivit tristitulus provinciam.
 Ægram videlicet huic molestiam creat
 Pecudum inquieta ludibundarum indoles,
 Simulque earum maxima imbecillitas.
 Procedente tamen tempore, ut blandissimæ
 Mitissimæque gentis innocentiam,
 Moremque vitæ simplicem exquisitius
 Cognovit, hanc amavit; & munus suum
 Incœpit aliqua cum voluptate exsequi.

Sæpe ibi voluptas, ubi necessitas fuit,
 Paulatim ab ipsa nascitur assuetudine.



FABULARUM
 ÆSOPIARUM
 LIBER SEPTIMUS.

PROLOGUS.

ÆSOPIARUM ut fabularum dignitas
 Magis magisque commendetur, hic libet
 Narrare, quantum laudis ad fastigium
 Memoria Æsopi gentem apud doctissimam
 Evecta fuerit. Nam ille, postquam Delphici

Facinore populi damnatus obiit necem,
 Cum jam per omnem Græciam cognomine
 Sapientes septem nuncuparentur viri,
 Sapientum octavus non reputatus est modo,
 Statuas sed inter istis positas, Attici
 Voluere forma, insigniore (a) ceteris,
 Hunc stare fabricatum Lysippi manu.
 Et merito: nam Cleobulus, Pittacus, Solon,
 Thalesque, Chilonque, Perianderque, & Bias
 Præcepta vitæ tradiderunt aspera,
 Durasve leges, aut graves sententias:
 At veritatem callide Phryx noverat
 Hominibus approbare, quippe qui jocis
 Dulcibus elueret ejus amaritudinem:
 Et his fuisse mihi videtur artibus
 Tanto sapientibus aliis præstantior,
 Quanto ille Medicis omnibus longe fore
 Existimandus doctior, qui suavibus
 Quoscumque morbos remediis depelleret.

FABULA I.

Perdix & Canis venaticus.

ODORE Perdix quæ se prodiderat suo,
 Venaticum consistere subito Canem,
 Et subsidere, & omnem frangere impetum,

H 5

Et

(a) Phædrus, Lib. II Epilog. V. 1.

Æsopo ingentem statuam posuere Attici.

Sed & Agathias Antholog. Lib. IV sub fin. Lysippum
 Sicyonium, Sculptorem eximium, laudat, quod Æsopum
 posuerit ante septem sapientes:

Ἐπὶ τὰ σοφῶν ἐμπροσθε.

Hos enim cogere ad bene agendum, illum autem esca
 blanda & eximia invitare.

... καλὸν ἔχει δέλεαρ.

A. Gellius pariter Lib. II Cap. 29. *Æsopus*
 haud immerito, inquit, sapiens existimatus est non so-
 vere, non imperiose præcepit ut Philosophis mos est;
 sed festivos, delectabilesque Apologos commentus, res
 in mentes, animosque hominum cum audiendi quadam illace-
 bra induit.

Et quasi cavere ne quid officeret, videns,
 Nihil timendum jam sibi esse credidit.
 Sed ista volucrum decipiebat credulam
 Species dolosa fictæ mansuetudinis;
 Eratque signum, gressibus tacitis hero
 Huc se inferenti, præda ut innotesceret:
 Et rem ille pulchre intelligit; & ubi satis
 Accessit, aliquo motu Perdicem excitat,
 Et avolantem missili plumbo necat.

Nocitura nunquam certius est malignitas,
 Quam cum personam lenitatis induit.

FABULA II.

Viator & Platanus. (b)

LABORE, & æstu Solis ardentissimi
 Fessus Viator Platani in umbra languidos
 Deponit artus: dumque Zephyrorum leves
 Admittit auras, & vapores igneos
 Caulas (c) per omnes corporis sensim ejicit;
 Torvis pererrat oculis beneficam Arborem,
 Ipsamque duris appetit conviciis;
 Quod tam formosis, tamque densis frondibus
 Exuberaret; at careret fructibus.
 Respondet illa: Tunc maledicas mihi,
 Ingrate? saltem oportuit laudabilem
 Hac me videri parte, quod prosum tibi.

FABULA III.

Luporum Legati ad Anglorum Regem. (d)

LEGATOS olim Regem (e) ad Anglorum Lupi
 Miserunt. Unum genere de suo marem,

Unam.

(b) Æsopus, Fab. CCLV. Benferade, Fab. CXXXV.

(c) Lucretius, Lib. VI V. 839 de avibus intereuntibus:
 Dispergunt animas per caulas corporis omnes.

(d) Furetiere, Fab. XLVIII.

(e) Camdenus in sua Britannia, Edit. Lond. 1600 in 4.
 pag. 592. *Numerosi ovium greges in his (Walliæ) montibus
 errant, nec ullum est a Lupis periculum: qui tunc per uni-*
ver-

Unamque feminam ejus in terras rogant
 Portare liceat. Providus Rex abnuat;
 Istique, dixit, recipiantur si duo,
 Mox facile crescant milliarium in gregem:
 Etenim (f) malorum cito propagatur genus.

FABULA IV.

Canis & Herus. (g)

CANIS ex herili qui domo migraverat
 Fugitivus, ab hero postmodum inventus suo,
 Herumque se benignum cur sic linqueret,
 Interrogatus: Te quidem fateor mihi
 Et liberalem semper, & mitissimum
 Fuisse dominum, dixit; at tua interim
 Omnis familia perpetuis cæsum male
 Verberibus huc me denique miserum impulit,
 Ut hoc defugerem, non quod infortunium
 Intuleris, at quod te prohibere oportuit.
 Quisquis cum possit, alii ne faciant malum,
 Vetare, non vetat, idem (h) facienti facit.

FABULA V.

Jupiter & Rusticus. (i)

QUÆDAM agri jugera ab ipso maximo Jove
 Locata quidam Rusticus conduxerat;
 Translegeratque, & pactionem fecerat,
 Ut constitutos intra limites agri
 Sibi ordinandas tempestates traderet.

La-

versam Angliam delati erant, cum Edgarus Rex (circa annum 960) Luduallo harum regionum principi tricenos Lupos, in singulos annos, vestigialis nomine, imperaret. Et pag. 610. Qui (Lupi) jam in Anglia nusquam comparent, ne in ipsis versus Scotiam linitibus, cum sint tamen in Scotia frequentissimi.

(f) Minutius Felix Edit. Balduini 1560 pag. 17. *secundius nequiora proveniunt.*

(g) Abstemius, Fab. XXXVI. Faernus, Fab. LII.

(h) Horatius Art. Poet. V. 467.

Invitum qui servat, idem facit occidenti.

(i) La Fontaine, Lib. VI Fab. IV. Faernus, Fab. XCVIII.

Lætissimus ergo, spesque animo magnas movens
 Proscindit arvom; mandat, occat semina:
 Et sudum, & imbres, & calorem, & frigora
 Inducit, utcumque optimum fore autumat:
 Tamen ad extremum pessimas segetes metit.
 Secum quærentem commiseratus Jupiter
 Compellat ultro: Teque, dixit, an sciam
 Moderari melius, & varias anni vices
 Utilius ducere, experiri nunc decet.
 Cumque abstulisset annuenti Rustico
 Imperium ineptis male gubernatum artibus:
 Hortatur, operam is ut velit modo impiger
 Adhibere: tempestates ipse digerit
 Ratione solita; & hujus agro largiens
 Emissiones lege communi statas,
 Demum paternis omnia curis temperans,
 Ad eos facit rem progredi sensim exitus,
 Ut redeat ampla messis: quam dum Rusticus
 Colligere properat, gratus hanc vocem edidit:
 Divina qui se Providentia regi
 Sinit, unice illum sapere nunc intelligo.

FABULA VI.

Lepores, Canes, & Vulpes.

EFFUGERE semper impetus primos Canum
 Cum cogerentur Lepores, maximum licet
 Conflare sæpe didicissent exercitum;
 Vulpinam ad gentem supplicatum denique
 Misere, vellet auxiliares copias
 Sibi commodare. Vulpes, quas odium vetus;
 Et ira stimulat jugis adversus Canes,
 Auxilia spondent: coeunt: ad pugnae locum
 Properant frequentes: at, quibus operam dicant,
 Stare otiosos, utpote imbelles jubent,
 Ne forte solita timiditate exterriti
 Corrum pant animos dimicantium strenue.
 Lepores promittunt, legibus se inertiae
 His, quanquam turpibus, obsecuturos fore.

Pugnam

Pugnam ergo placidi spectant. Postmodum tamen
 Et numero & astu superiores Vulpium
 Phalanges Canibus prævalere cum vident,
 Concurrere audent, si queant aliquam sibi
 Asserere partem laudis & victoriæ.
 Sed ubi intuentur propius in teterrimis
 Fœde excubantes vultibus hostium minas,
 Cæco pavore omnes simul versi retro
 Fugere; turmisque socialibus malo
 Exemplo suafere, similem ut caperent fugam.
 Pugnare solos bellicosos expedit;
 Imbellium agmen officit, nedum adjuver.

FABULA VII.

Leo furiosus & Lepus. (k)

LEO furiosus factus est: clamat Lepus:
 Nos, heu! pusillos quanta perniciēs manet!
 Quod vix ferendum, quamdiu is sanus fuit,
 Credidimus, quale nunc videbitur jugum?
 Spes denique omnis infimos tum deserit,
 Furor (l) ubi comitem se potestati dedit.

FABULA VIII.

Canis mordax. (m)

MORDERE prætereuntes assueto Cani
 Adpenderat herus parvum tintinnabulum,
 Ab eo cavendum ut omnibus notesceret.
 Hoc ille signo gloriatus est, quasi
 Virtutis esset præmium sibi datum.
 Quod aliquis animadvertens: Frustra, o pessime,
 Tibi plaudis, inquit: nam æris istius sono
 Quisque admonetur de tua prava indole.
 Fabella quosdam carpit, vertere qui sibi
 Tentant honori infamiæ turpem notam.

FA-

(k) Gabrias, Fab. IV. Camerarius, Fab. CXLIX. Faer-
 nus, Fab. V.

(l) Publius Syrus, V. 789.

Fulmen est, ubi cum potestate habitat iracundia.

(m) Benferade, Fab. XCIX. Æsopus, Fab. CXCVI.
 Avienus, Fab. VII.

FABULA IX.

Hirundo & Luscinus. (n)

OBSTREPERE solita quamlibet circa domum
 Hirundo amœnam forte solitudinem
 Petierat. Ibi Luscinium, qui lauro super
 Viâtrice placidus otia retur, videns:
 Suaves canoro gutture te quidem ferunt
 Iterare cantus, dixit: nil tamen hæcenus
 Ejusmodi ex te audire nobis contigit:
 Ego vero ubique personans vocis meæ
 Impertio lubens omnibus dulcedinem:
 At tu canendi singularis artifex
 Si jure diceris, urbes cur porro fugis,
 Hominumque cœtus? Ne tibi laudes negent
 Meritas, vereris? an times potius, tuam
 Dum conscius ipse agnoscis imperitiam,
 Ne forte coram judicibus idoneis
 Sistaris irridendus; & prudens lates?

Retulit Luscinus: Urbes, & homines habent,
 Quæ mihi placere poterant: tamen ante omnia
 Molles beati ruris deliciæ placent;
 Ac inter illas vivere, & mori velim
 Inglorius. Huncce cur libeat morem sequi,
 Turpes mihi causas imperitiæ objicis:
 Tamen ipse dicam simpliciter: cantus meos
 Dare combibendos delicatis auribus
 Minime refugiam, si qua necessitas ferat;
 Neque me despicio, neque peritos judices
 Horresco stulte timidus: at facile est mihi
 Urbis carere turbulentis æstibus,
 Placidoque ruris otio dulce est frui.
 Neque te videre possum quid tantum juvet
 Circum superbas ædes, & palatia
 Volitare, cum debueris ipsa sæpius
 Perspicere, quantum cunctis auribus tuæ
 Afferre soleant cantilenæ tædium.

Plerumque

Plerumque contra, quam fas & ratio velint,
Lucem indoctus amat publicam, doctus fugit.

FABULA X.

Ensis & Vomer. (o)

PROCUL hinc recede, sordida ne me inquines
Consortione, dixit Ensis Vomeri.

At ille contra: Cur me, ait, sic despicias,
Superbe? Ferrum tibi pater est; est & mihi.
Deinde mihi quantum debeas, ante latet?
Nam si otiosus non proscinderem solum,
Ut fruges, quæ tuam herilem reficiant manum,
Nascantur, illa nonne mox langueretur?
Tunc te quid fieret autem? in umbra scilicet
Tenebricosa duceres turpem situm.

Agricola eodem prorsus, ac Miles luto
Confictus est: sed ille præstat alteri,
Quod operam nobis præbeat magis utilem.

FABULA XI.

Hariolus sibi non providens.

HARIOLOUS olim cum soleret in foro
Suam futuri venditare scientiam,
Miserosque pauper ageret interim dies;
Nasutus aliquis: Quonam, ait, pacto fidem
Tibi possim habere, cum ipse non prævideris
Tua fata, teque certo periturum fame,
Artem ni abjicias hanc modo tuam futilem,
Aliamque discas, quæ tibi victum pares?
Male prævidet ille, qui sibi non providet.

FABULA XII.

Opilio & Oves. (p)

ADEONE vobis cæcus illudit pavor,
Ut, cum coactæ sitis in tantum gregem,
Unus, nec ipse mole major corporis

Vos

(o) La Motte, Lib. III Fab. XIV.

(p) La Fontaine, Lib. IX Fab. XIX. Abstemius, Fab.
CXXXVII.

Vos terreat, in fugamque convertat Lupus,
 Demumque prædam facile sic tollat suam?
 At si Latronem occidere, ac discerpere
 Nimis benigna vestra non fert indoles,
 Obfistere saltem audete, ne quid audeat.

Orationem hanc opilionis approbant;
 Deincepsque vim se vi repulsuras fore
 Spondent Bibentes. Credit Opilio bonus:
 Ratusque tempus satis idoneum sibi,
 Aliquam quietis capere quo partem queat,
 Secessit, & supinus somno se dedit.
 At mox gregatim celeri pede fugientium
 Multus bidentum strepitus ipsum suscitavit.
 Fugæ ille causam quærit, & nullam invenit,
 Perflante nisi quod vento inhorruit (q) rubus.
 Augetur ipso imbellium numero pavor.

FABULA XIII.

Ardea & Pisces. (r)

PRÆFIXA longis, gracilibusque cruribus,
 Longoque collo, rostro longo prædita
 Stabat silentis Ardea lacus in vado;
 Et expectabar, si qua fors occurreret
 Idonea sibi præda. Pisces adnatant:
 (s) Barbus, Cyprinus, Perca, Tinca, Lucius,
 Eunt, redeuntque: accedere propius videt,
 Ut eligendi, capiendique jam labor
 Superfit unus: at vel exiles nimis,

Parum-

(q) Horatius de Minuleo, Lib. I Od. 23 V. 5.

Nam seu mobilibus vepris inhorruit

Ad ventum foliis, seu virides rubum

Dimovere Lacertæ;

Et corde, & genibus tremit.

(r) La Fontaine, Lib. VII Fab. IV. Boursault in sua
 Comœdia Æsopica secunda, Act. I Sc. IV.

(s) Barbum, Tincam, Lucium Ausonius in sua Mosella
 memorat, V. 134, 125, 122. Cyprinus, & Perca a Plinio
 memorantur, Hist. Lib. XXXII Cap. XI. Carpam autem pro
 Cyprino legere me apud Auctorem latinum nullum memini
 Cassiodoro antiquiorem: qui quidem Lib. XII Epist. IV, *De-*
stinat, inquit, *Carpam Danubius*.

Parumve dignos, qui gulam sibi mulceant
 Tam delicatam, reputat illa; & singulos
 Superba omittit. Interim alio Piscium
 Sua turbam levitas, aut libido pervehit;
 Abitque tempus; & supervenit fames
 Immodica. Vilis ac pusillus Gobio
 Tunc forte cœno emersus huc adremigat.
 Advertit omni vacua jam fastidio
 Ardea; fatisque se beatam existimet,
 Donare ventri talem si prædam queat.
 Hiantis ergo rostri longitudinem
 Demittit in aquas subito: sed citatior
 Aviditas frangit omnis vim solertiæ;
 Vadumque turbat tantum aberrans impetus.
 Hic mœsta quidquam perfici posse Ardea
 Desperat; infelixque litus deserit:
 Abscedit, & limacem in immundum incidit;
 Ipsumque, sprexit quæ optimos Pisces, vorat.
 Sua qui fastidiosus respuit bona,
 Merito ille pœnas stultæ dat superbix.

FABULA XIV.

Afellus.

OPERA Maronis quidam Afellus reperit;
 Simul improbavit, atque discerpit jocans.
 Audaciorem stupiditas Criticum facit.

FABULA XV.

Talpa & Olitor.

SUB humo intubisque (t), rapulisque confixa
 Tenebricosum Talpa fodiebat larem:
 Et: Fuerit Olitor, inquit, Argo oculator,
 Tam bene latentem si me deprehenderit.

Sed

(t) Virgilius Georg. Lib. I V. 120.

..... Et amaris intuba fibris.

Ad quem locum Pierius: *scribendum*, inquit, INTUBA
 per u, ex antiquis plerisque codicibus tam Virgilianis, quam
 Plinianis; *Latina enim dictio est, neque admittit y.*

Sed glebulas dum trudit, & fursum aggerit,
 Fit tumulus, operam qui latentis indicat.
 Advertit Olitor; insidiasque faucibus
 Collocat in ipsis latebræ, & incautum capit.
 Malefici semper aliqua se produnt via.

FABULA XVI.

Ollæ duæ. (u)

OLLÆ peregrinari voluerunt duæ,
 Una ænea, altera fictilis. Dixit prior:
 Nam quo diversa sic abis, soror? Mihi
 Comes adhæresce proxime quantum potes:
 Ac offendiculis liberam tibi viam
 Præstabo; teque dura fragilem protegam.
 Imprudens illa paruit. Sed invicem
 Dum gradibus ambæ, quippe tripedes, ambulant
 Male temperatis, dura fragilem conterit.
 Ne societatem inire cum potentibus
 Velitis, homines, fabula vos, tenues, monet (x)

FABULA XVII.

Milvi & Columbæ. (y)

OLIM efferatis hinc & inde partibus
 Inter latrones Milvos exarserat
 Civile bellum. Jam protervis traditas
 Ludibria ventis mutuus crebras furor,
 Avulserat alas; multa jam teterrimis
 Transverberata rostris, lacerata unguibus
 Data lero fuerant corpora; jamque plurimus
 Alto caducus ab æthere pluerat, cruor.
 Tenero Columbas corde præditum genus
 Lucifica species tam horridæ cladis movet:
 Miserisque, dicunt, media nisi pax venerit,

Brevi

(u) La Fontaine, Lib. V Fab. II. Benferade, Fab. CII.
 Æscopus, Fab. CCXCV. Avienus, Fab. XI. Faernus, Fab. I.

(x) Ecclesiasticus, Cap. XIII V. 2, 3. Ditori te ne socius
 fueris. Quid communicabit Cæabus ad Ollam? Quando
 enim se colliserint, confringetur.

(y) La Fontaine, Lib. VII Fab. VIII. Abstemius, Fab.
 XCVI. Jaius Biblioth. Rhetor. Tom. I pag. 744.

Brevi est futurum ut deleatur funditus
 Gens Milvina. Hoc scilicet reputant malum
 Benignæ, & esse præcavendum judicant.
 Igitur precando, commonendo hoc denique
 Proficiunt, animos ut feroces molliant,
 Induciasque suadeant, mox & rato
 Utrinque fœdere sanciant pacis fidem.
 At ubi reliquit Milvos discordia,
 In ejus expultrices omnis impetus
 Sceleratæ gentis versus est. Tunc sentiunt
 Miseræ columbæ, tutius nunquam bonis
 Ævum esse, quam cum dissidium est inter malos.

FABULA XVIII.

Puella & Nais.

PUELLA quædam lucidum ad fontem sedens
 Suam in liquoris speculo pulchritudinem
 Contemplabatur. Crevit interea sitis:
 Hanc ut levaret, hausit aquam cava manu:
 At omnis inde perturbatus est liquor.
 Ergo illa, quod nil cernere jam possit, dolet,
 Queriturque. Nais imi fontis incola (z)
 Emergit: Et: Te cernere ut possis, ait;
 Quam tu fugasti, expecta dum redeat quies.
 Se noscere ipsum qui cupit, placidum sibi
 Ut se ipse sistat; hac monetur fabula.

FABULA XIX.

Catellus & Molossus.

NUMMIS Catellum viginti exiguum
 Venire in urbe cum videret Rusticus:
 Tantine fieri, dixit, animal tantulum!
 Quid autem, quid si corporis amplitudine
 Æqualis esset canibus nostris? Eugepæ!
 Nos facere talem mercaturam convenit.
 Rus ergo mox ille ad suum revertitur;
 Molossumque simul horridum, immanem eligit;

I 2

Extra-

(z) Phædrus, Lib. I Fab. VI V. 6.

..... quædam tum stagni incola.

Extrahit in urbem; speque præsumens lucrum,
 Venalem exponit nobili mulierculæ:
 At hujus famulis traditus ludibrio,
 Fructum labori ridiculo parem tulit.

Non omnis, quo magis ampla, merx proba est magis:
 Est, quam commendat delicata exilitas.

FABULA XX.

Equus senescens.

ANNOS apud herum divitem multos Equus,
 Omni bonorum instructus affluentia,
 Et dulce, nulloque unquam corruptum gravi
 Labore captans otium, peregerat.
 At cum senectus adveniret, & dies
 Auferret aliquod usque spoliū corporis,
 Mox ille cœpit negligi, mox despici,
 Mox odio haberi: pertrahendo denique
 Plaustro admovetur. Tum suam infelix vicem
 Dum queritur; alius quadrupes, cui se additum
 Tam duro in opere faciendo socium dolet:
 Age sanus, inquit, hoc reputa, laboribus
 Nos esse natos perferendis maximis:
 Vanisque sortem exasperare questibus
 Jam desine. Tristis autem socius hæc refert:
 Disparibus agimur fati: miseras enim
 Tu nosti tantum; easque passus tamdiu,
 Ferre didicisti: contra vero mollibus
 Ego in deliciis antea usque vixeram;
 Et nunc eo redire ad extremum mihi.
 Rem video, ut illum proprio exemplo probem
 Bis esse miserum, qui ex beato fit miser.

FABULA XXI.

Avis solitaria. (a)

PROCUL remota ab omni consuetudine
 Volantum, & imæ vallis in sinu latens
 Amœnoq, placidos quædam Avis agebat dies.
 Vitæ sed illa solitariæ tamen

Sen.

Sensit aliquando tædium; & se protinus
Inferre statuit cœtibus gentis suæ.
Migrat. Strepentem Corvorum in turbam incidit:
Hos turpibus rapinis fuetos vivere,
Edacitate fœda percitos, gula
Stimulante atroces, pro cibis levissimis
Querelas, rixas, pugnas rostro & unguibus
Movere ferrea obstinatos indole,
Discordiarum perpetuus agitat furor.
Paulisper ergo sustinere vix potest
Avis pacifica tale contubernium:
Refugit. Hinc ad aquilarum contendit gregem.
Nobilibus illæ, & gloriosis artibus
Se devoverunt: laudis ad fastigium
Animos volentes usque & usque fuscitant
Generosa studia: sed simul ambitio mala,
Simul ferocibus odiis crudelitas
Exasperata nunc per occultum nefas,
Nunc per apertos & violentos impetus
Patrare suadent omne criminum genus;
Nec judicatur quidpiam illicitum, modo
Huic dignitatem grandis eventus paret.
Simul atque sensit factiones improbas
Avis modesta, & ausus tam nefarios,
Exhorruit, & recessit. Paulo post videt
Valle in reducta serpere tenues aquas,
Frondere densas arbores: audit sonos
Arte modulatos musica: huc delabitur,
Avesque gaudet reperisse dediras
Studio canendi: Ibique, quam quæro, nisi
Habitet voluptas, non habitat, ait, uspiam.
At misera doctas Cantrices dissensio
Perturbat: omnes laudis immodicus tenet,
Et macerat amor: nulla ferre suam potest,
Dignamve laude justa censere æmulam:
Hinc livor, & simultas, & calumnia
Ultro, citroque commeantes sæviunt,
Luctumque spargunt. Hæc mala videt, & gemit

Avis benigna; mox & infidum nemus,
 Sedesque falsa specie blandas deferens:
 Reperamus, inquit, nostram solitudinem:
 Quod cupimus, nostro gerimus in sinu bonum;
 Alibique frustra quæritur felicitas.

FABULA XXII.

Mustela, Cuniculus, & Felis. (b)

MUSTELA vacuum cum cuniculi domum
 Fors reperisset, subiit, & propriam sibi
 Facere decrevit. Interim e pastu redux
 Cuniculus, ubi vidit hospitam novam,
 Hos jure monuit esse hæreditario
 Suos penates: egredique protinus
 Vellet, rogavit. Illa vero quamlibet
 Terræ partem esse cuiuslibet propriam negat;
 Et se juvari lege naturæ, & frui
 Primi occupantis jure, contumax refert.
 Contentioni postquam inutili datus
 Utrinque locus est, Felem ad extremum placet
 Adhibere litis finiendæ judicem.
 Hæc vetula, vitam quæ nefariam sibi
 Assiduus aucta furtis prorogaverat,
 Sanctoque vultu tegere fraudes impias
 Pulchre didicerat, læta clientes excipit:
 Et lis, ait, omnis vestra dirimetur brevi:
 Accedite modo; namque paulo furdior
 Effecta sum; ætas attulit id incommodi
 Longæva: propius, filioli, huc accedite.
 Parent. Satis illa sibi propinquos ut videt,
 Injicit utrique hinc inde falcatas manus;
 Litemque dirimit, litigantes dum vorat.
 Periculosum est hominibus, cum dissident,
 Potentiorum ad arbitrum recurrere.

FA-

(b) La Fontaine, Lib. VII Fab. XVI. Jaisus Biblioth.
 Rhetor. Tom. I pag. 750. Specimen sapientiæ Indorum,
 est. IV pag. 265. Edit Starkil.

FABULA XXIII.

Senex & Mors. (c)

ANNOS homo centum totos qui peregerat,
 Demum advenire mortem sensit; &, nimis
 Properanter illam sic agere secum, quærens,
 Perlit, ne vita cedere prius cogeret,
 Perfecta quam essent sua quædam negotia:
 Saltem expectaret, dum ex nepote filii
 Brevi futuras conclusisset nuptias,
 Factoque rite testamento ab omnibus
 Remotam rixis familiam relinqueret:
 Quod si migrandum hinc sibi fuisse tam cito
 Præmonitus esset . . . Hic Senem ultra mors loqui
 Non passa: Funeris habet mille nuntios
 Senectus longa, dixit; & prædam abstulit.

FABULA XXIV.

Testudo & Anates duæ. (d)

PEREGRINANDI varias in mundi plagas
 Cupido quondam ridicula Testudinem
 Incessit. Adeo, dici quod vulgo solet,
 Verum est: Tardipedes stare vix posse in loco.
 Hæc conspicata forte pascentes duas
 In litore Anates: Vos o felices, ait,
 Quibus remotas visere licet, cum libet,
 Regiones! Nostra non obesset tarditas:
 Et illa, quam gestare cogimur, domus
 Non impediret: hoc mihi solum protinus
 Deferere, meque terras hinc ad ultimas
 Transferre libeat. Ista ne te maceret
 Libido, dicunt Anates, ipsam, si velis,
 Nos ambæ facile explere, statimque, possumus.
 Se spondet autem beneficii memorem fore
 Testudo. At illæ, ramus ut forte arboris

I 4.

Excl.

(c) La Fontaine, Lib. VIII Fab. I. Abstemius, Fab. XCIX.

(d) La Fontaine, Lib. X Fab. III. Specimen sapientiæ In-
 dorum, Sect. I pag. 119. Edit. Starkii. Camerarius, Fab.
 CCCLXXX. Jaius Biblioth. Rhetor. Tom. I p. 749. cujus
 verba non pauca retinimus.

Excisus aderat, tollunt, atque: Tu, inquit,
Hunc stringe medium dentibus, quantum potes;
Aptantesque per os Domiportæ simul inferunt;
Monentque, caveat, ne de causa quolibet
Dimittat unquam sic arreptum mordicus:
Ipsæque mox, ejusdem extremis virgulæ
Partibus utrinque pariter admorsis, volant,
Nostram & per auras efferunt Testudinem.

Res visa cum esset proximi pagi incolis,
Stupuerunt omnes insolens spectaculum:
Et clamitantes ire per arduum æthera
Testudinem, imo Reginam Testudinum,
Eam salutant. Stulta gestit in sinu;
Et: Sum Regina, gaudii impotens ait:
Ita sane; nihil est verius, Regina sum.
Tacuisset illa, fecisset prudentius:
Namque os apertum sustinentem virgulam
Postquam reliquit, ipsa duris cautibus
Illisa periit. Sic, mala curiositas
Quod meruit, inepta gloriatio dedit.

F A B U L A XXV.

Ad Isaacum Belletum Doctorem medicum.

Formicæ duæ.

TUA, Bellere, jucunda morum indole,
Tua doctrinæ varietate amabili,
Tuaque facilis & elegantis ingeni
Festivitate nunc usque duntaxat mihi
Aut ægritudo mentis, aut hujusmodi
Averruncari quodpiam potuit malum:
Tua sed artis (e) medicinæ scientia
Assidua & efficaci bis veterem meum
Amicum morte liberaſti proxima:
Quapropter habeo gratiam tibi maximam.

Mihi

(e) Varro de Lingua Latina, Lib. IV pag. 24. Edit. Ser-
verii. *Ab arte medicina Medicus.* Hyginus, Fab. CCLXXIV.
*Athenienses caverant, ne quis servus aut femina artem medi-
cinam disceret.*

Mihi vero talem nec salutiferam tuam
Cogaris olim similiter operam dare,
Caveo me hercle diligenter: & cibus
Ob id ipsum mihi vulgaris ac tenuis placet;
Potentiumque vito mortiferas dapes:
Et aliqua verbis ut meis auctoritas
Accedat, esto talis exempli fides.

Viles, parabilesque contentæ (f) cibos
Adhibere, vitam sustinebant commode
Dux Formicæ. At una quondam tædio
Affecta, sortisque melioris appetens,
Peregrinari cœpit paulo longius,
Dum perveniret denique in quoddam horreum
Bellariorum omni refertum copia.

O Jupiter, inquit, hospitalis; quod bonum
Mihi venit hodie, perpetuum facias precor!
Simulque dulcem sacchari dapem elicit;
Comeditque, si non, aviditas quantum juber,
At parva quantum continere alvus potest.
Opipare prænfa pauperem ad cellam redit:
Limenque vix ingressa narrare incipit
Omnem munificæ sortis oblatae sibi
Benignitatem; & hujus in partem boni
Invitat ultro sociam, & admovent preces
Sollicita blandas. Illa vero pertinax
Repugnat: Cumque nunc satis bene sit mihi,
Periculosum judico, inquit, o soror,
Melius habendi cupiditate distrahi:
Et renuit explorare fortunam novam.

Sed altera nil jam, nisi degustatas semel
Delicias, cupiens, ordinariam terit
Escam superbo dente, & in ægram nauseans
Demittit alvum; & quam licet sæpissime
Revisit, quod jam diligit unice, horreum.
Intemperanti dum sic obsequitur gulæ,
Se facere credit stulta multum corporis:

(f) Vel. Paterculus, Lib. II Cap. XLIX. *Contentus cum una legione titulum retinere provincia.*

At villibus olim venter assuetus cibis,
 Offenditur istis delicatioribus,
 Quorum usus etiam largior damnum aggravat.
 Demum illa vitam dum sibi vult reddere
 Jucundiores, multo breviores efficit:
 Miseræque funus Bestiolæ curat soror,
 Mœsta quidem, sano sed vigens corpusculo.
 Admonitus hoc exemplo magna divitum
 Contemnere pauper facile possum prandia.

FABULA XXVI.

Arbuseula, Arbor, & Colonus.

JUNIPEROS inter & alios hujusmodi
 Frutices, tenebat principatum Arbuseula.
 Inde procul Arborem eximiam dum respicit,
 Et ejus omnem perspicere præstantiam
 Ne possit, ipsa dum vetat longinquitas,
 Ac tenuis etiam nebula visum decipit;
 Existimare cœpit, illi scilicet,
 Si contra staret, præferendam se fore.
 Quapropter, omnibus ut facultas suppetat
 Utramque comparandi, maxima prece
 Orat Colonum, tollere hinc ipsam velit,
 Et collocare in Arboris vicinia.
 Recusat ille primum: at importunitas
 Hunc denique cogit facere, quod valde improbat.
 Natalis ergo stirpitis e terræ sinu
 Avellit, & reponit optato loco.
 Sed illam totam sic pusillam cum vider
 Latere in umbra magna vicinæ Arboris,
 Irridet: Et: Te quanto, ait, satius fuit
 Juniperis, & Genistis, & Caprifolii
 Dominari, tantæ quam invidere tantulam,
 Et anteponi velle magnitudini!

Virgilii, Homerique æmulos quosdam, sibi
 Palmam arrogantes, fabula, ut sapiant, monet.



FABULARUM ÆSOPICARUM LIBER OCTAVUS.

PROLOGUS.

BIS mille ante annos, terque centum circiter,
 Fortunæ crimen alti dotes ingeni
 Cum vindicassent, Phryx Æsopus exiit
 E servitute, Sardibusque floruit,
 Regnante Cræso: hic sorte prospera fruens,
 Suoque summe gratus Principi,
 Quas, libertate dum careret, fecerat,
 Collegit ipse, & publicavit fabulas.
 Mox notuere in Græcia; has & favor
 Excepit ingens, has Librarius frequens
 Exscripsit, omnium his insudavit manus:
 Et quia potentes, & humiles; pueri, & senes,
 Sophique, & ipse Socrates eas probe
 Discebant, ac tenebant etiam memoriter;
 Quosdam impulere hæc, falsam ut induerent sibi
 Persuassorem, nullas unquam literis
 Mandasse Æsopum fabulas; tantummodo
 Recitasse, quas fecisset; denique has diu
 Non aliter, hominum quam per ora, traditas
 Percrebuisse. At Græcis illum ceteris
 Scriptoribus omnis annumerat Antiquitas (a).
 Neque tamen omnes, quæ sub ejus nomine

Cir-

(a) Aristophanes in Avibus, V. 471.

Οὐδ' Αἰσώπων πεπράττας:

Æsopum non trivisti. Dicere autem Aristophanes recte non potuisset auctorem hunc teri, sive legi, cujus scripta non extitissent. Vide etiam scholia veteris Interpretis ad hunc locum.

Circumferuntur, Apologorum texuit
 Narrationes: imo vero vix licet
 Dubitare, quin plerasque temeritas rudis
 Librariorum eas interpolaverit;
 Quasque edidit, harum plurimas affinxerit
 Planudes (b) ille Maximus prænominē,
 Re fabulator, & nugator maximus.

Sed fraude quamvis barbara fere omnibus
 Æsopi, quales nunc habemus, fabulis
 Inducta forma est deterior; illæ tamen
 Facetæ adhuc sunt, & valent reconditis
 Sententiarum, luminumque dotibus.
 Certe Apologorum semper unus hic mihi
 Thesaurus esse visus est doctissimus,
 Secutus ergo exempla multorum, hinc opes
 Assumere mihi idoneas non destiti;
 Istihuncque porro confeci omnem prologum,
 Ne quis beneficii immemorem me diceret.

FABULA I.

Momi censura. (c)

OPUS quisque suum absolverant, Taurum quidem
 Neptunus, hominem Jupiter, Pallas domum:
 Momum advocarunt: Et: Super his quid sentias,
 Ediffere nobis, inquirunt. Postquam satis
 Cuncta ille sese examinasse credidit:
 Cur non sua Tauro cornua infra oculos, ait,
 Sunt collocata, ut melius ictum dirigat?
 Certe Hominis pectus perfidis plenum dolis

Non

(b) Maximus Planudes vitam Æsopi scripsit, vel potius inepte diffinxit, fabulasque edidit, quæ sub ejus nomine circumferuntur, nisi quod ex earum numero centum triginta sex, nomen ejus, a quo editæ fuerint, non præferentes, e Bibliotheca Palatina depromsit Isaacus Nicolaus Neveletus, typisque excusas luce publica donavit anno 1610. Constat autem Planudem nostram anno 1347 adhuc inter vivos existisse: at longe absunt a vero, qui vixisse illum decimo quinto sæculo, Concilioque Basileensi interfuisse comminiscuntur.

(c) Richer, Lib. II Fab. IV. Æsopus, Fab. CXIII. Faernus, Fab. XCII.

Non occulendum, sed fenestrandum (d) fuit.
 Istique Domui nonne oportuit rotas
 Submitti, ut possit, quæ libet, circumvehi?
 Industria quidquid summa, & eximius labor
 Perficiant, semper aliquis obrectaverit.

FABULA II.

Papilio & Apis. (e)

PAPILIO volucer, florum amator frivulus
 Dum levibus alis visere ad cunctas opes
 Redolentis horti properat, & violæ modo,
 Modo Calthæ inane libat osculum, & fugit;
 Apim insidentem purpureæ calici rosæ,
 Dulcesque succos extrahentem naviter
 Vidit, & accedens substitit aliquantulum,
 Tam pertinacem illius diligentiam
 Ut irideret. At ea nihilo segnius
 Opus exsecuta: Fuitiles, inquit, jocos
 Refellere verbis neque lubet, neque expedit;
 Illud monebo tantum: Qui dulce utili
 Miscuit, is omne meritis est suffragium.

FABULA III.

Divinus. (f)

VENTURA fallax dum Divinus in foro
 Prænuntiaret, verus illi nuntius,
 Suam patere foribus effractis domum,
 Neque reliquum intus esse jam quidquam boni,
 Repente venit. Ergo, quo damnum vocat,
 Homo meus ire properat. Tunc adstantium
 Unus: Alienam quis jam, ait, sortem putet
 Te prævidere, cum tuam haud prævideris?

Ad

(d) Plin. Hist. Lib. XI Cap. XXXVII paulo longius ab initio: *Media eorum* (oculorum) *cornea fenestravit papilla*. Vitruvius; Lib. III init. *Memoratur* (Socrates) *dixisse*, oportuisse hominum pectora fenestrata & aperta esse.

(e) Commirius, Tom. I. Edit. 1714 pag. 308.

(f) Benferade; Fab. CLXXII. Ætæopus, Fab. XL. Faer- nus, Fab. LXXII.

Ad hos fabella pertinet, qui res amant
Alienas curare, propriasque negligunt.

FABULA IV.

Accipiter & Noctua. (g)

ACCIPITER olim Noctuæ promiserat,
Et obligarat jurejurando fidem,
Pullis ab ejus, quamvis urgeret fames,
Et rostrum & ungues cohibiturum se fore.
At ne qua forsan cupiditas, inquit, mala
Olim in tuorum damna me inscium ferat,
Ediffere, hos porro quibus agnoscam notis.

A ceterarum fetibus Avium meos
Distinguere tibi est facile, dixit Noctua:
His nulla namque Mater unquam protulit,
Unquamve, spero, deinde proferet pares;
Adeo venustam corpore speciem gerunt,
Tam singulari florent pulchritudine!
Probe meminero cuncta, discedens ait
Accipiter; & cavebo, ne nostra indoles
Aliquid in tales formas audeat mali.

Postridie auras dum volando circinat (h)
Jejunus, ultra ferre nec potest famem,
Turris vetustæ latibula subito petit:
Ibi per omnes quæritat prædam cavos,
Pullosque demum Noctuæ ipsos invenit:
Tenebricoso nidulo extrahit: videt
Tristes, horridulos: Nostraque his tam turpibus
Amica, dixit, vitam certe non dedit,
Quæ tam venustos, tamque pulchros educat:
Nec plura: simulque evisceratos devorat.

Hæc inficetum fabula indicat librum,
Quem si modesto venditari nuntio
Critici viderent, fors illæsum omitterent,

At,

(g) La Fontaine, Lib. V. Fab. XVIII.

(h) Ovidius Metam. Lib. II V. 720.

Sic super Actæas agilis Cyllenius arces
Inclinat cursus, & easdem circinat auras.

At, si elegantem stultus Auctor prædicet,
Hi rite expensum acuto discernunt stilo.

FABULA V.

Melezia & Larix.

ORTA est in nemore Transpadani litoris
Meleziam inter & Laricem contentio.
Melezia prior Sorte, ait, satis mea
Me gloriari, & esse contentam licet:
Apud omnes quippe Physicos nostri temporis
Peritiores nostrum & nomen & decus
Celebratur: dum te venditam judicant
Scriptorum inani veterum testimonio,
Priscaque laude destitutam vituperant
Critici sagaces. Contra sic retulit Larix:
Adjicere, stulta, debueras; etiam mihi
Has nunc negari dotes, ipsa quas dedit
Natura (i); miram nempe in altitudinem
Me surgere; quam tu sic pusilla vix potes
Aspicere: quolibet intemeratam tempore
Consistere mihi viriditatem frondium,
Ut nuda tu videbis, omni te simul
Honore Boreas ingruens spoliaverit;
Ac denique nullis ignium me viribus
Verti in favillas posse, quod certis sibi
Notum esse multisque experimentis graves
Et eruditi docuerunt olim viri.
Quid plura? debes vel tuis præconibus
Fidem habere nullam, vel credere & id, quod volunt,
Me, qualis adsum nunc tibi, me scilicet
Numquam extitisse; teque flammis tam cito
Aboleri facilem, te caducis frondibus
Instructam, Laricis esse reputandam loco.

Meum

(i) Plin. Hist. Lib. XVI Cap. X. *Picea minus alta, quam Larix perpetuo virent Laricis morbus est, ut tæda fiat Nec ardet, nec carbonem facit; nec alio modo ignis vi consumitur, quam lapides Materies præstantior longe, incorrupta vis, omni ventumax.*
Vide & Vitruv. Lib. II Cap. XI sub. fin.

Meum at tam dispar, tam longe præstans tuo
 Genus reverere: cuius excellentiam,
 Laudemque fictas æstimare fabulas
 Critici si pergant, hoc sibi dictum putent:
 Non semper inficiari licet, ubi non liquet.

FABULA VI.

Edera & Murus.

PERMITTE, dixit Edera Muro blandiens,
 Ut fragilis, & me sustinere nescia
 Tibi tam stabili, tamque firmo adhæream.
 Haud renuit ille; at sentiens hanc postmodum,
 Stirpibus hac, illac furtim permeantibus,
 Cæmenta solvere, & lapidum compaginem
 Laxare, queritur; herumque communem rogat,
 Distrumpere velit nexibus consortium
 Male ominatis initum, & ejicere procul
 Plantam nocivo sibi jugatam fœdere.

Audit quærentis herus preces, & approbat;
 Stirpesque tentat noxias revellere;
 At cum per omnes Muri penetrasent cavos,
 Tenacibusque hærent internodiis,
 Non posse jam revelli eas intelligit,
 Quin ipse Murus parte labefactus sui
 Majore, vel inclinetur, vel etiam ruat:
 Ideoque, damnum ne eveniat majus, timens,
 Malum dirimere non audet commercium.

Hunc fabula monet, quisquis arcto se finit
 Temere alligari societatis vinculo.

FABULA VII.

Simioli & Pyra.

PRÆCEPTOR olim diligens sibi traditos
 In disciplinam Simiolos instruxerat
 Moribus honestis: tamque mites, & probos,
 Et temperantes esse factos credidit,
 Ut non dubitarit illos Domino sistere,
 Sperans Lucellum, industriæ videlicet
 Fructum, & laboris, se recepturum fore.

Sed

Sed intromissi cum fuere belluli
 Minervæ Alumni, forte sepositum vident
 Plenum Pyris canistrum, &, abjecta simul
 Omni modestia, uno pariter impetu
 Illuc, cupiditas quo trahit victrix, ruunt,
 Prædamque, fœdis etiam rixantes modis,
 Diripiunt. Hic Magistrum penitus afficit
 Dolor pudore mixtus: ingemuit miser;
 Et: Arte, dixit, expellatur qualibet,
 Tamen (k) recurret usque vitiosa indoles.

FABULA VIII.

Perdix & Auceps. (l)

ALITIBUS Auceps insidias tetenderat:
 Incauta Perdix in laqueos sese induit.
 Sensit periculum: certam ut effugeret necem,
 His Aucupem tentasse verbis dicitur:
 Agro in propinquo sociæ pascuntur meæ
 Multæ; sine modo, huc illas adducam tibi,
 Mensa ut paretur præda dignior tua:
 Postquam rediero, nec mihi parces, si voles,
 Vel, si placuerit officium, vitam dabis.

Agnoscit Auceps callidus inanem dolum;
 Avemque capiens garrulam: Ut credam tibi,
 Respondet, ullam tu mihi ut serves fidem,
 Socias quæ prædis ipsas? Hæc aliis cane:
 Interea capsam ingredi, si largam minus,
 At delicatam præbitura mihi dapem.

Inimico vanis se promissis perfidus
 Obligat, amicos prodere ipsos qui potest.

FA-

(k) Horatius, Lib. I Epist. X V. 24. quanquam sensu diverso:

Naturam expelles furca; tamen usque recurret.

(l) Richer, Lib. I Fab. XI. Æsopus, Fab. CLXVII. Jatus Biblioth. Rhetor. Tom. I pag. 739. cujus verba pleraque retinimus.

FABULA IX.

Parasitus & Pisciculi. (m)

QUIDAM Parasitus, & facie, & facetiis (n)
 Ridiculus, audax scurra, delicta populi, (o)
 An Publicani sumptuosam divitis
 Mensam sedebat imus. Is neptuhios
 Sibi esse positos tantum Pisciculos dolens,
 Dum grandia monstra ponerentur ceteris,
 Suos minutos anxia tollit manu,
 Orique primum, & auribus dehinc suis
 Alios post alios mimico gestu admovet.
 Hic omnium ingens curiositas fuit.
 Audire facti causam flagitantibus:
 Me cura, dixit, magna sollicitum tenet
 De sorte amici, qui longinqua jam diu
 Per maria eurrit: ergo ab his ponti incolis
 Exquiro, numquid de illo fors resciverint:
 At juniores se esse respondent mihi;
 Interrogemque grandiores, me monent.
 Inexpectatum callidi scurræ jocum
 Convivæ risu excipiunt, & grandes simul
 Dilargiuntur Pisces, quos interroget.
 Ingenium avarus acuere stomachus solet.

FABULA X.

Apis & Jupiter. (p)

APIS Jovi olim mellis obtulit favum.
 Admovit ori dulce munus Jupiter:
 Cumque approbasset Aviculæ solertiam:
 Age, inquit; opta quid tibi rependi velis.
 Has, retulit illa, nostras involat in dapes,
 Et eas profanat cupida gens mortalium:

Da

(m) La Fontaine, Lib. VIII Fab. VIII. Abstemius, Fab. CXVIII. Jaius Biblioth. Rhetor. Tom. I pag. 755.

(n) Cicero ad Attic. Lib. I Epist. 13 circa med.

(o) Plautus Mostel. Act. I Sc. I V. 14.

(p) Æsopus, Fab. CCXLIV. Camerarius, Fab. CCXLIII. Jaius Biblioth. Rhetor. Tom. I pag. 747. cujus verba aliquoties adhibuimus.

Da vindicare posse prædones malos,
 Plagamque facere pungendo insanabilem.
 Votum improbavit Deus, & tantam tantulæ
 Crudelitatem volucris indigne ferens:
 Tibi certa mors est, dixit, si quem læseris;
 Animamque in ipso irata linques vulnere. (q)
 Plerumque pœnas vindictam auctori suo
 Consciscere graves, hoc exemplo discimus.

F A B U L A XI.

Leænæ Apotheosis. (r)

L EONIS uxor e vivis decesserat:
 Solemnis ergo dicitur exsequiis dies;
 Missique circum Feciales admonent
 Regni incolas: Adeste pompæ funebri
 Qui volet, acceleret. Nullus non, vel adfuit,
 Vel excusavit per alios absentiam.
 Turbam ut frequentem vidit, ingentes Leo
 Causas dolendi præsignificare omnibus
 Longo ejulatu cœpit: adflere Aulici,
 Parique luctu luctum Regis prosequi.

Unus tot inter fletus fletibus abstinet
 Cervus. Sibi namque meminit uxorem feris
 Nuper Leænæ devorata dentibus.
 Advertit, & æstuantis Rex iræ impotens:
 Sic ergo nostros concelebras luctus, ait!
 Potes esse lætus in dolore publico?
 At non Leonis vindicabitur impetu
 Tam turpe crimen: ruite in impium, Lupi,
 Reginæque piis Manibus inferias date.

Nihil moveri visus ad tristes minas,
 Sic placide causam Cervus oravit suam:
 Rex magne, satis est luctui datum hactenus,
 Recepta Carlo flere nos ultra vetat
 Augusta Conjux. Namque dum ereptam mihi

K 2

Uxorem

(q) Virgil. Georg. Lib. IV V. 238.

(r) La Fontaine, Lib. VIII Fab. XIV. Abstemius, Fab. CXLVIII. Jatus Biblioth. Rhetor. Tom. I pag. 747. cujus etiam verba plurima usurpavimus.

Uxorem queror, & Mortis inclementiam
 Accuso, inane luctus ad solatium;
 Vidi Leenam curru sublimem rapi,
 Interque collocari cœlestes Feras.
 Quapropter alacris lætitia jam nos decet.
 Hac fraude lepida Leo placatur credulus;
 Recreatque dono, destinabat quem neci.

Amant Potentes, quæ canit adulatio,
 Licetque falsa judicent, raro improbant.

FABULA XII.

Agnus, Canis, & Lupus. (s)

STUDIOSA mater, & sagax dederat Ovis
 Fidelem, si quis unquam alius, Canem suo
 Custodem Agniculo. Non erat ille bellulus,
 Neque aliquis unus ex illis, qui comiter
 Adblandiuntur: at generosus, & valens,
 Acerque, & omnes qui ferox hostis Lupos
 Usque allatraret, arceretque longius.

Custodis hujus imprudentem tædunt
 Alumnum; cumque de tutelari fide
 Furtim exeundi occasionem quæreret,
 Lupus ecce occurrit, artibus instructus malle
 Veterator, tectus pelle ovilla, qui suam
 Dissimulans vocem sic eum alloquitur prior:
 Mihi Fors bona favet, qui te solum invenerim,
 Amicule: operam jam antea tibi meam
 Impendere utilem, animo destinaveram.
 Dic autem, amabo: quid tibi cum ista Bellua
 Tristi & severa, cujus in custodiam
 Te traditum esse, sic amabilem audio?
 Moderator ille est, chara quem dedit Parens,
 Respondit agnus. Huic Lupus retulit: Suum
 Egregie Alumnum, & erudite scilicet
 Institvere ille norit, aliud qui nihil,
 Præter latrare, didicit! si credis mihi,
 Doctorem sanus invenustum deseres.

Me

Me sequere : disces quidpiam, quod sit magis
E re tua, magis etiam placeat tibi.

Lupi consiliis paret Agnus perfidis :
At vix uterque proximum intravit nemus,
Comitem misellum strangulat impius Latro.

Bonus ille custos, qui severus & probus
Propulsat; non qui blandus importat malum.

FABULA XIII.

Homines duo & Thesaurus. (t)

INOPIA quidam perditus statuit mori:
Laqueum paravit ære quod superfuit,
Collo alligavit; veteri semirutæ domus
Pietati clavum fixit, unde pendulus
I longum faceret. At in ruinam cum foret
Paries propensus, sustinendo ponderi
Impar secutus ultro est; & magnam simul
Effudit auri copiam. Ille, qui nigras
Præter Erebi umbras cogitaret jam nihil,
Ubi sic dejectum, & illæsum etiam se videt,
Stringente nodo se exemit, laqueum abjicit,
Fortunæ munus oblatum recolligit,
Repetitque dulci gravis onere suos lares.

Interea, hunc ipsum ibidem qui locaverat
Thesaurum, Avarus advenit, & exterritus,
Victusque damno cognito: An meos mihi
Amores, heu! fuisse sublatos feram,
Vivamque? misero vivere quid prodest, ait?
Visoque laqueo se suspendit, & perit.

Ubi quis desperat, confiditve maxime,
Ratum crede nihil: nam repente, si velit
Fortuna, res utrinque mutabunt vicem.

FABULA XIV.

Corvus & Lepus.

PER odora rura dum thymum pascit Lepus;
Volans per auras hunc simul Corvus videt,

K 3

Si-

(t) La Fontaine, Lib. IX Fab. XVI. Abstemius, Fab. CLXIX.

Simulque Venatores aspicit procul:
 Miseramque pecudem nisi, ait, admoneam cito,
 His facile fiet præda venatoribus.
 Delapsus ergo postquam confedit solo,
 Leporem quietum hortatur monitor anxius,
 Fugiat, suoque se recipiat latibulo,
 Ac venatorum vitet adventum, & necem.
 His monitis ille paruit, falsis licet:
 Nam Venatores alio cursum verterant.
 At Corvus, ut humo tollere se tentat, pedes
 Retineri sentit impeditos cassibus,
 In quos latentes induit se improvidus,
 Saluti alterius providere dum cupit.
 Rebus alienis qui student vigilantius,
 Quam sit opus, hi sæpe nihil in propriis vident.

FABULA XV.

Porcus & Sturni. (u)

INTER vetusta rudera dum terram fodit,
 Glebasque rostro Porcus evertit putres,
 Erumpere cogit vermiculos: Sturni advolant;
 Fossorem stipant; & capeffunt strenue
 Infecta lubrica, & avide liguriunt.
 Meus ille stupidus agmen aligerum sibi
 Honoris causa huc advolasse credidit:
 Sola parasitos excitaverat fames.

FABULA XVI.

Pica & Acanthis. (x)

SUA sola Picam futilem loquacitas
 Domino jucundam, amabilemque fecerat.
 Procacibus illa perstrepens clangoribus,
 Modo objurgabat omnem familiam, modo
 Potum sibi darent, postulabat, aut cibum:
 Statimque, quidquid vellet, habebat affatim.

Eadem

{u} Richer, Lib. III. Fab. XI.

{x} Richer, Lib. II. Fab. XVII.

Eadem Acanthis (y) quæ latebat in domo;
 Iterare blandos didicerat tantum sonos;
 Mulcensque cantu solitudinem suam,
 Durabat, omni se abstinens querimonia,
 Nec dignabatur postulare quidpiam.
 Interdum ad ejus lene & argutum melos
 Familia, & ipse Dominus, attenti aurium (z)
 Operam dicabant, deliciasque musicas
 Remunerabant ultro magnis laudibus:
 Sed alia raro conferebant munera.
 Ergo, quibus etiam sustineret spiritum,
 Avis misella sæpe caruit victibus;
 Emarcuitque, ac denique periit fame.

Hinc literati nempe discunt, o dolor!
 Modestiam nocere doctis artibus,
 Valere ineptas, quas juvet impudentia.

F A B U L A XVII.

Mustela & Columba.

MUSTELA catulos cum quotidie suos (a)
 Transferret; hanc Columba, quid toties locum
 Mutare, tamque sollicitam esse egeret,
 Interrogavit. Illa respondit: Tuos
 Cum te viderem pullos in eodem loco
 Usque educare, & hos tibi usque subripi;
 Tua ista fecit me anxiam securitas.

K 4

FA-

(y) Virgil. Georg. Lib. III V. 336.

... Cum frigidus aera vesper

Temperat, & saltus reficit jam rosca Luna,

Litoraque Alcyonem resonant, & Acanthida dumi.

Quam, inquit Servius ad hunc locum, alii *Lusciniam* esse volunt, alii vero *Carduelem*. Quidam autem animadvertentes tempus hic a Virgilio memorari, quo *Luscinia* cantare soleat, non *Carduelis*, *Lusciniam* ibidem fatis aperte designari contendunt.

(z) Plautus Bacchid. Act. 4 Sc. 9 V. 72.

Ubi lubet, recita: aurium operam tibi dico.

(a) Plin. Hist. Lib. XXIX Cap. IV. *Hæc autem (Mustela domestica) catulos suos, ut auctor est Cicero, quotidie transfert, mutatque sedem.*

FABULA XVIII.

Sidera & Sol.

DE principatu contendebant sidera :
Sol oritur : omnis definit contentio.

FABULA XIX.

Leo iratus. (b)

DUM quærit olim iratus elapsum Leo
Alium Leonem, quem mactet odio furens,
In puteum offendit : inspicit; suam videt
Pictam in liquore imaginem; quem vult, sibi
Hostem hunc adesse credit; irruit, & perit.
Sæpe furiosi plus sibi, quam aliis, nocent.

FABULA XX.

Eruca duæ. (c)

IN Caule eodem Erucæ (d) creverant duæ,
Et societatem inliverant fororiam.
At una pennas cum repente cerneret
Sibi advenisse, Papilionum se gregi
Statim immiscere cupiens, sursum enititur,
Fertur per auras, veterem amicam negligit,
Et hujus, Erucarumque omnium immemor,
De gente se ista unquam fuisse pernegat.
Homines repente emersos ex humili loco
Tolerare possum, ni suum spernant genus.

FABULA XXI.

Fur deceptus. (e)

RECONDERE aliquis thesaurum in terræ sinu
Cum vellet, unum e vicinis vocaverat,
Qui se adjuvaret, secretique conscius
Fieret. At ille occasione mox data

Fidem

(b) Le Brun, Lib. V Fab. XXIII. Specimen sapientie Indorum, Sect. I pag. 75. Edit. Starkii.

(c) Richer, Lib. VII Fab. XVII.

(d) Plin. Hist. Lib. XI Cap. XXXII. Prognitur vermiculus parvus, & triduo mox Eruca . . . Hæc Eruca, quam Chrysalidem appellant, rapto deinde cortice volat Papilio.

(e) La Fontaine, Lib. X Fab. V.

Fidem fefellit, seque teste conditas
 Clam sustulit opes. Dominus illuc postmodum
 Soius revertens vacuum ut invenit locum,
 Disjudicavit id quod res erat, suo
 Esse imputandum amico perfido scelus.
 Adit hunc; dicitque thesauro jam condito
 Adjungere aliam velle se pecuniam:
 Adesset ergo similem postera die
 Daturus operam. Se adfuturum scilicet
 Promittit isto Fur lætatus nuntio,
 Speratque summam pariter hanc posse abripi,
 Suoque properat reddere alteram cavo:
 Quam Dominus ut recepit, abscondit domo,
 Nihilque Furi, præter (f) animo dejici,
 Relinquens, docuit; plerumque artibus suis
 Cæcam improborum cupiditatem decipi.

FABULA XXII.

Vulpis & Lupus. (g)

PLENÆ simulachra Lunæ dum speculo suo
 Placitus profundi redderet putei liquor;
 Accessit illuc forte, visum quæritans,
 Jejuna Vulpis, at, ubi prospexit, fames
 Malefuada perpulit, uti pinguem crederet
 Summis super aquis innatare caseum.
 Ergo duobus, alternabant qui vices,
 Pensilibus alta e machina situlis itus
 Cum facilis esset usque puteales aquas,
 In eum, quem levitas propria, & alter prægravans
 Extulerant sursum ad marginem, sese injicit:
 Delapsa sed mox luget errorem suum;
 Seque perituram deputat. Animum tamen
 Vitæque misera sustinet. Jam biduum
 Erat consumptum; cum Lupus tandem advenit:
 Quem conspicata: Situlum, ait, te in hunc cito.

K 5

Im-

(f) Horatius, Lib. II Sat. V. 68.

..... tacitus leget, invenietque

Nil sibi legatum, præter plorare, suisque.

(g) La Fontaine, Lib. XI Fab. VI.

Immitte: properaque in mei partem boni:
 Optimus hic est mihi repertus caseus:
 Comedi, quantum cupiditas suasit mea;
 Nunc satuta cogor hunc, sic abratum, ut vides,
 Deferere. Luna scilicet decreverat,
 Et simul imago Lunæ. Stulte credulus,
 Avidusque prædæ inanis, obsequitur Lupus;
 Præponderatque corpore, & fundum petens
 Sursum propellit Vulpem; quæ parum anxia,
 Lupo quid fieret, liquit hærentem vado.

Quod (h) cupimus, id verum esse facile credimus.

FABULA XXIII.

Cervus æger. (i)

MORBO laborans Cervus cum decumberet;
 Cervi prope omnes nemoris ejusdem incolæ
 Ad eum venire, disitantes, maximam,
 Quidquid doleret, capere se partem mali.
 Suam ille gratus hos ita benigne vicem
 Dolere visos, benevolis affectibus,
 Aptisque verbis, quando id unum nunc potest,
 Remuneratur; & pietatis sedulæ
 Officia laudat; seque, non obstant modo
 Fata nimis aspera, memorem spondet fore.
 At pristina brevi cum revertisset salus,
 Exurgit; visit, quo suæ sint res loco:
 Vidensque ab istis solatoribus suis
 Absumpta circum sua fuisse pabula:
 Officia, dixit, sancta quanto veneunt!

FA-

(h) Cæsar, de Bello Gall. Lib. III; *fere libenter homines id, quod volunt, credunt.* Quam sententiam felici forsitan eventu aptavissimus fabellæ nostræ concinnatam hoc modo: *Fere libenter, quod volumus, id credimus.*

(i) La Fontaine, Lib. XII Fab. VI. Richer, Lib. VIII Fab. XV. Tanaq. Faber Fab. III ex Locmani arabico. (c)

FABULA XXIV.

Graculus. (k)

O LIM superbus, impudensque Graculus,
 Fur ipsemet ille, qui Alitis Junonii (l).
 Radiantibus se pennis exornaverat,
 Revulsas ardæ alas forte reperit;
 Hasque sibi, stulte cupidus, quo potuit modo,
 Aptavit. Ultra nubes se jam præpetem
 Ferri volatu posse sublimi autumat.
 At vix se in auras crassiores sustulit,
 Misere impeditur, talis remigii insolens,
 In humumque prono capite præceps decidit.
 Ineptos fabula plagiarios notat.

FABULA XXV.

Musarum Alumnus & Bombyx. (m)

MUSARUM Alumnus junior, nugax, levis,
 Ofor librorum, cubiculumque, quo suus
 Ipsum magister detinebat sedulo,
 Horrere solitus pejus atro carcere,
 Luctum ut fugaret, falleretque tædium,
 Bombycem alebat. Hunc videns subtilibus,
 Quæ neverat ipse, filis sese involvere:
 O stulta bestia, istis quæ laboribus
 Consumeris, ait, ut tibi carcerem struas!
 At ille retulit: Tale opus ni secero,
 Eruca cogar repere, nec unquam mihi
 Continget, ut venustum muter in Alitem.
 Fabella pueros, ut laborent, admonet,
 Doctisque vigilant studiis, repere ni velint.

FA-

(k) Richer, Lib. VIII Fab. VIII. Galli quidem, qui latine scire se credunt, si quando dicant, *Le Geai de la Fable*, Graculum intelligi volunt. At in Commentario quodam nostro ad Phædrum ostendimus, Latinorum Graculum, si minus cornicula ipsa sit, avem certe esse, non varii, at prorsus nigri coloris.

(l) Vide Phædr. Lib. I Fab. III.

(m) Richer, Lib. VIII Fab. XIII.

FABULA XXVI.

Formica & Jupiter. (n)

FORMICA sortem conquerebatur suam:
 Ævum se innumeris trahere obnoxium malis;
 Timere semper, rusticæ plebis gravi
 Ne conteratur planta, vel perdicibus
 Jucunda fiat esca: O Jupiter, mihi
 Concede pennas, inquit, ut, quæ me ambiunt,
 Possim evolare tot procul a periculis.

Motus querela pervicaci Jupiter
 Pennas concessit imprudenti Bestiæ.
 Ergo illa gaudet munere novo, & se levis
 Tollit per auras: at simul ab hirundine
 Aspicitur; in eam devolans rapido impetu
 Avis famelica nec opinantem vorat.
 Stulte appetentes, dum annuit, plebit Deus.

FABULA XXVII.

Cultor Arborum Imperitus. (o)

CUM cupidus aliquis agriculturæ foret,
 Animique vana elatione turgidus,
 Suam latere vellet imperitiam;
 Ficta ambulandi causa Agricola convenit
 Valde peritum: solitis hunc laboribus
 Fungentem paulum observat; atque etiam videns,
 Fruticationes Arborum superfluas,
 Vagos stolones, parasitosque ramulos
 Eum amputare: Cur, ait, tantam facis!
 Lignique frondiumque cædem? Hinc scilicet,
 Inquit Colonus, uberior fructus redit.
 Neque ille plura quæsit; & prudentiam
 Sese artis omnem jam affecutum credidit;
 Abiitque. Fundum mox reversus ad suum,
 Capit securim; & obvios quosque Arborum,
 Bonos, malosque, ramos abscondit miser;
 Spemque furiosus resecat omnem palmitum.

Docet

(n) Richer, Lib. VII Fab. II.

(o) La Fontaine, Lib. XII Fab. XX. A. Gellius, Lib. XIX ap. XII.

Docet fabella, sæpe ab exemplis bonis
Capere imperitos peccandi fiduciam.

Sed & severa Stoicorum sanctio (p)
Hic quoque notatur, animi nullum quæ probat
Affectum, at omnes penitus excindi jubet.
Illi quidem altæ semina mentis indita
Habuerunt, plenaque utilis sapientiæ
Sanxere multa, & ausus hæc olim sui (q)
Celebrare quodam carmine: sed enim omnium
Præstare cum se motuum expertes volunt,
Nec Di videntur esse, nec homines mihi.
Quid? Excitatum misericordiæ indolem
Cohibere, frænare pietatem, extinguere
Virtutis etiam igniculos: hæc virtus erit?
Talis apathia dici virtus si potest,
Virtutis ergo summum in automatis latet.

FABULA XXVII.

Ad Reverendum Patrem Carolum de Neuville.

Columba, & ejus Pullus; Buboque, & Aquila.

ILLUD profecto, Carole, dat animos mihi,
Quod laus tua singularis eloquentiæ,
(r) Sapientiæque summa vis te non vetant
Has penitus intueri fabellas leves,
Quas arte finxi, & expolivi tantula:
Etiamque, qua sint parte commendabiles,

Qua

(p) A. Gellius, Lib. XIX Cap. XII hanc fabulam refert ex Herode Attico; cujus etiam conclusionem adversus Stoicos talem exhibet: Sic isti apathia sectatores, qui videri se esse tranquillos, & intrepidos, & immobiles volunt; dum nihil capiunt; nihil dolent, nihil irascuntur, nihil gaudent; omnibus vehementioris animi officiis amputatis, in corpore ignavi & quasi enervata vita consenscunt. Ubi pro corpore, nemo hucusque, quod sciam, animadvertit esse legendum, torpore.

(q) Quod carmen, cum a peritis quibusdam expeteretur, nunc jam edendum, & in appendice hujusce voluminis extrema reponendum esse judicavimus.

(r) Cicero Oratoris Cap. LXX. Est, inquit, eloquentia, sicut reliquarum rerum, fundamentum sapientiæ.

Qua parte peccent, ponderare te sinunt.
Age nostris æquam perge porro lusibus.
Præstare mentem. Judex en inducitur.
Regina volucrum: quæ tuam satis probe
Vicem an sustineat, dispicere nunc te velim.

Columba pullum excluserat, gratum sibi,
Studioque magno vigilans educaverat.
Videbat hunc plerumque apud gentem suam
Ornari laudibus; & gaudebat in sinu.
Suffragia tamen blanda multitudinis
Benevolæ secum tacita dum considerat,
Timet, immodestus verba ne dederit favor,
Illuseritque. Veritatis appetens,
Bubonem, solitum turris in fastigio
Residere, vitamque agere solitariam,
Nisi dubitat una cum suo Columbulo
Adire, sincerumque judicium rogat
Super hujus omni sive virtutum indole,
Sive vitiorum. At ille, dotes quælibet
In qualibet ipsi luce ponantur, truces
Obliquat oculos; quæque, recto si velit
Examinare intuitu, forsitan probet,
Statim repudiat, antequam perspexerit.

Matrem misellam disrutiatur ingens dolor
Pudore mixtus: neque bubonis tetrici
Vim judicandi pravis ductam affectibus
Cognoscere ejus nimia simplicitas sinit.
Relinquit ergo mœsta scævum Judicem;
Metuensque, caræ vera ne nimis nota
Inusta fuerit Proli, hanc respicit, & gemit;
Neque tamen, oculis sedulo quanquam utitur,
Obnuntiata turpitudinem potest
Videre; Bubonisque vereatur licet
Auctoritatem, tamen assensum sustinet.

Sed cum meminerit, Aquilam dici ceteris
Volantibus unam magis acutum cernere,
Suum coram illa iudice sistit filium:
Trepida, humilisque, causam veniendi docet,

Et obsecrat; uti se nimis diu anxiam
Ab inquieto liberet erroris metu,
Omnemque certo iudicio rem finiat.

Haud renuit Aquila: hos in Columbulum simul
Defigit oculos, aspicere Solis facem
Rutilam irretorti qui valent. Postquam satis
Pervidit omnia: Isto, dixit, optimus
Toto vigescit succus in corpusculo:
Formæ decenti veneres non defunt suæ,
Nitore blando, munditiisque simplices:
Quædam at nec absunt negligentia (s) mala,
Quæ delicatis asperam censoribus
Creare possint nausæ molestiam.
Plumisque, pennisque varius color insidet,
Quem cura facilis, & naturalis decor
Concentu amico ad elegantiam instruunt:
At suavitatem paulo concitior
Animaret utinam virtus, & nusquam auræ
Mediocritatis lumen elanguesceret!
Imbelle rostrum, & innocens, rixam fugit,
Parabilesque, & obvios tantum cibos
Adhibere novit: sed animosius vellim
Converteretur in omne noxium pecus;
Et in ciborum delectu cupiam quoque,
Gustus adesset doctior sagacitas.

Hunc tu tamen, pia Mater, gaudeas licet
Genuisse talem: Candida ratio vetat,
Maculis offendi paucis, plura dum nitent.



FABU-

(s) Phædrus, Lib. III Fab. VIII V. 15.
Tu formam ne corrumpas nequitia malis.

~~~~~

FABULARUM ÆSOPIARUM

LIBER NONUS.

PROLOGUS.

PERICULOSAM miles ingressus viam
 Non tam sollicitè ab hostium insidiis cavet,
 Quam veritus ego sum, & anxius operam dedi,
 Ne quempiam hinc fabulis offenderem.
 Quod si secus contingat: haud crimen meum,
 Sed malevolorum injusta criminatio,
 Hominumve stulte errantium vanissimæ
 Suspiciones, quælibet species mali
 Mihi imputetur, hanc omnem conflagaverint.

Cœptus quam honesta fuerit hic meus labor
 Ratione, quantumque habeat innocentiae,
 Monere toties, nescio an quidquam mihi
 Sit profuturum: sed nihil certe magis
 Mihi expetendum, quam laus ingenue & probæ
 Integritatis, (a) & nihil magis expeto.

FABULA I.

Anguilla & Anguis. (b)

ANGUILLA dixit Angui: Cur nostrum genus
 Quotidie homines prendunt, deglubunt, edunt;
 Dum vos refugunt, ac timent attingere?
 Respondit Anguis: Hi sciunt videlicet,
 Nos prodesse nihil, & nocere plurimum.
 Improbis ipsa sæpe tuetur improbos.

FA-

(a) Cicero ad Attic. Lib. VII Epist. 2. *Dedit (Cato) integritatis, justitiæ, clementiæ, fidei mihi testimonium.*

(b) Abstemius, Fab. XVII. Faernus, Fab. XXVII.

FABULA II.

Piscis. (c)

EBULLIENTEM missus in sartagine
 Piscis, ab immodico ut se calore subtrahat,
 Resiliit; at prunas miser in ipsas decedit:
 Sic ergo, frixus ne pereat, assus perit.

Quem pertinacis ira Fortunæ premit,
 Mutat aliquando, nec tamen vitat malum.

FABULA III.

Sus & Apes. (d)

APICULA teneram læserat Suis cutem:
 Iratus ille, tantulæque tam levem
 Punire volucris punctiunculam volens,
 Aggreditur ipsum disjicere apiarium,
 Quassatque rostro: totum at examen ruit,
 Et mille punctum aculeis hostem fugat.

Qui vindicare injurias leves cupit,
 Ille sibi plerumque graviores concitat.

FABULA IV.

Recessus pictus & Columba. (e)

PICTAM in parietē imaginem blandissimam
 Taciti Recessus, temere positas arbores,
 Has permeantem cyanei lucem Ætheris,
 Interque Gramina fugientem Rivulum,
 Vidit Columba, cumque premeretur siti,
 Huc celeritate, quanta potuit, se intulit:
 At misera solido offendit; & in ipso impetu
 Male vulnerata, præceps ad humum corruit.

Hæc fabula homines heu! nimis multos monet,
 Quos vana species ad suum damnum trahit.

FA-

(c) Abstemius, Fab. XX.

(d) Abstemius, Fab. XXXVIII. Le Noble, Fab. XXVII.

(e) Æsopus, Fab. CXX. Locmanus, Fab. XXVII. Ca-
 morarius, Fab. CXIX.

FABULA V.

Pastor & Rex. (f)

OVIUM regebat magnum & eximium gregem
 Pastor beatus: cujus cum prudentiam,
 Industriadque cognovisset proximæ
 Rex civitatis; hunc, ut ovibus, sic quoque
 Aptum regendis hominibus fore judicans
 Ad se vocavit, &, reluctantem licet,
 Regni administrum fecit. Ille, qui satis
 Ingenii haberet, vique judicii bona
 Instructus esset, virtutesque ceteras,
 Quarum usus indigeret, facile consequi
 Studio & labore posset, rem Domini simul
 Populique recte gessit, & tulit datas
 Utrinque laudes. Quosdam at Aulæ Principes
 Livor malignus impulit, ut mendaciis,
 Dolisque turpibus in animum Regis graves
 Suspicionum injurias inducerent.
 Hunc insusurrant furtis ditari suis,
 Pecuniamque publicam corradere:
 Arcam fuisse visam in ejus cubiculi
 Secretiore parte, clausam sedulo,
 Multisque laminis communitam ferreis:
 Illic recondi scilicet raptas opes.

His invidorum machinationibus
 Rex denique victus arcam recludi jubet.
 Nil perturbatus ille, suæque conscius
 Integritatis: Magne Rex, inquit, cave,
 Ne fiat id, quod postea infectum velis:
 Crede innocenti: nesciam labis meam
 Semper fuisse, & esse adhuc testor fidem:
 Ultra ne inquire. Sed cum proficeret nihil,
 Arcam recludit ipse; simulque proferens
 Singula, Cucullum scilicet pastorium,
 Sagumque rusticum, & Panariolum, & Pedum,
 Et fistulam: Thesaurus en, inquit, meus:
 Hunc olim amare suetus, hoc uno frui

Dein-

Deinde volo: forsan invidere desinent
 Malevoli. Rex pudore confusus gemit;
 Et execratus scelera gentis invidæ:
 Ne me, ait, amice, miserum amicum desere.
 At ille durus fugit, & oves redit ad suas.
 Invidia nunquam vincitur: hanc virtus semel
 Experta cedat, si sibi ipsa consulat.

FABULA VI.

Rusticus & Sophus. (g)

LONGINQUAM ad oram vi procellosi maris
 Allisa quondam navis Rusticum & Sophum,
 Mersis profundo ceteris, ejecerat,
 Potus, cibique, & omnium rerum indigos.
 Omnem suam illi miseriam postquam satis
 Habuere perspectam, & vident jam se fame
 Esse perituros, aliquid opis ni suppetat,
 Mœrent, silentque: mox tamen Sophus prior:
 Bono, inquit, animo es; me duce, sperari potest
 Fortuna melior: hinc in urbem proximam
 Cito ambulemus: uberes scientiæ
 Fontes aperiam: quid malum sit, quid bonum,
 Quid turpe, quid decorum, Gentem barbaram
 Docebo; mentibus ingeram novitiis
 Honesti amorem; omnesque sanctis legibus
 Excultos facile deducam, ut suas opes
 Quascunque participare nobiscum velint.

At Rusticus: Quis, inquit, antequam tuas
 Tot artes, tamque difficiles persuaseris,
 Efficiet, misera ne fames nos enecet?
 Alimenta ventri, inani jam nimis diu,
 Paranda sunt quamprimum; & hac ipsa die
 Cœnare cupio; provitoque protinus,
 Ne desit id quod flagitat necessitas,
 Dixit; simulque proximum petit nemus,
 Ramos defringit arborum, mundat, ligat,
 Desert in urbem, venales pronuntiat,

L 2

Ven-

Vendit, cibosque facta emit pecunia.

Ars optima, suo quæ Domino victum parat.

FABULA VII.

Ad Iosephum Farsettium, Patricium Venetum, & in Academia * Florentina socium.

Felis & Mus.

TUSCI sermonis illius veteris, boni
Sane, & faceti, & elegantis, integram
Urbanitatem versibus adhibes tuis,
Jucunde Farsetti; & poeticam simul
Nosti latinam, scriptor, haud incallidus.
Avitum honorem his perge porro mitibus
Ornare studiis: at voluptatem sequi
Malam, improbe delicias miserales
Amoris ullo ne libeat unquam tibi
Celebrare cantu, fabula sequens admonet.

Felis dolosa murem incautum ceperat:
Gulæ voracis impetus primum fuit
Prædam comedere; sed malam urget Bestiam
Alia cupiditas, prævalensque, paululum
Differre cogit: fraudulentis scilicet
Prius oblectare collibet se lufibus.
Suum ergo, fingens se misereri, mitibus
Oculis connivens etiam, & obvertens caput,
Captivum omittit; at fugientem mox levi
Cursu affecuta recipit: gaudio exilit,
Circumque sublit, & resilit, & insilit;
Et rursus omittit; & fatigatum metu,
Sævoque ludo, mulcet, ac demitigat
Clemente planta, vel ciet aliquantulum
Exertis unguibus ad inutilem fugam;
Tum semivivum, more pilæ, sursum vibrat;
Jactat, receptat, vexat, ac demum vorat.

Animum

* Della Crusca.

Animum inscientem retibus postquam suis
 Amor impedivit, barbarus & exlex Amor,
 Blanditur atrox, & jocatur perfidus,
 Demumque luctu perditum immolat ferox.

FABULA VIII.

Villicus, Vulpis & Canis. (h)

ADVENERAT NOX, immemorque Villicus
 Liquerat apertas Gallinarii fores.
 Jejuna Vulpis sensit; & somno gravi
 Cum familia omnis, & Canis custos jacent,
 Huc avida siccis faucibus ingreditur: nihil
 Discernit, an gallina, vel pullus neci
 Mandetur; prima quæque mactat corpora;
 Prædamque secum, quantam ferre potest, rapit.
 Ubi sua damna postero agnovit die,
 Doloris impos Villicus objurgat Canem,
 Cæditque fuste. Et ille contra: Cur, ait,
 Me plectis immerentem? an ideo sum nocens,
 Quod tu ipse fueris negligens rei tuæ?
 Herus ubi peccat, sæpe servus plectitur.

FABULA IX.

Cycnus. (i)

CYCNUM canora voce placuerat diu,
 Multamque laudem, dulce cantus præmium,
 Retulerat: at pertædet illum denique
 Quod usque eodem canere dicatur modo.
 Igitur, natura & usus quod perfecerant,
 Omne id repudiat, & novos tentat sonos.
 Os distorquetur: dura vox extruditur:
 Nescio quid canitur gutture invito insolens.
 Laudare soliti vituperant, si qui audiunt;
 Istumque, dicunt, Cycnum, an Anserem licet

L 3

Cre-

(h) La Fontaine, Lib. XI Fab. III. Abstemius, Fab. CXLIX.
 Jaisus Biblioth. Rhetor. Tom. II pag. 752.

(i) Richer, Lib. III Fab. VIII. Bourfaul in sua Comoedia
 Æsopica prima, Act. I Sc. VI.

Credere? figura Cycni, vox est Anseris.

Huc sequere, qua Natura tibi monstrat viam.

FABULA X.

Simius & Speculum. (k)

QUI, qualis esset, nesciebat Simius,
Et se putabat bellulum, effigiem suam
Pictam fideli vidit in Speculo. Nihil
Ad se attinere tale simulachrum ratus,
Gaudet videndo; ridet, acres & jocos
Subamarus inficeram in Bestiam jacit:
Industriamque laudat Artificis manum.

Sed aliquis: Heus, te, dixit, ignoras? Tua est
Ipsa hæc imago. Cum sensisset asperam
Vim veritatis Simius, jam tum incipit
Damnare Speculum, quod prius laudaverat.

Qui Fabularum proprium norit genus,
Et Specula cunctis posita has esse meminerit;
Quo tale spectet argumentum, intelliget.

FABULA XI.

Gallus & Cochlea. (l)

AD culmen excelsæ arboris dum nititur
Gallus se tollere volitando, nec potest;
Huc pervenisse Cochleam attonitus videt.
Efficere id autem quonam licuerit modo
Pennis carenti, audire discupiens, rogat.
Quid tum, inquit illa, si volare nescio?
Artem allabendi calleo magis utilem.

FABULA XII.

Serpens & Talpa.

ME cæcitatís admodum miseret tuæ,
Talpæ inquiebat Serpens; namque vix potes
Erumpere foras, & aliquantum progredi,
Quin te salutis offeras periculo.

Hæc

(k) Richer, Lib. VII Fab. I.

(l) Richer, Lib. IX Fab. XI.

Hæc cura, retulit Talpa, nec te maceret:
 Raro ambulare cupio; latibulum colo;
 Meisque vitam tutus in tenebris ago.
 Te vero, qui tam acutum cernere diceris,
 Nullane pericula premunt? Audivi tamen
 Jacere plura gentis vestræ corpora,
 Quam nostræ, acerbæ quæ data fuerint necl.

F A B U L A XIII.

Culex. (m)

AB avida Procne cum suam opprimi Culex
 Gentem videret, aeris cessit plagis;
 Et se recepit Rustici vilem in casam:
 Sed usquequaque retia hic extendere
 Videns Arachnen, dixit: Heu! misero mihi
 Quid quæsi? Iste plenus insidiis locus,
 Plenus periclis. Ergo textricem suæ
 Inimicam genti abominatur, & fugit.
 Hinc ad superbam Divitis volat domum,
 Furtimque splendidum in conclave permeat:
 Latet aliquandiu, animi dubius an satis
 Sibi omnia tandem tuta sint. Postquam metum
 Abjecit omnem, ex angulo erumpit levis:
 Atque: Bona, dixit, has ædes habitat Salus:
 Laute, beate, tuto vivere hic licet.
 Nox interim advenit; accenduntur lumina:
 Novus iste Culici fulgor insueto placet:
 Huc ergo ruit; at ustulatur, & crepat.
 Sæpe hostes sapiens qui suos fugit, sua
 Sibi hostis ipse deinde stultitia perit.

F A B U L A XIV.

Mulus & Porcus.

MACERQUE, onustusque graviore sarcina
 Tarde ambulabat, & suam crebro gemens
 Vicem dolebat Mulus: hunc Porcus, sua

L 4

Quem

Quem pariter impediēbat (n) nimia obefitas,
 Sic consolandi gratia allocutus est:
 Age vero, frater, hos inanes comprime,
 Parumque honestos gemitus: æquo animo sequi
 Sua quisque fata debet; omnes te sciunt
 Natum gerendis oneribus, quæ si libens
 Alacrisque gerere detrectaveris, nihil
 Profeceris; illa namque cogeris tamen
 Nolensque, tristisque, gerere. At me denique
 Inspice, tuamque discē fortunam pati.
 An levius esse, quam te, onustum me putas?
 Adverte quantum pinguitudinis geram:
 Meum illud onus est, quo quidem totus premor
 Eo usque, vix ut ingredi liceat mihi:
 Et vita nostra peragitur nihilominus
 Satis jucunde; nec curis edacibus,
 Ullisve porro gemitibus corrumpitur.
 Orationem Porci Mulus respuens:
 Sortem, ait, utrinque disparem esse non vides?
 Essem beatus, si carerem sarcina;
 At tu miser eris, cum tuum amittes onus.

FABULA XV.

Vulpis. (o)

DUM Vulpis furtim Villici chortem subit,
 Queritur, meatus quod sit angustus nimis:
 Sed insequentem posthac dum refugit Canem,
 Queritur, meatus quod sit multo laxior.
 A se ipsa Ratio humana sæpe discrepat.

FABULA XVI.

Rubus & Ovis. (p)

PLUVIA imminebat: sic hortatus est Ovem
 Rubus:

(n) Varro de re rust. Lib. II Cap. IV pag. 73. Edit. Scri-
 verit: *Sus usque adeo pinguitudine crescere solet, ut seipsa
 sustinere non possit, neque progredi usquam.*

(o) Richer, Lib. V Fab. XIX. Faernus, Fab. XLIV.

(p) Richer, Lib. XI Fab. XI. La Motte, Lib. III Fab. X.

Rubus: Procellam non vides? quid restitas?

Huc te celeriter in meos recipe sinus,

Tua ne tam nitida permadescant vellera.

Diffidere cuiquam nescia bidens paruit;

Utque Rubi densis protegeretur frondibus,

Spinosa se hujus brachia inter condidit.

Pluviam quidem vitavit: at beneficium

Hospitis avari pretio magno constitit:

Abire nullo quippe jam potuit modo,

Quin lanæ id omne, quod fuisset ab improbis

Semel apprehensum brachiis, relinqueret.

Fabula rapaces ad patronos pertinet.

F A B U L A XVII.

Villicus & Columba.

CIBUM Columbæ Villicus dum poneret,

Grana, inquit, ista doleo certe quod tibi

Afferre cogor: quanto justius Bovi

Apponerentur, cujus irrigata sunt

Sudore multo? vili & infuavi tamen

Contentus ille sano vitam sustinet:

Sed te otiosam, desidemque tam bonis

Gaudere vitæ subsidiis, ægre id fero.

Retulit Columba: Talibus granis doles

Me refici; at illa delegisti sedulus

Toto ex acervo pessima, reservans tibi

Quæcumque bona sunt. His operarium Bovem

Fuisse longe digniorem (q) judicas:

At natura ejus non petit tales cibos.

Me denique otiosam ac desidem vocas:

Ingrate! nostris perfrui te fœtibus

Potes oblivisci? mihi ne Pullos educo,

An tibi, qui sæpe cum teneram lanuginem

Vix induerunt, hos mihi abripis, & voras?

Tuam ergo curam desine tam levem queri,

Unde tibi tanto fœnore pretium redit.

L 5

FA-

(q) Virgil. Æneid. Lib. IX V. 212.

Te superesse velim: tua vita dignior ætas.

FABULA XVIII.

Cornicula & Columba. (r)

CORNICULA olim cum Columbam inviseret,
 Fœcunditatem gratulari cœperat,
 Quæ singulis progeniem mensibus ederet.
 At illa : Ne mei, inquit, commemores mihi
 Causam doloris. Parere toties quid juvat?
 Quoscumque Pullos educo, Dominus rapit
 Avarus, fœtibusque ditescit meis.

Plerumque misera est servilis fœcunditas.

FABULA XIX.

Psittacus. (s)

PROBE educatum, prænitentem corpore,
 Ac prævalentem Psittacum vir nobilis
 Emerat : hunc Atrienſi curandum dedit;
 At ille totum id rejicit negotii
 Ad Janitorem, Janitor ad Topiarium,
 Demum Topiarius ad inertes Pedisequos;
 Qui, sat bene habeat, necne, infelix Psittacus,
 Flocci æstimantes, illum sæpe & sæpius
 Cibique potusque indigentem negligunt,
 Adiguntque, sortem ut pristinam recolens gemat;
 Et : Vita, dicat, paupere mihi sub casa
 Heri prioris quante erat beatior :
 Quas convenire scisset naturæ meæ,
 Cautè eligebat, præparabat sedulo,
 Et copiose largiebatur dapes,
 Altor mihi solus ille quidem, sed optimus.
 Nunc in superba hujusce Nobilis domo,
 Ubi meliorem mihi fore sortem credidi,
 Vita mea servis commendatur plurimis,
 Longaque miser interea conficior fame.
 Benefaciendi curam si susceperit
 Idoneus unus, præstat multitudini.

FA-

(r) Æsopus, Fab. 121.

(s) Furetiere, Fab. XLIII.

FABULA XX.

Vulpis & Lupus. (t)

CITATIORE dum viam carpit gradu,
 In foveam Vulpis inopinanter decidit.
 Accedit hūc forte Lupus, & dum prospicit:
 Age, inquit illa, amice, quod facile potes
 Dare, perituræ ne mihi auxilium nega:
 Aliquot recisos quære ramos arborum,
 Et injice, qui me ad resiliendum sublevant.
 Lupus ad hæc: Sine modo, quod petis, faciam lubens:
 Sed dic, amabo, num diu est, cum sic jaces?
 Tuque adeo, quam prudentem & callidam ferunt,
 In has incurrere insidias quonam modo
 Potueris, ego profecto scire pervelim.
 Ohe, reclamatione Vulpis impatiens moræ,
 Nunc ista desine, quæso: me primum adjuva.
 Ex hoc periculo ut reducar ocyus:
 Tibi nostra tum omnis historia narrabitur.

FABULA XXI.

Viatores duo & Latro. (u)

DUO Viatores dum simul faciunt iter,
 Marsupium unus aureis plenum invenit.
 Eja, inquit alter, (x) in commune. Sed lucri
 Ille negat ullam posse se partem dare;
 Totumque jure uni reservandum sibi
 Contendit, unus cum ipse sit, qui invenerit.
 Interea utrique armatus occurrit Latro,
 Nummorum tunc possessor: Eja, dexteram
 Confer, ait, vimque vi repellamus: duos
 Non vincet unus. Pauper at retulit Comes:

Non

(t) Benferade, Fab. LXXIII. Abstemius, Fab. CXV.
 Faernus, Fab. XLIX.

(u) Æsopus, Fab. LXXXII.

(x) Seneca Epist. CXIX. *Quoties aliquid inveni, non expello donec dicas, in commune; ipse mihi dico.* Phædrus, Lib. V. Fab. VI V. 3.

Eja, inquit, in commune quodcumque est lucri.

Non tanti est: quid enim possit hic vacuo mihi
Abripere? sed tu, habere qui solus bonum
Volueris, solus jure nunc malum feres.

FABULA XXII.

Mercurius & Sculptor. (y)

MERCURIUS in cujusdam Sculptoris domum
Cum divertisset, Patris effigiem sui
Aspexit; & quæsit, quanti venderet.
Ubi hanc audivit assibus totis decem
Sibi esse emendam, risit, lætus in sinu
Venire magnum pretio tam vili Jovem.
Sed hic suum quoque stare simulachrum videns,
Multo majoris æstimandum credidit:
Quanti, inquit, istud? Sculptor autem: Si alterum
Stipulata signum compares pecunia,
Istud tibi, mercedis in cumulum, dabo.

Ridicula quam sit humiliorum vanitas,
Tunc, justa cum sit æstimatio, patet.

FABULA XXIII.

Gallus & Vultur. (z)

IMPERIUM late gentem in gallinaceam
Sibi asseruerat victo Gallus æmulo:
Hinc se superbus tollit ad culmen domus,
Suam ipse cantu celebret ut victoriam.
At Vultur audit, & advolans illum rapit.
Impune victor nullus insolens fuit.

FABULA XXIV.

Canis domesticus & Canis externus. (a)

CONVIVIIUM solemne Canis domesticus
Videns parari, invitat externum Canem,

Secum

(y) Richer, Lib. IV Fab. VI. Æsopus, Fab. XC. Faernus, Fab. XLVII.

(z) La Fontaine, Lib. VII Fab. XIII. Benferade, Fab. CLIII. Æsopus, Fab. CXLV. Aphthonius, Fab. XII. Locmanus, Fab. XXXV.

(a) Richer, Lib. X Fab. VI. Benferade, Fab. CLXVIII. Æsopus, Fab. CXXIX. Faernus, Fab. LXXX.

Secum ut futuri particeps fiat boni.
 Benignitatem hanc sperat ille credulus
 Fore efficacem; quodque sperat, jam ratum
 Sibi esse reputat; resque suæ quo sint loco,
 Et varietas quos quanta commendet cibos,
 Ut videat, ad Culinam vadit: at Coquus
 Eum apprehendit derepente cruribus
 Præcipitem de fenestra projicit in viam.

Quicumque se spondet aliorum de bonis
 Fore liberalem, nostra fabella hunc notat;
 Culpatque pariter ejus imprudentiam,
 Qui tam caducæ sponcioni habet fidem.

FABULA XXV.

Simia & ejus Filius. (b)

Suum ad Tribunal omnes olim Jupiter
 Mercurium jussit convocare belluas;
 Ut pulchriores edidisse filios
 Quas judicasset, has donaret præmio.
 Accurrit ergo Simia, & turpem offerens
 Simiolum: Is, inquit, bellulus meus mihi
 (Cedite, Parentes ceteræ) palmam exigit.
 Malus auctor fœtus nunquam bene novit suos.

FABULA XXVI.

Avium & Piscium fœdus. (c)

Cum Piscibus olim fœdus inierant Aves,
 Ut invicem opibus se juvarent muruis.
 Sed hinc, & illinc publica res cum postulat,
 Ut obligatam facta liberent fidem;
 Neque gens natantum sese in auras tollere,
 Neque gens volantum permeare undas potest.
 Inutilis ibi societas conjungitur,
 Ubi via dividit invia, & dilpar genus.

FA-

(b) Benferade, Fab. CV. Le Noble, in sua Comœdia
 Æsopica, Act. V. Sc. IV. Avienus, Fab. XIV,

(c) Camerarius, Fab. CCCI.

FABULA XXVII.

Arbuscula & Quercus.

LAUDABAT Quercus arduæ præstantiam
 Sub ejus educlâ foliis Arbuscula.
 Meum quidem, inquit Quercus, altum in æthera
 Surgit cacumen; rami etiam circum undique
 Late procurrunt; & in omne dominor nemus.
 At quo magis præcello arboribus cæteris,
 Tanto facilius venti, grandinis, nivis,
 Fulminis atroces me petunt injuriæ.

Hac fabula homines commonentur infimi,
 Summis suam invidere ne fortem velint.

FABULA XXVIII.

Auceps. (d)

IRRETIENDIS laqueos explicaverat
 Volucris Auceps; alliciendi gratia
 Pofuerat escam: demum in insidiis cubans
 Expectat. Agmen mox satis magnum advolat;
 Sed nimis avaro visa hæc nimia paucitas:
 Nihil ergo tentat ille, in horam differens,
 Dum multitudo accederet frequentior.
 Aliæ post alias interim abscedunt Aves;
 Novissimæque succedunt prioribus.
 Longe minore numero; ad extremum, cibi
 Egenus, & macer, unicus Passerculus
 Jam superat; & in occasum cum sol vergeret,
 Auceps, ne vacuus redeat, laqueos contrahit,
 Et illam denique futilem prædam capit.

Meliora dum vis, ne bona amittas, cave.

FABULA XXIX.

Rusticus & Canis. (e)

CUNIS jacentem filium valido Cani
 Custodiendum Rusticus commiserat:
 Adrepsit hydra immanis, artus parvulos,

Et

(d) Abstemius, Fab. XXXIX.

(e) Camerarius, Fab. CCCLXXXIX. Specimen sapientie Indorum, Sect. VII pag. 341. Edit. Starkii.

Et delicatos devorare jam parans.
 Sed obstitit enim, correptamque mordicus
 Illam fidelis custos magno vulnere
 Infregit, incassumque tollentem minas
 Demum interemit; at puerum, & cunas simul,
 Amore pugnae cæcus, evertit super
 Extincta peste. Paulo post revertitur,
 Cunasque Rusticus hinc everfas ut videt,
 Inde efferatum rictibus canem aspicit
 Adhuc cruentis, hunc, dolore percitus,
 Ligone, quem tenebat, impacto ferit,
 Interficitque, nil morari sustinens,
 Animi furentis impetum dum vindicet.
 At cunas ubi restituit, ac demortuo
 Super angue puerum vivum, illæsum reperit,
 Tum vero mœstus egit poenitentiam,
 Et se incusavit ipsum, & agnovit gemens,
 Iræ malum reverti ad auctores suos.

FABULA XXX.

Accipiter & Luscinia. (f)

CAPTAM tenebat diris Lusciniam unguibus
 Accipiter. Illa: Si me dimittas modo,
 Tibi, suave pretium, quam potero doctissimos
 Iterabo cantus, dixit, quibus etiam tuas
 Tentabo laudes, & mei clementiam
 Victoris efferre. At mihi, retulit latro,
 Non auribus bene esse, sed ventri volo.

Canant Poetæ; at meminerint, quædam fera
 Ingenia nullis artibus humanis capi.

FABULA XXXI.

Gutta, Pontus, & Ostreum.

CUM tenuis alto Gutta cadens ab æthere
 Vastos devolveretur in Ponti sinus:
 Heu! tantula, inquit, tantæ quid voragini
 Prodesse possum, primo fluctu scilicet

Ex-

Exhaurienda, & interitura funditus?
 Dum sic misella deprimit fortem suam;
 Patulo dehiscens ore summis Ostreum
 Emergit undis, hancque delapsam excipit,
 Penitus recondit, induratum perficit:
 Quæ Gutta fuerat, unio demum extitit. (g)

Nos fabula docet, quam sit momentum leve,
 Quo dignitas ab humilitate discrepat.

FABULA XXXII.

Corvus & Lupi. (h)

MULTAM secutus per diem Corvus Lupos,
 Prædam his potitis officium jactat suum,
 Sibi que partem retribuunt aliquam, rogat.
 Respondet unus: Gratum id esset forsitan,
 Si cura nostri te comitem nobis daret:
 At sola prædæ cupiditas huc te impulit,
 Ad quam obtinendam cum operæ potueris nihil
 Conferre, merito te vacuum dimittimus.

Notat Comedones officiosos fabula.

FABULA XXXIII.

Cuculus, Philomela, & Asellus. (i)

CUM cantavissent coram Asello iudice
 Cuculus, ac Philomela; & hic quidem unicum,
 Quem norat, usque & usque repetisset sonum;
 At illa divisisset egregium melos,
 Sonosque mira varietate volubiles;
 Postremo Asellus dixit hanc sententiam:
 Philomelæ cantus paulo est intricatior;
 Placet Cuculus, magis æquabiliter canens,
 Nostrasque, pugna præmium, laudes feret.

Quæcumque capere intelligendo non potest
 Judex ineptus, ea plerumque deprimit.

FA-

(g) Uniones in Ostreis ex rore concepto, nasci crediderunt veteres. Vide Plin. hist. Lib. IX Cap. XXXV.

(h) Camerarius, Fab. CCLXXXV.

(i) Camerarius, Fab. CCCCXVI.

FABULA XXXIV.

Equus & Sessor imperitus.

LORIS sinebat currere admissis Equum
 Vehementem Sessor imperitus: quod videns
 Clamavit aliquis: Ni caves, tuum brevi
 Immodicus ille deferet ruptum impetus
 Cursorem: age ergo, lora prudens confine.
 Extimuit, at se dum putat (k) meus hic stupor
 Præstare, quod monetur, conatu aspero,
 Subitoque frena concutit; Equus & ferox
 Simul erigit se, non ferens molestiam,
 Præcepsque retro lapsus Sessorem opprimit.

Quam temperatum sibi moderamen expetant
 Homines regendi, ex hac fabella discimus.

FABULA XXXV.

Porcus & Nautæ.

CUM navem acerbum fluctibus iratis mare
 Vexaret, & turbaret exanimis metu
 Nautas, jacebat Porcus interea gravi
 Sopore merius. Illi desidem excitant,
 Et exprobrantes tam supinam inertiam:
 Commune, clamant, non sentis periculum?
 Dormire, mortem cuncta dum intentant, potes?
 Trepidate, stulti, grunniens Porcus refert;
 Ista sapientem me decet (l) securitas.
 Nautæ reponunt; Imo socordem decet.

Apathia, tantis Stoicorum laudibus
 Celebrata, rursus (m) hæc notatur fabula.
 Illam esse dicunt Stolci constantiam;
 Mihi videtur esse mentis tarditas.

FA-

(k) Catul. carm. 17 V. 21.

Talis iste meus stupor nil videt, nihil audit.

(l) Diogenes Laert. Lib. IX. *Navi aliquando ferebatur (Pyrrho) & cum socii, tempestate astiti, dejectiores essent, ipse, tranquillo animo, porcellum in navi edentem ostendebat, dicens oportere sapientem hanc illius imitari securitatem.*

(m) Vide Lib. III Fab. XXVII.

FABULA XXXVI.

Juveni duo & Pratulum. (n)

QUÆ suppetebant gramina satis, affatim,
 Erantque idonea stomacho simul, & gulæ,
 Duo Juveni in colle dum depascerent,
 Procul aspexere viriditatem Pratuli;
 Ejusque subito desiderio percliti,
 Huc se transferre properant. Aliquantum viæ
 Confecerant: frutetum se densum objicit;
 Hac permeandum: tentant; & aditum sibi
 Inveniunt: at prædator irruit Lupus;
 Utrumque ferus oppugnat; unum strangulat:
 Evadit alter propellente agilis metu,
 Tandemque Pratulum ad expetitum pervenit.
 Laboris ergo jam solatio frui
 Parat; avidusque se teneris ingurgitat
 Graminibus. At recepit letiferas dapes,
 Simulque virus faucia cute combibit.
 Videlicet omnis infestus erat is locus
 Serpentibus atris, herbis & nocentibus:
 Ergo miser inde cum reversus est domum,
 Languere cœpit, & obiit mortem brevi.

Quemcumque stulta cupiditas cogit suum
 Relinquere bonum, meritis hic malum invenit.


FABULA XXXVII.

Ursus & Vulpis.

QUOD mortua Ursus corpora nulla manderet,
 Humanitatem idcirco jactabat suam:
 At Vulpis: Imo vis, ait, humanus mihi
 Videri? mande mortua, vivis abstine.
 Tam facinorosa neminem vita inquinat,
 Qui laude se aliqua dignum non existimet.



FABU-



FABULARUM ÆSOPIARUM

LIBER DECIMUS.

PROLOGUS.

ACERBITATIS multum, & acrimonie
Semper habet omnis satyrarum festivitas:
Quapropter hominum ut est plerumque præferox
Natura, proclivisque ad iracundiam,
Quoscumque se exercere in hoc ludo juvat,
Consciscere sibi grave periculum solent.
At propria cum sit Fabularum humanitas
In corrigendo, & in docendo suavitas;
Miror, quod optimus harum Phædrus artifex
Ab instituta paulisper abierit via
Diversus; animique ægritudini obsequens,
Viro potenti turpem inusserit notam.
Sed qualis illum maximas injecerit
In calamitates culpa, narrare hic libet.

Par dignitate, superior potentia
Cæsaribus; uno Principe Tiberio minor,
Sejanus homines despiciebat ceteros
Longe remotos infra se; imo traditas
Imperii habenas temperabat improbus
Dominator. Humilis ac tenuis homunculus,
Qui gereret animos forte majores sua,
Tristem, at verendam immanitatem non tulit.
Liberius, omnia forte nondum pristinae
Qui servitutis argumenta amiserat,
Tali, tantoque sempiternam inurere
Sejano Phædrus ausus est infamiam.

Nam cum ille factus in dies magis insolens
Sibi postulasset Livillam uxorem dari,

Livillam Drusi filiam Germanici,
 Quam deinde magni Caius Augusti Nepos,
 Mox Drusus etiam natus Tiberii unicus,
 Adhuc bona ætate viduam reliquerant:
 Rumor per urbem de malo hujus ambitu
 Disseminatus continuo percreebuit;
 Plebemque, & Proceres, mox & ipsum Principem
 Commovit. Homini exagitandi commodam
 (a) Occasionem Phædrus hanc ratus, arripit:
 Doctam, faciam, & elegantem fabulam (b)
 Concinnat: Sol uxorem ducere quod velit,
 Ranas inducit conquerentes cum Jove,
 Furis beati nuptias celebres notans.

Brevi rescivit crimen illatum sibi,
 Sensitque Sejanus, & auctore cognito,
 (c) Aliam de Ranis sibi Regem petentibus,
 Quam nil dissimulans publicam ille fecerat,
 Fabellam ad ipsum pertinere Tiberium
 Facile probavit. Ergo accusat hunc reum,
 Et crimine læsæ Majestatis alligat.

Hinc ista luctus significatio tam frequens
 Auctoris afflicti, & graves querimonie.
 In aliquod etiam vitæ discrimen miser
 Fuerit adductus; quod & ipse satis innuit; (d)
 Certe irrogatas vixit ærumnas diu
 Perpeffus. Emendatus exemplo suo,
 In scriptitandis nihilo segnius tamen
 Fabellis posuit operam, at innocentibus,
Et his dolorem delenivit remediis: (e)

Felix

(a) Quas hic causas, cur Phædrum vexaret Sejanus, tanquam certas exponimus, has conjectura tantum probabili in quodam nostro ad Phædri fabellas commentario instituimus.

(b) Lib. I Fab. VI.

(c) Lib. I Fab. II.

(d) Lib. III Prol. Lib. IV Epist. & alibi.

(e) Lib. III Prol. V. 41.

Quod si accusator alius Sejano foret,

Felix, qui fortis asperæ inclementiam
 Tam suavi studio mitigare noverit;
 Feliciorque, si nunquam, hoc ipso male
 Abusus, illam sibi fecisset asperam!

FABULA I.

Glires & Fagus. (f)

PROCERA Fagus (g) fructibus Glires suis
 Enutriebat, & cavo etiam conditos
 Trunco tegebat, commodam præbens domum:
 Ascendere tamen toties, ac descendere,
 Victus petendi gratia, ignavos piget;
 Suamque demum altricem statuunt impii
 Evertere. Omnes ergo, junctis viribus,
 Effodere certant, strenuique, dentium
 Sæpe repetitis circum abrofas ictibus,
 Stirpes recidunt; donec oppugnantibus
 Impulsa ventis Fagus infelix ruat.
 Tum glandis illi facile quidem quantum volunt,
 Comedere possunt: sed ubi consumptus fuit
 Proventus omnis, non alias rursus dapes
 Suppeditat arbor exsiccata funditus:
 Gliresque tandem longa fames cogit mori.
 Benefico ingratus dum nocet, nocet sibi.

FABULA II.

Piscator. (h)

RETIA sub amne Piscator præpanderat:
 Tum conto instructus omne verberat vadum,
 M 3 Moto-

Si testis alius, judex alius denique;
 Dignum faterer esse me tantis malis,
 Nec his dolorem delentrem remediis.

(f) Abstemius, Fab. XXXV.

(g) Plin. Hist. Lib. XVI Cap. VI. *Fagi glans muribus
 gratissima est, & ideo animalis ejus una proventus. Gliræ
 quoque saginat.* Isidorus Origin. Lib. XII Cap. III. *Gliræ
 dicti sunt, quia pingues eos facit somnus: nam GLISCERE
 dicimus CRESCERE.*

(h) Æsopus, Fab. LXXXVII.

Motoque penitus fundo limum dissipat.
 Quæsiuit aliquis, perlucens antea
 Cur sic liquores reddidisset turbidos:
 Ni facerem, dixit; vacuus hinc forsan domum
 Repetere cogar: sed opera dum sic mea
 Turbatur amnis, Piscibus lucem eripit,
 In retia ut illi temere palantes ruant.

Fabella quosdam spectat ad cives; quibus
 E turbulentis rebus emergit lucrum.

FABULA III.

Rex & Ludi Magister. (i)

LUDI Magistro Rex Asinum mandaverat,
 Ut illum humanas edoceret literas;
 Pollicitus amplum collocata præmium
 Operæ, fatis si fieret: sin minus, graves
 Interminatur pœnas. Talem is ut videt
 Non posse legem rejici, injustam licet;
 Se præstiturum spondet, quod Rex expetit:
 Sed Asinum reddere doctum, ut est opera admodum
 Difficilis; annos orat, & impetrat, decem
 Sibi dari, dum rem ad exitum perduceret.
 Amicis interim ipsius miseram vicem
 Dolentibus, qui se operæ inexplicabili,
 Periculo etiam capitis, obligaverit;
 Nil metuite, inquit; spatium intra datum mihi
 Vel Rex, vel Asinus, vel ego obierimus necem.

Procrastinatum sensim abit periculum.

FABULA IV.

Musculus, Felis, & Gallus. (k)

PROBE educatus olim quidam Musculus
 Cum præterire angustias vellet cavi
 Natalis; ipsum provida monuit Parens,

Pruden-

(i) La Fontaine, Lib. VI Fab. XIX. Abstemius, Fab. CXXXIII.

(k) La Fontaine, Lib. VI Fab. V. Benferade, Fab. CXVII. Camerarius, Fab. CCCXII.

Prudenter ageret, & caveret sedulo,
Ne calamitatem sibi fortasse maximam
Ab improborum adscisceret commercio.
Nil temere se promittit ausurum fore
Musculus; & alacri gaudio exsiliens simul
Erumpit. Ubi progressus aliquantum fuit,
Felem modesta præditam specie videt,
Secum oriantem leniter: cujus malum
Nil suspicatus ingenium, ipsam protinus
Adire statuit, si liceatque, mutuum
Ferire fœdus: at ecce, dum stultam parat
Propensionem improvidæ mentis sequi,
Supervenit, canitque Gallus. Aspero
Exterritus ille vocis argutæ sono,
Fugit, cavumque quam celerrimo pede
Repetit: & : Audi mater, audi, clamitat;
Tuique miseram filii vicem dole:
Forma elegante Belluam inveni modo,
Mitem, quietam, totam amabilem: nitet,
Ridetque facies blanda: speciosum caput
Breves, acutas, rectas auriculas gerit:
Tum nulla pars est delicati corporis,
Quam non pilorum mollis obtegit seges.
Volui animantis tam bene ornatæ fidem
Tentare: adibam: cum se subito huc intulit
Cristatus Ales, tibiis exilibus,
Nudisque nixus, oculis ardens igneis,
Vultu minaci, & corneo rostro ferox;
Simulque gutture eluctatus horrido
Cum tristes & peracutos truderet sonos,
Fugere coegit me prope exanimem metu.
O Nate, retulit Mater, plaudo, & gaudeo,
Quod fugeris: nam mitis ista Bellua
Fugienda, & execranda est; qua fallacior,
Gentique nostræ inimicior nulla existit;
At nihil hic Ales horridus nobis nocet.

Cognosce penitus, antequam dijudices,
 Externa species imprudentem decipit.

FABULA V.

Ranæ & Junci. (I)

RANÆ in palude Juncis obsita diu
 Tutæ latuerant. Cepit illas tædium
 Obscurioris vitæ: prospectum sibi
 Omnem videlicet adimi, graviter ferunt;
 Et se fieri ipsas aspectabiles velint.
 Odiosis ergo stirpibus ut purget vadum,
 Suis quemdam adigunt Rusticum clamoribus.
 At variæ pestes, Ardeæ, Ciconiæ,
 Vulturii, mox ut scitis cunctis vident
 Eas patere, huc advolant identidem,
 Carpuntque miseras, seminecesque glutunt.
 Tenuēs & humiles hac monentur fabula,
 Illustriorem ne statum vitæ ambiant.

FABULA VI.

Arbores duæ.

FRUGIFERI generis Arbores quidam duas
 Habebat: unam vase clausit ligneo,
 Ut ingruentis ab hiemis molestia
 Defenderetur sub tepenti fornice:
 At alteram patentē posuit in solo,
 Ut ferret, aliis una cum compluribus,
 Quascumque pluviae, frigoris, & æstus vices.
 Quid accidit autem? fructus illa præcoces,
 Malosque: seros hæc, bonosque protulit.
 Hinc discimus, puerilis institutio
 Privata quam sit posthabenda publicæ.

FABULA VII.

Viator, Tygris, & Corcodilus.

MINUS aliquando simplici duplex malum
 Nocere, vera ostendit hæc narratio.

Qui-

Quidam Viator in Regione Bengala
 Rupem arduam inter, Gangis & crepidinem
 Dum carperet iter, efferum aspexit Tygrim
 Huc irruentem: ferre vult retro gradum;
 At Corcodilus (m) parte ab hac etiam furens
 Accurrit. Ergo geminæ se miserum videt
 Et hinc, & illinc pariter expositum neci;
 Nullaque utramvis belluam potest via
 Effugere; & in prædā involare jam parans
 Tygris exerebat unguēs: ecce autem simul
 Pernix eodem Corcodilus advenit,
 Omissoque homine, ferratis hunc dentibus
 Medium apprehendit, & sub aquas secum rapit:
 Malumque duplex qui timuit, neutrum subit.

FABULA VIII.

Navis & Nauta.

IMPOSITO Navis onere cum ingemisceret
 Nautam rogavit, ipsam ut antennis suis,
 Rudentibusque, armamentisque ceteris
 Levaret: omnem sic magis celerem sibi
 Et expeditum dictitans cursum fore.
 At ille: O stulta, quid petis, ait? maxime
 Juvabit id quod impedimentum putas.

Fabella quorundam hominum stultitiam notat,
 Qui liberos præstare sese dum volunt,
 Sibi res maxime utiles abjudicant.

FABULA IX.

Serpens & ejus Filius.

SERPENS monebat filium, ut adesset sibi,
 Serpentem in alium dum rueret, ac mordicus
 Corriperet, & glutiret. Tam nefarium
 Tunc, inquit ille, ut perpetres facinus, Pater?

M 5

De

(m) *Corcodilus* apud auctores optimos multo sæpius, quam *Crocodylus*, scriptum invenitur. Vide Phædri Fab. XXV Lib. I, & ad eam peritiorum quorumque Criticorum notas.

De gente nostra is unus est . . . Tace, tace,
Inepte: sic agere expedit: Serpens (n) enim,
Serpentem si non devoret, non fit Draco.

Hos ad Potentes fabula nostra pertinet,
Qui crescere solent ex alienis cladibus.

FABULA X.

Canis Astutia.

UT inter homines, ita quoque inter belluas
Ingenia quædam singularia eminent.
Præstare stulto callidos nihilo magis
Videtur, quam cata Vulpis foetidæ sui,
Cui pro sale data est anima, ne putresceret. (o)
Sed aliquæ belluæ, intra proprium genus
Consideratæ, quantum intelligentia
Videantur olim sociis antecellere,
Brevi hoc exemplo nunc mihi probandum venit.

Tres in culina dum ad focum cubant Canes
Tempore hiemali; quartus en supervenit;
Qui cum relictum idoneum locum sibi
Nullum videret, hanc adinvenit viam
Id obtinendi, quod volebat: se foras
Repente proripit; & quam maximis potest
Viciniâ omnem commovet latratibus:
Quibus excitati, qui cubabant ad focum,
Statim allatrantes exeunt: at hic simul
Furtim regressus in culinam, quem locum
Sibi arbitratur commodissimum, occupat.

Animalia autem huiusmodi, quis est sophus
Qui persuadere possit, nihilo plus meris
Automatis sapere? si Cochleæ, vel Ostreum
Dicantur esse machinæ versatiles,

Parum

(n) Erasmi. Adag. Chil. III. Centur. III. Proverb. LXI.

(o) Cic. de Nat. Deor. Lib. II Cap. LXIV. *Sus . . . cui quidem, ne putresceret, animam ipsam pro sale datam dicis esse Chrysippus.* Varro de re rust. Lib. II Cap. IV. pag. 73. Edit. Scriverii: *Suittum pecus donatum ab natura dicunt ad opulandum: itaque iis animam datam esse proinde, ac saltem, quæ servaret carnem.*

Parum repugnem: nostrum ad hunc Canem, suis
 Furtim inservire commodis tam callidum,
 Normannus, ac si veterator (p) aliquis foret,
 Quicumque sensu destitutum dixerit,
 Rationis expers ipse videbitur mihi.

FABULA XI.

Canis Venaticus & Molossi. (q)

ET cursu, & astu superior Venaticus
 Leporem excitatum latibulo cepit Canis.
 Prædam statim vorare suadebat fames:
 Persuasit aliud stulta gloriatio.
 Namque is, Molossi non procul ut erant duo,
 Huc se repente contulit, ostentans suæ
 Pernicitatis pignus ac solertiæ.
 Leporinum at illi vix odorem senserant,
 Simulque vanum in ostentatorem ruunt,
 Prædamque, stulta quam cupiditas gloriæ
 Inexpectatam derulit, avide vorant.

Ne quære laudem, ubi fruendam rem tenes.
 Dum frueris etiam te silere juverit,
 Ne te ipse forsitan indicio prodas tuo:
 Quod & sequente comprobatur fabula.

FABULA XII.

Corvus nimium loquax.

REPERERAT olim Corvus pinguem caseum.
 Cum debuisset tacitus hac præda frui; (r)
 Sua crociendo (s) significare gaudia,

Bo-

(p) Qualem Cicero, de finib. honor. & malor. Lib. II
 Cap. XVI memorat: *Omnia callide referentem ad utilitatem,
 acutum, versutum, veteratorem.*

(q) Camerarius. Fab. CCCXXXVIII.

(r) Horat. Lib. I Epist. XVII V. 50.

Sed tacitus pasci si posset Corvus, haberet
 Plus dapis, & rixæ multo minus invidiæque.

(s) Plantus aulul. Act. IV Sc. III V. 1.

Non temere est, quod Corvus cantat mihi nunc ab læ-
 va manu:

Semel radebat pedibus terram & voce crecibat sua.

Bonamque sortem ovante gutturis sono
 Annuntiare maluit, nimium loquax.
 Corvi ergo plures advolant famelici,
 Ruuntque, rixasque vehementes excitant,
 Demumque opimam diripiunt hujus dapem.

FABULA XIII.

Ovis & Canis. (t)

QUO vestiatur, laneum abripit mihi
 Tegmen Herus, dixit invidens Ovis Cani:
 Is autem quid retribuit? ingratus jubet
 Me visitare fortuito gramine;
 Dum te faginat pane, cibusque ceteris,
 Quibus ipse vescitur. At canis contra refert:
 Ingrata es ipsa, tale ciborum quæ genus,
 Studii & laboris præmium, invidas mihi:
 Nam ratio victus quo melior me recreat,
 Nostram, Luporum quolibet contra impetus,
 Hoc magis alacriter tibi ope am sentis dari.

Hos fabula monet, qui sibi indigne ferunt
 Minus bene esse, quam suis custodibus.

FABULA XIV.

Equus & Muscæ. (u)

EQUUM macerrimum, ulceratum, & insuper
 Cauda minorem dira Muscarum Cohors
 Aculeis pungebat pertinacibus.
 Hanc ille postquam nulla vi molestiam
 Excutere potuit; denique Volucres malas
 Rogare cœpit, ultro ipsæ discederent,
 Suamque miseram omitte esset cutem, horridam
 Ulceribus; aliumque simul ostendens Equum
 Pinguem & nitentem, suadet ut in hunc devolent,
 Meliorem quippe potaturæ sanguinem.
 Respondet una: Forte fieret quod rogas,
 Nisi ille nimium corpulentus, & ferox,
 Nimiumque longa præditus cauda foret.

Fabel-

(t) Camerarius, Fab. CCCXCVIII.

(u) Furetiere Fab. XLVI.

Fabellæ quasdam ad sanguifugas pertinet,
Quæ vexant miseros, a beatis abstinere.

FABULA XV.

Orator ad Statuas. (x)

STATUAS ad veteres, quæ, docti artificis manu
Politæ, fidei exprimebant vultibus
Monstra vitiorum varia, qualis sunt Amor
Illicitus, Ira, Livor, Ambitio, Furor,
Dum verba copiosus Orator facit,
Acerque fulminat, & suadere nititur,
Ut ad bonam recipere se frugem velint:
Commonet Amicus, canere surdis desinat,
Suamque potius ad homines facundiam
Convertat. Ille vero: Mene, homines licet
Adhorter, inquit, plus profecturum putas?

FABULA XVI.

Turdi. (y)

AMANs quietis, & periculum timens
Unus de multis, qui petebant exterâs
Regiones, peregre abire Turdus abnuit;
Suoque visitare natali solo,
Si fors beate minus, at certe tutius,
Maluit. Acutum post ubi remisit gelu,
Hiememque veris pellere cœperunt vices,
Ad se reverti peregrinos tandem videt
Duos omnino. Cum niterent hi quidem,
Etiamque mole pinguiori corporis
Distenderentur, sortem jactabant suam:
Tuque, inquiebat, si voluisses hunc locum
Deferre, & esse nostri incepti particeps,
Non sic langueres invenustus & macer.
Contra ille retulit: Mihi, macro quantumlibet,
Et invenusto, vividæ vires tamen
Vigescunt: at validior esto sanitas,
Meliorque nostra vos corroboraverit;

Quan-

(x) Richer, Lib. XI Fab. XVII.

(y) Faernus, Fab. VII.

Quantis repertum est hoc bonum periculis
Obnoxium? abire tanto quos vidi grege,
Cur video vos redire vix centesimos?

Trans oceanum opes qui peregrinas petunt,
Hi fabulam ad se pertinere existiment.

FABULA XVII.

Asellus & Rivus. (z)

AD Rivum Asellus venerat: egregios videt
In margine satos ulteriore carduos:
Sollicita jejunum huc porro impellit fames,
Suadetque, dulcibus agens illecebris, statim
Trajicere Rivum; quod & aquæ sinunt breves: (a)
At delicatos tingat si lymphis pedes,
Timet inepta pecus, ne rigescant scilicet:
Expectemus, ait, omnis aqua dum defluat, (b)
Expectat ergo, at tamadiu, dum languidos
Deficiat artus pene consumptus vigor.
Trajicere tandem si queat, tentat vadum:
Sed frustra: inertem limus impedit tenax
Et lubricus, ne ad dulces perveniat cibos.
Qui rem gerendi stultus horam prorogat,
Bonis, quibus eget maxime, merito caret.

FABULA XVIII.

Iris & Phœbus. (c)

TRIPLEX superbam cum fecisset Irida
Puniceus, viridis, atque purpureus color,
Contempnere illa præ se Phœbum cœperat,
Cui color inesset, quamlibet nitido, unicus.
Sentit, & inanem ut reprimat superbiam,
Respicere Phœbus illam desinit; & simul

Vane-

(z) Richer, Lib. XII Fab. XXVI. Camerarius, Fab. CCCLIII.

(a) Vide notam ad Fab. XXIII Lib. III.

(b) Horat. Lib. I. Epist. II. V. 41.

Incipe. Qui recte vivendi prorogat horam,
Rusticus expectat, dum defluat amnis: at ille
Labitur, & labetur in omne volubilis ævum.

(c) Richer, Lib. XII Fab. III.

Vanescit ejus omnis & color, & decor.

Hos qui vituperant, quorum præsidio suos
Debent honores, hac monentur fabula.

FABULA XIX.

Cervus & Piscator. (d)

IN litore maris Cervus iter dum carperet:
Nullum, ait, opinor, est periculum mihi
Ab aquis timendum; verum ab agris non item.
Huc ergo tantum respicit, malum sibi
Infligat ne quis forte venator, cavens.
Piscator autem cymbula vectus levi
Sentim propinquat, oram & extremam legit,
Jactoque telo malecautum sternit Ferum.

Undique cavendum est: ex loco minime omnium
Suspicioso (e) calamitas sæpe advenit.

FABULA XX.

Mus & Talpa. (f)

Mus inconsultus huc, illuc dum curstat,
Pascensem in ipso cavi aditu Talpam videt:
Compellat ultro: respondetur: invicem
Confabulantur. Hunc oculis captum (g) ferunt;
At cautus est, & facile quemlibet sonum
Paratus aure semper arrecta excipit.
Murem sic admonere cœpit: Heu! miser,
Cur tam sollicitos, tamque tibi parum utiles
Amas iterare cursus? Quid tantum juvat
Ferri, referri, & inquietum pertrahi,
Utcumque prava curiositas juber?
Quietus, & beatus in tuo potes

Lati-

(d) Richer, Lib. XII Fab. XXI. Æsopus, Fab. LXIII.

(e) Cicero, Lib. I. ad Famil. Epist. VII. *Semper tua laudi favere visus est, etiam ipso suspiciosissimo tempore Caniniano.*

(f) Richer, Lib. IV Fab. VIII.

(g) Plin. Hist. Lib. XI Cap. XXXVII paulo longius ab initio: *Talpis visus non est: oculorum effigies inest, si quis prætentam detrahât membranam.* Et Lib. X Cap. LXIX. *Li-*
quidius audiunt Talpa.

Latibulo vivere: illud, an teipsum fugis?
 Ibine solum invisus occurris tibi?
 An vero nescis, te, simul erumpis foras,
 Multisque, gravibusque objici periculis?
 Nihil unquam audisti pernicioſa Felium
 De gente, quam sit agilis, astuta, & rapax,
 Tuumque quantis cladibus afficiat genus? ...
 At, at, mihi aures perculit aliquis sonus:
 Latibulum subeo: tu vale, & fuge, si sapiſ.
 Nihil eſt, Mus inquit; omnia tuta tu times;
 Manedum. Sed ille jam cavo later ſuo.
 Simulque Felis (nam ipſa furtim reſperat,
 Prædam ſecuta) proſilit, & Murem capit.
 Vivit beatus ille, qui tutus later.

FABULA XXI.

Chamæleon. (h)

CHAMÆLEONTIS quis color proprius foret,
 Duo Viatores diſputabant. Viridis eſt,
 Ait unus: imo violaceus, alter reſert.
 Delitigantes cum viam procederent,
 En ipſe, cauſa jurgii, Chamæleon
 Occurrit, in calice heliotropii inſidens;
 Flavusque totus viſus eſt. Stupentibus:
 Color omnis, præter candidum & rubrum, mihi (i)
 Rerum, inquit, omni ſpecie ab objecta venit.
 Turpis Adulator hoc ſibi ſcriptum putet:
 Namque ille, niveam præter innocentiam,
 Pudoremque verendum, imitatur omnia.

FABULA XXII.

Villicus, Felis, & Caſeus. (k)

CLAUSAM in Cubiculo Villicus Felem inſcius,
 Expoſitumque ſimul Caſeum reliquerat.

Ergo

(h) Richer, Lib. IX Fab. VIII. De la Motte, Lib. II Fab. IX.

(i) Plin. Hiſt. Lib. VIII Cap. XXXIII. *Mutat (colorem Chamæleon) redditque ſemper quicumque proxime attingit, præter rubrum, candidumque.*

(k) Richer, Lib. IX Fab. V.

Ergo illa prædam tam parabilem videns,
 Nil dubitat ilicet & capeßere, & frui.
 Herus domum reversus, vacuum Caseo
 Reperit catinum, tersumque: dolet: respicit:
 Sedentem clunibus aspicit Felem, pii,
 Blandique vultus docta dissimulantia
 Magnum exhibentem specimen innocentiae:
 At ista species, inquit, non me decipit,
 Scelerata: certo certius meum scio
 Te surpuisse opimum Caseum mihi.
 Imo hunc comedi; Felis ait; nec poenitet:
 Tuæque munus largitatis credidi:
 Namque tua sinere non potuit prudentia,
 Custodiendum Feli Caseum ut dares.

FABULA XXIII.

Imago picta sub Camera.

QUIDAM sub alta camera pictam Imaginem
 Miratus: Illa quanto, dixit, suavius
 Teneret oculos, si prope adstaret mihi,
 Quæ tam procul remota tam valde placet!
 Secretiores ergo per scalas levi
 Ascensu ad ipsam pervenit testudinem:
 Sed omnia vasta lineamentis videns
 Crassisque, diductisque in enormem modum:
 Stupet, & agnoscit denique errorem suum.

Quam multi in alto collocati culmine
 Oculos hiantes infimorum detinent
 Errore blando, quos propius si inspexeris,
 Grandes pateſcent turpitudinis notæ!

FABULA XXIV.

Homo & Ursus. (1)

HOMO nemorosi montis inter devios
 Recessus vitam agebat solitariam.
 Aliquando tamen hunc solitudinis suæ

Cum

(1) La Fontaine, Lib. VIII Fab. X.

Cum tædium cepisset, proximum sibi
 Adscivit Urfum societate mutua.
 Magno ille studio, & singulari percitus
 Amore, inhabilis indoles quantum sinit,
 Juvare socium curis, & laboribus,
 Et genere quovis officiorum nititur:
 Ipsi modo lustrat omne venator nemus,
 Affertque varias, quas prædatus est, feras;
 Modo fidus ipsi janitor servat casam:
 Etiamque muscas, si per æstivos dies
 Molestas esse dormienti viderit,
 Abigere didicit: una sed Hominis genas
 Cum instaret olim pungere, contumacius,
 Et sæpe abacta, semper huc reverteret;
 Arripuit lapidem, robore quem magno vibrans
 Impegit, muscamque, & Hominem leto dedit.
 Stultus inimico sæpe Amicus plus nocet.

FABULA XXV.

Vulturius, Ostrea, & Vulpis. (m)

VULTURIUS olim invenerat grandem Ostream:
 At squama prædam durior cum clauderet,
 Suam ille frustra explere conatur famem:
 Idoneum ergo a Vulpe consilium petit.
 Quæ delicatæ pariter appetens dapis,
 Operam, inquit, omnem misere perdideris tuam,
 Si frangere rostro squameam velis domum:
 Sed alte in auras evola, quantum potes;
 Hinc rupem in istam mitte durum corticem:
 Facile frangeretur, & apertam dapem offeret.
 His ultro monitis ille stultus paruit.
 At liberatam carcere Ostream suo
 Postquam videt dolosa Vulpis, hanc vorat,
 Squamasque tantum Vulturio linquens, fugit.

Hos

(m) Richer, Lib. I Fab. XIV. Le Noble, Fab. CXXXIII.
 Camerarius, Fab. CXCVI. Le Jay, Biblioth. Rhetor. Tom. I
 pag. 749. cujus etiam verba quædam, ut & in Fabula præ-
 xime sequenti, retinimus.

Hos fabula docet imprudenter consuli,
Ad quos redire consilii fructus potest.

FABULA XXVI.

Aves de creando Rege deliberantes. (n)

REGEM creare cum sibi vellent aves,
Gens omnis in vetustum convenit nemus;
Ibique scissæ studiis dum partes strepunt,
Et fluctuantur animis alternantibus,
Comicia Pavo lustrat interea, rotat (o)
Superbus, omnes caudæ gemmas explicat.
Tam nitidus oculos vulgi præstringit decor;
Nomenque Regis ac decus Junonio
Quin deferatur Aliti, jam nil moræ est.
At Pica renuit, consiliumque reprobans
Male auspicatum: Pulcher, & comptus quidem
Rex, inquit, ille est, quem placet nobis dari;
Sed bella si excitentur, si hostes ingruant,
An fortis ultor vindicabit impetum?
Inertia forte redimitur prudentia:
Ipsius at mens tam cæca esse dicitur,
Quam cæci, quotquot oculos in cauda gerit.
Assentit omnis Coetus, & plausu dato
Picæ sagaci, damnat errorem suum.

Species inanis imperitos decipit:
Peritus in re nil nisi ipsam rem videt.

FABULA XXVII.

Puer & circumlitæ saccharo Nuces. (p)

SATIS quidem capacis alvi, at gutturis
Paulo arctioris vitreum vas saccharo
Circumlitas tenaci servabat Nuces,
Quarum albicantis illecebras corticis

N 2

Pellu-

(n) Richer, Lib. VI Fab. X. Benferade, Fab. LXXXV.
Æsopus, Fab. LIII. Faernus, Fab. XXII. Le Jay, Bibl.
Rhet. Tom. I pag. 739.

(o) Columel. de re rust. Lib. VIII Cap. XI sub med.
Semetipsum (Pavo) veluti mirantem caudæ gemantibus pin-
nis protegit: idque cum facit, rotare dicitur.

(p) De la Motte, Lib. II Fab. III.

Pellucida claustra cum foras transmitterent,
 Tantam bonorum copiam simul aspicit,
 Simul fruendi cupidus accedit Puer:
 Facile, quo properat, vacua descendit manus;
 Evadere autem plena nimis jam non potest:
 Et renuit ille amittere prædam, quam tenet;
 Et obstinatus pugnat, nilque proficit:
 Flere ergo cœpit. Stultam pervicaciam
 Miseratus aliquis: Tot simul, ait, si velis
 Capeffere, nullam habere fas erit tibi;
 Sed habebis omnes, singulas si sumpseris.
 Jam monui, & rursus id monere juverit:
 Sibi ipsa semper nimia cupiditas nocet.

FABULA XXVIII.

Philomela & Vespertilio. (q)

CAPTIVA totos muta peragebat dies
 Philomela: tantum, nox ubi multa venerat,
 Canere solebat, luctus ad solatium:
 Causam cum peteret quidam Vespertilio;
 Respondit: Quia diurnis cantibus meis,
 Ut me misellam caperet, adduxi aucupem.
 Statim ille retulit: Si sic fecisses prius,
 Quam capta in huncce trudereris carcerem,
 Laudarem, at istas, cum tibi profunt nihil,
 Nunc te recurrere ad artes, stultum judico.

FABULA XXIX.

Myrtus & Arbor magna. (r)

QUASSATA ventorum importunis flatibus,
 Suadet Colono Myrtus, ut se transferat
 Locetque in umbra vastæ, & excelsæ Arboris:
 Sed cum Arbor illa tanta parvis in sinu
 Terræ parentis inhæreret radicibus,
 Simul atque Boreas ingruit violentior,
 Cadit, ruinaque opprimit Myrtum sua.
 Miseram Clientum sortem fabella indicat.

FABU-

(q) Richer, Lib. VIII Fab. VII. Æsopus, Fab. LXXVII.
 (r) Richer, Lib. V Fab. X.

FABULA XXX.

Avarus & Graculus. (s)

FURAX Avaro nummos aliquot Graculus
 Surripuit, abditoque reposuit cavo.
 Mox furtum Avarus cum bene haberet cognitum,
 Velletque furem comprehensum plectere:
 Mala Bestia, inquit, nam quis te meos mihi
 Abripere nummos furor adegit? Quid tibi
 Prodesse possunt? Hos edules an putas?
 Non esse edules scio, respondet Graculus:
 Eos tamen, deceptus exemplo tuo,
 Prodesse mihi tam posse, quam tibi, credidi.

FABULA XXXI.

Gallina plumis spoliata. (t)

GALLINAM Vulpis rapuerat famelica:
 Nec sustinens, dum tuto manderet hanc loco,
 Differre, plumis jam spoliaverat suis
 Plus parte media. Facinus advertit canis;
 Accurrit; in Prædonem vehemens irruit,
 Avidiasque prædæ extorquet illi e dentibus.
 Gallina male (u) mulcata cum gentem suam
 Reviseret: O Sorores, quam parum abfuit,
 Clamat, ut acerba vobis eriperer nece!
 Hinc forte in agros paululum diverteram:
 Scelerata Vulpis me nec opinantem rapit,
 Miseramque, validus ni Canis succurreret,
 Vorasset. Tum retractat, flebiliter gemens,
 Quantis suam omnem iniqua fors vitam malis
 Vexare jam sæpe antea obstinaverit:

N 3

Et

(s) Richer, Lib. X Fab. I. De Graculo vide notam ad Fabulam XXIV Lib. III.

(t) Richer, Lib. XII Fab. XVIII.

(u) *Mulctare* quidem *punire* est, *mulcare* autem est *male tractare*. Terentius, Eun. Act. IV Sc. VII V. 4. *Male mulcabo ipsam*. Phædrus, Lib. I Fab. III V. 9. *Male mulcatus Graculus*. Cicero de clar. Orat. Cap. XXII. *Addebat etiam...* Scriptores illos *male mulcatos* *exisse cum Galba*. Vide etiam quæ jam antea notavimus ad Fab. XIV Lib. II.

Et verbis, ut dolentum mos est, asperis,
 Etiamquæ paulo significantioribus,
 Suum renarrat infortunium recens,
 Dulcem excitare cupiens misericordiam.
 At illæ murmure glorientes (x) barbaro:
 Fuge hinc, inepta, cum tuis querimoniis;
 Tibique apud aves quære deplumes locum.
 Si misera es, ipsa, quidquid advenit mali,
 Tibi advocasti moribus indoctis tuis:
 Cumque ea parumper renueret, ferociunt,
 Rostrisque sævis abigunt, extrudunt foras.
 Ubi est calamitas, ibi culpa esse creditur.

FABULA XXXII.

Ictericus.

QUODCUMQUE sive Ars, sive Natura exhibet
 In Orbe variis præditum coloribus,
 Ictericus omne id respuebat intuens;
 Et indignatus conquerebatur, nihil
 Occurrere usquam sibi, quod flavum non foret.
 Sed aliquis, istam non ferens calumniam:
 Cognosce teipsum, dixit; atque sedulo
 Provisæ (y) morbum, quo laboras: si queas
 Suis Medicina remediis expellere:
 Videre sano res, uti sunt, fas erit.

FABULA XXXIII.

Asinus pelle Leonis indutus. (z)

ASINUS Leonis forte pellem invenerat,
 Suo statim illam corpori aptans induit.
 Ita nempe vitii id emne, quod sibi indidit
 Natura, facile corrigi posse autumat:
 Etiamque callidos jam se habere spiritus

Mira-

(x) Pompejus Festus; *Glocire, & glocitare, Gallinarum proprium est.*

(y) Terentius Andr. *As. V. V. I.*
 Provisio, quid agat Pamphilus.

(z) La Fontaine, *Lib. V Fab. XXI. Æsopus, Fab. CXXXIII.*
 Faernus, *Fab. LXXXVIII.*

Miratur, &, eorum insolens, sibi adstupet.

Hinc se ergo contra silvicultrices (a) Feras
Bellator infert; seque terribilem putans:
Tremite, pavescite; hostis en adsum ferox,
Immisericorsque, strage qui multa domos
Implere vestras animo destinaverim.

Dixit; alacrique rapidus impetu ruit,
Simulque, bellum nuntians, valide rudis,
Et ab ore vasto clamorem horrificum ciet.
Fugere primo territæ aspectu Feræ,
Sonusque celerem duplicat auditus fugam.

At cantilena callidam non decipit
Asinina Vulpem: Pecudis Arcadicæ melos
Probe illa novit: seque fert ipsa obviam:
Asinumque, vel sic, inquit, esse te liquet;
Quod & istæ auriculæ, quarum apex furtim emicat;
Testentur etiam, quamvis ipse deneges.
Tunc Belluarum cetera, expulso metu,
Plebs revenit (b) ultro: & ambit: & acerbe jocans
Cucullum ineptæ Pecudi alienum deripit;
Istaque crebro inertem cædit; & probris
Onerat, fatigatque omni contumelia.

Ibi militaris nil juvat species, ubi
Occasione deficit animus data.

FABULA XXXIV.

Felis & Canis. (c)

FELEM, Canemque longa contubernii
Necessitudo ita invicem conjunxerat,
Ut etiam sæpe mutuum colluderent.
Miratus aliquis, quod Animalium in genus
Tam dispar caderet tanta familiaritas,
Naturæ quandam conciliatricis fidem
Occultam, tanto firmiorem credidit
Subesse utrinque, quanto rarior forer.

N 4

At

(a) Catullus Carm. 64 V. 72.

Ubi Cerva silvicultrix, ubi Aper nemorivagus.

(b) Vide notam ad Fab. IX Lib. V.

(c) Furetiere, Fab. XXXIV.

At mox, utrique cum ciborum reliquias
 Projiceret in commune, ut advertit pari
 Contentione prædam ab illis distrahi,
 Rixamque concitari, pugnam denique
 Pugnari, ut Feles inter & Canes solet:
 Vestra, o malæ, inquit, Bestiæ, indoles patet:
 Vos, video, nulla vis amicitiae prius
 Conjunxit, sola sed libido perpulit:
 Nam vix utrique commoda res proponitur,
 Discordia simul media vos inter venit.

FABULA XXXV.
Agricola & ejus Filius. (d)

AGRICOLA curam filio mandaverat
 Agrum excolendi vetere squalentem situ,
 Fruticantibusque sentibus late horridam.
 Tanti laboris ille speciem non tulit;
 Silvamque foedam vix oculis lustraverat,
 Exterritus recubuit; & vel otio,
 Vel etiam somno totam consumpsit diem.
 Quod ita accidisse propter ægritudinem
 Hujus male desperantis ut advertit Pater:
 Age, Nate, dixit, quid operæ sit opus, vide:
 Nunc iste, latus quinque dumtaxat pedes,
 Purgandus, excolendus Angulus est tibi.
 Is cum annuisset, & factu facillimum
 Opus hoc diurnum comperisset; alterum
 Consimile pensum sibi datum postridie
 Aggressus ultro est, & pari absolvit modo:
 Aliisque deinde se diebus ad Patris
 Implenda jussa morigerum sic præstitit,
 Cultum ut pars agri nulla non receperit.
 Objecta rerum magna moles territat?
 Partem intueri, & hanc aggredere naviter;
 Quæ facile votis ubi tuis responderit,
 Aliæ sequentur similem habentes exitum.

FA-

FABULA XXXVI.

Nux & Arbores infructuosæ. (e)

FABULA XXXVII.

Perdices duæ & Auceps.

DE sorte cum Nux gloriaretur sua,
 Aliasque multas Arbores contemneret
 Infructuosas; una dixit: Fructibus
 Ubi tuis aliqua accesserit maturitas,
 Simul omnes sustibus, & lapidibus te petent,
 Et expoliando mille plagas ingerent.
 Tunc sterilitatem nostram hanc optabis tibi,
 Hanc ipsam, quam tu nunc superba despicias.

Confidere suis divites opibus vetat
 Fabula. Rapaces copia invitat manus,
 Ut non modo gravi sæviant injuria,
 Sed & aliquando perniciem summam afferant;
 Quod altera hæc fabella testatum dabit.

Pullos eodem in agro Perdices duæ
 Simul educabant, una complures quidem,
 At altera duos tantum. Ditiior Parens
 Contemnere cœpit istam præ se pauperem:
 Quantisque, dixit, me affici damnis prius
 Esset neesse, quam mea similis tuæ
 Fortuna fieret! hanc Parens paupercula
 Cum sustinere non posset superbiam;
 Diversa paulum abscessit. Interea suis
 Instructus Auceps omnibus dolis, gradu
 Tacito furtivus huc accedit: hanc videt
 Cum prole gemina, respuitque: at alteram
 Stipante cinctam tanto Pullorum grege
 Ut pariter aspicit, eo confert unice
 Industriam, cæcosque pedicarum dolos:
 Matremque, & omnem familiam simul capit.

FABULA XXXVIII.

Os & Oculi.

ORI invidabant oculi, quod varias dapes
 Huic usque & usque, sibi que nunquam porrigi
 Ullas viderent: ergo id injustum putant,
 Expostulantque cum manibus. Isti manus
 Solatium aliquod ægritudini ut ferant,
 Mel invenire quod licuit suavissimum
 Peramanter ipsis admovent: at melleam
 Hi non modo nullam suavitatem sentiunt,
 Sed & gravi torquentur acrimonia.

Non appetenda quælibet bona sunt tibi;
 At sola, quæ naturæ convenient tuæ.

FABULA XXXIX.

Adamas & Artifex imperitus.

OLIM imperiti cum venisset in manus
 Artificis Adamas, subter illapsis quidem
 Granis notatus arenulæ, at levissimis,
 Perpaucisque, cetera commendabilis
 Et magnitudine, & nitore, & pondere:
 Is obstinatus nil non, ut vitium extrahat,
 Tundendo, radendo experitur; at suum
 Denique Adamantem comminuendo perdidit.
 Periculosum est vitia quædam tollere.

FABULA XL.

Pratum, Apis, & Vipera.

PLANTIS scatebat innumeris Pratum ferax;
 Sed ut salubres multas, & suavissimis
 Passim offerebat præditas coloribus,
 Odoribusque, sic & aliquot fœtida
 Contagione, pestiferoque noxias
 Veneno alebat. Huc adrepsit Vipera,
 Apisque pariter advolvit: at fuit
 Utriusque studium longe dispar: hæc enim
 Generandi mellis cupida, qui gratissimus,
 Simulque fuerit optimus, florem hunc petit,

Huic

Huic diligente pertinacia insidet,
 Hujus liquores exquisitos exprimit.
 At Vipera, suum ut augeat virus, malam
 Carpit cicutæ frugem, & hæc se ingurgitat,
 Succosque tristes corpore atro combibit.

Boni bene, mali male gesta ex omni solent
 Historia legere, propria quæ faciant sibi.

FABULA XLI.

Sorex & Mus. (f)

CUM cantitare belle sese crederet
 Sorex, acutos se stridulo sonos
 Clere solitus, gestit, & sibi
 Plaudebat; Muris præ am carpebat jocans
 Taciturnitatem. At ille: Si sciperes, ait,
 Pariter taceres. Quo dicto, subiit cavum.
 Mox autem inepti crebrescente Soricis
 Stridore Felis admonita supervenit,
 Tacitoque gressu accedens incautum occupat.
 Atque ita suo ille proditus indicio perit. (g)
 Damnosa stulto semper est loquacitas.

FABULA XLII.

Urfa & Leæna.

QUÆDAM Urfa (h) Catulos ut figuraret suos
 Laboriose & anxie cum lamberet;
 Vidit Leæna: Lambe, ait, quantum voles,
 Non fiet, Urso ut non educaveris.
 Raro elegantem cura reddit hunc librum,
 Quem semel informem partus infelix dedit.

FA-

(f) Camerarius, Fab. CCCCLXXX.

(g) Terentius Eunuch. Act. V. Sc. VII. V. ult.

Egomet meo indicio miser, quasi Sorex, hodie perii.

(h) Plin. Hist. Lib. VIII. Cap. XXXVI. Hi (foetus Urssini) sunt candida, informisque caro, paulo muribus major, sine pilo; unguis tantum prominent: hanc lambendo paulatim figurant.

FAME coactus Villici chorrem Leo
 Subierat. Ille facile se præda ratus,
 Tanta potiri posse, clausit ostium.
 At vix regressum sibi negari senserat,
 Illicet atroces corde flammato Ferus
 Concepit iras: diris infremuit modis,
 Simulque, rapidus quo furor pepulit, ruens
 Crudelitatis specimen horrendum dedit.
 Namque violentus irrumpit in Ovilia,
 Et in Bubilia; miserasque strangulat,
 Laceratve pecudes. Tunc dolore perditus
 Suam execratur temeritatem Villicus;
 Trepidansque furtim patefacit, quantam potest,
 Viam Leoni: qui mox egreditur quidem,
 At victor, at cruore plenus, & satur.
 Ad incitas redactus hostis præferox
 Quam sit timendus, illud exemplum docet.

EPILOGUS.

His lusibus ego leniebam tædium,
 Si quod erat, ut sit, solitudinis meæ;
 Et verisimiles comminiscens fabulas,
 Conabar omne non modo ferarum genus
 Animare, sed res etiam quæ sensu carent;
 Mundique concentum universi reddere
 Vocaliorem: ut inde possit ad bonos
 Regina nostra hæc Ratio mores instrui.
 Nec poenitet me, quod inhonoratos dies
 Tenuibus hisce deditus studiis agam:
 Sed in remoto præsepultus angulo
 Senescere velim, ne quid illius, illius
 Immanitatis impiæ, quæ nunc viget,
 Aspicere cogar. Quid? Vivi pervenimus,

Ue

Ut religionis patriæ contra sacros,
 Veteresque ritus sese homunculus frequens
 Inferre pugnax audeat? Ut omnem Dei
 Abolere cultum tentet? Ut sanctissimis,
 Certissimisque nobiles Auctoribus
 Leges revellat: consecratam rideat
 Laudem pudoris: Temperantiam, Fidem,
 Etiam efferatis, barbarisque Gentibus
 Verenda nomina, pro meris nugis putet?
 At hæc mihi quando per tenuitatem meam
 Domare monstra non licet, fugere expedit.

F I N I S.

*Peste laborantes belluæ. (a)*

CALAMITAS, qua non alia diligentior
 Vastare terram ab inferis emittitur,
 Pestis furebat late in omnes belluas:
 Permulta fuerant corpora data jam neci;
 Reliqua male ominosus urgebat stupor
 Tristi veneno languida. Procul, hinc procul
 Territa voluptas cum salute fugerat:
 Ubique luctus, ubique regnabat pavor.

Ea tam atroci clade percussus Leo
 Jubet advocari concionem, & unius
 Ob crimen, inquit, vindicis ira Numinis
 Sæpe universam plectit multitudinem:
 Nunc ergo iudex quisque, non mollis sibi
 Descendat in se; dispiciatque sedulo,
 Siquid erit, quo fors irritaverit Deum:

Ut

(a) La Fontaine III Part. Liv. I Fable I.

Non invenitur quidem hæc Fabula in Editione tertia
 parifina, quam solam Auctor agnoscit; at referunt illam
 Ephemerides Trivoltienfes, adduntque, nescio qua incuria
 factum, ut genuinæ editioni non infereretur.

Ut una demum, rite sese devovens,
 Hostia tot innocentes redimat victimas.
 Ego quidem culpa non carere me puto:
 Nam & oves, & agnos, & juvencos & boves
 Comedi, nec peperci ipsis custodibus.
 Devotus itaque sistar, maxime omnium
 Nocens si videor unus. Hic vulpecula
 Vitam reclamat omnem tanti principis
 Nulli inveniri posse culpæ obnoxiam:
 Nempe, ait, ovillis & bovillis carnibus
 Sæpe satiasti nobilem tuam famem;
 Quid tum? Pecudibus magnus est stultis honos
 Indultus, alvum quod tuam repleverint.
 Aliquot præterea rusticos discerpere,
 Et ad cibatum sumere placuit tibi:
 Hostile sed genus abolere nil vetat;
 Bellique jus est, ulcisci, quæqua licet.

Quæ visa postquam est plausibilis oratio,
 Sua confiteri scelera non dubitat tigris,
 Non dubitat ursus; non lupo, non ceteri
 Carnifices; & ea sceditatibus suis
 Qui purgent, adsunt oratores callidi.
 Restabat asinus: is suum bona fide
 Explorat animum; & invenire vix potest
 Aliquid, quod ipsum premat ad extremum tamen:
 Mihi, quasi per nebulam, ait, in mentem venit,
 Olim me divertisse, nescio qua via,
 Ad sacrificuli, nescio cujus, pratulum:
 Herba bona, tenera, si bene memini, fuit;
 At illa, fateor, non erat juris mei:
 Noram; abstinere volui; sed stimulans fames
 Et allicientis opportunitas boni,
 Et genius aliquis, credo, me malus impulit,
 Ut dulce gramen attentarem denique,
 Pauxillulumque pabuli decerperem.

Vix ea: repente in infelicem bestiam
 Ab universo coetu clamor tollitur:
 Pereat scelestus, causa communis mali,
 Asinus, nefandi pereat auctor criminis.

Sacrificuli herbam comedere audaci dolo,
Quid est, nisi junctum cum sacrilegio scelus?
Hinc nos videlicet hisce cladibus premit
Cœlestis ira : Numen ergo debita
Statim expietur impiæ pecudis nece.

Ubi rem contemptus vel odium dijudicat,
Facile in grave scelus culpa mutatur levis.



FABULARUM ÆSOPICARUM APPENDIX.

J O C I.

I.

Arbor felix. (a)

REFERAM, quod Cicero false dictum credit;
Et posuit inter non inutiles Jocos.
Maritus olim conquerebatur bonus,
De ficu suspendisse te uxorem suam:
Amabo te, inquit aliquis nasurus, mihi
Ex arbore ista furculos da, quos feram.

II.

Scipio Nasica, & Ennius Poeta. (b)

NASICA ab ostio Ennium cum quæreret,
Ancilla dixit non domi esse; sed probe
Hanc Domini jussu sic locutam intelligit.

Ad

(a) Cicero de Orat. Lib. II Cap. LXIX. Commirius,
Tom. I Edit. 1714 pag. 352.
(b) Cic. ibid. Cap. LXVIII.

Ad se ergo paucis post diebus Ennium
 Venientem ut audit, abesse se clamat domo. . .
 At tu tamen ades: vocem & agnosco tuam. . .
 At tu tamen homo es perversus, qui nunc mihi
 Non credis ipsi, Ancillæ qui nuper tuæ,
 Te non domi esse, tam facilliter credidi.

III.

Præceptor & Puer.

PUERUM fruentem leniter suavi otio
 Præceptor excitavit: &: Honestus labor
 Eritne semper, inquit, invisus tibi?
 Non est, ait ille, invisus, at tantummodo
 (c) Vellem, ut laborare esset id, quod nunc ago.

IV.

Curiositas elusa.

CUM ferret aliquis nescio quid sub pallio
 Absconditum, alius nescio quis exquisit,
 Quidnam rei esset? At ille, quidquid est, ait,
 Si manifestare vellem, non absconderem.

V.

Alexander & Apelles. (d)

CUM divertisset olim Apellis in domum,
 Sententiamque magnus Alexander suam
 Cœpisset omni de arte pingendi palam
 Proferre; in ejus summus Artifex statim
 Aurem insufurrans; Oh! file, inquit, obsecro;
 Vel voce saltem hujusmodi res disputa
 Submissiore; ne pueri te, dum terunt (e)
 Mihi colores, audiant, & rideant.

VI.

(c) Ctc. ibid. Cap. LXXI.

(d) Philibert. Hegemon, Fab. IV.

(e) Plin. Hist. Lib. XXXV Cap. X. Sed & in officina im-
 perite multa differenti (Alexandro) silentium comiter suade-
 bat (Apelles) ridere eum dicens a pueris, qui colores tererent.

VI.

Senex ofor nivium.

QUIDAM, rigentem nivibus injectis aquam
 Ut bibere vellet, cum rogaretur Senex:
 Ætas mea, inquit, frigore contenta est suo.

VII.

Antisthenes & Socrates.

ANTISTHENES cum vendicaret olim Socrati
 Vile, lacerumque, quod gerebat, pallium;
 Respondit ille: Laudo virtutem tuam;
 Verumtamen te præcavere oportuit,
 Ne pallii hujus ipsa per foramina
 Tua se videndam vanitas furtim daret.

VIII.

Cleanthis monitum.

QUEMDAM Cleanthes ambulantiem reperit
 Solum: rogavit, quid ageret? Mecum loquor,
 Respondit ille. Tu tamen, retulit Sophus,
 An non loquaris homine cum improbo, vide.

IX.

Æschines & Socrates.

IN disciplinam Socratis cum se Æschines
 Traderet: Id unum, quod habeo, dono tibi,
 Meme, inquit, ipsum. At ille: Te perquam libens
 Ego nunc accipio; teque meliorem tibi
 Ut deinde reddam, diligentem operam dabo.

X.

Cræsus & Solon.

OBAMBULABAT veste Cræsus Regia
 Stulte superbus: ex Solone quæsiit,
 Usquamne quidquam contigisset pulchrius
 Videre? Vidi Psittacos, inquit Solon,
 Qui plus niterent, & superbirent minus.

XI.

Cynicus & Rex.

CYNICUS talentum a Rege cum peteret sibi:

Plus

Plus, inquit ille, quam decet Cynicum, petis.
 Denarium ergo jam petit. Petis minus,
 Ait ille rursus, quam decet Regem dare.
 Inventa sic est causa, cur daret nihil.

XII.

Emptoris fides. (f).

SEXAGINTA aliquis vendidit nummis equum
 Hac lege: nummos Emptor ut daret statim
 Triginta, se debere triginta alteros
 Juraret. Aliquot mensibus post Venditor
 Emptorem convenit, & reposcit debitum:
 At ille nummos se soluturum negat . . .
 Quid? te obligatum jurisjurandi fide
 Meministin', an non? . . . Memini, & idcirco tibi
 Neque volo quidquam, neque etiam possum dare:
 Nam debitorem me esse juravi tibi;
 Atqui non essem debitor, si solverem;
 Ipsum ergo jusjurandum solvere me vetat.

XIII.

Novus Orpheus. (g)

DE nocte quidam subditus Amoris jugo
 Hispanus ægra lachrymabundus lyra
 Duras puellæ supplicabat ad fores.
 At illa blandum miseri Amatoris melos
 Saxis repente depluentibus obruit;
 Saltem obruisse credidit: sed Musicus
 Pulsa canit adhuc obstinatius lyra;
 Retroque cedens gradibus ad numeros graves
 Bene temperatis: Orpheus (h) ego pol novus,
 Dixit, canoris saxa qui traham sonis!

XIV.

(f) Camerarius, Fab. CCCCLVIII.

(g) Democritus ridens, pag. 4.

(h) Hujuscemodi nomina diphtongo finire, quam distrahere duas in vocales non liceat, falso arbitrati sunt nonnulli. Phædrus, Lib. V Fab. I V. 1.

Demetrius, qui dictus est Phalereus.

XIV.

Cæna Iberiaca. (i)

AD cœnam Iberus Teutonem invitaverat:
 Raphani fuere cœna. Teuto epulum ratus
 Id esse primum: Patria, inquit, in mea
 Raphani, ubi cœna vergit in finem, solent
 Apponi. Et illud idem apud nos ferculum,
 Retulit Iberus, ultimum apponi solet.

XV.

Parasitus impransus. (k)

QUIDAM impudenti de Parasitorum grege
 Lautas in ædes commeabat sæpius
 Sub tempus ipsum prandii. Assiduum nimis
 Convivam abigere cupiens, horam prandii
 Paterfamilias prorogari jusserat.
 Parasitus alvi motum inanis non ferens:
 Hodiene, dixit, in hacce prandetur domo?
 Quem subdole hospes intuens: Nondum quidem
 Advenit, inquit, hora prandendi; at statim
 Adveniet, hinc tu tandem ubi discesseris.

XVI.

Sera post mortem ultio. (l)

DOMINO potenti gratosus Morio
 Cum fletu ad ipsum venerat: quemdam sibi
 Mortem fuisse interminatum conquerens.
 Juberet esse Princeps bono animo: quod si minas
 Hic exsequatur, patibulo spondet scelus.
 Statim expiandum. At imo, dixit Morio,
 Uno prius, quam morte me afficiat, die
 Fac ille vitam finiat suspendio.

O. 2

XVII.

 Auctor culicis. V. 116.

. Orpheus Hebrum

Restantem tenuit ripis, silvasque canendo.

Palladius, Virgil. Catalect. pag. 174. Edit. Lindenbr.

Moresque agrestes expolivit Orpheus.

(i) Democritus ridens, pag. 230.

(k) Idem, pag. 221.

(l) Idem, pag. 219.

XVII.

Accedendum ad Rempublicam, tanquam ad Ignem.

SOCRATICÆ alumnus disciplinæ Antisthenes
Interrogatus ab aliquo, quonam modo
Accedere expediret ad Rempublicam:
Accedé, dixit, tanquam ad Ignem; algent enim,
Qui longius absunt; qui stant propius, æstuant.

XVIII.

Carbonarius ad Principatum Civitatis evectus.

FORTUNA ludum cum insolentem ludere
Voluisset olim, quemdam Carbonarium
Ad principatum Civitatis extulit.
Confestim amici, cum propinquorum grege
Numeroso, ad ejus genua multivoli accidunt:
Sed hos sibi esse cognitos omnes negat;
Stupentibusque: Quid, ait, admiramini,
Quod nesciam vos? Memetipsum nescio.

XIX.

Calvus & Cæsaries factitia. (m)

EQUO dum vehitur Calvus, quam factitiam (n)
Cæsariem hæbebat, improvisi turbinis
Impetus hanc ipsi derepente sustulit:
Statimque risus omnium ingens tollitur.
At ille: Quid mirum, inquit, Crines, qui mei
Nunquam fuere, si recedant; hi quoque,
Fuerant qui mecum nati, cum recesserint?

XX.

Recens Maritus & Sophus.

RECENS Maritus a Sopho cum quæreret,
Arcana quænam uxore posset cum sua

Com-

(m) Æsopus, Fab. CCLXXXVIII. Avienus, Fab. X.
Benferade, Fab. CXXXIV.

(n) Longa est in vocibus hujuscemodi antepenultima syllaba, ut patet ex hoc Porcii versu octonario, quem refert Suetonius in vita Terentii:

Eorum ille opera ne domum quidem habuit conductitiam.

Communicare: Quælibet, retulit Sophus;
His tantum exceptis, quæ taceri oporteat.

XXI.

Thales & Ancilla. (o)

COELI meatus ore sublimi Thales
Intentus observabat: in foveam incidit.
Quem sic fuisse irrisum ab Ancilla Plato (p)
Memorat: Tuumne tam procul supra caput
Remota posse perspicere speraveris,
Dum posita quæ sunt ante pedes non perspicis?

XXII.

Doctor Veterinarius. (q)

DOCTORIS Medici equos olim rhedarios
Cum curavisset Doctor Veterinarius,
Et acceptare nollit oblatam sibi,
Operæ efficacis præmium, pecuniam:
Nunquam, ait, id obtinebis, ut gratis tibi
Non inservierim: cuncta quo deceat modo
Agi inter homines artis ejusdem, scio.



NARRATIUNCULÆ.

I.

Titi humanitas.

AMATOR, & amor generis humani Titus
Et jure potuit, & citra jactantiam,
Quicumque rerum cursus esset, dicere:
Felicitem omnes mihi referunt suam;
Luctus per orbem si quis est, nemo imputat.
Cum sterilis illi forte abivisset dies,
Quo contigisset neminis ægritudinem

O 3

Leva

(o) La Fontaine, Lib. II Fab. XIII. Æsopus, Fab. CLXIX.
Faernus, Fab. LXXIII.

(p) In Theæteto.

(q) Democritus ridens, pag. 231.

Levare, sortemve ex mala meliusculam
 Facere, vel etiam reddere ex bona optimam;
 Cœnæ sub ipsum tempus occurfat gravis
 Memoria: subito conticescit, ingemit;
 Interque motus cordis angusti pios
 Divina tinxit lacryma regales genas.
 Hic magna Proceres cura sollicitos movet;
 Tristesque Dominum, quid mali doleat, rogant.
 Respondet ille: Nemini me contigit
 Hodie benefacere: diem, Amici, perdidit.

II.

Socratis patientia. (r)

Uxorem (s) habebat Socrates, qualem tibi
 Exoptet ultro, qui malam tibi rem velit;
 Difficilem, acerbam, feminae plus quam solent.
 Aliquando voces illa dum rabido vomit
 Furore plenas, & onerat conviciis
 Virum innocentem; impar Sophus nefariæ
 Cedit procellæ, & aure demissa silens,
 Gradumque celerans, Dominus egreditur domo,
 Furiamque solo fervere (t) in campo sinit.
 Ipsas sedebat ad fores placidus, nihil
 Sibi suspicatus esse meruendum mali,
 Postquam remisit nobilis totum decus
 Triumphi. At illa, non sibi obstiti dolens,
 Novas ad artes confugit, bilem viro
 Si qua movere possit; hocque rem modo
 Tentat: superius scandit in conclavium;
 Aperit fenestram; & inde vas plenum nimis
 Humore quodam olente non opobalsamum,

In

(r) Democritus ridens, pag. 29.

(s) A. Gellius, Lib. I Cap. XVII. *Xantippe Socratis Philosophi uxor morosa, admodum fuisse fertur & jurgiosa . . . Alcibiades . . . interrogavit . . . cur mulierem tam acerbam domo non, exigeret. Quoniam, inquit Socrates, cum illam domi talem perpetior, insuesco & exerceor, ut ceterorum quæque foris petulantiam & injuriam facilius feram.*

(t) Terent. Adelph. Act. IV Sc. I V. 18.

Cum servit maxime, tam placidum, quam ovem, reddo.

In Socratem, o pudor! impia effundit manu:
 Nec gutta periit una, miserum quæ sophum
 Non inquinasset. Ille nihilo motior,
 Excuteſe ſordes, linteo vultum & caput
 Fricare cœpit. Impudentem feminam,
 Virumque mitem, hac forte ſi qui tranſeunt,
 Mirantur: At more tamen, inquit Socrates,
 Id fit, ubi multum tonuit, ut demum pluât.

III.

Vana nobilitas.

ALIIQUIS vetuſti laude avorum nobilis
 Homuncio, quamvis ejus in titulis foret
 Plane omnis ipſum cauſa laudandi, tamen
 Superbiebat; & ſuam memorans domum,
 Ægre ſerebat additum quemdã ſibi
 Socium fuiſſe; gente quem natum licet
 Agreſti ad altos propria extulerant gradus
 Merita: malisque vellicans diſſertis
 Eum laceſſit, & genus vile exprobrat.
 At ille: Patrem ſi tibi, inquit, ut mihi,
 Habere ſorte contigiffet ruſticum,
 Hodieque (u) rure deliteſceres tuo.

IV.

Avarus Scyllam inter & Charibdim deprehenſus. (x)

VIR quidam, Avarus quanquam erat, amicis ſuis
 (Habere amicos ſi tamen avarus poteſt)
 Geniale quondam ſtruxerat convivium.
 Nemo e vocatis non adeſt: properant frui
 Benignitate tam nova: accumbunt. Duos
 Ille aſſidentes, helluonum par vorax,
 Sedebat inter medius; ac dum ſtrenue
 Nudant catinos, & ſcyphos exhauriunt,
 Dolore homo meus interim confumitur;

O 4

Stu-

(u) Scioppius Animadverſ. in Voſſium Cap. XXI. *Hodieque* pro *hodie quoque* dici vetat: Inſcite: quippe qui exemplis Auctorum veterum innumeris reſelli poſſit.

(x) Democritus ridens; pag. 173.

Stuperque mœstus. Aliquis hortatur, bonam
Præbere læti ut hospitis frontem velit:
At, egone læter, inquit, illatibiles
Sic usque & usque dum aperiunt misero mihi
Scylla & Charybdis hinc & hinc voragines?

V.

Fœnerator Concionatoris sacri studiosus.

IN Urbe quadam Concionator (y) fuit,
Qui vitia Sanctæ Religioni maxime
Opposita grandis eloquentiæ gravi
Et efficaci profligaret impetu.
Is inter alia debellata fortiter
Portenta scelerum, fœnebre aliquando luem
Ita impugnavit, ut fere omnes, huic malo
Qui dediti essent, ad bonam coegerit
Redire frugem: at ex horum collegio
Restabat unus, qui quamvis esset frequens
In concione, nil tamen deterritus,
Rem facere, ut ante, diligenter institit.
Sed & Oratoris inclyti facundiam,
Ultro, palamque magnis effert laudibus;
Adit etiam ipsum, & gratulabundus facris
Tribuit honorem debitum successibus.

Quod ille mirans: Atenim, ait, te credidi
Unum de gente Fœneratorum. Bonus
Cui Fœnerator, minime falsus es, refert;
Sum Fœnerator; atque eo studiosius
Mea hac in arte me exercere nunc libet,
Quod eadem mecum munia exsequentium
Fervente nuper impeditum copia
Me liberaſti; solus ut jam fœnebris
Percipere fructum possim omnem pecuniæ:
Memor ergo totum id esse muneris tui
Fateor, tibi que gratias ago maximas.

SE-

(y) De significatione, quam huic voci tribuimus, multa
doſte Olaus Borrichius, contra Ger. Joan. Voſſium diſputat
in ſuis de Lingua Latina cogitationibus, Hafniæ editis, an.
1675. in 4to. pag. 69 & ſequentibus.




SELECTA

Philosophorum veterum placita.

PRÆFATIO.

CUM hoc poema nondum curis posterioribus castigatum, quale nunc exhibetur, at paulo deterius figuratum, in quorundam manus clam pervenisse rescissem, edendum esse judicavi. Pleraque autem sententiarum lumina, quæ in eo continentur, ex variis Senecæ Philosophi libris excerpta sunt, ita, ut ipsamet hujus verba sæpe agnoscere possint. Loca quidem usurpata notassem omnia, si prævidissem, opusculum, quod olim mihi, & amicis quibusdam meis concinnaveram, emittendum esse aliquando in lucem publicam: nunc præstare id cum vellem, neque facile est; neque per tempus licet. Paucula tamen hæc præfanda fuerunt, ne quis me non ingenue fecisse diceret, qui non indicassem, per quem præcipue profecerim.



QUISQUIS es, ingenium cui nobile, spiritus acer,
 Excellens animus, mens & diviniore, almæ
 Sin. eræque foveat immensum laudis amorem,
 Huc ades; & longos durato corde labores
 Aggredere: en Virtus vocat ipsa, cietque morantem.
 Nec tecum reputans ignava hæc sensa revolve:
 Multa mihi passio veniet quæ denique merces?
 Merces ampla fati, Virtus: per se una beatum
 Efficit illa virum, qui fortiter utitur ipsa.
 Interea monitis adverte fidelibus aurem.

Dum præclara tibi Sapientum effata retexo;
 Et quæ tot veteres diæ Virtutis Alumnos
 Pene pares Divis vivendi regula fecit,
 Hanc blando mulcens conor describere versu.

Sola suum Virtus, varii dum cetera casus
 Pervertunt, servat, nunquam violanda, tenorem.
 Mortalesque rapit, mortaliaque omnia tempus;
 Nescit at illa mori; violentaque secula vincit
 Durando. Vel si resolutis nexibus Orbis
 Corruat, involvantque graves elementa ruinæ;
 Perstat, & ipsa suo fulcit se pondere Virtus.
 Illa bonos inter, qui se objecere, malosque
 Eventus rerum, coepit quo tendere, pergit,
 Insidiasque sibi positas utrinque repellens,
 Regina incedit reverendo prædita fastu.

Vivit enim Sapiens casus in utrosque paratus;
 Estque bonorum idem rector, victorque malorum.
 Huic si contigerint, quos appellare favores
 Fortunæ suemus: quanquam nil sensa movebunt
 Interiora animi, tamen laud excludet; & ultro
 Fortunam, quanta est, patietur degere secum;
 Exlegemque regens, ad formam finget honesti.
 Si mala, quæ dicunt, adversi incommoda Fati
 Adveniant, his occursat generosus, & æquo
 Responsat vultu, & præcelso corde resistit;
 Aut etiam super instat agens; dum vincere demum
 Discat, & ipse suum victis infundere morem.

Divitias ergo Sapiens admittit; at illas
 Tecto, non animo, recipit, liberrimus hospes.
 Divitiæ subsunt Sapienti: servit Avarus
 Divitiis, quis si spoliabitur, omnia perdet.
 At pereant; Sapiens sibi nil periisse dolebit.
 Ablatæ ut fuerint, ipsi tamen omnia restant:
 Namque has qui rapuit, nil abstulit ille, nisi ipsas.

Nec tamen illa tuæ surgat sententia menti: (z)

Huma-

(z) Stoicorum hic, & aliis quibusdam in locis, molliorum
 sententiam exponimus; nam rigidiores omnem animi affe-
 ctum penitus esse excindendum sanxerunt; Apathiamque ten-

Humanæ fortis Sapientem excedere fines
 Posse ratos, penitusque omnes extinguere motus,
 Quos ipse inſevit Naturæ providus Auctor.
 Naturæ ſimilis communi lege teneri
 Quemque hominum, verum eſt: affectus ergo rebelles
 Et Sapiens patitur, ſed & illos nempe coercet,
 Ordine præſtringens recto; vinctosque catenis,
 Fruſtra obluctantes, domat, & manſueſcere cogit,
 Et ſolers etiam domitos apponere lucro,
 Ritibus informat variis, quorum indiget uſus.
 Haud aliter, ſi fas rebus componere tantis
 Vile miniſterium, Tygrimve, ferumve Leonem,
 Solerti intentus ſtudio, cicuravit Agyrta,
 Irasque & calidas Lybiæ ſitientis arenas
 Oblitos regit imperio, vocemque magiſtri
 Noviſſe, inſertamque ori aſſueſecit herilem.
 Non læſiſſe manum; per vicos denique doctis
 Moribus his belle inſtructos, perque omnia circum
 Oppida Præceptor ducit faſtoſus Alumnos,
 Ac turbam ludo ſolemni paſcit hiantem,
 Hincque etiam dulci ſentit ſe augeſcere quaſtu.

Crebra homines quamvis inſligant vulnera, nulli
 Pervius eſt animus Sapientis: quippe feriri
 Ille poteſt, nequit offendi, undique tutus, & ipſis
 Par Superis, niſi quod moriendi lege tenetur.
 Hunc animum, dixit quidam de gente Sophorum,
 Membra quidem incluſum cohibent: at ſemine vitam
 Undique ſubnixam immortalī ducere ſeſe
 Conſcius ille ſibi, retinentia vincula perſert,
 Liberque interea perituro in carcere regnat.
 Ac ſi quid vel fraus hominum importuna, vel acres
 Morborum appulſus potuere inſligere damni,
 Carcer, non animus damnum hoc quodcumque recepit.
 Extrema hæc meta eſt: omnis pertringere tantum
 Viſ huc uſque poteſt: ultra ſi tendere certat,

Offen-

tentarunt inſtituere univerſam; quam deinde etiam propu-
 garunt Maſſaliani hæretici, ut reſert Nicetas Choniates, Lib.
 de Fide Orthodoxa, Cap. XXXVI.

Offendit solido, retroque remittitur ictus.

Si tamen appetitur graviori vulnere pectus,
Naturæ motus paulum laxare fideles,
Ingemere, ex oculis etiam demittere fletum,
Servata gravitate, licet: sed vulnera quanquam
Crudescunt, contra, oh! ne corporis ulla volupras,
Ipso nempe malo peior medicina, paretur.
Luctus, plaga ferox; ubi verus: mollibus uti
Parcite fomentis: curanda severius illa est.

Nec tibi, quantumvis atrox hinc inde malorum
Impellat rabies, veniat tam dira cupido,
Ut misera demum statuas excedere (a) vita,
Dejectusque animo properes arcessere mortem.
Verlantem his terris te noli credere totum
Esse tui juris: non huc sine numine Divum
Venisti: neque, si renuant, exire licebit.

Quid proſitve mori? Non omnis morte peribis;
Parsque tui melior, reſoluto corpore, vivet;
Heu! vivet pœnis æternum addicta, ratum ſi
Ante diem injuſſus vitæ ſtatione recedas.
Præterea vitam pro luctus ſine paſciſci,
An Virtus illa eſt? Imo eſt focordia. Vive.
Vive tamen ſævæ media inter vulnera Sortis,
Non vitæ, at ſolo ductus Virtutis amore.
Hanc fruſtra laudant Epicuri de grege Porci,
Quam vapidò emiſit Mæcenas pectore vocem:
In cruce diſtorquete: bene eſt, ſi vivere fas eſt.
Qui vitam exoptet tali mercede redemptam,
Quocumque hanc etiam mercari crimine poſſit.

Eſt hominis varium vitæ ſentire laborem,
Ferre viri eſt. Fortuna gravi licet undique vultu
Ingruat, immota vir fortis mente reſiſtit
Uſque ſui ſimilis, mollitaque Fata receptum
Virtutis Dominæ cogit ſervare colorem.
Maximus ille Cato invitam dum fortiter audet
Tutari Patriam, & grandes impendere curas,

Fune-

(a) Cicero de Senect. Cap. XX. *Vetat Pythagoras injuſ-
ſu Imperatoris, id eſt Dei, de præſidio & ſtatione vitæ de-
cedere.*

Funestosque usus & iniquum tollere morem
 Conatur, solo subnixus pectore Prætor;
 Spernitque effrænos stulta cum plebe Tribunos;
 Ecce furens subito Plebs circumfusa tumultu
 Invaditque, ruitque, nefas immane! Catonem;
 Detractaque toga ejiciunt, pugnisque propellunt,
 Probrisque, sputisque, & crebro verberare lædunt.
 Ille autem hæc inter sceleratæ crimina Sortis
 Qualis erat? Credis scelerata Sorte minorem
 Inclyta fœdavisse inhonesto pectore planctu?
 Imo aliud. Namque ut quondam Sol aureus, atram
 Si contra agglomerent nebulam exhalata paludum
 Suffimenta, putrique involvant omnia nocte,
 Nil patitur damni; at raptos Mortalibus ægris
 Colligit in sese radios, Superisque, sibique
 Redditus; & majori etiam se luce coronat.
 Sic ille hæc inter positus simulachra malorum
 Arduus incolumi secum Virtute triumphat.

Hic vir hic est: felix! si, tot nunc dura ferendo
 Qui superat, non ferre olim graviora recuset.
 Heu, fragiles hominum mentes! Tam splendida Virtus
 Dudum perfliterat victrix, poteratque videri
 Omnia posse pati, nisi contra insurgat, & ipsum
 Vincere cum victo Cæsar velit Orbe Catonem.
 Debuerat perferre Cato, quod Fata negabant
 Corrigere: extremam hanc durando vincere sortem
 Debuerat: sed enim fractus, totoque minutus (b)
 Corde, malis cessit; seque ipsum, ipsosque, tueri
 Quos voluit frustra, Romanæ Gentis honores
 Polluit infando scelere; & conscivit iniquam
 Ignavamque sibi violento vulnere mortem.

At sæpe insontes furiosa Calumnia vitas
 Afficit obscæno tactu; morsuque lacerans
 Pestifero maculis inspergit candida nigris:
 Et qua sacrilegæ Pestis subtile venenum
 Vitari arte queat? Quo sese purior offert,

Hoc

(b) Cicero de finib. bonor. & malor. Lib. I Cap. XVIII. *Alii
 minuti, & angusti, aut omnia semper desperantes, &c.*

Hoc fraudi magis est impuræ obnoxia Virtus,
 Attamen inferri quæcumque infamia possit,
 Quid nocet infanti? summam tentantia pellem
 Spicula quid corde admittis? Procul hæc age damna
 Excute; non tua sunt. Sentis? tibi propria reddis.
 Dum filet, & secum Virtus immota quiescit
 Socratis: Evigila, clamant; enitere vitam
 Excusare tuam, cui non infligere cessat
 Turpes vis inimica notas. Frustra, inquit, amici,
 Instatis; quasi sim, quem fœda Calumnia tangat:
 Non me, sed sceleratum hominem petit inscius error.
 Denique non magis est damnosa Calumnia iusto
 Prudentique viro, quam si quem corpore sanum,
 Prævalidumque, gravis tentatum vulnere morbi
 Decubuisse ferant: at viribus ille probatis
 Innixus stultæ rider mendacia linguæ.

Inprimis animos, rursus rursusque monebo;
 Profuerit vicibus duris assuescere rerum:
 Has appone lucro sapiens: his robur adultæ
 Virtutis magis atque magis firmare memento.
 Si mala, quæ venient tibi cumque ferenda, negabis
 Ferre bonus; tamen hæc cogeris ferre, malusque.
 Obsequere, o! ducunt clementia Fata volentem,
 Nolentem imperiosa trahunt, duplicantque ruinam.
 Solvere se æterno qui tentat ab Ordine, tentat
 Emendare Deos. Fer sponte ferenda; volensque
 Observa legem, quam te decet usque vereri,
 Nolentemque licet, tamen observare necesse est.

Lætificos sine nube dies, multisque fluentes
 Deliciis agitas tranquillo corde: nec unquam
 Molliculos turbant ulla infortunia sensus.
 Quid gaudes, demens? vitam hanc ne crede beatam.
 Adveniet quandoque truci comitante malorum
 Agmine, torva tuens Luctus: Jamque efferus, atrox
 Insuetum diris cruciari doloribus ardet;
 Jamque tibi ingentem molitur forte ruinam.
 Quo vultu, miser, aspicias tam fœva minantem?
 Quo ve animo crudos ferientis cominus ictus

Tiro feres nullo bellorum exercitus usu?


Ni tibi, ni magno firmatum robore, tristes
Adversum casus, dura experientia rerum
Munierit pectus; verbis mercabere frustra
Magnificis famam illustrem: te denique fortem
Unde probas, si nondum ullos deviceris hostes?
Bella probant animos. Facile est extrinsecus alto
Splendida virtutis mentiri insignia vultu,
Omnia dum molli composita in pace quiescunt:
Non, nisi conflictu in medio, ac discrimine belli
Fulmineo, sese generosi Militis acres
Ostendunt animi. Tibi tunc sub pectore vires
Constare indomitas ulla sine fraude patebit,
Victor ubi adversæ tristem superaveris iram
Fortunæ: nos interea nescimus, & ipse
Tu nescis, quantum valeas, dum teque, tuasque
Prodat opes aliquis graviori vulnere casus.
Lydius hic Lapis est, quo se probat Aurea Virtus.
Et generoso etiam sensu exultare decebat,
Et sua testari Sapientem gaudia vultu,
Si quando Fortuna truces denuntiet iras
Multa minans, duroque paret certare duello.
Sic voto pugnam anticipat Mavortius Heros:
Huncque ceter pulsans, animosaque corda fatigat,
Flagrantesque vago depascitur igne medullas
Laudis amor, simul instructæ fulgentibus armis
Constiterunt acies, feralique horrida cantu
Signa dedere tubæ, multæque pericula mortis
Per media ingentes animas pepulere volentes.


At nullo quanquam urgeri discrimine magno,
Contigit, ipse tamen testis mihi conscius, inquis,
Gratulor igniculos Virtutis, gratulor aptum
Motibus egregiis pectus, neque casibus olim,
Si qua ferox Fortuna ferat, gravioribus impar.
An vero, quos nunc iactas, incommoda duræ
Vel paupertatis, vel ademptæ laudis iniquas
Per fraudes hominum, aut urentis viscera morbi,
Sensus non tibi sint consternatura superbos,

Res est ambiguïs nimium semota sub umbris,
 Cum vivas opibus florens, & honoribus auctus,
 Et sano demum vigeant in corpore vires :
 Hæc sunt fallaci plerumque infida calore
 Velamenta hominis; fuerint detracta, patebit
 Quantus erit. Nitido sic quæ medicamine vultum
 Oblivit mulier, faciem tegat illa decoram,
 An turpem introrsum, certo dignoscere iudex
 Nemo potest: sed rem tunc unicuique videndam
 Lux manifesta dabit, si perfida larva recedat.

Ergo æge, jucundo rerum diffide tenori:
 Ac licet horrifono veniat violenta paratu
 Fortuna, intrepidus lætusque occurre furenti;
 Illustriſque juvet tentare pericula pugnæ:
 Nec pugnare prius, quam debellaveris hostem,
 Desine; certamen pulchrum est, dignusque triumphus
 Spectatore Deo. Perſta modo: protinus ietum,
 Quemcunque intentet rabies inimica, retundant
 Æs animi triplex & vis adamantina cordis
 immoti; æurnasque graves tolerantia frangat.
 Nec tu crede fera hæc media inter bella severos
 Numinis æterni magno sub pectore ſenſus
 Obruiſſe tibi: teſtis reſpectat ab alto
 Ipſe Pater, pugnæque idem juſtiſſimus auctor.
 Nempe Deus, quem præcipuo dignatur amore,
 Per longos exercet agens plerumque labores;
 Induransque malis dignum ſibi format Alumnum.

F I N I S.





INDEX FABULARUM.

A.

- A**CCIPITER & Cuculus. Lib. III. Fab. 38.
Accipiter & Luscinia. IV. 30.
Accipiter & Noctua. III. 4.
Adamas & Artifex imperitus. X. 39.
Æthiops. III. 33.
Ager, in quo Thesaurus. V. 7.
Agnus, Canis, & Lupus. III. 12.
Agricola, & Arbores. V. 42.
Agricola & Ciconia. III. 2.
Agricola & ejus Filii. II. 12.
Agricola & ejus Filius. X. 35.
Agricola & Fortuna. II. 38.
Agricolæ & Mercurius. I. 20.
Alba-Spina & Ficus. V. 40.
Amnis & Fons. V. 16.
Amygdalus & Pyrus. V. 42.
Anguilla & Anguis. IX. 1.
Anicula & ejus Ancillæ. IV. 20.
Aper & Cerva. III. 31.
Apes & ipsarum Dominus. II. 25.
Apis & Jupiter. VIII. 10.
Aquila, Corvus, & Pastor. I. 3.
Aquila & Corvus. VI. 28.
Aquila & Mus. I. 21.
Aquila & Pavo. VI. 4.
Aquila & Sol. I. 28.
Aranea & Hirundo. III. 40.
Arbores. V. 25.
Arbores duæ. X. 6.
Arbuscula, Arbor, & Colonus. VII. 26.
Arbuscula & Quercus. IX. 27.
Ardea & Pisces. VII. 13.
Aries & Taurus. I. 18.
Atellus. VII. 14.
Asellus, ejusque Herus. VIII. 21.
Asellus & Equus. II. 18.
Asellus & Rivus. X. 17.
Asellus onustus sale, deinde spongiis. V. 31.
Asellus viridis. II. 36.
Asini duo & Vulpis. VI. 17.
Asinus Dominos mutans. III. 30.
Asinus & Equus. III. 31.
Asinus pelle Leonis indutus. X. 33.
Asinus silvestris & Asinus domesticus. II. 26.
Asinus, Simia, & Talpa. II. 30.
Avarus & ejus Filius. V. 24.
Avarus & Graculus. X. 30.
Avarus & Thesaurus. IV. 15.

P

Auceps.

Auceps. IX. 28.

Auceps, Palumbus, & Serpens, III. 20.

Aves de creando Rege deliberantes. X. 26.

Avis, ejusque pulli, & Villicus. III. 27.

Avis solitaria. VII. 21.

Avium & Piscium fœdus. IX. 26.

B.

Bos & Equus. IV. 26.

Bos & Vitula. III. 15.

Boves duo. VI. 25.

Boves & Lanius. VI. 3.

Bubulcus & Hercules. V. 28.

Bubulcus & Leo. II. 7.

C.

CAMELUS. V. 1.

Camelus & Jupiter. III. 7.

Cancer & ejus Filius. I. 19.

Cancer & Vulpis. III. 12.

Canis astutia. X. 10.

Canis domesticus & Canis externus. IX. 24.

Canis & Asinus. III. 14.

Canis & Bos. III. 5.

Canis & Herus. VII. 4.

Canis & Lepores duo. I. 26.

Canis & Vulpis. V. 6.

Canis infidelis & Pastor. II. 34.

Canis mordax. VII. 8.

Canis mutare conditionem coactus. VI. 29.

Canis venaticus & Molossus. X. 11.

Capo. I. 10.

Capones duo. III. 39.

Carbonarius & Fullo. V. 4.

Casens & Felis. V. 34.

Catella. IV. 12.

Catellus & Molossus. VII. 19.

Catellus, Ovis, & Cuniculus. V. 43.

Cera & Later. V. 20.

Cerva, Venator, & Leo. II. 23.

Cervus æger. VIII. 23.

Cervus & Hinnuleus. II. 1.

Cervus & Piscator. X. 19.

Cervus & Viris. V. 5.

Chamæleon. X. 21.

Columbæ & ejus Pullus, Bubo & Aquila. VIII. 28.

Columba & Turtur. VI. 19.

Columba plumipes & Columba faxatilis. I. 9.

Columbæ & Accipiter. III. 18.

Cornicula & Columba. IX. 18.

Corvus, Afellus, & Agaso. V. 15.

Corvus & Lepus. VIII. 14.

Corvus & Lupi. IX. 32.

Corvus & Serpens. III. 25.

Corvus & urna. III. 23.

Corvus nimium loquax. X. 12.

Crocodilus & Vulpis. III. 28.

Cuculus & Luscinius. VI. 27.

Cuculus, Philomela, & Afellus. IX. 33.

Cucur-

Cucurbita & Arbor. V. 32.	Cultor Arborum imperitus.
Cucurbita, Glans, & Rusticus. I. 14.	VIII. 27.
Culex. IX. 13.	Cycnus. IX. 9.
Culex, Leo, & Aranea. III. 17.	Cycnus & Anser. I. 22.

D.

DELPHINUS & Simius. V. 13.	Deus ligneus. IV. 24.
	Divinus. VIII. 3.

E

EDERA & Agricola. IV. 17.	Equus & Lupus. IV. 9.
Edera & Murus. VIII. 6.	Equus & Muscæ. X. 14.
Ensis & Vomer. VII. 10.	Equus & Sessor imperitus.
Equus ægrotans & Canis. II. 32.	IX. 34.
Equus & Asinus. I. 23.	Equus senescens. VII. 20.
Equus & Equulus. V. 9.	Ericius & Talpa. I. 5.
	Erucæ duæ. VIII. 20.

F.

FELIS & Canis. X. 34.	Formica & Columba. II.
Felis & Mus. IX. 7.	24.
Femina mortem pro marito appetens. II. 29.	Formica & Jupiter. VIII. 26.
Fluvii duo, alter perstre-	Formicæ duæ. VII. 25.
pens, alter silens. V. 22.	Fringuilla. II. 21.
Formica & Cicada. I. 2.	Fur deceptus. VIII. 21.
	Fures & Gallus. V. 14.

G.

GALLINA & Ova Serpentis. V. 10.	Gallus & Vultur. IX. 23.
Gallina Ova pariens aurea. II. 15.	Glires & Fagus. X. 1.
Gallina plumis spoliata. X. 31.	Graculus. VIII. 24.
Gallus, Asinus, & Leo. IV. 7.	Gruæ & Anseres. II. 8.
Gallus & Cochlea. IX. 11.	Gruis & Pavo. I. 12.
	Gutta, Pontus, & Ostreum.
	IX. 31.

H.

HARIOLUS sibi non providens. VII. 11.	Hædus & Lupus. III. 36.
Hirundo & Luscinus. VII. 9.	Homines duo & Thesaurus.
	VIII. 12.
	Homo & Ursus. X. 24.

I.

- I**CTERICUS. X. 32. | Jupiter, Modestia, & Virtutes ceteræ. III. 42.
 Imago picta sub camera. X. 23. | Jupiter & Rusticus. VII. 5.
 Invidus & Avarus. IV. 6. | Juvenci duo & Pratulum. IX. 36.
 Iris & Phœbus. X. 18. | Juvenes duo & Ursus. IV. 25.
 Jupiter, Apol. & Momus. VI. 5.

L.

- L**ACERTA & Testudo. I. 4. | Lepores & Ranæ. II. 2.
 Leana & Ovis. IV. 10. | Lepus & Testudo. V. 33.
 Leana apothœosis. VIII. 11. | Liber & Prelum. I. 29.
 Leo, Agnus, & Cerva. IV. 28. | Liliū. I. 1.
 Leo, Asinus, & Vulpis. IV. 4. | Lucius late regnandi cupidus. II. 35.
 Leo bellum parans. VI. 13. | Lupi fides. V. 36.
 Leo & Capra. II. 19. | Luporum legati ad Anglorum regem. VII. 3.
 Leo & Musculus. V. 30. | Lupus & Anicula. II. 16.
 Leo & Rana. II. 37. | Lupus & Hœdus. III. 8.
 Leo & Villicus. X. 43. | Lupus & Hystrix. II. 31.
 Leo Filium Rustici amans. III. 16. | Lupus & Mulus. V. 21.
 Leo fariosus & Lepus. VII. 7. | Lupus & Ovis. II. 14.
 Leo iratus. VIII. 19. | Lupus Filium erudiens. IV. 16.
 Leo, Lupus & Vulpis. I. 6. | Lupus ovilla pelle indutus & Pastor. I. 24.
 Leo senex & Vulpis. II. 20. | Lupus pœnitens. I. 15.
 Leo, Simius, & Vulpis. I. 27.
 Lepores, Canes, & Vulpes. VII. 6.

M.

- M**ALA aurea. I. 13. | Milvus & Agricola. II. 28.
 Malus exspoliata. I. 25. | Momi censura. VIII. 1.
 Melezia & Larix. VIII. 5. | Mors & Rusticus. II. 10. & 11.
 Membra & venter. III. 4. | Mula. II. 9.
 Mercurius & Sculptor. IX. 22. | Mulier & Gallina. III. 11.
 Milvi & Columbæ. VII. 17. | Mulus & Porcus. IX. 14.
 Milvus ægrotans. IV. 22. | Mures duo. I. 17.
 Milvus, Corvus, & Aquila. IV. 8. | Murium conventus. VI. 7.
 Mus & Talpa. X. 20.

Mus in cista natus. II. 27.	Musculus. III. 13.
Musarum Alumnus & Bombyx. VIII. 25.	Mustela, Cuniculus, & Felis. VII. 22.
Muscæ. III. 34.	Mustela & Columba. VIII. 17.
Musculus & Felis. IV. 5.	Mustela & Mures. IV. 18.
Musculus, Felis, & Gallus. X. 4.	Myrtus & Arbor magna. X. 29.

N.

NAVIS & Nauta. X. 8.	Noctua & Gallus. VI. 22.
Nitredula & Mustela. VI. 9.	Nux & Arbores infructuosæ. X. 36.

O.

OLITOR & Sepes. V. 39.	Os & oculi. X. 38.
Ollæ duæ. VII. 16.	Ostrea & Viatores duo. VI. 15.
Opilio & Oves. VII. 12.	Oves & Lupi. III. 9.
Orator ad Statuas. X. 15.	Ovis & Canis. X. 13.
	Ovis & Cornicula. II. 17.

P.

PAPILIO & Apis. VIII. 2.	Pica & Acanthis. VIII. 16.
Parasitus & Pisciculi. VIII. 9.	Pica & Columba. V. 23.
Pardus & Vulpis. IV. 23.	Pica & Columba. X. 20.
Pastor & Mære. IV. 3.	Piscator. X. 2.
Pastor & Molossus. VI. 14.	Piscator & Pisciculus. III. 3.
Pastor & Rex. IX. 5.	Piscator & Thunus. V. 12.
Perdices duæ & Auceps. X. 37.	Pisces. II. 41.
Perdix & Auceps. VIII. 8.	Piscis. IX. 2.
Perdix & Canis venaticus. VII. 1.	Piscis fluviatilis & Pisces marini. V. 27.
Philomela, Corvus & Bubo. VI. 18.	Porcus & Nautæ. IX. 35.
Philomela & Vespertilio. X. 28.	Porcus & Sturni. VIII. 15.
Pica, Cornicula, & Vulturius. VI. 24.	Pratum, Apis, & Vipera. X. 40.
	Psittacus. IX. 19.
	Puella & Nafas. VII. 18.
	Puella rustica & Lactis cymbium. VI. 12.

Puer & agricolæ. II. 6.	Puer & Passer fugitivus. IV. 2.
Puer & circumlitæ faccha- ro Nuces. X. 27.	Puer & Scamnum. VI. 6.
Puer & Coluber. II. 42.	Puer & Turbo. IV. 27.
Puer & Colonus. IV. 19.	Pueri duo. VI. 21.
Puer & Fortuna. III. 6.	Pueri & Ranæ. II. 40.
Puer & Pædagogus. VI. 11.	Pueruli Fratres. I. 7.

Q.

Q UERCUS & Arundo. VI. 10.	Quercus & Edera. VI. 26.
-----------------------------------	--------------------------

R.

R ANÆ duæ. II. 22.	Rubus & Ovis. IX. 16.
Ranæ & Junci. X. 5.	Rustici & Sarmenta. III. 26.
Ranunculus & Rana. VI. 8.	Rusticus & Asellus. IV. 13.
Rex & Ludi Magister. X. 3.	Rusticus & Canis. IX. 29.
Rosæ & Amarantus. II. 43.	Rusticus & Silva. II. 3.
Rosæ & Papilio. I. 8.	Rusticus & Sophus. IX. 6.

S.

S CULPTORES duo & Æso- pus. VI. 16.	Simius & Speculum. IX. 10.
Senex & Mors. VI. 23.	Sol & Aquilo. III. 1.
Serpens & ejus Filius. X. 9.	Sol & Noctua. V. 41.
Serpens & Talpa. IX. 12.	Sorex & Mus. X. 41.
Sidera & Sol. VIII. 18.	Struthiocamelus altum vo- landi cupidus. V. 35.
Simia & ejus Filius. IX. 25.	Superba anxietas, sive Mu- sca, Trochil. & Trostil. IV. 14.
Simia & Nux. V. 18.	Sus & Apes. IV. 3.
Simia, Porcus, & Vulpis. V. 29.	Sus & Leæna. IV. 1.
Simioli & Pyra. VIII. 7.	Sus opima. V. 19.
Simius & Hinnuleus. I. 11.	

T.

T ALPA & Olitor. VII. 15.	Tauri quatuor & Leo. II. 13.
----------------------------------	------------------------------

Taurus

Taurus & Caper. III. 22.	Tubicen & Hostes. III.
Testudo & Anat. duæ. VII.	37.
24.	Tulipa. II. 39.
Testudo & Aquila. II. 5.	Turdi. X. 16.

V.

VENATOR & Leo. III.	Vir sapiens & ejus Inimicus.
24.	IV. 1.
Venator, Palumbes, &	Urfa & Leæna. X. 42.
Cornix. V. 8.	Ursus & Vulpis. IX. 37.
Vespertilio & Mustelæ duæ.	Ursus & Uxor ejus. VI. 2.
III. 35.	Ursus, Leo, & Lupus. III.
Viator & Lapides. V. 2.	29.
Viator & Platanus. VII. 2.	Vulpis. IX. 15.
Viator, Tygris, & Corco-	Vulpis, Asinus, & Leo. IV.
dilus. X. 7.	21.
Viatores duo & Latro. IX.	Vulpis & Canis. I. 16.
21.	Vulpis & Caper. III. 10.
Villicus & Canis. VI. 1.	Vulpis & Cervus. V. 3.
Villicus & Columba. IX.	Vulpis & Ericius. III. 41.
17.	Vulpis & Ericius. V. 37.
Villicus, Felis, & Caseus.	Vulpis & Gallina. II. 4.
X. 22.	Vulpis & Lupus. IX. 20.
Villicus, Vulpis, & Canis.	Vulpis & Rubus. V. 11.
IX. 8.	Vulpis sine cauda. V. 26.
Vir eruditus & Trossulus.	Vulturius, Ostrea, & Vul-
II. 33.	pis. X. 25.



INDEX

JOCORUM & NARRATIUNCULARUM.

A.	F.
A CCEDENDUM ad Rempu- blicam, tanquam ad ignem. J. 17.	FOENERATOR Concionato- ris sacri studiosus. N. 5.
Æschines & Socrates. J. 9.	N.
Alexander & Apelles. J. 5.	Novus Orpheus. J. 13.
Antisthenes & Socrates. J. 1.	P.
Arbor felix. J. 1.	PARASITUS impransus. J. 15.
Avarus Scyllam inter & Charybdim deprehensus. Nar. 4.	Præceptor & Puer. J. 3.
C.	R.
CALVUS & Cæsaries factitia. J. 19.	RECENS Maritus & Sophus. J. 20.
Carbonarius ad principatum Civitatis evectus. J. 18.	S.
Cleantis monitum. J. 8.	SCIPIO Nasica, & Ennius Poeta. J. 2.
Cœna Iberiaca. J. 14.	Senex odor nivium. J. 6.
Cræsus & Solon. J. 10.	Sera post mortem ultio. J. 16.
Curiositas elusa. J. 4.	Socratis patientia. Nar. 2.
Cynicus & Rex. J. 11.	T.
D.	THALES & Ancilla. J. 21.
DOCTOR veterinarius. J. 22.	Titi humanitas. N. 1.
E.	V.
EMPTORIS fides. J. 12.	VANA nobilitas. N. 3.



888.6 A254D

432A

Fabularum Aesopiarum

888.6 A254D

432A

